

ओरकी बात नांही. पाछें हरिजीवनदासनें श्रीगोपेश्वरजीसों पूछी जो श्रीहरिरायजीके कोई पत्र आयेहैं ? तब श्रीगोपेश्वरजीनें कही जो आगेतो बहुत आवते सो गवाखामें धरेहैं अबदशपांचदिनते तो आवत नांही. तब हरिजीवनदासनें गवाखामेंतें पत्र ४१ निकारिकें श्रीगोपेश्वरजीके आगे धरे ओर विनति कीनी जो महाराज एकपत्र वांचियें तो सही, तब श्रीगोपेश्वरजीनें एकपत्र अपने श्रीहस्तकमलमें लियो सो भगवदिच्छातें प्रथमपत्र हस्तमें आयो. तब श्रीगोपेश्वरजीको उहपत्र वांचतेही सगरो दुःख दूर होयगयो. भगवद्भाव हृदयमें बढ्यो. तब श्रीगोपेश्वरजी उठिके हरिजीवनदास वैष्णवको अपने हृदयसों लगायके कहे जो तूं आयो तो हम यह श्रीहरिरायजीके पत्र वांचे ताकरि मेरो सगरो दुःख गयो. पाछें श्रीगोपेश्वरजी शिक्षापत्र ४१ हुते सो सब वांचे पाछें श्रीगोपेश्वरजीनें हरिजीवनदाससों कही जो यह शिक्षापत्रकी टीकामें करूं जो तू मेरेपास नित्य बैठे, तब हरिजीवनदासनें विनति करी जो महाराज या उपरांत ओर कहाहे ? मैं बैठंगो, परंतु आप स्नानकरि भोजन करियें सगरे सेवक वैष्णव दुःखीहैं तब श्रीगोपेश्वरजी प्रसन्न होयके स्नान किये पाछें आपु भोजन किये तब सगरो परिवार प्रसन्न भयो. सेवकवैष्णव सुख पायें. पाछें हरिजीवनदासको पास वेठाये श्रीगोपेश्वरजी, भावमें मग्न होय श्रीआचार्यजी, श्रीगुसांईजी, श्रीहरिरायजीका स्मरण करि नमस्कार करि शिक्षापत्रकी टीका करन लागे सो शिक्षापत्रके प्रारंभसों लिख्यो हे.

શેઠ નારણદાસ આસનમલ.



જન્મ — વર્ષ ૧૯૦૦ આવણ સુદી ૭

અવમાન — સ વર્ષ ૧૯૪૪ આવણ વદ ૫,
ઇ સ ૧૯૦૪ તા ૬ઠી મગધેશ્વર


॥ श्री: ॥

પરમ ભગવદીય નારાયણદાસ આસનમલનો પરિચય.

ચાલતા સમયને લઈ જુની પરાડી અનુસાર પરમ ભગવદીય નારાયણદાસનો તેમજ તેમના કુટુંબનો પરિચય કરાવવો તેમાં કંઈં છોડું નથી.

જો કે આ ગ્રંથ એવો છે કે જેમાં આત્મપ્રશંસા નજ હોવી જોઈએ, પરંતુ આ તો ભગવદીયનો પરિચય અને તે દ્વારા પ્રગટ થયેલા ગ્રંથનું મનન થાય તો નવ યુવાન મંદલને તેમાં જ સ્વર્ધર્મેને મુખ્ય વઠ્ઠી રહી ધીજો ધર્મ દુઃખદાયી જાણે તેમને આવા ભગવદીયના પરિચયથી વધુ લાભ થાય ને શ્રીગુરુપાથી ભગવાન પૂજા દયા લાવી સૌને આવો ગ્રંથ મનન કરતાં તેવાં કાર્યો કરવા ઉત્તેજિત કરે એ આશા છે.

માઈ નારાયણદાસનું કુટુંબ સિંધમાં કરાંચી પાસે ઠઠા (નગરઠઠાના નામે જે ઓઢાયા છે તે) માં રહેતું હતું. જાતે લોહાણા વૈષ્ણવ હતા. હાલ પણ તેઓ ગઢામલના કુટુંબના નામથી ઓઢાયા છે. ગઢામલ નારાયણદાસના દાદા થાય છે. વંશાવલી નીચે પ્રમાણે છે.



સગત શેઠ નારાયણદાસ આસનમલનું જીવનચરિત્ર લખતા અગાઉ તેમના વહીલોની કંઈક જીવન કથાનો અહીં ઉલ્લેખ કરવાની આવશ્યકતા જણાય છે. તેમના પિતા શ્રી સાદું જીવન ગુજારતા હતા. તેમના કુટુંબમાં તેમના દાદા શેઠ ગઢામલ તે શેઠ ના. આ. ના દાદા, મીરોને ત્યાં પ્રાઈમ-મીનસ્ટર હતા. સિંધમાં તેમણે મીરોને ત્યાં ઉચ્ચ પંક્તિની હકુમત તથા સાયમી મોગવી હતી. તેઓ સ્વાભિમાની અને અદમ ટેકીલા પુરુષ હતા. સિંધમાં મુસલમાનોનું જોર વધારે હતું તેમ છતાં પોતે સત્તાનો દરજ્જો મીરોને ત્યાં સારી રીતે ચલાવતા અને હિંદુઓનું સ્વમાન જઘવાઈ રહે તે વાત અત્યંત કાઢી રાખતા હતા; તેથી કંઈક અનુચિત પ્રસંગને લીધે તેમણે પોતાના હોદ્દાનું રાજી નામું આપ્યું હતું.

તેમના કુટુંબમાં તેમના કાકા આમુમલ ઉદાર હૃદયના હતા. જે દાન આપતા તે શુભ આપતા. તેઓ નગરશેઠ હતા. શેઠ આમુમલે દ્રવ્ય સંપાદન

કરવા માટે અરવસ્તાન તરફ પ્રયાણ કર્યું અને પોતાની કાર્યકુશલતાથી અરવસ્તાનમાંથી તેઓ સારું દ્રવ્ય પેદા કરી લાવ્યા, અને કહેવત છે કે, “ સર્વે ગુણાઃ કાંચન-માશ્રયંતે ” તે પ્રમાણે લોકોમાં તેમની જે અગાઠની પ્રતિમા હતી તેમાં વિશેષતા થઈ.

પોતે લોહાણા જ્ઞાતિના અને પરમ વૈષ્ણવજન હતા તેથી તેમનું કુટુંબ પણ તેજ નીતિ રીતિને અનુસરીને ચાલતું હતું. તેઓ ઠઠામાં કરાંચી નજીક રહેતા હતા. શેઠ આસુમલની વાચતમાં એક પ્રસંગ એવો વ્યવસ્થા કે જે તેમની યાદગીરી સદાને માટે કાયમ રાખે છે. ઠઠામાં મુસલમાનોની વસ્તી વધારે હોવાથી ઘણાં ધણાં પાણીનાં સાધનો તેમના કચડામાં હતાં તેથી હિંદુઓ પાસેથી તેઓ પાણીના એક ઘડા માટે રૂ. ૦-૦-૩ ત્રણ પાઈ લેવા લાગ્યા જે હિંદુઓને માટે એક ગ્રાસદાયક કર સમાન થઈ પડ્યું, તે ઉપરથી શેઠ આસુમલે ઠઠાના વિધાની કુટુંબના ભાઈ ફરસરામ પાસેથી જમીન લઈ તેમાં એક રાતમાં તઢાવ ચોદાવ્યું જે હાલ નાના વાગના નામે ઓઠાવાય છે.

તેમને એક વહેન મંગીવાઈ નામે છે જેઓ વાઠવિધવા થયેલ છે અને ત્યાર બાદ તેઓ માત્ર પ્રભુસેવા અને પ્રભુસ્મરણમાં જ પોતાનો સમય વ્યતીત કરતાં હાલ મથુરાં જિલ્લામાં શ્રી ગોકુલમાં રહે છે. તેમના ભાઈ શ્રીકમદાસ આસનમલ શિવેરાતના ધંધામાં વાહોશ હતા પરંતુ તેઓ ૪૨ વર્ષની યુવાન વયે શ્રી પ્રભુચરણમાં સિધાવ્યા. ત્યાર બાદ તેમના એક નાના ભાઈ વલ્લભદાસ પણ પોતાની ૨૪ વર્ષની ભર યુવાવસ્થામાં પોતાનો વતન તરફ સમુદ્રપ્રયાણ કરતાં આકસ્મિક વહાણ ચડવાથી સમુદ્રમાં ઢૂબી ગયા અને પ્રભુચરણમાં પહોંચ્યા.

શેઠ શ્રીકમદાસ પોતાની પાછલ તેમની એક વિધવાને મૂકી ગયા છે તે પણ પ્રભુસ્મરણમાં જ દિવસો નિર્ગમન કરે છે.

શેઠ નારાયણદાસ આસનમલ કે જેમણે પોતાની વાહોશીથી પુષ્કલ દ્રવ્ય સંપાદન કરી ઉદાર સલાવતો કરી છે તેમના જીવનચરિત્રનો હલ્લેસ કરવાની પણ ખાસ આવશ્યકતા છે.

શેઠ નારાયણદાસ પ્રથમ જ્યારે મુંબઈમાં આવ્યા ત્યારે રૂ. ૮) ના માદાની ઓરડીમાં ગોસ્વામી શ્રી ચીમનલાલજી મહારાજના મંદિરમાં રહેતા હતા. પરંતુ “ વરમેકો ગુણી પુત્રો ન ચ મૂર્સશતાન્યપિ ” એ કથન અનુસાર તેમણે શિવેરાતના ધંધામાં સારી પ્રતિષ્ઠા સંપાદન કરી. શિવેરાતની દલાલીમાં વધા તેજ ધંધામાં વિલાયતમાંથી તેમણે ઘણુંજ દ્રવ્ય એકઠું કર્યું. પોતે સાદાઈથી રહેતા અને કરકસર કરી દ્રવ્યને સન્માર્ગે જ વાપરતા હતા. તેઓ શ્રી શુદ્ધિમાર્ગ ધર્મના ખુસ્ત અનુયાયી હતા.

પોતાની લોહાણા જ્ઞાતિ તરફ તેમને અત્યંત મમતા હતી. તેથી અળીનાં ચણતે તેમણે ઘણીજ સારી મદદ કરી. સંવત્ ૧૯૬૪ ને ૭૦ ની સાલની નાણાસંબંધી હાડમારીના સમયમાં તેમણે મુલતાની ભાઈઓની સાગી સેવા વજાવી હતી.

ઠઠાની લોહાણા મુલતાની જ્ઞાતિમાં તેઓ જ્ઞાતિના એક આગેવાન પુરુષ હતા અને જ્ઞાતિમાં તેમજ નગરવાસી ઘીજા મુલતાનીઓમાં પણ તેમનું માન સારું હતું.

મુંવાઈમાં શ્વેરાતનો ધંધો તથા તે ધંધામાં દલાલી કરતા તેથી મોટા મોટા અમલદારો તથા આગેવાન પેઢીઓ તેમજ પરદેશી અને-યુરોપિયન વેપારીઓમાં પણ તેઓ સારી રીતે જાણીતા હતા. મુંવાઈના શ્વેરી માણેકચંદ પાનાચંદની પેઢી સાથે તેમને ઘણોજ નીકટનો વેપારસંબંધ હતો અને તેમની સાથે તેઓ પોતાના કુટુંબીઓની માફકજ વર્તતા હતા.

જ્ઞાનમંથુર દેહનો વિશ્વાસ ન રાખતાં પોતાની હયાતીમાંજ તેમણે સ્વહસ્તે ઉદાર સલાવતો જાહેર કરી હતી જે હાલ પણ તેમના ટ્રસ્ટ મુજબ ચાલે છે, તે પૈકીની (૧) સલાવત સંવત્ ૧૯૭૦ માં ઠઠા પાંજરાપોળને સારી રકમના શેરો આપીને કરી હતી. (૨) અને ઘીજી ગોશાલા ઉદ્ભવ કુંડમાં (મથુરાં જિલ્લામાં) खोली હતી જે હજુ ચાલુ છે. (૩) ઠઠામાં શેઠ ત્રીકમદાસ આસનમલ ધર્માદા આયુર્વેદિક ઔષધાલય. (૪) પુષ્ટિમાર્ગ ધર્મના પ્રચારાર્થે રૂપીઆ એક લાખની સલાવત કરી છે કે જેના વ્યાજમાંથી પુષ્ટિમાર્ગ ધર્મનો વહોલો ફેલાવો થાય. આ સંસ્થાને અંગે કરાંચીમાં એક પુસ્તકાલય સ્થાપિત કરવામાં આવ્યું છે અને પુષ્ટિમાર્ગ ધર્મનાં પુસ્તકો તથા અપ્રકટ સાહિત્ય પ્રકટ કરી તેને પ્રસિદ્ધિમાં લાવવાનો પ્રયાસ ટ્રસ્ટીઓ તરફથી ચાલુ છે. તેને અંગે પ્રથમ પુસ્તક શ્રી હરિરાયજીકૃત વહે શિક્ષાપત્રની નકલો લેવાસ થઈ જવાથી ફરીથી તે છાપવાનું કામ હાથ ધરવામાં આવ્યું છે. (૫) વ્રજ ભૂમિમાં કુંડો લોદાવવા તથા જીર્ણ થયેલા કુંડોનો જીર્ણોદ્ધાર કરવા માટે રૂપીઆ એક લાખની સલાવત કરી છે. અને (૬) રૂપીઆ એક લાખ નગર-ઠઠા સ્કૂલને માટે કાઢેલા છે. તેમજ (૭) તેમના ગૃહેવના શ્રી ઠાકોરજી માટે મંદિર બાંધી તેમાં શ્રી ઠાકોરજીને વિરાજમાન કરવા માટે રૂપીઆ એક લાખની સલાવત કરી છે. આ વધી તેમની સલાવતોનું તેઓ ટ્રસ્ટ કરી ગયા છે જે હાયકોર્ટથી મંજૂર કરાવી ટ્રસ્ટીઓ તે સંસ્થાઓ સારી રીતે ચલાવે છે. ઠાકોરજી માટે મંદિર બાંધવાની યોજના ચાલુ છે. તેમજ હાયસ્કૂલ નગરઠઠામાં ચાલુ કરવા માટેના પ્રયાસો પણ ચાલુ છે, દરમ્યાન તે સાતેથી વિદ્યાર્થીઓને સ્કોલરશીપો અપાય છે.

શેઠ નારાયણદાસનાં પત્ની તેમની હયાતીમાંજ ગુજરી ગયાં હતાં. તેમને કંઈ પણ સંતતિ ન હતી તો પણ તેમણે ફરીથી લગ્ન કરવાનો વિચાર માંડી વાળ્યો હતો.

પોતાના કનિષ્ઠ વંધુ ભાઈ જેઠાનંદ તરફ તેઓ વાત્સલ્ય પ્રેમ રાખતા અને તેમને ઘણું જાહેતા હતા.

શેઠ નારાયણદાસ સામાન્ય સ્થિતિ અને સાધારણ કેલવણીમાં ઉછેરેલા હતા તેમ છતાં તેમનામાં ધર્મભાવના અને નીતિ રીતિ અને વેપારી કુનેહ ઉચ્ચ પ્રકારનાં હતાં તેથી પુષ્કળ દ્રવ્ય સંપાદન કરી પોતાનું નામ અમર કરી તેઓથી પોતાની ૬૦ વર્ષની વયે સંવત્ ૧૯૮૪ ના શ્રાવણ વદ ૭ ને ગુસ્વાર રૂ. સ. ૧૯૨૮ ના સપ્ટેમ્બરની ૬ થી તારીખને રોજ શ્રીપ્રમુશરણમાં પહોંચ્યા.

તેમની પછી તેમના નાના ભાઈ શેઠ જેઠાનંદ આસનમલે વહીવટ પોતાના હાથમાં લીધો. વધાયે છેવટ મુખી અવિભક્ત કુટુંબમાં જ રહેતા હતા. ભાઈ જેઠાનંદના પ્રથમ લગ્નનાં પત્ની ગુજરી જવાથી તેમણે ઘીનું લગ્ન કર્યું હતું, પરંતુ પ્રમુની માયા અકલિત છે ! તેમને પણ કંઈ સંતતિ થઈ નહીં અને પોતાના વડીલ વંધુ નારાયણદાસના અવસાન પછી ઘણાજ ટુંક સમયમાં તેઓ સંવત્ ૧૯૮૫ ના પોષ વદ ૧૨ સને ૧૯૨૯ તા. ૬ થી ફેબ્રુવારીને રોજ તેમના સ્થૂલ શરીરનો ત્યાગ કર્યો અને તેમની પાછલ તેમની એક વિધવાને તેઓ મૂકી ગયા છે. તેઓ પોતાની હયાતીમાં જ પોતાની મીલકતનું કાચડેશીર ઘીલ કરી ગયા છે અને પોતાની મીલકતમાંથી અમુક સર્વેની રકમો અપાઈ ગયા પછી અવશેષ રહેલી તેમની વધી મીલકત ધર્માદા કરવાનું ઘીલમાં જાહેર કરી ગયા છે.

ઉપર જણાવેલ ઠઠાના લોહાળા ગંઢાળી કુટુંબના અવશેષો તરીકે હાલમાં ભાઈ શ્રીકમદાસનાં વિધવા મથુરાંવાઈ તથા ભાઈ જેઠાનંદ આસનમલનાં વિધવા-ગોમતીવાઈ છે જેઓ પોતાનો સમય શ્રી પ્રમુસેવામાં અને યાત્રાઓમાં નિર્ગમન કરે છે, અને ત્રીજાં શેઠ નારાયણદાસનાં વહેન મંગીરાઈ કે જેઓ ચાલવિધવા છે તેઓ પણ અહીં પ્રહર શ્રીઠાકોરજીની સેવામાં જ પોતાનો સમય વ્યતીત કરે છે.

આ શિક્ષાપત્ર શેઠ નારાયણદાસ તથા શેઠ જેઠાનંદ આસનમલના ટ્રસ્ટ ફંડ-માંથી ટ્રસ્ટીઓ છપાવ્યું છે તેથી ઉપરોક્ત શેઠીઆઓનો પરિચય અહીં આપવામાં આવ્યો છે.

માધિક ધેણવજનો શિક્ષાપત્રનો યથુ પ્રમાણમાં પાઠ કરે તે સારુ શિક્ષાપત્રનું મૂલ્ય ઘણું જ ઓછું રાખનામાં આવ્યું છે.



શ્રેષ્ઠ જોડાનંદ આસનમલ.



જન્મ - સ વત્ ૧૮૭૮ ના ફાગુન વદી ૧૧

અવસાન મ વત્ ૧૯૮૫ પોષ વદી ૧૭,
ઇ ૨૨ ૧૯૭૮ તા ફાગુઆરી

श्रीहरिरायविरचित । बडे शिक्षापत्र.

॥ श्रीकृष्णाय नमः । श्रीगोपीजनवल्लभाय नमः ॥

अथ श्रीहरिरायजीकृतानि शिक्षापत्राणि श्रीगोपेश्वरजीरचितया
ब्रजभाषाटीकया समेतानि श्रीनृसिंहलालजी महाराजाज्ञानु-
सारेण संशोधितानि ब्रजभाषाया मूलश्लोकटीकास्थ-
श्लोकानां शब्दार्थयुतानि प्रकाश्यन्ते ॥

मूलं-सदोद्विग्नमनाः कृष्णदर्शने क्लिष्टमानसः ।
लौकिकं वैदिकं चापि कार्यं कुर्वन्ननास्थया ॥१॥
निरुद्धवचनो वाक्यमावश्यकमुदाहरन् ।
मनसा भावयेन्नित्यं लीलाः सर्वाः क्रमागताः ॥२॥

शब्दार्थः-निरंतर (अहंताममतात्मक असदाग्रहर्तें) उद्वेगयुक्त
नाम निर्वेदयुक्त हे मन जाको ओर श्रीकृष्णके दर्शननिमित्त क्लिष्ट
(आर्तियुक्त) हे मन जाको, ओर लौकिक तथा वैदिक कार्यहूं फलाशा
छोडिकें करिवेवारो, वचनकुं नियममें राखिवेवारो, आवश्यक (जरूर
बोलवे विना कार्य चले नहि तितनो) वाक्यको उच्चार करिवेवारो
वैष्णव मनसों क्रमप्राप्त सर्व लीलाकी भावना करे ॥ २ ॥

टीका-जो लौकिक वैदिक कार्यके आवेश करी मनकों उद्वेग
करिकें तथा लौकिक वैदिक कार्यके क्लेशयुक्त श्रीकृष्णके दर्शनकों
जइए सो प्रभुतो आनंदरूप हे सो जीवको मुख क्लेशरूप देखिकें

उदासीन होय जाय तातें लौकिक (संसारके) कार्य सिद्ध न होय अथवा विगिरि जाय जासुं मनमें क्लेश नांहि करियें । लौकिक वैदिकों मनमें तुच्छ करिकें जानियें, ओर प्रभुकी सेवा संबंधि कार्य सिद्ध होय तब मनको प्रसन्न राखियें । जो कदापि सेवा न बने तो मनमें क्लेश राखिये यह पुष्टिमार्गकी रीति है । जेसैं सेवा ब्रजभक्त करते, श्रीठाकुरजी गोचारनको वनमें पधारते, तब वियोगमें वेणुगीत युगल-गीत गावते पाछें जब श्रीठाकुरजी ब्रजभक्तनको सुखदानार्थ ब्रजमें पधारते तब ब्रजभक्त आनंदसो दर्शन करते, तेसैंही पुष्टिमार्गमें सेवा-समय सेवा—दर्शन करियें ओर अनोसरमें श्रीठाकुरजीसंबंधी क्लेश (वियोगार्ति) करियें. श्रीकृष्णके मुखारविंदको ध्यान करियें । जब सेवाको समय होय तब आतुरतासों श्रीकृष्ण फलात्मक पुरुषोत्तमके दर्शन करियें । पाछें लौकिक कार्य वैदिक कार्य गृहस्थाश्रमको धर्महे तातें लौकिक अयकीर्तिके निवृत्त्यर्थ तथा वैदिक मर्यादाके लिये अवश्य करियें । परंतु लौकिकवैदिकमें मन आसक्त न राखियें । मन एक श्रीकृष्णहींमें राखियें । तातें मनमें क्लेश राखिके दर्शन न करियें प्रसन्नतासों दर्शन करियें । सूतकमें मंदिरकी सेवा न होय सके तो भाव करि मानसी सेवा होय यह मर्यादा है क्यों जो मंदिरमें छुड़ जाय ॥ १ ॥ अपनैं वचनको निरोध करना, बोहोत बोलनों नांही आवश्यक कार्यार्थ होय सोइ बोलनों । मुख्य सिद्धांत तो यह है जो भगवत्संबंध विना सर्वथाही न बोलनों परंतु लौकिक वैदिक कार्यार्थ गृहस्थाश्रममें बोले बिना काम न चले तासों आवश्यक होय सोइ बोलनों सो काहेतें जो वाणीको निग्रह होय तो मुखरता दोष न होय ओर बोहोत बोले तो भगवद्भावहृदयमें स्थिर न रहे वाणीद्वारा बाहिर निकसि जाय एसी भगवद्धर्मकी सूक्ष्मगति है तातें सब वाणीके निरोधसों सिद्ध होय । मनको यह धर्म है जो अनेक ठिकानें भटक-

तहे सो मनमें विचारिकें श्रीठाकुरजीकी अपार लीला अनेक प्रकार-
की हे तामें क्रमसहित मन लगाय दीजियें, काहेतें जो मनको गमन
पवनहूतें अधिक हे तातें मनको कोटिउपायसों रोकियें परंतु रोके
मन रहत नांही तातें श्रीठाकुरजीकी लीलामें लगाइयें । जन्माष्टमी,
अन्नकूट, होरी, हिंडोरा आदि वर्षदिनके उत्सव तिनकी अनेक लीला
भावकरिकें पुष्टिमार्गकी रीतिसों मन लगायकें भावना करे । तथा नित्य-
लीला प्रातः कालतें श्रीठाकुरजी श्रीनंदरायजीके घरमें जागतहे कुंजमें
श्रीस्वामिनीजीके यहांहु जागतहे तथा खंडिता, मंगलाभोग, मंगला-
आर्ति, सिंगार (शृंगार), ग्वाल, पालनां (पर्यंक), राजभोग, उत्था-
पन, भोग, संध्या, शयन पर्यंत ऋतु अनुसार तथा शयन पीछेहु शुद्ध
मनकरिके रासलीला, मानलीला, जलस्थलविहार इत्यादिक मनसों
भावना करियें तथा श्रीआचार्यजीके कुल श्रीगुसांइजीके स्वरू-
पको विचार श्रीठाकुरजीको प्राकट्य कौन अर्थ ? लीला
सामग्री वागावस्त्रको भाव कहा हे ? यह मनमें विचारि विचारि
भावना करियें । क्रमसहित लीलाको विचार करियें ताकरि
भगवदावेश होय । अष्ट प्रहर लीलाको स्मरण मनमें राखनों ।
भावनाके दोय प्रकार हे एक उत्तम ओर एक मध्यम । उत्तम प्रकार
यह जो प्रथम स्नान करि शुद्ध होय भाव सहित गुरुके पास जाय
प्रथम गुरुकी सेवाकरिकें पाछें गुरुके संग मंदिरमें जाय तहां गुरु जो
आज्ञा देय सो तथा विनति करि सेवा करियें आपु चलिक्कें जाय
सेवा करेतो प्रभुको श्रम न होय, ओर आनंदात्मक प्रभु बेगिही प्रसन्न
होय यह उत्तम प्रकार जाननों । ओर मध्यम यह जो अपने हृदयमें
प्रभुको पधरावे सो प्रभु तो दयालु हे परंतु प्रभुको श्रम होय सो
पुष्टिकी रीति नांही । या क्रमसों सेवा करे ॥ २ ॥

मूल-सेवाऽपि कायिकी कार्या निरुद्धेनैव चेतसा ।
 दैहिकं कर्म निखिलं प्रभुसेवोपयोगिनाम् ॥३॥
 यथोपकरणादीनां रक्षा तद्वद्विधीयताम् ।
 भार्यादिष्वनुरागोऽपि सेवाहेतुक एव हि ॥४॥

शब्दार्थः—कायिकी सेवाहू निरोधयुक्त चित्तसोंहि करनी । ओर प्रभुसेवामें उपयोगी जो पदार्थ हे ताकी जेसैं रक्षा होय तेसैं समग्र दैहिक कर्म करें । ओर भार्या पुत्रादिकविषे जो स्नेह सोहू सेवानिमित्त राखनों जो सेवामें अनुकूल आवे ॥ ४ ॥ टीका—सेवा श्रीठाकुरजीकी अपने देहसों करनी ओर काहुसों न करावनी । जो कदाचित् अपने शरीरसों सब सेवा न होय आवे, अपने श्रीठाकुरजीकों श्रम होत होय, तो सहायके लीये ओरसंहं करावनी । पुष्टिमार्गीय वैष्णव होय तथा अपने कुटुंबमें समर्पनी मर्यादी होय तातें करावनी । अवैष्णवसों सेवा सर्वथा न करावनी । ओर जहांलों जितनी सेवा अपने देहसों वनें तहांलों ओरसं न करावनी । आलस्यकरिके लौकिकावेश न करनों । अपनी कायासों श्रीठाकुरजीकी सेवा करेतो शरीर इंद्रिय मन सब श्रीठाकुरजीके सन्मुख होय, भगवत्संबंधतें बहिर्मुख न होय । तातें अवश्य अपने शरीरसों नियमसहित भगवत्सेवा करनी । यह नियम राखनों जो इतनी सेवाकरिकें लौकिक वैदिक कार्य खानपान करनों । जा भांति जेसी प्रीतिसों खानपानको नियम हे तेसी प्रीतिसों सेवा जो वैष्णवको मुख्य धर्म हे सो नियम करिकें करनी यह दासको धर्म हे, जो में सेवा विना केसैं रहूं या प्रकार मनमें विचारिके ज्ञानकरि मनकुं समझावनो, ओर लौकिक वैदिक अनेक ठोर मन भटकत हे तहांते मनकों निरोध करिकें सेवा करे । प्रथम तो मनको निरोध राखे. जो मन लौकिक वैदिकमें जाय तो भगवत्सेवामें उद्वेग

होय तब सेवामें श्रद्धा घटि जाय तातें मनको निरोध करनाँ । सेवा-संवंधि कार्य विना बोलनाँ नांही । लौकिक वानी कहे तो मुखरता दोष होय, सेवामें भगवद्भावरूपी रसको तिरोधान होय तातें मिथ्या वाणीको निरोध करे । तेसेही मिथ्या क्रियाको निरोध करनाँ । भगवत्सेवाके समय लौकिक वैदिक कार्य कछू आय परे सो सर्वथा न करनाँ । जो सेवासंवंधि कार्य छोडिकें वैष्णव ओर कार्य करे तो वह कार्यहू सिद्ध न होय लौकिकावेश होय । या प्रकार मन वाणी क्रिया ये तीन्याँनको लौकिक वैदिकतें निरोध करि भगवत्सेवा करे । ओर दैहिक लौकिक वैदिक कर्म बहोत हे सो यह संसारमें रहिके न करे तो संसारमें अपकीर्ति होय सेवामें प्रतिबंध होय तातें लौकिक वैदिक कार्यहू लोकनके दिखायवेके लीये करे श्रीठाकुरजीकी सेवासों पहुँचिकें अनोसरमें आसक्ति विना करे । या प्रकार प्रभुके अंगीकार योग्य वस्त्र सामग्री करे ॥ ३ ॥ पाकादिक सामग्रीकी रक्षार्थ ओर श्रीठाकुरजीकी सेवार्थ सब कार्य करे । या प्रकार वैष्णव सेवा करे तो प्रभु अनुभव करावे । जो भार्या (स्त्री) भगवत्सेवामें सहाय होय तो सेवा भली भाँतिसों होय । या भाँति भगवत्सेवार्थ भार्या जो स्त्री ताहुमें अनुराग (स्नेह) राखनाँ । अपने विषयादिकके अर्थ अनुराग सर्वथा न करे । तामें दृष्टांत कहतहे । महादेवजीकी स्त्री सती हती सो वानें महादेवजीको कह्यो न मान्यो ओर श्रीरामचंद्रजीकी परीक्षा लेयवेकुं श्रीजानकीजीको स्वरूप धन्यो सो वार्त्ता महादेवजीनें जानि सो महादेवजी तो भगवद्भक्त हे तातें वाही समय सतीको त्याग कीयो पाछें सती दक्ष प्रजापति (अपने पिता) के यज्ञमें अपनो देह भस्म करि हिमाचलके गृहमें प्रकटभई । तहां अनेक तपस्या कीनी तोहू महादेवजीको मन सतीपर प्रसन्न न भयो तब श्रीठाकुरजीनें

मूल-सेवाऽपि कायिकी कार्या निरुद्धेनैव चेतसा ।
 दैहिकं कर्म निखिलं प्रभुसेवोपयोगिनाम् ॥३॥
 यथोपकरणादीनां रक्षा तद्वद्विधीयताम् ।
 भार्यादिष्वनुरागोऽपि सेवाहेतुक एव हि ॥४॥

शब्दार्थः—कायिकी सेवाहू निरोधयुक्त चित्तसोंहि करनी । ओर प्रभुसेवामें उपयोगी जो पदार्थ हे ताकी जेसैं रक्षा होय तेसैं समग्र दैहिक कर्म करने । ओर भार्या पुत्रादिकविषे जो स्नेह सोहू सेवानिमित्त राखनों जो सेवामें अनुकूल आवे ॥ ४ ॥ टीका—सेवा श्रीठाकुरजीकी अपने देहसों करनी ओर काहुसों न करावनी । जो कदाचित् अपने शरीरसों सब सेवा न होय आवे, अपने श्रीठाकुरजीकों श्रम होत होय, तो सहायके लीये ओरसंहू करावनी । पुष्टिमार्गीय वैष्णव होय तथा अपने कुटुंबमें समर्पनी मर्यादी होय तातें करावनी । अवैष्णवसों सेवा सर्वथा न करावनी । ओर जहांलों जितनी सेवा अपने देहसों बनें तहांलों ओरसूं न करावनी । आलस्यकरिके लौकिकावेश न करनों । अपनी कायासों श्रीठाकुरजीकी सेवा करेतो शरीर इंद्रिय मन सब श्रीठाकुरजीके सन्मुख होय, भगवत्संबंधतें बहिर्मुख न होय । तातें अवश्य अपने शरीरसों नियमसहित भगवत्सेवा करनी । यह नियम राखनों जो इतनी सेवाकरिकें लौकिक वैदिक कार्य खानपान करनों । जा भांति जेसी प्रीतिसों खानपानको नियम हे तेसी प्रीतिसों सेवा जो वैष्णवको मुख्य धर्म हे सो नियम करिकें करनी यह दासको धर्म हे, जो में सेवा विना केसैं रहूं या प्रकार मनमें विचारिकें ज्ञानकरि मनकुं समझावनो, ओर लौकिक वैदिक अनेक ठोर मन भटकत हे तहांते मनकों निरोध करिकें सेवा करे । प्रथम तो मनको निरोध राखे. जो मन लौकिक वैदिकमें जाय तो भगवत्सेवामें उद्वेग

होय तब सेवामें श्रद्धा घटि जाय तातें मनको निरोध करनाँ । सेवा-संवंधि कार्य विना बोलनों नांही । लौकिक बानी कहे तो मुखरता दोष होय, सेवामें भगवद्भावरूपी रसको तिरोधान होय तातें मिथ्या वाणीकों निरोध करे । तेसैंही मिथ्या क्रियाकों निरोध करनाँ । भगवत्सेवाके समय लौकिक वैदिक कार्य कछू आय परे सो सर्वथा न करनाँ । जो सेवासंवंधि कार्य छोडिकें वैष्णव ओर कार्य करे तो वह कार्यहू सिद्ध न होय लौकिकावेश होय । या प्रकार मन वाणी क्रिया ये तीन्योंनकों लौकिक वैदिकतें निरोध करि भगवत्सेवा करे । ओर दैहिक लौकिक वैदिक कर्म बहोत हे सो यह संसारमें रहिके न करे तो संसारमें अपकीर्ति होय सेवामें प्रतिबंध होय तातें लौकिक वैदिक कार्यहू लोकनके दिखायवेके लीये करे श्रीठाकुरजीकी सेवासों पहुँचिकें अनोसरमें आसक्ति विना करे । या प्रकार प्रभुके अंगीकार योग्य वस्त्र सामग्री करे ॥ ३ ॥ पाकादिक सामग्रीकी रक्षार्थ ओर श्रीठाकुरजीकी सेवार्थ सब कार्य करे । या प्रकार वैष्णव सेवा करे तो प्रभु अनुभव करावे । जो भार्या (स्त्री) भगवत्सेवामें सहाय होय तो सेवा भली भाँतिसों होय । या भाँति भगवत्सेवार्थ भार्या जो स्त्री ताहुमें अनुराग (स्नेह) राखनों । अपने विषयादिकके अर्थ अनुराग सर्वथा न करे । तामें दृष्टांत कहतहे । महादेवजीकी स्त्री सती होती सो वानें महादेवजीको कह्यो न मान्यो ओर श्रीरामचंद्रजीकी परीक्षा लेयवेकूं श्रीजानकीजीको स्वरूप धन्यो सो वार्त्ता महादेवजीनिं जानि सो महादेवजी तो भगवद्भक्त हे तातें वाही समय सतीको त्याग कीयो पाछें सती दक्ष प्रजापति (अपने पिता) के यज्ञमें अपनो देह भस्म करि हिमाचलके गृहमें प्रकटभई । तहां अनेक तपस्या कीनी तोहू महादेवजीको मन सतीपर प्रसन्न न भयो तब श्रीठाकुरजीनिं

महादेवजीसों कह्यो जो तुम अब मेरो इतनो कह्यो करो पार्वतीकों अंगीकार करो तब महादेवजी पार्वतीकों व्याहिकें अपने घर लेआये तब पार्वतीनें भगवल्लीला महादेवजीसों पूछी तब प्रसन्न भये । तार्ते वैष्णव होयकें लौकिक विषयके अर्थ स्त्रीपर प्रसन्न होय नहीं. भगवत्सेवार्थ अनुराग करे । जा प्रकार भगवत्सेवा भली भांतिसो होय सोई करनों या भांति सेवा होय तो लौकिकहू करियें ॥ ४ ॥

मूलं-प्रातिकूल्ये यथा त्यागः प्रभुसंबंधिवस्तुनः ।

धनेषु निस्पृहः सेवोपयोगित्वेन रक्षणम् ॥ ५ ॥

शब्दार्थः—जेसें श्रीठाकुरजीके विनियोगमें नहीं आवे एसी वस्तु-को त्याग करनो तेसें भार्यादिक जो सेवामें प्रतिकूल होय तो वाकोहू त्याग करनो । धनमें इच्छा नहि राखनी परंतु (धन होय तो सेवा भली भांतिसों होय तासुं) सेवोपयोगिपनेतें धनको रक्षण करनो ॥ ५ ॥ टीका—जो स्त्री प्रतिकूल होय भगवत्सेवामें प्रतिबंध करे तो वह स्त्रीको त्याग करियें वामें अनुराग न करियें काहेतें जो प्रभुसंबंधी न होय ताको त्यागही उचितहे । जो प्रभुसंबंधी स्त्री न होय तो भगवदभावमें वाको मन लगाइयें । पुष्टिमार्गमें श्रीआचार्यकुलद्वारा नामनिवेदन होय मर्यादी होय तो श्रीठाकुरजीको स्पर्श कराइयें । सेवक होय मर्यादी न होय तो उपरकी सेवा कराइयें । प्रतिबंध करे तो शीघ्रही वाको त्याग करियें । ओर धनमें आसक्ति न राखे निःस्पृह होयकें रहे धनकी रक्षा करे नांही यह उत्तमोत्तम कहे । ओर यह कलिकाल हे या कालमें जीवकों धीरज तत्काल छुटिजात हे जो धनकी रक्षा न करे तो धन सब उठि जाय पाछे जीवको धीरज न रहे तब धनके लीये वोहोत दुःख पावे सो न करे । धनकी रक्षा अपने सुखके अर्थ न करे यह जाने जो यह

धन प्रभुको हे सो प्रभुकी सेवाके अर्थ रक्षा करे जो हृदयमें पूर्ण वैराग्य होय तो धनकी रक्षा न करे जो वैराग्य दृढ न होय तो भगवत्सेवार्थ जानि रक्षा करे ओर भगवदुत्सवादिकमें यह धनको लगावे। जो भगवदर्थ धन न लगावे ओर लौकिकमें लगावे तथा धनमें मनको आसक्त करिके भगवदुत्सवमें गुरुके वहां बलभकुलमें वैष्णवनमें न लगावे तो आसुरावेश होय ताते मन करिके आसक्ति रहित होयके धनकी रक्षा करि भगवत्सेवा गुरुसेवामें विनियोग करे। या भांति विवेकसों वैष्णव रहे तो भगवद्भाव हृदयमें बढे ॥ ५ ॥

मूलं-विवाहादिषु कार्येषु बध्वाः सेवार्थमानसः ।

भगवत्संगिसंगोऽपि स्वप्राणप्रेष्ठवार्त्तया ॥ ६ ॥

शब्दार्थः—स्त्रीके विवाहादिक कार्यमें प्रभुकी सेवाके अर्थ चित्त रहे ओर अपने प्राणप्रिय जो ठाकुरजी बिनकी वार्त्ता [भगवत्कथा] के निमित्त भगवद्भक्तको संग करनों ॥ ६ ॥ टीका—उपर कहे जो धनको लौकिकमें न खरचे सो विवाहादिक कार्यमें धन खरचे बिना कैसे चले ? तहां कहतहे जो अपनो विवाह तथा पुत्रादिकको विवाह होय तो सेवाको विचार करिये जो भगवत्सेवामें मनुष्य होय तो सेवा भली भांतिसों होय यह विचारिके जितनों द्रव्य विवाहादिक कार्यमें अवश्य लगावनों होय सो श्रीठाकुरजीकी आज्ञा लेयके वह द्रव्य खरचे या भांति प्रभुकी आज्ञा मांगिके दासभावसों लौकिक कार्य करे। ओर भगवदीयको संग करियें सो कलु लौकिक वैदिक की चाहना [स्वार्थ] के लिये न करियें केवल अपने प्राणप्रेष्ठ जो श्रीठाकुरजी तिनकी वार्त्ताकरणार्थ भगवदीयको संग अवश्य करनों निरपेक्षभावसों करनों अपनी बडाइके अर्थ भगवद्धर्म कलु न करनो दैन्ययुक्त होय अपनो धर्म जानि करनों ॥ ६ ॥

मूलं—वियोगानुभवं कुर्वन् सेवाऽनवसरे पुनः ।

मूर्तो भगवतो दृष्टिर्भाव्या तत्तस्य दर्शनम् ॥७॥

शब्दार्थः—सेवाके अनवसरमें (अनौसरमें) वियोगानुभवं करि-
कें निर्वाह करे (ब्रजभक्त वेणुगीत युगलगीतसों विप्रयोगको अनुभ-
व करते तेसैं करें) ओर श्रीठाकुरजीके स्वरूपमें यह साक्षात् श्रीकृष्ण-
चंद्र हे एसी भावना करे तब वाकुं साक्षात् श्रीपूर्णपुरुषोत्तमके दर्शन
होय (जब तौंइ सानुभाव न होय तब तौंइ जेसी साक्षात् श्रीकृष्णकी
सन्निधिमें भाव ओर मर्यादा राखे तेसी भगवत्स्वरूपकी सन्निधिमेंहुं रा-
खे) ॥ ७ ॥ टीका—भगवत्सन्मुखसेवामें संयोगात्मक लीलारसको
अनुभव करियें। सो सामग्री तथा वस्त्रादिक धरियें ताको भाव विचारियें
जब सेवासों पोहोचि अनौसर करियें तब वियोगानुभव करियें। जेसैं
ब्रजभक्त वेणुगीत युगलगीतमें कीयेहे। वाहीभांति विचारियें जो अब
प्रभु कोनसी कुंजमें पधारे होयँगे कहा लीला भक्तनके संग
करत होयँगे ताको स्मरण करत विकल होय जो में बडो दुष्टहों
जो प्रभुको दर्शन नार्हीं होतहे। तब यह श्लोक श्रीगुसाँइजीको
हे ताको भाव विचारनो। श्लोकः—चित्तेन दुष्टो वचसाऽपि दुष्टः कायेन
दुष्टः क्रियया च दुष्टः। ज्ञानेन दुष्टो भजनेन दुष्टो ममापराधः कतिधा
विचार्यः ॥ शब्दार्थः ॥ मे चित्ततें दुष्ट वचनतें दुष्ट कायतें दुष्ट
क्रियातें दुष्ट ज्ञानतें दुष्ट भजनतें दुष्ट एसैं सवरीतसों दुष्टहों एकहुं
शुद्ध नहीहे तासुं मेरो अपराध कितने प्रकारको विचारनो। या भांति
मनमें दीनता करि वियोगानुभव करिये। जब सेवाको समय
होय तब वेगिही स्नान करि वेगि अपरसमे पुष्टिमार्गकी रीतिसो
मंदिरमे जायकें ठाकुरजीके रसात्मक श्रीमुख श्रीअंगके आनंदमय
दर्शन करि सकल विरहकों दूर करियें भावसहित दर्शन करियें। जेसैं

ब्रजभक्त श्रीनंदरायजीके घर आयकें श्रीठाकुरजीको दर्शन करतहे ता भावको स्मरण करियें तो ब्रजभक्तनकी कृपातें याहूको भावदान होय७

मूलं-स्पर्शस्तत्रैव भावेन सर्वास्तत्रैव तत्क्रियाः ।

भावात्मनो ह्यनुभवः सर्वो भावेन नान्यथा॥८॥

शब्दार्थः—भगवत्स्वरूपमें भावही तें स्पर्श करे तेसेही सब देह-संवांधि क्रिया बाहीमें करे क्यों जो भावात्माको सर्व अनुभव भावतें होय अन्यथा न होय ॥ ८ ॥ टीका—उपर दर्शनको प्रकार कहे तामे नेत्रइंद्रियको सुख भयो । पाछें स्नान करी सेवामें सर्वेन्द्रियको विनियोग होतहे । प्रथम मंगलाते पोहोचि पाछे श्रीठाकुरजीको स्नान करावे । अंगवस्त्रकरि ऋतु अनुसार वागा वस्त्र धरावे । या भांति सेवामें भगवत्स्वरूपको स्पर्श भावसों करे । जो हृदय शुद्ध होय तो ब्रजभक्तनकी भावना करे यह भाव विचारे जो अपने घरतें ब्रजभक्त वस्त्र आभूषण खिलोनां लेयकें श्रीनंदरायजीके घर प्रातः-काल आय सेवा करत हे स्नान करावत हे शृंगारादिक करत हे जो शुद्ध हृदय न भयो होय तहां ताँड़ राजा जेसो भय मनमें राखे जो प्रभु ईश्वरके ईश्वर हे अयराध पडेगो तो दंड देयेंगे या भांति भयसं-युक्त अंगस्पर्श करियें । जो शीतकाल होय तो अपनो हाथ सेकिकें श्रीअंग महा कोमल हे एसें विचारिकें स्पर्श करे तो भाव हृदयमें प्रकट होय । या भांति मंगलातें शयनपर्यंत शरीरकी सगरी क्रिया भाव-सहित करे । जितनी वस्तु सेवामें होय सो सबनको भावसहित स्वरू-पात्मक जानिकें सेवा करियें भाव विना अन्यथा न करियें । सर्वात्मभा-वसों श्रीठाकुरजीकी सेवा करे तो स्वरूपानंदको अनुभव होय ॥८॥

मूलं-हृदयस्यात्यशुद्धत्वान्न तत्रावेशसंभवः ।

स्वमूर्त्तावतिशुद्धायामाविश्यानुभवं हरिः॥९॥

यावत्साधनसंपत्तिः कारयत्यखिलान्निजान् ।

शुद्धं विधाय हृदयं पश्चात्तत्राविशोत्स्वयम् ॥ १० ॥

शब्दार्थः—हृदयको अति अशुद्धपनोहे तासुं वामें प्रभुके आवेशको संभव नहींहे जितनी साधनसंपत्ति होय तितनो श्रीप्रभु अपनी मूर्ति अतिशुद्धहे वामें सगरे अपने भक्तनकुं अनुभव करावेहें. पाछें (भक्तको) हृदय शुद्ध करि वामें आप प्रवेश करेहें । यह दोय श्लोकमें “ यावत्साधनसंपत्तिः कारयत्यखिलां निजान् ” इतनो पाठभेद पुस्तकांतरमें हे । अब पाठान्तरानुसार शब्दार्थः— हृदयको अति अशुद्धपनो हे तासुं वामें प्रभुके आवेशको संभव नहीं हे । जब तौइ निजजनको सगरी साधनसंपत्ति प्रभु सिद्ध करावें हैं तब तौइ अति शुद्ध अपनी मूर्तिमें प्रवेश करि अनुभव करावें हैं ओर साधनसंपत्तिसों (भक्तनको) हृदय शुद्ध करि पीछे वामें आप (प्रभु) प्रवेश करतहे ॥ १० ॥ टीका—भगवत्सेवामें अपने हृदयको इंद्रियको अति शुद्ध राखे लौकिकावेश विषयकी भावना न करे । लौकिक देहसंबंधिके सुखदुःख मनमें न राखे । लौकिक वैदिक सुख दुःख हे सो यह देहसंबंधी हे ओर भगवत्सेवासंबंधी सुख दुःख हे सो आत्मसंबंधी जन्मजन्मको हे । ओर श्रीठाकुरजीको स्वरूप अति शुद्ध हे तातें लौकिकमायाके गुण प्रभुके विषे कछु न विचारे । प्रभुको श्रीअंग करपादमुखोदरादि सर्व आनंदरूप हे, ओर शुद्ध मन करि अनुभव करिवे योग्य हे, काम क्रोध मद लोभ मत्सर ताकरिके रहितहे, ओर सर्व दुःखके हर्ता हे, परमानंदके दाता हे, एसें श्रीठाकुरजीको अलौकिक गुणसंयुक्त मनमें भावना करि, सर्वठोरतें अपने मनको खेंचिकें, एक श्रीठाकुरजीके चरणारविंदमें मन लगाय भगवत्सेवा भावसहित करे तो प्रभु अपनो अनुभव करावे ॥ १० ॥ यह संसारमें आसुरी पदार्थ हे

ओर दैवी पदार्थ हे तामें दैवीमें दोय प्रकार हे एक मर्यादा ओर एक पुष्टि, तिनमें आसुरी ओर दैवीके दोय भेद मिलि तीन्योको भेद न्यारे न्यारे कहतहे सो भेद हृदयमें राखे तो अज्ञान करि दुःख सुख न पावे । भगवत्सेवामें साधनसंपत्तिरूप पुष्टिपदार्थ निरूपण करेहे । प्रथम अपनो देह जो भगवत्सेवामें लग्यो रहे तो दैवी जानियें । जो भगवत्सेवामें आलस्य होय कदाचित् कोई वैष्णवके संगतें सेवा करे ओर रोगादिक बाध करे तब जानियें जो आसुरी देह हे । ओर दैवी मन होय तो सेवा करतमें प्रभुके स्वरूपको अनुभव होय । ओर आसुरी मन होय तो सेवा करतमें अनेक लौकिकमें भटके ताकों स्वरूपानंदको अनुभव न होय । ओर देहसंवंधी स्त्रीपुत्रादिक कुटुंब भगवत्सेवामें सहाय होय तो दैवी जानियें । जो भगवत्सेवामें विरोध करे तो आसुरी जानियें । जो कर्ममार्गमें रुचि होय तो मर्यादा जानियें । याही प्रकार द्रव्य जो भगवत्सेवामें विनियोग होय तो दैवी जानियें । जो कर्ममार्ग दान होम श्राद्धादिकमें उठे सो मर्यादा जानियें । जो लौकिकमें जाय चोरी होय दंड होय सो आसुरी जानियें । तातें जो पदार्थ भगवत्सेवामें विनियोग होय तिन सबनकों शुद्ध जानियें जो भगवत्सेवामें विनियोग न होय ताकों अशुद्ध जानियें । या भांति जो प्रभुकी सेवा संवंधी शुद्ध पदार्थ हे तिनकों हृदयमें धारण करे जो मेरे कामके येहीहे । तब स्वयं भगवान् शुद्धहृदयमें प्रवेश करि स्वरूपानंदको अनुभव करावे तातें सेवासंवंधी न होय ऐसे पदार्थको त्याग करियें । भगवत्संवंधी पदार्थ सामग्री वस्त्रादिकको भाव हृदयमें राखिकें भगवत्सेवा करियें ॥ १० ॥

मूलं-दत्त्वा दैन्येन संतुष्टो नित्यं देहमलौकिकम् ।

स्वयं प्रविश्य भावात्माऽनुभवं कारयेत्स्वकम् ११

शब्दार्थः—दैन्यतें प्रसन्न भये प्रभु नित्य अलौकिक (सेवोपयोगी) देह देयकें भावात्मक आप वामें प्रवेश करिकें आपको अनुभव करावे ॥ ११ ॥ टीका—उपर कहे ता प्रकार सेवा करे ओर दैन्य मनमें न होय तो श्रीठाकुरजी संतुष्ट न होय तातें दीनता करि सेवा करी श्रीठाकुरजीको प्रसन्न करियें तब श्रीठाकुरजी प्रसन्न होय । काहेतें जो भगवान् पङ्गुणपूर्ण ईश्वरके ईश्वर हे । काहु वस्तुकी अपेक्षा नाहि राखतहे । एक प्रीति दीनता ही प्रसन्न करिवेको उपाय हे । सो भगवदीय गायेंहे “ प्रीतम प्रीतहीतें पाइये । यद्यपि रूप गुण शील सुधरता इन बातन न रिझैयें । १। सत्कुल जन्म कर्म शुभ लक्षण वेद पुराण पढैयें । गोविंदप्रभु विनस्नेहसुं वालो रसना कहा नचैयें ” । २ । तातें भक्त दीनता करि जो कछु प्रीतिसों समपें सो प्रभु अंगीकार करे । जेसैं पद्मनाभदासनें छोला समपें सो प्रभु अंगीकार कीये । जब अत्यंत दैन्य करि प्रभु संतुष्ट होय तब जीव पर कृपा करे, तब अलौकिक देह जो नित्य सेवायोग्यहे, ताकी सिद्धि करि आप हृदयमें पधारे । भावात्मक प्रभु तब अपने स्वरूपको अनुभव करावे । तब सगरो जगत् लीलामय दीसे काहु प्राणिमात्रमें इर्ष्या न होय तब पुष्टिमार्गीय फल सिद्ध होय ॥ ११ ॥

मूलं—एवंविधं फलं नित्यं चिंतयन् चेतसा सदा ।

कुर्यादत्यादरं कृष्णसेवायामेव सर्वथा ॥ १२ ॥

शब्दार्थः—पूर्व कह्यो ता प्रमाण भगवत्सेवामें नित्य (अविनाशि) फलको चित्तसों निरंतर विचार करत प्रभुसेवामेंही आग्रहपूर्वक अति आदर करे ॥ १२ ॥ टीका—एसे पुरुषोत्तम फलात्मक तिनको चिंतन चित्तमें सदा (सर्वकाल) कीयो करे तो कबहु अन्यसंबंध न होय । जो नित्यस्मरण न करे तो अन्यसंबंध होय ताकरि आसुरी बुद्धि

होयजाय । तातें उपर कहे ताही प्रकार दैन्यसों क्लेश-आतुरता संयुक्त चिंतन करें । ओर अति आदरपूर्वक भगवत्सेवा करे । लौकिकमें दिखायवेके लीये प्रतिष्ठार्थ सेवा न करे । पुष्टिमार्गीय वैष्णवको मुख्य धर्म येहीहे । दास्यभावसों फल सर्वोपर जानि सेवा करे । अति आदरपूर्वक सदा सेवा करे. (यह न विचारे जो आजु नांही सेवा करी तो काल्ह करूंगो) परन्तु नित्य नियमपूर्वक अपने देहकों अनित्य जानि देह इंद्रियको सुख सब छोडिकें भगवत्सेवा करे यह सर्वोपर सिद्धांत हे ॥ १२ ॥

मूलं-साक्षात्परोक्षरूपत्वात्सेवा पूर्वविलक्षणा ।

यथा गायंत्य इत्यत्र भावः शबलितो मतः ॥१३॥

शब्दार्थः-साक्षात् परोक्षरूप हे तातें सेवा पूर्वतें विलक्षण हे अथवा संयोग-विप्रयोगात्मक जो सेवा हे सो अपूर्व विलक्षण हे, जेसैं ब्रजभक्त-नकों प्रथम स्वरूपानंदको अनुभव भयो, पाछें श्रीठाकुरजी अंतर्हित भये तब “ गायंत्य उच्चैरमुमेव संहता विचिक्त्युरुन्मत्तकवद्वनाद्वनम् ” यह पंचाध्यायीके तीसमें अध्यायके श्लोक ४ में निरूपण कीये जो सब मिलकें श्रीठाकुरजीकोही गुणगान करतभये ओर बावरेकी नांइ एक वनतें दूसरे वनमें टूंढिवे लगे, फिर तदात्मक होय विनकी लीला करन लागे, वामें संयोग-विप्रयोगात्मक भाव निरूपण कीयोहे तेसोहि भाव राखे ॥१३॥ टीका-साक्षात् ओर परोक्ष दोउ समयके स्वरूपसंबलित होय सेवा करे । प्रथम सेवा समय साक्षात्स्वरूपकी सेवा करि संयोग रसको अनुभव करे । अनौरसमें कुंजकी लीला विचारि विचारि वियोगरसस्वरूपको अनुभव करे । जेसैं ब्रजभक्त रासपंचाध्यायीमें अपने घरतें श्रीठाकुरजीके पास आय स्वरूपानंदको अनुभव कीये । पाछें श्रीठाकुरजी अंतर्धान होय विप्रयोगरसको अनुभव कराये ।

काहेतें जो प्रथम श्रीठाकुरजी स्वरूपानंदको अनुभव न करावते तो अंतर्धानमें विप्रयोग दुःख भक्तनको बोहोत न होतो । जेसैं लौकिकमें कोइ धन पावे ओर फेरी धन नष्ट होय तो दुःख बोहोत मनमें आवे । परि जाके पास जन्मतेंहि मूलमें धन न होय सो दुःख काहेको पावे । ता भांति गोपीजन थोरो सो अनुभव संयोगरसको कीयो । पाछें अंतर्धानमें विप्रयोगरसको अनुभव कियो । ता पाछें श्रीठाकुरजी प्रकट भये तब जलस्थलक्रीडा सिद्ध भई । तेसैं ही पुष्टिमार्गमें सेवा हे । वैष्णव भगवत्सेवामें साक्षात् स्वरूपानंदको अनुभव करे ता समय सेवासंबंधी संयोगके कीर्तन करे । ओर जब अनौसर होय तब परोक्ष दशा जानि विप्रयोगके कीर्तन (वेणुगीत, युगलगीत, गोपिकागीत) अति आतुरतासों (गान) करे । परोक्षकी सेवा होय सो सब सिद्ध करे । या भांति संयोग-विप्रयोग विचारि सेवा करे तो आगें भाव बढे । सो प्रकार आगें श्लोकमें कहतहे ॥ १३ ॥

मूलं-तदुत्तरं यथा भावः केवलो विरहात्मकः ।

फलं तथैव चात्रापि फलता केवलस्य हि ॥१४॥

शब्दार्थः-पूर्वश्लोकमें जो भाव निरूपण कीयो सो भाव प्राप्तभये पीछें जेसो केवल विरहात्मक भाव होय तेसोही यह पुष्टिमार्गमेंहु फल होय काहेतें जो केवल विरहात्मक भाव फलरूप हे ॥ १४ ॥ टीका-उपर कहे ता प्रकार भगवत्सेवा गुणगान करे सो संयोग-विप्रयोग दोउ भाव वेष्टित होय करे, तो ताकरि उत्तरदल जो केवल विरहात्मक भाव, ताको दान प्रभु करे, सो फल शुद्ध पुष्टिमार्गमें सर्वोपर हे, या उपरांत ओर कोइ फल नांही । जहां उत्तरदल विरहात्मकभावको दान श्रीआचार्यजी दीये, तत्र सर्व फलकी सिद्धि होय चुकी ।

विप्रयोगमें सगरो पदार्थ प्रभुरूपही दीसे, तब भगवत्सेवामय संयोगहूमें विप्रयोग होय । प्रभुके दर्शनमें पलक आडि परे तो विप्रयोग होय विकल होय, प्रेमलहरीमें यह जाने जो प्रभु मोकुं छोडि कहुं गये । यह साक्षात् विरह वनांतरकी लीला स्मरण करि विकल होय, जो अब प्रभु घूपमें नागे पायन गाय चरायवे कैसें जायँगे, कोमल चरन हे । कहू झारिकां न चले जाय ! मैं प्रभु बिना कैसें काल बिताऊंगी । या प्रकार कोटान कोटि विप्रयोगकी लहरी संयोगसमय मनमें रहे । लौकिक देहसंवंधी भोग सब छुटि जाय तब जानियें जो प्रेमलक्षणा भक्तिकी प्राप्ति भई । यह मुख्य रस हे ॥ १४ ॥

मूलं-फलाशायां फलं कृष्णवदनं हृदि चिंत्यताम् ॥

फलं कृष्णः सदानंदो भक्तभावात्मकत्वतः॥१५॥

शब्दार्थः—कदाचित् फलकी आशा होय तो श्रीठाकुरजीको मुखारविंद फलरूप हे एसो विचार हृदयमें करनों । काहेतें जो सदा आनंदरूप श्री कृष्ण भक्तनके भावात्मक हे तासु फलरूप हे ॥ १५ ॥ टीका—उपर कहे जो सेवा गुणगान शुद्धभावसों करे सो करत करत केवल विप्रयोग सिद्ध होय सो विप्रयोग सर्वोपर हे । तहां कोई पूर्वपक्ष करे जो सदा विप्रयोग दुखही रहे तो यामें फल कहा सिद्ध भयो ? कछु फलकि आशा करे के न करे ? तहां सिद्धान्त कहत हे जो वह विप्रयोगही परम फल हे, कोटान कोटि सुख वा विप्रयोग समान नांहीहे । सो भाव ब्रजभक्ती जानतहे, ब्रह्मादिक शिवादि-कनकों अगम्य हे । ओर सेवा गुणगान करे तामें कछु लौकिक वैदिक फलकी आशा तथा अपने उद्धारकी आशा राम्वेताकों पुष्टिमार्गीय मुख्य फल न होय । तातें फल यही मनमें चाहे जो श्रीकृष्णचं-

द्रुके वदनकमलके दर्शन कब होय ! काहेते जो श्रीठाकुरजीके मुखारविंदरूप श्री आचार्यजीहे ताते श्री आचार्यजीके दर्शनकी अभिलाषा मनमें राखे । सो भगवत्सेवामें साक्षात् मुखारविंदको दर्शन वारंवार करे येही सर्वोपर फल हृदयमें जाने । ताते श्रीकृष्णके वदनचंद्रको चिंतन वियोगमें डू करे । अनोसरमें वियोगश्रम बहुत करे । तब केवल विप्रयोग भावात्मक फल सिद्ध होय । तब श्रीकृष्णको वदनचंद्र सबठोर दिखे । ताहें विरह हे सो फलरूप हे ओर श्रीकृष्ण हे सो फलात्मक ब्रजभक्तनके भावात्मक परमतत्वहे । एसे जानि सेवा स्मरण करे ॥ १५ ॥

मूलं--न तत्र ज्ञानसंबंधो यतोऽत्रापि न वै चितिः ।

सच्चिदानंदरूपस्तु प्रसिद्धः पुरुषोत्तमः ॥ १६ ॥

शब्दार्थः--तहां ज्ञानसंबंध नही । क्यों जो वहां चिति जो चैतन्य नाम ज्ञानहि नांही हे । ओर पूर्णपुरुषोत्तमही सच्चिदानंद-स्वरूप श्रुतिस्मृत्यादिकमें प्रसिद्ध हे ॥ १६ ॥ टीका--ऐसे रसात्मक श्रीकृष्ण एक अनन्यभक्तनके अनुभव योग्य हे । तहां कोई कहे जो पुराणशास्त्रमें ज्ञानमार्गहु बडो कह्योहे, ताकरि प्रभुकि प्राप्ति कहीहे ओर तुम भक्तिकरि प्राप्ति कह्योहे, ताको कहा कारन हे ? तहां सिद्धान्त कहत हे जो शुद्धाद्वैतीय ज्ञानमार्गमें ज्ञानी तेजोमय स्वरूपकी भावना करतहे, तिन ज्ञानीकों स्वरूपानंदसों संबंध कोई कालमें नांही, स्वरूपानंदके चिंतन योग्य ज्ञानी नांहीहे । ज्ञानीको संबंध तो अक्षरमेंहे । सबठोर अगिकी नाँइ व्यापक ब्रह्म हे तिनहीमें लय होतहे । उनकों भक्तिरसकी प्राप्ति कबहुं नांहीहे । ताते शुद्धाद्वैतीय ज्ञानीके आगेहु या स्वरूपको भाव न कहेनो । श्रीकृष्ण हे सो सच्चिदानंद-स्वरूप रसात्मक हे, जीवमें सत् ओर चित् दोय धर्म हे, आनंदको

तिरोधानहे ओर श्रीठाकुरजी परमानंदरूपहे । श्रीभागवत गीतामें कहेहें जो श्रीकृष्ण पूर्णपुरुषोत्तमहे । सो वेदशास्त्रमें सवठोर प्रसिद्धहे तातें एक श्रीकृष्णहीकों सवतें पर पूर्णपुरुषोत्तम जाननों । ब्रह्मादिक शिवादिकनकों मर्यादा भगवद्भक्त जानने । स्वतंत्र एक श्रीकृष्ण-हीकों जाननो ॥ १६ ॥

मूलं-पूर्वावस्थाफलं कृष्णः केवलश्चोत्तरो मतः ।

तस्यैवाऽऽस्यं कृपापूर्णः प्रभुः श्रीवल्लभाभिधः ॥१७॥

शब्दार्थः-पूर्वावस्था (संयोगात्मक पूर्वदल) के फलरूप श्रीकृष्णहे ओर (विप्रयोगात्मक) उत्तरदल केवल फलरूपहे । [साधन ओर फल दोउ एक श्रीकृष्णहीहे] । विनकेही मुखारविंद कृपापूर्ण श्रीवल्लभप्रभु हे ॥ १७ ॥ टीका-अब कोई कहे जो तुम श्रीठाकुरजीकी सेवा करिकें कछु फलहूकी वासना मनमें नांही राखतहो सो काहेतें ? वेदमें जितनी क्रिया कहि ताको फलहू कहेहे जो कछु फल न होय तो क्रिया व्यर्थ कहियें यह यह वेदशास्त्रकी मर्यादाहे, यह संदेह होय तहां कहतहे जो जा जीवकों श्रीआचार्यजीद्वारा ब्रह्मसंबंध भयो ओर वह जीव (वैष्णव) पुष्टिमार्गकी रीतिसों भगवत्सेवा करन लाग्यो तब वह सेवा करतमें साधनहूं श्रीकृष्ण ओर सेवा सिद्ध भये पाछें फलहू श्रीकृष्णहीहे । तातें या पुष्टिमार्गमें साधनहीमें फलकी प्राप्ति भई ओर वेदमर्यादामें क्रिया साधनरूप न्यारीहे ओर फल न्यारोहे फल भयो तब मर्यादाकी क्रिया नाश भई । ओर पुष्टिमार्गमें साधनहूंमें श्रीकृष्णसेवा ओर फलहूंमें श्रीकृष्णसेवा हे । सो श्रीकृष्ण कब प्राप्त होय ? जब श्रीठाकुरजीके मुखारविंदरूप श्रीआचार्यजी महाप्रभुनकी पूर्ण कृपा होय तब यह जीव, शरण आवे पुष्टिमार्गमें भगवत्सेवामें रुचि होय, श्रीआचार्यजीकी कृपा बिना पुष्टिमार्गमें जीव कबहू शरण न आवे ओर पुष्टिमार्गमें प्रवेश कबहू न होय यह

सिद्धांत निश्चय जाननों । सो श्रीआचार्यजीकी कृपा कौन प्रकारसों होय सो आगे श्लोकमें कहतहे ॥ १७ ॥

मूल—तदाश्रयः सदा कार्यो मनोवाक्कायवृत्तिभिः ।

स्वकीयता तदीयेषु तद्भिन्ने भिन्नता मता ॥१८॥

शब्दार्थः—मन वाणी ओर कायाकी वृत्तिकरिके विनको आश्रय सदा कर्त्तव्यहे ओर जो तदीय [भगवदीय] हे वामे अपनेपणांको ममत्व तथा जो विनकी शरण नहीं आयेहे वामे भेदबुद्धि राखे ॥१८॥ टीका—अब श्रीआचार्यजी कृपा करे सो उपाय कहतहे जो मन वचन कर्म करिकें एक श्रीआचार्यजीके चरणकमलको आश्रय करे तब श्रीआचार्यजी अनन्यसेवकको भाव देखिकें प्रसन्न होय ओर श्रीआचार्यजीको आश्रय हृदयमें दृढ न होय तो कोटानकोटि साधन कीयो करे परि रंचकहू फलसिद्धि न होय, अन्यसंबंधतें नाश होय जाय । सो श्रीगुसांइजी विज्ञप्तिमें एक श्लोक कहेहैं “ अन्य संबंधगंधोऽपि कंधरामेव बाधते ” (अन्यसंबंधको गंधहू कंधरा [गरदन] कूं ही बाध करेहे) अन्यसंबंध होय तो माथोही कटे । जैसे संभरवारे दामोदरदासकी वार्तामें प्रसिद्धहे जो स्त्रीने अन्याश्रय कीयो तो पुत्र म्लेच्छ भयो । अन्यसंबंध भक्तिमार्गमें महाबाधकहे । ओर जो श्रीआचार्यजीको दृढ आश्रय होय ओर साधन थोरो वनि आवे तोहू सकल कार्य सिद्ध होय । आश्रय दृढ यह वैष्णवको परम धर्महे । श्रीआचार्यजीको दृढ आश्रय भयो कब जानियें जब श्रीआचार्यजीके तदीय अनन्यभक्त चोरासीवैष्णव अष्टसखा आदि जो जिनके हृदयमें श्रीआचार्यजीको आश्रय दृढ सिद्ध भयोहे जिनकूं श्रीआचार्यजी प्रसन्न होय अपनो अनुभव करावतहे मन कर्म वचन करि एक श्रीआचार्यजीकोही जानतहे ऐसे

भगवदीयको सत्संग करे । ओर ऐसे भगवदीयमें यह भाव राखे जो इनको श्रीआचार्यजी कृपा करिके दान दीयेहें सो अहर्निश इनके हृदयमें श्रीआचार्यजी विराजतहे । तातें श्रीआचार्यजीमें ओर भगवदीयमें कछु भिन्नता नांहीहे । जेसैं अग्निके पुंजमेतें चिनगारी उडतहे सोहू अग्निरूपहे तेसैं भगवदीय हू भगवद्रूप हे । तातें एसैं भगवदीयमें ओर श्रीआचार्यजीमें भिन्नबुद्धि राखे तो उह जीवकों पुष्टिमार्गको फल कबहू न होय श्रीआचार्यजी प्रसन्न न होय । जेसैं रामानंदने अपनी स्त्रीसों कही जो ' वेगी गोवर सकेलि नातर वैष्णव उठाय ले जायगें ' यह सुनत ही श्रीआचार्यजी क्रोधकरि त्याग कीयो कितनेक जन्मको अंतराय भयो । तातें भगवदीयमें ओर श्रीआचार्यजीमें भेदबुद्धि न राखे ॥ १८ ॥

मूलं—तदीयेषु च तद्बुद्ध्या भरः स्थाप्यो विशेषतः ।

यथा दूतीषु भवति विषयिणां मतिस्तथा ॥ १९ ॥

शब्दार्थः—जेसो भाव श्रीआचार्यजीमें तासूं विशेष भाव भगवदीयमें राखे, जेसैं कामीपुरुषहे तिनकी बुद्धि दूतीके विषे रहतहे तेसैं भगवदीयमें बुद्धि राखे अर्थात् कामीपुरुष परस्त्रीतेंहू जा दूती द्वारा वह प्राप्त होय ताको सन्मान बोहोत करे तेसैं भगवदीयको सन्मान विशेष आदरपूर्वक करे ॥ १९ ॥ टीका—तदीयमें लौकिक-बुद्धि न राखे यहजाने जो तदीय प्रसन्न होयगें तब श्रीआचार्यजी प्रसन्न होय दान करेगें । सो लौकिकदृष्टांतसों कहतहे—जेसैं कामी पुरुष होय सो दूतिद्वारा परस्त्रीकों बुलावे सो कामतो परस्त्रीसों वाको सिद्ध होय परंतु बीचमें दूती प्रसन्न होयके करे तो काम सिद्ध होय नातर नांही सिद्ध होय तातें जेसैं दूति प्रसन्न रहे सोहि कामी पुरुष करतहे । तातें जो दूति कार्यकों सिद्ध करतहे तापरहू अधिक स्नेह

होतहे तेसेही जीव जब भगवानसों मिले तवही यह जीवको कार्य सिद्ध होय परंतु भगवानहू भगवदीयके संगविना न मिले भगवदीय-द्वारा भगवान् प्रसन्न होतहैं तातें भगवदीयमें ओर भगवानमें समानबुद्धि स्थापन करे ॥ १९ ॥

**मूलं—धनं गृहं यथा कृष्णे तथा भक्तिस्थितेऽपि च ।
विनियोक्तव्यमेवं हि प्रभोर्भावो भविष्यति ॥२०॥**

शब्दार्थः—धनगृहादिक जेसैं श्रीठाकुरजीमें विनियोग करे तेसैं-ही भक्तमेंहू विनियोग करे काहेतें जो ऐसैं प्रभुकी प्रसन्नता होय ॥२०॥ टीका—भगवदीयमें भाव भयो कब जानियें ? जेसैं धनगृहादिक श्रीकृष्णकों समर्पतहे भावसहित भगवत्सेवा करतहे तेसैंही भावसहित भगवदीयकी सेवा करियें धनगृहादिक मन वचनकर्मसों स्नेहसंयुक्त भगवदीयमें विनियोग करियें तो भगवान् प्रसन्न होय ॥ २० ॥

**मूलं—तदीयाश्चेत्स्वतस्तुष्टास्तुष्टः कृष्णो न संशयः ।
तदीयास्तु निजाचार्यचरणैकपरायणाः ॥ २१ ॥
अनन्यभजनास्तुष्टाः कामलोभविवर्जिताः ।
निरपेक्षा विरक्ताश्च सर्वभूतहिते रताः ॥ २२ ॥
निर्मत्सराः कृष्णसेवाकथादिविहितादराः ।
एवंविधास्तदीयाश्चेत्संगादपि विशेषतः ॥ २३ ॥**

शब्दार्थः—भगवदीय आपतें प्रसन्न होय तब प्रभु प्रसन्न भये वामें संशय नांही । अब भगवादीयके लक्षण कहतहे—श्रीआचार्यजीके चरणारविंदको आश्रय जिनकू दृढ होय ॥ २१ ॥ अनन्यभक्ति करिवेवारे [अन्याश्रयरहित], संतोषवारे, काम लोभतें वर्जित, निरपेक्ष [जाकूं काहूकी अभिलाषा नांही], विरक्त [भगवच्चरणारविंद

विना ओर सबतें आसक्तिरहित], सर्वप्राणिमात्रके हितमें प्राप्ति वारे ॥ २२ ॥ ईर्ष्यारहित, प्रभुकी सेवाकथादिकमें आदर करिवेवारे ऐसे भगवदीय मिले तो विनके संगतेहू विशेष फल हे ॥ २३ ॥ टीका—अब उपर कहे भावपूर्वक धन गृह श्रीकृष्णकों समर्पे तैसेही भावसहित भगवदीयकूं समर्पे । तहां कोई कहे जो भगवानकी सेवा तो आवश्यकहे सो करि चाहिये ओर भगवदीयकी सेवा कीयेतें कहा होतहे ? तहां सिद्धांत कहतहे जो भगवदीयकों सेवाकरि प्रसन्न करिये तब भगवदीय संतुष्ट होय जब भगवदीय संतुष्ट न होय तब भगवानहू संतुष्ट न होय । ऐसे जानि भगवदीयको सर्वप्रकार संतुष्ट करने ताकरिकें निश्चय भगवान् संतुष्ट होयगें । तहां कोई कहे जो वैष्णव जानिके आपतें बने सो सेवा करिये ओर वैष्णव कठिन आज्ञाकरे सो आपते न बने तब वैष्णव संतुष्ट न होय तो कहाकरे ? या भांति कोई कहे तहां सिद्धांत कहते हे—जेसे राजाके बालककी सेवा करिये सो वह बालककूं ज्ञान न होय वह अनेक वार्ता कहे सो आपतें न बने तातें वह बालक प्रसन्न न होय परि राजा तो अपने मनमें जाने हे जो याने मेरे बालककी सेवा वोहोत करीहे याहीसों बनी तितनी करीहे यह जानिकें राजा तो प्रसन्नही होय । ऐसे जानिकें अपन शुद्धभावतें बने तितनी वैष्णवकी सेवा करिये तोहू वैष्णव प्रसन्न न होय तो कुछ चिंता नांही भगवान् प्रसन्नही होयगें । अब वैष्णव कितने प्रकारकेहे सो कहतहे जो ऐसे वैष्णव होय तिनकी सेवा करे । (१) एक श्रीआचार्यजीके चरणारविंदकी भक्तिमें परायण होय, अहर्निश यह लोक परलोकमें श्री आचार्यजीके शरणकी कामना होय, ऐसे भगवदीयकी सेवा करे सत्संग करे तो जीवहूकी अनन्यता श्रीआचार्य जीमें होय ॥ २१ ॥ (२) श्रीठाकुरजीकी सेवाही करि संतुष्ट रहे ओर

देवतांतरको भजन स्वप्नमें नांही जानतहे, तब श्रीठाकुरजी कृपा करे प्रसन्न होय । [३] काहू वस्तुकी कामना नांहीहे तीन्योलोकपर्यंत ब्रह्मानंदमोक्ष पर्यंत तुच्छ जाने । [४] लौकिक काम क्रोध मद मत्सरता विषयवासनाकी गंध जामें न होय ओर लोभ न होय जो सगरो धर्म द्रव्यके लिये बेंचे काहेतें जो यह कलियुगमें द्रव्य करि सकल लौकिक-कार्य सिद्ध होतहे सो द्रव्यमें जाको रंचकहू लोभ न होय सो भगवदीय जानियें । [५] निरपेक्षभावसों भगवत्सेवा करे कछु लौकिक वैदिककामना मनमें न राखे काहू राजा द्रव्यवारेकी अपेक्षा मनमें न राखे [६] मनकरि विरक्त रहे स्त्रीपुत्र कुटुंब गृह देहसंबंधि सगरे जगतमें दृढ वैराग्य जानें । काहूसों अपने स्वार्थके लिये कछु याचना करे नांही, यह जाने जो श्रीकृष्णही सर्व कार्य सिद्ध करेंगे मेरो धर्म तो भगवत्सेवाही करिवेकोहे । [७] सर्वभूतप्राणिमात्रमें हित राखे काहूको बूरो सर्वथा न विचारे मन वचन कर्म करि सबको हितही करे । [एसे भगवदीयको संग अवश्यही कर्तव्यहे तिनकी सेवा स्नेहपूर्वक करे] ॥ २२ ॥ (८) मत्सर (जो ओरको उत्कर्ष देखि न शके सो) न करे अपनेतें ओर वैष्णव थोरो भगवद्धर्म करत होय तोहू वाकी बडाई करे, धन्यवाद दे योग्यता न जाने जो में बोहोत धर्म करतहों यह जाने जो मेरेमें तो भगवद्धर्म रंचहू नांहीहे या भांति दीनता राखे । (९) श्रीकृष्णकी सेवाहू आदरपूर्वक करे श्रीकृष्णकी कथाहू आदरपूर्वक सुने काहेतें जो भगवत्सेवा कीयेतें सर्व इंद्रिय भगवत्परायण होय ओर श्रीकृष्णकी कथा सुनेतें भगवत्सेवामें रुचि उपजे (तातें भगवत्कथाहू अति आदरपूर्वक सुननी भगवत्सेवाहू करनी) या भांति उपर कहि आये ऐसे नवगुणसूं परिपूर्ण भगवदीय होय तिनको संग अवश्य नियमपूर्वक करे या भांति शुद्ध मनसों उत्तम भगवदीयको संग करे, उनकी सेवा करे, भगवदीय कहे तापें मनमें विश्वास राखिकें

स्नेहपूर्वक सब करे या प्रकार वैष्णव रहे तो श्रीआचार्यजी प्रसन्न होय
आनंद दान करे ॥ २३ ॥

मूलं-सर्वथा शुद्धभावानां स्वीकृतानां कृपालुना ।

सर्वं श्रीवल्लभाचार्यप्रसादेन भविष्यति ॥ २४ ॥

शब्दार्थः—दयालु श्रीठाकुरजी, श्रीमदाचार्यजी ओर भगवदीयें
अपने कीयेहे एसें शुद्ध भाववारेनको श्रीमदाचार्यजीके प्रसादतें सर्व
कार्यहू सिद्ध होयगें ॥ २४ ॥ टीका—उपर जितनो प्रकार कहे सो
सब शुद्ध भावसों करे, श्रीकृष्णकी कथाको श्रवणहू शुद्ध भावसों
करे, भगवत्सेवाहू शुद्ध भावसों करे, गुरुसेवाहू शुद्ध भावसों करे,
वैष्णवकी सेवाहू शुद्ध भावसों करे, सगरी भगवल्लीलामें शुद्ध भाव
राखे, सर्व भगवत्सामग्रीमें शुद्ध भाव राखे, तब भगवदीय प्रसन्न
होय कृपा करे तो प्रभु हू कृपा करे । तहां कोई कहे जो इतने
धर्म महाकठिनहे यह कलियुगमें जीवसों कैसें बनि आवे जीवमें
तो एक हू धर्म महाकठिनतासों सिद्ध होत हे । या भांति संदेह
करे तहां सिद्धांत कहतहे जो श्रीवल्लभाचार्यजी यह कलियुगके
जीवनपें कृपा करिवेके लिये प्रकटे हे ओर यह पुष्टिमार्ग सर्वोपर
प्रकट कीयोहे, सो श्रीआचार्यजी महाप्रभुजीकी कृपातें धर्म एक
क्षणमें आवेंगे । जीवकों तो सबही कठिनहे क्योंजो जीव स्वभाव-
करि दुष्टहे ओर श्रीआचार्यजी महाप्रभु कृपा करे तिनकों सब
सुगमहे । तातें मनमें एक श्रीआचार्यजीके चरणकमलको आश्रय
दृढ राखे. सर्व कार्य आश्रयहीतें निश्चय सिद्ध होयंगो, निश्चय
पुष्टिमार्गमें फलहे सो श्रीमहाप्रभुजी दान करेंगे ॥ २४ ॥

या प्रकार प्रथम शिक्षापत्रमें अंगीकृत जीवनकी कर्तव्यता निरूपण करी ऐसे प्रथम शिक्षापत्रको भाव यथावृद्धि कहे.

इति श्रीहरिरायजीकृतं प्रथमशिक्षापत्रं श्रीगोपेश्वरजी-
कृतत्रजभाषाटीकासमेतं संपूर्णम् ॥ १ ॥

बड़े शिक्षापत्र २.

अब द्वितीयशिक्षापत्रमें श्रीहरिरायजी निरोधकी सिद्धिको प्रकार निरूपण करतहे—उपर कहे ता रीतिसों प्रथमशिक्षापत्रको भाव हृदयमें धारण करे तो वा जीवके उपर श्रीआचार्यजी महाप्रभु निश्चय कृपा करे । पुष्टिमार्गमें रसरूप फलात्मक श्रीकृष्णहे वाकों दान करे सो यह दूसरे शिक्षापत्रमें कहतहे तब श्रीकृष्णको स्वरूप हृदयारूढ होय जैसे स्वरूपको अनुभव होय—

मूलं—यशोदोत्संगललितः कचग्रथितवेणिकः ।

मुक्ताफललसद्भालचलत्कुटिलकुंतलः ॥ १ ॥

शब्दार्थः—अठारे श्लोक पर्यंत स्वरूपकोही वर्णनहे । श्रीयशो-
दाजीके उत्संग (गोद) में शोभितहे, केश वेणीरूप गूंथेहे, मुक्ताफल
सों सुशोभित भालहे, चलायमान कुटिल (वक्र) केश हे ॥ १ ॥
टीका—श्रीयशोदोत्संगललित यह केवल भावात्मक स्वरूपहे वसुदेव-

जीके वहां जो मथुरामें प्रकटहे सो केवल रसात्मक नांहीहे सो अनेक कार्यार्थ भूमिभारहरणार्थ मोक्षदानार्थ प्रकटहे । ओर श्रीयशोदाजीके वहां जो स्वरूप प्रकटहे सो केवल ब्रजभक्तनकों आनंददानार्थहे सो श्रीयशोदोत्संगलालित जो रसात्मक सोहि यह श्रीआचार्यजीके पुष्टि-मार्गमें सेवनीयहे । ताहूमें दोय प्रकारहे कल्पकल्पमें द्वापरयुग आव-तहे तब श्रीनंदयशोदा प्रकटतहे तब श्रीठाकुरजीहू प्रकट होतहे सो यशोदोत्संगलालित पुष्टिमार्गमें सेव्य नांहीहे । कल्पकल्पमें कबहू अंशावतार होतहे ओर सारस्वत कल्पमें जो स्वयं प्रभु (आप) पधारेहें सो वेदकी ऋचाकों वरदान दीयेहें सो सारस्वत कल्पके यशोदोत्संग-लालित यह पुष्टिमार्गमें सेव्यहे सो श्रीगुसांईके वचनहे “जानीत परमं तत्त्वं यशोदोत्संगलालितम् । तदन्यदिति ये प्राहुरासुरांस्तानहो बुधाः” (श्रीयशोदोत्संगलालित (श्रीकृष्ण) कूं परमतत्व जाननें,) श्री यशो-दोत्संगलालित विना ओरकूं जाने ताकों आसुर जानियें । सर्वलीला सर्ववस्तुके कारणरूप यशोदोत्संगलालितहे तिनकों श्रीयशोदाजी अति स्नेहसों उत्संगमें लीयेहे लालन पालन करतहे परम आनंदमें मग्नहे, श्रीगुसांईजी “मंगलमिह श्रीनंदयशोदानामसुकीर्तनमेतद्गु-चिरोत्संगसुलालितपालितरूपम् ” एसें मंगलमंगलग्रंथमें कहेहें ता-रीतिसों यशोदाजी सो मंगलरूपकों पायकें गोदमें ले आपहू मंगल-रूप भई एसेस्वरूपकों ध्यान करतहे । श्रीयशोदाजी उत्संगमें पुत्रकों लेयकें सुंदर घुघरवारे वारहे तिनकों सवारिकें वेणी गूहतहे । अथवा श्रीयशोदाजी अपनी गोदमें प्रभुकों लेयकें अनेक मेवा मि-ठाई आरोगावतहे, अनेक खिलौनानसों खिलावतहे, कुमारिका जो घरमें भक्तहे सो वेणी गूहतहे अथवा श्रुतिरूपा श्रीचंद्रावलीजी पधारि चालभावसों गूहतहे, अथवा मुख्यस्वामिनीजी श्रीवृषभानुजा पधा-

रिकें बालभावसों गूहते, अथवा श्रीठाकुरजीके बालभावको हठहे तासूं श्रीयशोदाजी वृषभानुकुमारिकाकों अपने पास वेठाय दोउ स्वरूपकी वेणी गूहते । या भांति अनेक भावहे (सो श्रीमहाप्रभु-जीकी कृपातें अनुभव होय) । या भांति वेणी सवारिकें सुंदर भालपर मोतीकी लर शोभा देतहे सों मानो नीलकमलके उपर बराबरी जलकी बूंद आय रहीहे, तथा श्यामचंद्रमाके उपर तारागणकी पंक्ति आय रहीहे, शीतल मंद सुगंध वायुतें कुंतल जो अलक चलायमानहे सो परम अद्भुत शोभा देतहें, मानो मुखकमलके मकरंदवश होय अलि जो भ्रमरके छोटे पुत्रकी पंक्तिकी पंक्ति आय पान करतहे, तथा मुखचंद्रमापर अलक सो सर्पके वच्चा आयेहे, या भांति शिखातें नखपर्यंत सिंगारको भावसहित हृदयमें विचारे ॥ १ ॥

मूलं-मुक्ताफलावलीभालप्रांतकर्णविभूषितः ।

कस्तूरिकातिलकयुग्मभालभूषातिसुंदरः ॥ २ ॥

शब्दार्थः—मोतिनकी मालासों भाल मध्यतें कर्णताँइ सुशोभितहे कस्तूरीके तिलकयुक्त भालके भूषणकी शोभा सो अति सुंदरहे ॥ २ ॥ टीका—मुक्ताफलकी लर भालसें दोउ कर्णताँइ बंदी धरेहें सो मानों श्याम मेघमें दोउ बक्की पंक्ति परम शोभा देतहें, सुंदर कस्तूरीको तिलक भालपर विराजितहे, शृंगाररसात्मक श्रीठाकुरजीके भालपर स्वतःसिद्ध सर्वकालमें कस्तूरीको तिलकहे तातें श्रीचंद्रावलीजी आप अपने भावसंवंधी श्रीठाकुरजीकों कियोहे कस्तूरीको तिलक ओर मुख्य श्रीस्वामिनीजी अपने भावरूप सुवर्णको भूषण भालपर धरायेहे । या भांति सगरे आभूषण भावात्मकहे ॥ २ ॥

मूलं—काश्मीररागविलसत्कपोलद्वयचित्रितः ।

स्फुरच्छ्रुतियुगप्राप्तकुंडलद्युतिमंडितः ॥ ३ ॥

शब्दार्थः—केंसरके रंगसों दोउ कपोल चित्रितहे ओर चलकितजो (दोउ कर्णमें) कुंडलहे ताकी कांतिसों मंडितहे ॥३॥ टीका—काश्मीर जो केसर कुमकुमादि—अंगरागसों कपोल चित्रितहे सो दोउ कपोलमें कमलपत्र परम शोभायमान हे यह कमलपत्र श्रीस्वामिजीके मनो-रथकोहे काहेतें जो कमलपत्र जब व्याह होतेहैं तबही धरतहैं । सो श्रीस्वामिनीजी अपनो मनोरथ करतहे अपने श्रीअंगके वर्णरूप केसरसों कमलपत्र दोउ कपोलमें सवारि यह जताये जो हमहींते व्याह हो-यगो । अथवा श्रीयशोदाजी श्रीठाकुरजीको श्रीस्वामिनीजीकी गोदमें पधराय आपु गृहकार्य करतहे तब श्रीस्वामिनीजी एकांतठोरमें पधरा-यके श्रीठाकुरजीसों प्रार्थना करतहे जो हमारो चिरकालको विरह तुम दूरी करो तब श्रीठाकुरजी किशोर वयको अंगीकार करि श्रीस्वामिनी-जीके सगरे मनोरथ पूर्ण करतहे तब श्रीस्वामिनीजी दोउ कपोलपर कमलपत्र अपने हस्तसों सवारिकें व्याहको मनोरथ पूर्ण करतहे जो नित्य याही भांति हमकों सुख दीयो करो 'दिनदूले मेरो कुंवर कन्है-या' या पदके अनुसार अनेक लीला गोप्य करि पाछें श्रीठाकुरजीकों गोदमें लेय श्रीस्वामिनीजी श्रीयशोदाजी पास आयकें कहतहे जो यह तुम्हारो पुत्र अतिचंचल केसंहू रहत नांही सो क्योहूं क्योहूं राखेहैं एक ठोरतो याहीको मन लागत नाहीं तातें खिलाय ल्यायेहैं । तब श्रीयशोदाजी श्रीस्वामिनीजी उपर प्रसन्न होय श्रीठाकुरजीको अपने उत्संगमें लेत हे, विधनासों अंजल पसारी यह प्रार्थना करत हे जो वृषभानुकुमारीतें मेरेपुत्रको व्याह होउ येही में मांगतीहों । पाछें भेवामिठाईसों श्रीस्वामिनीजीकी गोद भरी देतहे । याभांति श्रीठाकुरजीके कपोल चित्रितहे ओर दोउ श्रुति जो कर्ण तामें कुंडल शोभायमानहे सो कुंडल अति चंचलहे सो कवहू मकराकृति कुंडल धरतहे, कवहू मयूराकृति कुंडल धरतहे, तामें मकरा-

कौन भांतिकोहे सो भक्तनकी आर्ति प्रभु सही नांही सकत तातें चालभावसों कोई जाने नांही याभांति चरणारविंदके भक्तनको अध-रामृत रसको पान करावतहे, अथवा प्रभु यह विचार करतहे जो मेरे चरणारविंदमें एसो कहा रसहे जो सगरे भक्त चरणारविंदको पूजतहे ध्यान धरतहे सो रस मेंहूंतो देखों सो चालभावसों आपहू चरणारविंद-के रसको आस्वादन करतहे । ओर ब्रजभक्तन चारोंओर वेष्टित होय रहेहें तिनकों प्रभु नेत्रनके कटाक्षसों आगतस्वागत करतहे ओर रस-संकेत जतावतहे । अथवा कबहू श्रीहस्तको अंगुष्ठ मुखमें मेलतहे ताकरि अंतर्गृहगता देह छोडि श्रीठाकरजीके पास आईहे तिनकों आप श्रीहस्तसों पकरि अपने श्रीमुखारविंदमें धारण करतहे सो कबहू एकांतमें उनभक्तनकों बाहिर निकासि रमण करि पाछे फेरि मुखार-विंदमें धरि लेतहे । लोगनके दिखायवेमें बालक अंगुष्ठ चूसतहे । श्री-स्वामिनीजी आदिकों अनेक रमण बंधादिक क्रियाको बोधन करतहे। या भांति श्रीठाकुरजी जाको जेसो अधिकारहे ताकूं तेसोही रसपान करावतहे ॥ ६ ॥

मूलं—ग्रीवालग्रलसन्मुक्ताफलमालविभूषणः

तदुत्तरलसत्स्वर्णमणिमालातिमोहनः ॥ ७ ॥

शब्दार्थः—कंठमें लग्न शोभित मोतिनकी माला करिकें भूषितहे ओर ताकी उपर सुवर्णके मणिकाकी मालाहे तातें अति मोह उपजा-वत हे ॥ ७ ॥ टीका—ग्रीवासों लगी मोतिनकी माला (कंठश्री) परम शोभा देतहे । ताहीके पास सुवर्णके मणिका ओर मणिमाला ग्रंथनकरि श्रीकंठमें धारण कीयेहे ताकरि अपने भक्तनकों यह जताये जो में तुमकों अहर्निश कंठमें राखतहों । मुक्ताकी माला सुवर्ण तथा मणिमय अनेक भक्तनके भावात्मकहे तातें प्रभु प्रेमतें धारण कीयेहे ॥ ७ ॥

मूल—उरःस्थललसत्स्वच्छवक्रवैयाघ्रभूषणः ।

मुक्ताफलस्वर्णमालायुततुंदिलितोदरः ॥ ८ ॥

शब्दार्थः—हृदयपे शोभायमान स्वच्छ ओर बाँके नाहारके नखके भूषणवारे ओर मुक्ताफलमाला ओर सुवर्णमालासहित दौंदयुक्त उदरवारे हे ॥ ८ ॥ टीका—उरःस्थलके उपर केहरिको नख (वधनखा) परम शोभा देतहे सो श्रीयशोदाजी तो अपने पुत्रकी रक्षार्थ धरायेहे ओर ब्रजभक्तनको अनेक लीला सूचन करावतहे । नखदान रासादि लीला विहारमें होतहे सो वधनखा टेडोहे ताको अभिप्राय यह जो कितनेक भक्तनको हृदय टेडोहे तिनको अपने बस करनोहे. सो वधनखा टेडो अपने हृदयमें धरि यह जताये जो मेंहू त्रिभंगी टेडोहूँ । या भांति भक्तनके मन सुधेकरि अपने हृदयमें भक्तनको रखेहैं । तथा अनेक भक्तनके घर श्रीठाकुरजी पधारतहे तब वहां द्वार उपर रखवारी चाहिये तब नखते लीलासंबंधी आधिदैविकनृसिंहजी प्रकट करि द्वार उपर रखवारी राखि भक्तनके संग निर्भयतासों लीलाविहार करतहैं । तातें पोरीपर सिंह हे सो पुष्टिलीला संबंधीहे ताहीतें श्रीठाकुरजी नखभूषण हृदयमें धारण कीयेहैं । या भांति सगरे आभूषण ब्रजभक्तनके लीलासंबंधी अनुकूलहे तातें श्रीठाकुरजी प्रेमसों पास राखतहे । जो ब्रजभक्तनकी लीलासों प्रतिकूल होय ताको तत्काल श्रीठाकुरजी त्याग करतहे । तातें पुष्टिमार्गमें अंगीकार ब्रजभक्तनकी कृपातें होय ओर उपाय कोउ नाहीं । या भावसों वाधनख प्रभु धरेहे ता नखभूषणके पास मुक्ताफल ओर सुवर्णके मणिकायुक्त गुंथीएसी सुंदरमाला उपर विराजमानहे सो सुवर्णमणिका श्रीस्वामिनीजीको भाव तथा मुक्ताफल श्रीचंद्रावलीजीके भावसों श्रीठाकुरजी अपने हृदयमें धारण कीयेहैं ॥ ८ ॥

मूलं-बाहुमध्यलसद्रत्नजटितांगदसुंदरः ॥

पटगुच्छलसत्स्वल्पकरकंकणभूषणः ॥ ९ ॥

शब्दार्थः—दोउ भुजाके मध्य रत्नजडित बाहुबंधसं सुंदरहे पटगुच्छ (रेशमीफोंदना) सहित शोभायमान छोटे श्रीहस्तके विपे कंकणको आभरणहे ॥ ९ ॥ टीका—सुंदर बाहुमें बाहुबंध रत्नजटितहे सो नवरत्नयुक्त जडाव दोउ भुजामें शोभादेतहे सो वामभुजामें श्रीस्वामिनीजीको भावात्मक तथा दक्षिणभुजामें श्रीचंद्रावलीजीको भावात्मकहे । ओर पाटके गुच्छामें परोये ऐसे छोटे हलुके दोउ करमें कंकण परम शोभा देतहे ॥ ९ ॥

मूलं-दशांगुलिलसद्रत्नजटितोत्तममुद्रिकः ।

किंकिणीपटगुच्छातिविराजितकटिस्थलः ॥ १० ॥

शब्दार्थः—दशअंगुलियनमें विराजित रत्नजटित उत्तम मुद्रिका धरीहे ओर किंकिणी (क्षुद्रघंटिका) युक्त पाटगुच्छतें कटिस्थल अति शोभायमानहे ॥ १० ॥ टीका—दोउ श्रीहस्तकी दश अंगुरीमें रत्नजटित जडाव परमउत्तम मुद्रिका शोभितहे । सो दशमुद्रिकाको अभिप्राय यहहे जो दशप्रकारके भक्तनके भावात्मकहे । जा रसके जो भक्तहे तिनको ताही अंगुलीसों नखदान करि परम सुख देतहे । ओर कटिस्थल विपे पाटके गुच्छामें परोई ऐसी जो किंकिणी (रासादि अनेक लीलामें सुंदर मधुर शब्द करिवेवारी) कटिमें बांधीहे सो भक्तनको किंकिणीके नादतें अनेक लीलाको स्मरण होतहे ॥ १० ॥

मूलं-सनूपुरपदन्यासध्वनिमोहितगोपिकः ।

दिगंवरो नखविधुज्योत्स्नाजितनिशापतिः ॥ ११ ॥

शब्दार्थः—नूपुरयुक्त चरणारविंद धरे ताके शब्दसों ब्रजभक्तकों मोह करतहें ओर आप वस्त्ररहित (वालभावसों) हैं दशनखरूप

चंद्रमाकी किरणतें चंद्रमाको जय करिवेवारेहे ॥११॥ टीका—चरणक-मलमें नूपुर परम सुंदर धारण कीये हे सो नूपुरकी ध्वनि सुनिके अनेक गोपीजन मोहकों पावतहें ओर वाललीलाको स्वरूप दिगंबर निरावरण सर्वांगको दर्शन करावत हे सो श्रीनवनीतप्रियजी—श्रीवालकृष्णजीके स्वरूपमें प्रगट दर्शन होतहे दश नखचंद्र चरणारविंदमें धारण कीयेहे ता नखचंद्रके आगे चंद्रमा लज्जित होतहे चंद्रमाको जिते ऐसे नखचंद्र भक्तनके हृदयको अज्ञानरूप अंधकार दूरिकरतहे यह श्रीठाकुरजीके नखचंद्र एक एक नख कोटानकोटी अंधकारको नाश कर्ताहे सो दशनखचंद्र जिनभक्तनके हृदयमें रहतहे तिनके हृदयमें प्रकाश होय तामें कहा कहेनो ? नखचंद्रने अपने ज्योतिके प्रकाश-करि चंद्रमा, सूर्य, दर्पण, मणि—आदि सबके प्रकाशकों जितेहे ओर दशनखचंद्रहे तामें वामचरणारविंदके नख पुष्टिभक्तनके हृदयको तिमिर दूर करतहे ओर दक्षिणचरणके नख मर्यादाभक्तनके तिमिरको दूर करतहे । या भांति शिखातें नखपर्यंत स्वरूप वर्णन कीयेहे ॥११॥

मूलं—स्वरूपप्रतिविंवैकट्टिहास्यमुखांबुजः ।

पंकांगरागरुचिरः सदा मुग्धशिरोमणिः ॥ १२ ॥

शब्दार्थः—स्वरूपके प्रतिविंवमेंही दृष्टि लगी रहीहे ताकरिकें हास्य-युक्त मुखारविंद होय रह्यो हे ओर श्रीअंगमे कीचके लेप (अंगराग) करिकें शोभित हे । (प्रतिविंवमें हास्य तथा श्रीअंगमे कीचको लेप करिवेकी मतलब यह हे जो) मुग्धशिरोमणि हे [अर्थात् मुग्धबालकको नाट्यहे.] ॥१२॥ टीका—उपर कहे ऐसे सुंदर बालस्वरूपकी लीला श्रीठाकुरजी करतहे अपनो प्रतिविंव कवहू मणिज-टित आंगनमें देखि पकरनको दोरतहे प्रतिविंव श्रीहस्तमें नही आव-तहे तब मुखारविंदमें हास्य आवतहे कवहू मणिजटित स्त्रोत्रमें

अपनो प्रतिविम्ब देखि वारंवार किलकिक्के हसतहे ब्रजकी रज सर्वांगमें
लागि रहीहे सो परम शोभा देतहे मुग्ध—लौकिकबालककी नाई
अनेक लीला करत हे परंतु मुग्धशिरोमणिहे मानो कछुही नांही
जानत हे भांति ब्रजभक्तनकों सुखदेतहे ॥ १२ ॥

मूलं—लीलान्यज्ञानरहितः सर्वलीलाविचक्षणः ।

कंदर्पकोटिलावण्यो मानिनीमानदर्पहा ॥ १३ ॥

शब्दार्थः—लीलाकरिके अन्यज्ञानरहित दीसतहे ओर आपतो सर्व
लीलामें विचक्षणहे, कोटि कंदर्प (कामदेव) तें अधिक लावण्य (श्री-
अंगकी शोभा) हे ओर मानवतीके मानको गर्व हरिवेवारे हे ॥ १३ ॥
टीका—सर्व लोगनकों यह दीसत जो केवल बालकहे कछु ओर ली-
लाकों नांही जानत, परम मुग्धहे, मातृचरण (श्रीयशोदाजी) श्रीनं-
दरायजी रोहिणीजी आदि वृद्धगोपगोपी सबकोउ केवल बालकही
जानतहे ओर अंतरंग ब्रजभक्त यह जानत हे जो सर्वलीलामें परम
चतुरहे मातृचरणके आगे मुग्धता जतावतहे तो कहा भयो ? यहभाव
ब्रजभक्त जानतहे । ओर कोटिकोटि कंदर्प जिनकी शोभा देखि
लज्जा पावतहे एसो लावण्ययुक्त जिनको श्रीअंग परम शोभायमा-
नहे । मानिनी जो श्रीस्वामिनीजी ताके मानकों हरतहे यह विलक्षण
रीतिहे जो एककालाऽवच्छिन्न सगरीलीलाको अनुभव करावतहे । सो
श्रीगुसांईजी पलनामें कहेहे जो 'मानिनीमानहरणम्' श्रीयशोदा-
जीके आगे पलनामें झलतहे ताही समय मानिनी (श्रीस्वामिनीजी)
को मान हरतहे ऐसे विरुद्धधर्माश्रय अलौकिक बालकहे ॥ १३ ॥

मूलं—स्वगोपिकागूढचौरः कृतसंकेतगोपनः ।

परमानंदसंदोहः सदा दुःखविवर्जितः ॥ १४ ॥

शब्दार्थः—अपनी गोपिकानके भावकों गूढ राखिवेवारेहे तथा चोरिवेवारेहे ओर कीये संकेतकं गुप्त राखेहे, उत्तम आनंदके समूहरूप हे, सदा दुःखरहितहे ॥ १४ ॥ टीका—अपनी गोपिका (श्रीस्वामिनीजी) को गूढभाव हे तिनके घर चोरि करी संकेत करतहे पाछें ओर गोपीजनके आगें स्वामिनीजीको संकेत दुरावत हे जो यह न जानेतो आछो । अथवा समस्त गोपीजनके घर श्रीठाकुरजी गूढभावसों छिपि कें पधारतहे दूध दही माखन सगरी सामग्री अरोगतहे पाछें वह गोपी आवतहे तब उनसों एकांतमें संकेत करत हे पाछें कोउ गोप आवतहे अथवा मातृचरण श्रीयशोदाजी आवतहे तिनके आगें वह संकेतको गोपन करतहे तथा समस्त भक्तनके संग संकेत करतहे सो एकएक भक्तनके आगें संकेत गोप्य राखत हे वह जानतहे जो हमही-कों श्रीठाकुरजी मिलेहे ओरकों नांही, या भांति रमण करत हे । अथवा समस्त भक्तनके मध्यमें श्रीस्वामिनीजी बैठेहे तब श्रीठाकुरजी सेनमें श्रीस्वामिनीजीकों गूढभावसों ओर कोउ न जाने या भांति जतावतहे जो फलाने ठोर आवो तहां संकेतहे तब श्रीस्वामिनीजी कल्लु मिसतें श्रीठाकुरजीके पास पधारतहे पाछें अनेक भांति लीला करी सब सुखीनके आगें रसलीला गोप्य करतहे । परम आनंद रूपहे तातें समस्त भक्तनकों परमानंदको दान करतहे ओर सर्वकाल विषे दुःख करिकें रहितहे ॥ १४ ॥

मूलं—असमक्षो दुःखितानां प्रपंचसुखिनामपि ।

दयानिधिर्मुग्धभावः स्वीयवाक्यैककारकः ॥ १५ ॥

शब्दार्थः—दुःखयुक्तकों ओर प्रपंचतें सुखीनकोंह समक्ष नही हे ओर दयानिधिहे मुग्धभाव दिखावेहें तथा अपनैं भक्तनके वाक्यकों मुख्य करिवेवारेहे ॥ १५ ॥ टीका—लौकिक प्रपंचके अनेक प्रकारके

काम क्रोध मोह मद मात्सर्यादि मायासंबंधी दुःखहे तिन सवनके खननहारे हे । जो अविद्यारूप पूतना हती ताकों श्रीठाकुरजी मारिकें समस्त भक्तनकी अविद्या दूरि कीनी काहेतें जो भक्तनको सामर्थ्य अविद्या दूरि करनको नांही हतो सो श्रीठाकुरजी अपने भक्तनके अर्थ ब्रजमें अवतार धरेहे तातें सवनकी अविद्या दूरि करि अनेक लीलारसको अनुभव कराये परमसुख दीये दुःखको नाश कीये काहेतें जो दयानिधि हे भक्त दुःख पावे, सो नांही सही सकत हे लोगनमें देखत मुग्धभावको अंगीकार कीयेहें मानों कछु जानतही नांही काहेतें जो भक्तनकों ईश्वरभाव प्रकट होय तो वात्सल्यभाव छुटि जाय ईश्वरतासों करे तो यह जाने जो सगरे जगतके पोषणकर्ता हे इनकों में भोग कहां धरूं ? आभूषण वस्त्र खिलोनां कहां देऊ ? सगरो श्रीठाकुरजीकोहीहे या भांति स्नेह छुटे तो तो पुष्टिभक्तिकी प्राप्ति न होय तातें श्रीठाकुरजी मुग्ध लौकिक बालककीनाई लीला करतहे; भूखे होत हैं तब रुदन करिकें हट करिके मातासों भोजन मांगत हे तातें भक्तनपर कृपा करिवेके लिये मुग्धभावकों श्रीठाकुरजीने धारण कियोहे मुग्धभावमें थोरीसी वस्तुसों संतुष्ट होतहे जो ईश्वरता सहित प्रभु मागे तो भक्तनसों दीयो न जाय जेसैं राजा बलिसों तीन पेड धरती मांगी सो राजा बलितें दीनी न गई । तातें मुग्धभाव होय ब्रजभक्तनको सुख देतहे ओर अपने ब्रजभक्त जो अंगीकृतहे तिनके वाक्यके पूर्णकर्त्ताहे सो श्रीभागवतमें कहेहें जो कोउ ब्रजभक्त कहत हे जो पीढा उठाय ल्यावो, कोउ कहतहे उन्मान (पालीप्रभृति) ल्यावो, कोउ कहतहे पादुका ल्यावो, तुमकों माखन देऊंगी, कोउ कहतहे नांचो, तब श्रीठाकुरजी सबको कह्यो करत हे जो प्रकार ब्रजभक्त सुख पावतहे सोही श्रीठाकुरजी करतहे ॥ १५ ॥

मूलं-प्रपंचनाशनस्वीयनिरोधकृतितत्परः ।

बालभावग्रहपरः क्षणक्षणविलक्षणः ॥ १६ ॥

शब्दार्थः—अपने भक्तनकों प्रपंचनाशपूर्वक निरोध करिवेमें तत्पर रहे ओर बालभावकों ग्रहण करतहे तथा क्षणक्षणमें विलक्षणहे ॥ १६ ॥ टीका—श्रीठाकुरजी अपने निजभक्तनके लौकिकगृहाद्यासक्त मनहे तहांतें छोडाय आपमें लगावतहे तातें ब्रजभक्तनके घर श्रीठाकुरजी चोरी करनकुं पधारतहे, ब्रजभक्तनके दूध दही मांखनकी चोरी करि उनके मनमें श्रीठाकुरजी अपनो ध्यान करायो जो अब चोरी करनकों प्रभु आवत होयगें ओर वेणुनाद करि सर्व भक्तनको मन हरि लीनो ताकरि पति पुत्र गृहादि देहसंबंधी सवनकों भूलिजातहे ओर अविद्यारूप पूतनाकों मारिके समस्त भक्तनकी अविद्या दूर कीनी हे, अपने भक्तनके निरोध करिवेमें तत्परहे, इंद्रयज्ञ ब्रजवासी करत हते सो इंद्रको यज्ञ छुडायो गिरिराजकी पूजा कराय आपु सगरी सामग्री अंगीकार कीनी संयोगात्मक सगरी लीला करि बाहिरकी सगरी इंद्रियनको निरोध कीयो ओर वनांतरदेशांतरलीला करि मन इंद्रियनको निरोध कीयो । जेसँ रास-पंचाचार्यामें प्रथममुरली बजाय घरतें ब्रजभक्तनकों बुलाय रमण करि सर्वांगविहार करि बाहिरकी सगरी इंद्रिय शुद्ध करि पाछें अंतर्धान होयकें अंतःकरणमें रमण करि वाकुं शुद्ध करि प्रभु हृदयमें विराजे । या प्रकार संयोग विप्रयोग भक्तनकों देय निरोध सिद्ध कीयो ओर बालभावको मिसकरि ब्रजभक्तनके घर पधारतहे ताको कारण यहहे जो ब्रजभक्तनके गोपादिक मर्यादाप्रवाही हे तिनकों रहस्य लीलाको ज्ञान न होय, बालक देखिके काहूकी विषम बुद्धि

नहोय, या भांति ब्रजभक्तनके पास श्रीठाकुरजी आयकें अनेकलीला क्षणक्षणमें करतहे जा भक्तनको जेसो मनोरथहे ताकों ताही भांति अनेक चेष्टाकरि लीला करि सकल मनोरथ पूर्ण करि फेरि वालभावको अंगीकार करि घर पधारतहे ॥ १६ ॥

**मूलं-क्षणं क्रुद्धः क्षणं तद्दृष्टः स्वल्पवस्तुषु तोषितः ॥
स्वकीयहृदयाभिज्ञस्तदन्यज्ञानवर्जितः ॥ १७ ॥**

शब्दार्थः-क्षणमें क्रोधयुक्त और क्षणमें हर्षयुक्त होयजात हे अपने भक्त थोरी वस्तुदेय तामें संतुष्ट होत हे अपने भक्तके हृदयके मनोरथकुं जानिवेवारेहे ता सिवाय ओर कछु नांही जानतहे ॥ १७ ॥ टीका-वाललीला करि एकक्षणमें क्रोधित होतहे तनक श्रीयशोदाजी गृहके कार्यमें लागी तो दहींको माट फोरिडारे, मांखन बंदरनकुं लुटायदे भूमिपर लोटे, कोटिकोटि उपायसों श्रीयशोदाजी मनावे सो माने नांही, कबहू चंद्रमा देखी अड करे, कबहू तनक भोजन-मांखनकी ढील होय तो सही न सके, क्रोधवंत होयजाय, कबहू हसिदेय, स्वल्पवस्तु करि संतुष्ट होयजातहे, श्रीनंदरायजी खिलोनां तथा फूल तथा फलादि ल्यावतहे सो देखि बोहोतहीं प्रसन्न होय जातहे, ब्रजभक्तन नूतन सामग्री, नवनीत, थोरीसीहू कछु नईवस्तु, ल्याय श्रीठाकुरजीकों देतहे ताकरि श्रीठाकुरजी अत्यंत संतुष्ट होतहे, अपने स्वकीय ब्रजभक्तनके हृदयमें जेसो मनोरथ होय ताही कार्यमें श्रीठाकुरजी तत्परहे ओर बात जानत नांही, अपने निजभक्तनके हृदयके अभिप्राय बिना कछु ज्ञानहू मनमें राखत नांही । काहेतें जो ब्रजमें श्रीयशोदाजीके घर प्रभु पधारैहें सो केवल ब्रजभक्तनके सुखदानार्थ पधारैहें तातें पुष्टिमार्गमें प्रभु भक्ताधीनहे अन्यज्ञान करि रहितहे ॥ १७ ॥

मूलं—गूढलीलापरो भक्तगूढभावरसात्मकः ।

सेवनीयः सावधानैर्विपरीतगतिक्रियः ॥ १८ ॥

शब्दार्थः—गूढलीला करिवेवारे ओर भक्तनके गूढ भावके रसात्मक तथा विपरीत गति ओर क्रिया वारे श्रीठाकुरजी सावधानतासों सेवा करिवेयोग्यहे । (यह अठारेश्लोककरिकें जो स्वरूपगुणवर्णन कीये ऐसे श्रीठाकुरजी वोहोत सावधान होयकें सेवनयोग्यहे) ॥ १८ ॥ टीका—भक्तनके संग गूढलीलामें परायणहे, गूढ लीला सो रासलीला तामें अनेक प्रकारके रास दो दो गोपी विच विच माधो तथा सोरह गोपिनके मध्यमें अष्ट कृष्ण होतहे तथा भक्तभक्त प्रति भगवान् या भांति अनेक रासलीला मानलीला अनेक भांतिके विहार अनेक भांतिकी जलक्रीडा अनेक भांतिके श्रीचूदावनमें निकुंज कीयेहे ओर ब्रजभक्तनके घर बालस्वरूपतें किशोर होय अनेक लीला करतहे तथा खिरकमें गाय दुहावनमें अनेक लीला करतहे सो लीलासमुद्रको पार नांही तातें गूढलीला परायणहे गूढलीलाहे जिनके भावकी काहूको खबरि नांही रसात्मक श्रीठाकुरजी रसात्मक ब्रजभक्त सो रसमयी अनेक भांतिकी लीला करतहे । ऐसे रसात्मक श्रीयशोदोत्संगलालितहे सो श्रीहरिरायजी श्रीगोपेश्वरजीको पत्रमें लिखेहे जो ऐसे प्रभुकी सेवा अत्यंत सावधानतासों कर्तव्यहे काहेतें जो प्रभुकी विपरीत गतिहे विपरीत क्रियाहे एकक्षणमें प्रसन्न होय एकक्षणमें क्रोध करे तातें लौकिकमें मन न राखियें प्रभुमें मन राखियें जो मति कहु अप्रसन्न होय या भांति भयसंयुक्त सेवा करियें १८

मूलं—श्रीमदाचार्यकृपया तिष्ठति स्वगृहे हरिः ।

एवंविधः सदा हस्ते योगिनः पारदो यथा ॥ १९ ॥

शब्दार्थः—श्रीमदाचार्यजीकी कृपातें ऐसे (पूर्वोक्तगुणविशिष्ट) हरि अपने गृहमें विराजतहे सो जेसैं योगिजनके हस्तमें पारद सावधानतासों रहे तो कल्पतरु समान फलदेय ओर सावधान न होय तो हस्तसों निकसिजाय ओर फलहु नाहीं देय तेसैं अपने हस्तमें सदाही श्रीकृष्ण विराजतहे तिनकी सावधानतासों सेवा करनी ॥ १९ ॥

टीका—एसैं ब्रजभक्तके भावात्मक स्वरूप अपने घरमें विराजतहे सो श्रीआचार्यजी महाप्रभुजीकी कृपातें विराजतहे अपने प्रेम (स्नेह-भक्ति) को ओर कछु साधनको बल मति जानियो । ऐसे रसात्मक भावात्मक प्रभुकी सेवा अपन कहा करिवे योग्यहे ? परंतु श्रीआचार्यजीकी कानितें प्रभु घरमें विराजेहे याप्रकारको भाव अपने मनमें सदा जानों । प्रभुकेसेहे जो योगिजनके ध्यानमे नाहीं आवत अनेक जन्ममें अनेक साधन करतहैं तिनकों सपनेहुमें दर्शन दुर्लभहे सो प्रभु श्रीआचार्यजीमहाप्रभुजीकी कृपातें साक्षात् अपने घरमें विराजतहे यह अपने मनमें सदा विचार करि सावधानतासो सेवा करियें मति कहूं अपराधपरे, अपराध परे तो प्रभु अप्रसन्न होय जाय ॥ १९ ॥

मूलं—चिंतनीयोऽनवसरे सेवायाः सर्वथा धिया ।

यतो निरोधसंसिद्धिः सेवाया हार्दया भवेत् ॥ २० ॥

शब्दार्थः—सेवाके अनौसरमें बुद्धितें सर्वथा चिंतन करिवेयोग्यहे जातें निरोधसिद्धि मानसी सेवातें होय ॥ २० ॥ टीका—एसे यशोदोत्संगलालित भावात्मककी सेवा मनलगाय करनी उचितहे पाछें अनौसर होय तब उपर कहिआये ता भांति हृदयमें चिंतन करनो सदा अति स्नेहसों सर्वथा धर्म जानि सेवा करनी ताही भांति अनौसरमें सर्वथा चिंतन करनो तब निरोध सिद्ध होयगो । जेसैं ब्रजभक्तनकों निरोध सिद्ध भयो संयोग विप्रयोगर-

सको अनुभव भयो तेसेही सेवासमय संयोगकी भावना अनोसरमें विप्रयोगकी भावना करे यह हार्दसहित सेवा करे तब निरोध होय । यह वीसश्लोकको शिक्षापत्रहे सो श्रीआचार्यजी महाप्रभु वीसश्लोकको निरोधलक्षण ग्रंथकीयोहे ताभावके अनुसार श्रीहरिरायजी यह शिक्षापत्रमें निरोध पुष्टिमार्गीयजीवनकों जाभांति सिद्ध होय सो प्रकार कहेहे जेसँ निरोधलीला श्रीभागवतदशमस्कंध सर्वोपरहे तेसेही यह सर्वोपर निरोधप्रकार कहे हे ॥ २० ॥

इति श्रीहरिरायजीकृतं द्वितीयं शिक्षापत्रं श्रीगोपेश्वरजीकृतव्रजभाषाटीकासमेतं संपूर्णम् ॥ २ ॥

शिक्षापत्र ३.

अब तृतीय शिक्षापत्रमें भगवद्भावके साधकबाधकको निरूपण करेहे उपर कहिआये तारीतिसों सेवाहू करे तथा अनोसरमे चिंतनहू करे परंतु दुःसंग मिले तब एक क्षणमें सगरे धर्मको नाश होय जाय जन्मजन्मको भाव दुःसंगतें जात रहे तातें याकालमें दुःसंगतें बचनो सो निरूपण करतहे ॥

मूलं-निधिः प्राप्तः सुसंरक्ष्यो दुःसंगादिकतः सदा ।

त्यक्त्वाऽपि लोकसंकोचं यथा वह्निर्जलादिभिः॥१॥

शब्दार्थः-जो भगवद्भावरूपनिधि प्राप्त भई हे सो लोकके संकोच-कोहू त्याग करके निरंतर दुःसंगतें आछीभांतिसों जलसों वह्निर्जलांइ रक्षा करिवेयोग्यहे ॥ १ ॥ टीका-जो निधि प्राप्त भयोहे ताकी रक्षा

कर्त्तव्यहे जैसे काहू कृपणको धन मिल्यो सो वह द्रव्यकी रक्षा जतनसों न करे तो द्रव्य चोर लेजाय तेसैंही यह भगवद्भावरूप निधिकी प्राप्ति श्रीआचार्यजीकी कृपातें भईहे तानिधिकी दुःसंगतें रक्षा अवश्य कर्त्तव्य हे । तामें दुःसंग अनेकप्रकारकोहे लौकिक विषयादि तथा अन्यमार्गीयको संग तथा देहसंबंधी कुटुंब लौकिक वैदिक कार्य इन सबनतें मन निकासि प्रभुमें राखनो । तहां कोउ कहे जो गृहस्थाश्रममें रहेनो तब लौकिक वैदिक कार्य कीयेविना कैसे बने ? तहां कहतहे जो भगवत्सेवा पुष्टिमार्गीयधर्मतो अपने मनतें स्नेहपूर्वक करे ओर लौकिक वैदिक लोगनके दिखायवेके लीये (इच्छारहित होयके) करे सेवासमय सेवा छोडि न करे सेवामें लौकिक संकोच न करे जैसे दामोदरदास संभरवारे श्रीद्वारिकानाथजीकी सेवा करते सो जल अपने हाथसों भरिलावते तहां दामोदरदासके ससुरने कहि जो तुम जल भरतहो सो हमको बोहोत लज्जा आवत हे तातें जल लौंडी पास भरावो तब दामोदरदासने कही अब एसेही करेंगे पाछें अपनी स्त्रीसों कहे चलो जल भरि ल्यावे तब स्त्रीतो भगवदीय हती तासों तत्काल कलसा ले दोउ जने चले सो जल भरिकें ससुरके हाट आगें होयके निकसे तब ससुर आय दामोदरदासके पायन पड्यो ओर कह्यो जो में चूक्यो जो तुमको कह्यो अब तुमही जल भरो स्त्रीजनसों जल मति भरावो तब दामोदरदासने कह्यो कालितें न भरावेंगे । या भांति भगवत्सेवामें लोकसंकोच सर्वथा नांही कर्त्तव्यहे छोटि बडी सब सेवा भावपूर्वक प्रेमसों करनी । या भांति दुःसंगको जाननों । भगवद्भावहे सो तो अग्निरूप हे ओर दुःसंग हे सो जलवत् भावको नाशकर्त्ता हे ॥ १ ॥

मूलं-वह्निवत् भगवद्भावः सत्संगव्यवधानतः ।

नाशयेत् संसृतिं यद्वत्पात्रव्यवहितं जलम् ॥ २ ॥

शब्दार्थः—अग्निरूप भगवद्भाव सत्संगके व्यवधानतें संसृति जो अहंताममतात्मक संसाररूप दुःसंग ताको पात्रके व्यवधानयुक्त जलकी नाई नाश करत हे [मतलब यहहे जो पात्रमें जल होय ताको नाश जैसे अग्नि करेहे तेसें सत्संगके व्यवधानमें रह्यो जो संसार ताको नाश भगवद्भाव करे हे] ॥ २ ॥ टीकाः—भगवद्भाव अग्निरूपहे ओर सत्संग काष्टरूपहे जैसे अग्निमें काष्ट परे तो ओरहु अग्नि बड़े तेजःपुंज होय तेसेंही भगवद्भाव सत्संगपायके बड़े दृढ होय । ओर भगवद्भावरूप अग्निहे सो दुःसंगरूपी जलतें नष्ट होय जैसे थोडोसो अग्नि होय तामें जल डारेतें वा अग्निको नाश होय तेसेंही भगवद्भावको नाश दुःसंगतें होय । तहां कोई कहे जो लौकिकमें रहे विनातो चले नाहीं तब कहा करनों ? तहां कहतहे जो दुःसंगरूपी जलको सत्संगरूपी पात्रमें राखे तब वह दुःसंग भगवद्भावको नाश करि शके नाहीं । जैसे अग्निको जलको साक्षात्संबंध होय तो अग्निको नाश होय ओर एक पात्रमें जल करिकें अग्नि उपर धरे तो जलको नाश होय अग्निको नाश न होय ऐसे भगवद्भावरूपी अग्निको सत्संगरूपी काष्टतें बढाये जाय ताकरि दुःसंगरूपी जलको पात्रमें धरि (अपने हृदयमें अष्टप्रहर विचार करि) जराय देय तबहीं बचे । आगे बड़ेबड़े भगवदीय दुःसंगतें गिरेहें तातें दुःसंगतें सदाही डरपत रहेनो ॥ २ ॥

मूलं—जलवल्लौकिकं प्रोक्तं साक्षात्तन्मेलनेन तु ।

मूलतो नाशयेद्भावं यथा वैश्वानरं जलम् ॥ ३ ॥

शब्दार्थः—लौकिक जलवत् कह्योहे ताको साक्षात् भावसो संबंध भयेसूं जैसे जल [साक्षात् संबंधतें] अग्निको नाश करे तेसें मूलतें भगवद्भावको नाश करे ॥ ३ ॥ टीका—यह संसारमें लौकिक दुःसंग हे सो जलवत् हे सो जलकूं पात्र विना साक्षाद्भगवद्भावरूप अग्निमें नाहीं

डारनो जेसैं साक्षात् जल डारे तो वैश्वानर जो अग्नि ताको मूलतें नाश होय । जेसैं जडभरत सगरो लौकिक छोड़िकें भगवद्भजनकरिवेकूं वनमें गये तहां हरनी जलपीवनकों आई सो सिंहनादतें कूंदपरि ताके गर्भमेंतें बच्चा जलमें गियो सो भरतकों दया आई यहही दुःसंग भयो भगवद्भाव भगवद्भजन छुटि गयो तवही हरनीके संगतें तीनजन्मको अंतराय भयो एसो दुःसंग बाधकहे । तथा श्रीनंदरायजी अपने पुत्रकी सेवा करतहते सो अविकापूजनकों गये सो श्रीठाकुरजी सही न सके तहां सुदर्शनसर्प आयकें श्रीनंदरायजीकों प्रसीलीये तब श्रीठाकुरजीने छुड़ाये । तातें अन्य संबंध तथा दुःसंग सिद्ध भक्तनकों विशेष बाधकहे सो साधन दशावारे भक्तनकों लगे तामें कहा कहेनो । तातें दुःसंगकों यह जाने जो हमारे सर्व भावको नाशही करेगो या प्रकार दुःसंगतें भावकी रक्षा करे ॥ ३ ॥

मूलं-अतः सदैव भेत्तव्यं लौकिकासक्तितो जनैः ।

सत्संगमग्रतः कृत्वा नाशनीया न चान्यथा ॥४॥

शब्दार्थः—(उपर कहे तारीतिसों भगवद्भावकी रक्षा करनी क्यों जो दुःसंग बाधकहे) तासों लौकिक आसक्तितें सदाही भगवदीय जनकों डरपत रहनों । पेहेलें सत्संग करिके लौकिकासक्ति नाशकरिवे योग्य हे सत्संग न करे तो पाछें लौकिकासक्तिको नाश होयसकत नाहीं ॥४॥ टीका—लौकिकासक्तिरूप दुःसंगतें सदा डरपत रहनों यह न जाने जो जब दुःसंग लौकिकासक्ति होयगी तब में सत्संग करि लेउंगो जाही समयदुःसंग मिल्यो ताही समय तत्काल लौकिकासक्ति होय भगवद्भावको नाश होयगो तातें दुःसंग मिले तापेहेलेंहितें सत्संग कीयो भरे तब दुःसंग बाधा न करे ताको दृष्टांत कहतहे जो जीवको पीछें काल फिरतहे जो पेहेलेतें स्मरण भजन करिराखेतो पीछे अंतका-

लसमय काल वाधा न करे । जोजाने अवतो लौकिक करिलेउं पीछें भगवत्स्मरण करुंगो ताकूं काल आवे तो एक क्षणमें स्थायजाय तब वा समय कछुहू भगवद्धर्म न वने तातें पहेलेतें सत्संगहू करे ओर भगवत्सेवा स्मरणहू करे सो जव लौकिक दुःसंग आवे तब सत्संगके प्रतापतें बचीजाय सत्संगविना दुःसंगतें बचिवेको ओर उपाय नांहीहे यह निश्चय जाननो ॥ ४ ॥

मूलं--सता परोक्षे सत्संगजातभावो विभाव्यताम् ।

तद्विरुद्धवचो नैव माननीयं सतां कचित् ॥५॥

शब्दार्थः--सत्संगमें जो भाव उत्पन्न भयो वाकी भावना सत्पुरुषके परोक्षमें करनी ओर सत्पुरुषके वचनतें जो विरुद्ध वचन होय सो काहू समय नांही माननो ॥ ५ ॥ टीका--अब उपर कहे जो सत्संग करिकें, दुःसंग वाधा न करेगो तहां कोई कहे जो सत्संगतो दोयघडी चार घडी बनेगो पाछें सेवास्मरण लौकिक वैदिक कार्यहू सब कयों चाहियें तब दुःसंगतें कोन प्रकार बचेगो ? या भांति कोई कहे तहां कहतहे जो नित्य नियम करि जेसैं भगवत्सेवा स्मरण करे तेसैंही सत्संग एक घडी दोय घडी बने तितनोही करे पाछें सत्संगके परोक्षमें जो जो वार्त्ता सत्संगमें भयी होय ताको स्मरण करि अपने धर्मकों देखें जो श्रीआचार्यजी श्रीगुसांईजी तो या भांति कहे हे ओर में कहा करतहूं जो विरुद्ध होय ताके त्यागमें मन करे जा प्रकार कहे हे सो करनको मन करे । या भांति मनकों जो कोई भगवद्धर्ममें लगाय-राखेगो सो दुःसंगतें बचेगो जो वार्त्ता भगवदीयके मुखसों सुनीहे तामें दृढ विश्वास करि उह वार्त्ताकी भावना मनमें करियें तब मन ठिकाने आवे । जेसैं गाय वनमेंतें चरि आवत हे पाछें घर आयकें फेरि बैठिकें चर्वण करि स्वाद लेत हे तेसैं वैष्णवको संग होय ता समय

भगवद्धर्मको श्रवण करे पाछें सत्संगके परोक्षमें अपने हृदयमें मनन करिकें भावनासों रसको आस्वादन करे । सत्संगतें विरुद्ध वचन जितने हे तिनकों विचारि धर्म अधर्मको विचार मनमें राखे । ओर सत्संगतें विरुद्ध वचन न कहे, जामें सत्संग छुटिजाय एसो कबहू न करे ॥ ५ ॥

मूलं-भरतस्यापि दुःसंगे जाता हरिणजातिता ।

केवलं कलिदोषाभिभूता अपि जनाः स्वतः ॥६॥

तत्संगनिरतैर्नैव भवितव्यं विशेषतः ।

अथवा सर्वतो मौनं तदभावे विधीयताम् ॥७॥

शब्दार्थः-जडभरतकोहू दुःसंगमें हरिणजातिपनों भयो ओर सगरेजन आपतें हू केवल कलिदोषके जीतेभयेहे ॥ ६ ॥ तासों विनके संगमें विशेष करिकें प्रीतियुक्त नही रहेनो अथवा तेसैं न बने तो मौन राखनो ॥ ७ ॥ टीका-दुःसंगको मनमें भय राखे अपनो काल जाने काहेतें जो दुःसंगदोष होय तो हरि जो भगवान् सो दूर जात रहतहे सो श्रीआचार्यजी महाप्रभु संन्यासनिर्णय ग्रंथमें कहे हे “ विपयाक्रांतदेहानां नावेशः सर्वथा हरेः ” (जहां दुःसंगदोष करि देह विपयाक्रांत भयो ता देहमें भगवदावेश निश्चय न होय) तातें दुःसंगदोष महा बाधक हे ओर यह जगतमें भूतप्राणिमात्र हे सो सहजहीमें दोष करि भरे हे काहेतें जो यह कलिकाल महाकठिनहे अपने मनहूको विश्वास न करे जो में वोहोत समुझतहूं मेरे दृढ ज्ञान वैराग्य हे मेरो मन तो मेरे वश्य हे यह न जाने जासमय दुःसंग मिल्यो ता समय ज्ञान, वैराग्य, विवेक, धैर्य सब एक क्षणमें जात रहेगो । तातें अपने मनकों, इंद्रियकों, देहकों, कलिके दोष-

रूपही जाने ओर यह जाने जो सत्संगके प्रतापतें में वचतहूं
जासमय दुःसंग मिलेगो ताहीसमय में गिरुंगो एसो ज्ञान मनमें
राखे जो यह कलियुगने सगरे प्राणीमात्रकी बुद्धि हरिलीनीहे
कलिको दोष सवनकों लग्योहे, एसो जो दुसंगदोष सर्व धर्मको
नाशक हे तिनतें न्यारो यह जीव रहे तवही भगवद्भाव विशेष
होय, ओर उपाय कोई नांहीहे । तहां कोई कहे जो दुःसंग प्रबल
होय अपने वश न होय अपने घरके पडोसमें होय तथा कहूं
जीविका होय तहां दुःसंग होय अथवा अपने कुटुंबमें होय अपनेतें
यह दुःसंग निवारण न होय ओर जीवकों घरमें रहे बिनातो बने
नांही तहां दुःसंग प्रबल होय तो कहा करे ? तहां श्रीहरिरायजी कहतहे
जो मुख्य तो यहही हे जो अपने समुझायेतें अपने उपायतें दुःसंग
छुटत होय तो छोडाईयें अथवा आप छोडिकें ओर ठोर निर्वाह करिये
अपने काहूभांति दुःसंग न छुटे तो तहां मौनहोय रहियें बोलियें
नांही, जहां अपनो कह्यो न होय तहां अपने मनको भाव भग-
वद्धर्म वार्त्ता कवहू न कहियें उनतें मन न्यारो राखियें काहेतें जो जाकों
भगवद्धर्म सुनिवेकी श्रद्धा न होय तिनके आगें भगवद्धर्म सर्वथा न
कहियें काहेतें जो भगवानमें तथा भगवद्धर्ममें भेद नांहीहे एकही
पदार्थहे तातें भगवानको अतिक्रम होतहे यह विचारि जहां दुःसंग
प्रबल होय तहां वाद न करियें मौन रहियें मनमें हरिशरणकी भावना
करियें श्रीआचार्यजी महाप्रभु विवेकधैर्याश्रयग्रंथमें कहेहे “ दुःख-
हानौ तथा पापे भये कामाद्यपूरणे । भक्तद्रोहे भक्त्यभावे भक्त-
श्रातिक्रमे कृते ॥ अशक्ये वा सुशक्ये वा सर्वथा शरणं हरिः ”
(दुःखकी हानिमें तथा पापमें भयमें कामादिककी अप्राप्तिमें भक्तके
द्रोहमें भक्तिके अभावमें भक्तनके अतिक्रम कीयो होय तामें अश-

क्यमें तथा सुशक्यमें निश्चय हरिशरणहे) या भांति हरिशरणकी भावना मनमें करिकें चुप्प होयरहियें ॥ ६-७ ॥

मूलं—यो वदत्यन्यथावाक्यमाचार्यवचनाजनः ।

संस्मृतिप्रेरको वाऽपि तत्संगो दुष्टसंगमः ॥ ८ ॥

शब्दार्थः—जो जन श्रीआचार्यजीके वचनमें अन्यथा वाक्य कहे अथवा अहंताममतात्मक संसारमें आसक्ति करिवेकी प्रेरणा करे तिनको संग सो दुष्टसंग जाननो ॥ ८ ॥ टीका—अब कोई कहे जो दुःसंग अथवा भगवद्धर्ममें विरोध किनकों कहिये तहां कहतहे जो श्रीवल्लभाचार्यजीके वचनतें सिद्धांततें अन्यथा वचन कहे ताके वचन अन्यथा (झुठो) जाने श्रीआचार्यजीतें विरुद्धधर्ममें बोध करिकें चलाव अन्यमार्गकी रीति कहे तिनकों दुष्ट करिकें मनमें जाने जो याके वचन मानेतें मेरे सर्वधर्मको नाश होयजायगो तातें अन्यमार्गीयके पास न वेठियें अन्यसंबंध होयजाय, अन्यमार्गके धर्म सुनियें नांही अन्यमार्गीयक्रिया कछु न करियें, सो गोविंददुबेकी वार्त्तामें प्रसिद्धहे जो एकसमे गोविंददुबे मीरांवाईके घर गये तहां मीरांवाईने आदरसन्मानकरि गोविंददुबेकों राखे सो मीरांवाई भगवद्भक्त हती परंतु श्रीआचार्यजीमहाप्रभुके पुष्टिमार्गमें नांहीहती मर्यादामार्गमें हती सो यह गोविंददुबेकी बात श्रीगुसांईजीने जानि जो गोविंददुबे मीरांवाईके घर हे तव श्रीगुसांईजी एक श्लोक लिखे “ भगवत्पदपद्म-परागजुषो नहि युक्ततरं मरणेऽपितराम् । इतराश्रयणं गजराजधृतो नहि रासभमप्युररीकुरुते ” (प्रभुके चरणारविंदकी रजको सेवन करिवेवारेकूं मरणतें अधिक कष्ट प्राप्त होय तथापि ओरको आश्रय करनों योग्य नहीहे) अयिगोविंददुबे (जेसैं हस्तिने धारणकीयो एसो पुरुष गर्दभको स्वीकार नांही करतहे) यह लिखिकें एक ब्रजवासीको दीये जो गोविंददुबेकों दीजो । सो ब्रजवासीने गोविंददुबेकों जाय

दीयो तव गोविंददुचे वांचतही उठि आये तातें यह पुष्टिमार्ग हे सो एसोहे । श्रीगुसांईजी गोविंददुचेसो कहि जो हाथीकी असवारी करी अब गधाकी असवारीको मन भयो हे ? तासूं पुष्टिमार्गमें अनन्य भाव राखियें । पुष्टिमार्गमें अन्यधर्ममें चलावे ताको दुष्टसंग जाननों तत्काल ताको त्याग करना ॥ ८ ॥

मूलं—यश्च कृष्णे रतिं नित्यं बोधयत्यप्रयोजनाम् ।

निरक्षेपः सात्त्विकश्च तत्संगः साधुसंगमः ॥ ९ ॥

शब्दार्थः—जो सदा श्रीकृष्णमें कारणरहित प्रीतिको बोध करे ओर निरक्षेप तथा सात्त्विक होय तिनको संग सो साधुपुरुषको संग जाननों ॥ ९ ॥ टीका—उपर कहे जो अन्यमार्गीयको संग न करे तहां कोई कहे जो किनको संग करे ? तहां कहतहे जो एक श्रीकृष्णफलात्मक भावात्मक ब्रजपतिहे तिनमें नित्य नूतन प्रीति होय ओर अवतारादिकमें न होय एसो अनन्य भाव जाको होय ओर एक श्रीकृष्णके चरणारविंदकी भक्ति बढिवेकोही बोध करे ओर हृदयमें यहही वासना रहे जो श्रीकृष्णके चरणकमलमें प्रीति होय ओर दुसरो प्रयोजन मनमें न होय निरपेक्ष होय काहूकी अपेक्षा न राखे यह मनमें जाने जो एक श्रीकृष्णही कर्ताहे ओर कोउ नांही काहूको भगवद्धर्म दिखाय अपनी प्रतिष्ठार्थ अथवा लाभार्थ भगवद्धर्म करत न होय ओर सात्त्विक होय, छल, कपट, काम, क्रोध, मद, मत्सर, हृदयमें न होय एसो धर्म जहां देखे ता भगवदीयको संग करे ॥ ९ ॥

मूलं—एवं निश्चित्य सर्वेषु स्वीयेष्वन्येषु वा पुनः ।

महत्कुलप्रसूतेषु कर्त्तव्यः संगनिर्णयः ॥ १० ॥

शब्दार्थः—एसें अपने (भगवदीय जन) ओर अन्य [लौकिक] इन सबनमें संगको निश्चय करिकें फिर उत्तम कुलमें जिनको

जन्महे तिनके विषयमें संग निर्णय करनो ॥ १० ॥ टीका—सर्वओरतें निश्चित होय लौकिक वैदिक ओर देहसंवंधी अनेक उपाधि गृहकार्यतें मन करि निश्चित होय । भगवत्परायण एतन्मार्गीय पुष्टिमार्गीय वैष्णवकों अपनो जाने जो श्रीआचार्यजी महाप्रभुके शरण ये हू आयेहे हमहू श्रीआचार्यजीके शरणहे यह वैष्णव हमारे संवंधीहे एसो स्नेह वैष्णवपर होय तिनको सत्संग कर्त्तव्य हे । अन्यमार्गीय जो जीवहे तिनसों जाकों प्रयोजन न होय । महत्कुलमें जन्म होय सो साक्षात् श्रीवल्लभकुलमें यह सगरो धर्महे एक श्रीकृष्णहीकी सेवा एक श्रीकृष्णहीको आश्रय इनहीमें हे तासों विनको सत्संग मन वचन क्रिया करिकें कर्त्तव्यहे । अथवा श्रीआचार्यजीके अंगीकृत पुष्टिमार्गीय, नाम, निवेदन, मर्यादा, सेवा, श्रीकृष्णमें रति, जाके होय एसे भगवदीयको निश्चयही सत्संग कर्त्तव्य हे । या भांति सत्संगको निर्णय कर्त्तव्य हे ॥ १० ॥

**मूलं—श्रीमदाचार्यचरणे मतिः स्थाप्या सदा स्वतः ।
तत एव स्वकीयानां सिद्धिः कार्यस्य सर्वथा ॥११॥**

शब्दार्थः—सदा श्रीआचार्यजीके चरणारविंदमें आपतें मति स्थिर करनी तामेंही भगवदीयनके कार्यकी निश्चय सिद्धि होय ॥११॥ टीका—श्रीआचार्यजीके चरणकमलमें जाकी मति दृढ एकरस स्वस्थ होय मन वचन करिके एक श्रीआचार्यजीके चरणकमलमें जिनकी बुद्धि होय तिनको संग करनो । श्रीसर्वोत्तमजीकी टीका श्रीगोकुलनाथजी विरचित हे तामें लिखे हे जो पद्मनाभदास सरिखे भगवदीय विरलहे एसे भगवदीयके हृदयमें श्रीआचार्यजी महाप्रभु नित्य विराजमान हे तिनके संगतें सकल कार्य सिद्ध होय, भीज्यो कपराहे ताकों रखे कपराको संबंध होय तो वह भीजे, तेसेही भगवदीयके संगतें

भगवदीय होय एसें स्वकीय भगवदीय मिलनें बहुत दुर्लभहे । ओर जहांताई एसे स्वकीय भगवदीयको संग नहोय तहांताई कार्यहू सिद्ध नहोय तातें भगवत्सेवास्मरण करियें, एसे भगवदीयके मिलवेको मनमें ताप राखियें तो श्रीआचार्यजी महाप्रभु कृपा करिकें मिलावे तब श्रद्धापूर्वक दीन होय उनको संग मन लगायकें करियें । जब वे भगवदीय प्रसन्न होय कृपा करि पुष्टिमार्गको प्रकार लीलाभाव बतावे तब कार्य निश्चय सिद्ध होय । ताहीतें श्रीआचार्यजी महाप्रभु आप नवरत्नग्रंथमें निरूपणकीयेहे “निवेदनं तु स्मर्त्तव्यं सर्वथा तादृशैर्जनैः” (निश्चय तादृशीयजनके संग मिलिकें निवेदनको स्मरण करना) निवेदनको स्मरण तादृशीयवैष्णवसों मिलिकें करे तो हृदयमें मार्ग-स्फूर्ति होय तातें सत्संग अवश्य कर्त्तव्यहे ॥ ११ ॥

मूलं—अवैष्णवत्वं मन्तव्यं तद्विरुद्धजनेष्वपि ॥

जीवेषु दोषवत्स्वेवं तथा तत्साम्यवस्तुषु ॥ १२ ॥

शब्दार्थः—पुष्टिमार्गते विरुद्ध जो जनहे तिनमें तथा भगवदीयमें दोषबुद्धिवारे जो जीवहे तिनमेंहू एसें अवैष्णवत्व माननों ॥ १२ ॥ टीका—वैष्णव ओर अवैष्णव केसें जानियें सो लक्षण कहतहे । जो श्रीआचार्यजीनें पुष्टिमार्ग प्रकट कीयोहे ओर श्रीगुसाईजीनें प्रकाश कीयोहे सो नामावलीमें नाम कहेहे “पुष्टिप्रवर्त्तकाय नमः” यह श्रीआचार्यजीको नाम, “पुष्टिमार्गप्रकाशकाय नमः” यह श्रीगुसाईजीको नाम हे । तासूं जो कोई पुष्टिमार्गकी रीतिसों विरुद्ध आचरण करे ताकों अवैष्णव जानियें जो कोई पुष्टिमार्गकी रीति प्रमाण चलतहे तिनकों वैष्णव जानियें, काहेतें जो शुद्धजीव होयगो तासों शुद्ध क्रिया वनेगी । सो जीव जगत्तमें तीन प्रकारकेहें सो पुष्टिप्रवाहमर्यादाग्रंथमें श्रीआचार्यजी महाप्रभु कहेहें—“इच्छामात्रेण मनसा प्रवाहं सृष्टवान् हरिः । वचसा वेदमार्ग

हि पुष्टि कायेन निश्चयः” (प्रभु इच्छामात्रते मनते प्रवाहकं तथा वचनते निश्चयवेदमार्गको ओर कायाते निश्चय पुष्टिको उत्पन्न करत-भये) श्रीठाकुरजी इच्छा करिके मनते सृष्टि प्रकट करीहे सो प्रवाही सृष्टिहे वाको मन कवहू भगवद्धर्ममें नाहीं लगे सदा दुष्टाचरणही करे ओर वचनकरिके श्रीठाकुरजीने सृष्टि प्रकट करीहे सो मर्यादासृष्टि वैदिककर्ममें लागी रहेहे ओर श्रीठाकुरजीने अपनी कायाते सृष्टि प्रकट करीहे सो पुष्टिजीवहे उनसो भगवत्सेवाही वने या रीतिसो तीन प्रकारके जीवहे ताते जीव दोषकरिके भयोहे सो प्रवाहीहे तासोही दुष्टाचरण करतहे ताको अवैष्णव निश्चय जाननो ॥ १२ ॥

मूलं—श्रीकृष्णः श्रीमदाचार्यस्तथा श्रीविठ्ठलेश्वरः ।

तथा लीलास्थसामग्रीनैतत्साम्यं कदाचन ॥ १३ ॥

शब्दार्थः—श्रीकृष्ण, श्रीमदाचार्यजी, श्रीगुसाईजी, ओर सब लीला सामग्री इनसवनके बराबर लौकिकमें काहूदिन ओर कछु नहीहे ॥ १३ ॥ टीका—अब श्रीहरिरायजी पुष्टिमार्गीयजीवनको शिक्षा करतहे जो यह भाव मनमें अहर्निश अवश्य राखियो अलौकिक पदार्थमें लौकिक-बुद्धि आवेतो वाको सर्वस्व नाश होय सो कहतहे—एक श्रीकृष्ण, श्रीआचार्यजी ओर श्रीविठ्ठलनाथजी तथा लीला सामग्रीमें ब्रजभक्त आदि श्रीआचार्यजीके पुष्टिमार्गमें सेवा सामग्री सब अलौकिक जाननी श्रीकृष्ण साक्षात् फलात्मक रसात्मक श्रीयशोदोत्संगलालित सर्वांगसुंदर ब्रजभक्तनके सर्वस्व जीवनधन सोहि श्रीकृष्ण अपने दैवीजीवनके उद्धारार्थ श्रीआचार्यजी महाप्रभुजीरूप ओर अलौकिक अग्निरूप प्रकटे सो अलौकिक मार्ग प्रकट कीये सोहि श्रीआचार्यजी अपनो दूसरोहि रूप श्रीगुसाईजीको धारण करि यह पुष्टिमार्गको प्रकाश कीये । जेसे श्रीकृष्णावतारमें सगरी लीला-

सामग्री (श्रीकृष्ण), श्रीनंदरायजी, श्रीयशोदाजी, आदि सब अलौकिक बाललीलारसमें मग्नहे, सखा ग्वाल येहू अलौकिक सख्यभावमें मग्नहे, गोपीजनमें अनेक भावहे श्रुतिरूपा, कुमारिका, मुख्य श्रीस्वामिनीजी वृषभानुजा, ओर श्रीयमुनाजी इनके अनेक यूथ अनेक सखी यह सब अलौकिक श्रीगिरिराज, वृक्षादिक, पशु, पक्षी, व्रजभूमि, गुल्म, लता, औषधि, निकुंज, आदि सब लीलासामग्री आभूषण वस्त्रादिसामग्री सब अलौकिकहे तेसेही यह श्रीआचार्यजी श्रीगुसाईंजीके पुष्टिमार्गमें सेवाप्रकार, वर्षदिनके उत्सव, नित्यसेवाको प्रकार, सामग्री, आभूषण, वस्त्र, सिंहासन, खंडपाट, पिछवाई, निजमंदिर, मणिकोठा, तिवारी, डोलतिवारी, रसोईघर, पानघर, फूलघर, शाकघर, भंडार, चोक, सेवक, कीर्त्तनीया, परिचारक, आदि सब सेवासंबंधी पदार्थ अलौकिक जानिये इनको भावात्मक जानिये इनमें लौकिकबुद्धि करे तो महा अपराध होय । या भावसों पुष्टिमार्गीय वैष्णवसेवा करे । यह भाव मनमें गुप्त राखे सो आगेके श्लोकमें कहतहे ॥ १३ ॥

मूलं—यदस्माभिः पुरा प्रोक्तं तच्चित्ते स्थाप्यतां सदा ।

न कुत्रापि च वक्तव्यं सांप्रतं विमुखा जनाः ॥१४॥

शब्दार्थः—जो हमने आगे कह्योहे सो सदा चित्तमें स्थापन करियो जो मार्गके वक्ताहे तिनतें कहनो ओर काहूके आगे मति कहियो काहेतें जो आजकाल सगरे जन बहिर्मुख होय गयेहें ॥ १४ ॥ टीका—अब कोई पूर्वपक्ष करे जो सेवासामग्री तुम सब अलौकिक बताये सो तुम अपनी युक्तियों कहतहो के कहू ग्रंथमें हे? के काहूसों सुनीहे? या भांति कोई कहे तहां श्रीहरिरायजी अपने छोटे भाई तथा अंगीकृत सेवकनसों कहतहे जो यह हम बडेनसों सुनीहे श्री-गोकुलनाथजी श्रीकल्याणरायजी आदि सर्व भावरसके अनुभवकर्त्ता-

के श्रीमुखसों सुनीहे । अथवा श्रीसुबोधिनीजीमें श्रीमहाप्रभुजी सब-
भाव कहेहे तथा ग्रंथमें श्रीगुसांईजी सगरि लीलासामग्री अलौकिक
वर्णन कीयेहे सो हम तुमसों अति स्नेहकरिकें कहतहे जो यह वार्त्ता
अपने चित्तमें सदा स्थापन करियो, कवहू कोईकाल भूलिकें लौकिक
मति जानियो ओर यह भाव काहूके आगें मति कहियो, तुम्हारो
अंगीकृत जाको हृदय शुद्ध होय हृदयमें दृढ श्रीआचार्यजी श्रीगुसां-
ईजीके चरणकमलको विश्वास होय तिनसों मिलिकें अलौकिकपदा-
र्थको विचार कर्त्तव्यहे ओर विमुखजन जाकी लौकिक बुद्धिहे तिनप्रति
कवहू अलौकिकपदार्थको भाव न कहियें । तहां कोई कहे जो समुझे
नांही ताके आगें कहियें तो यहहू जाने ओर तुम कहतहो न कहियें
ताको कारण कहा ? तहां कहतहे ॥ १४ ॥

मूलं—सांमुख्यबोधनं नैव जायते बाह्यधर्मतः ।

एकोपि दोषः सुदृढः सर्वं नाशयति ध्रुवम् ॥ १५ ॥

शब्दार्थः—बाह्यधर्मतें सन्मुखमें बोधन होय नांही काहेतें जो एक
हू अत्यंत दृढ दोष निश्चय सर्वको नाश करे ॥ १५ ॥ टीका—ओरके
आगें अलौकिक प्रकारहे सो न कहेनो या पुष्टिमार्गमें भगवदीय
विना अन्यहे तिनसों कहियें तो अपनो धर्म जाय ओरके
आगें कलु कहनेको प्रकार आय बने तो ज्ञान वैराग्यको प्रकार कहि
दीजियें, अलौकिकभावको प्रकार न कहियें । काहेतें जो अपने
हृदयको धर्म बाहिर प्रकाश करेतो धर्मरस बाहिर जातरहे हृदयतें
प्रभु जातरहे । तातें मुख्यधर्मको बाहिर प्रकाश सर्वथा न करनो, काहे
तें जो एकदोष यह जीवमें एसो दृढहे जो अलौकिकमें लौकिकबुद्धिहे
सो यह सर्वधर्मको निश्चयही नाश करतहे, सो अलौकिकपदार्थमें
लौकिकबुद्धि सबकीहे कोटानकोटिमें कोई एककी अलौकिकबुद्धि

होयगी सो सगरी वस्तु लीलामय देखेगो तिनसों लौकिकक्रिया कबहु न बनेगी । तातें यह एक महादोष जगतमें मिलिरह्योहे जो लौकिक बुद्धि अलौकिकमेंहे, तिनके सर्वधर्मको नाशहे कछु अनुभव नाहींहे । या प्रकार पुष्टिमार्गमें रहे तिनको श्रीआचार्यजीकी कृपातें भाव उत्पन्न होय स्वरूपानंदको अनुभव होय ॥ १५ ॥

मूलं-अस्माभिरेवं लिखितं निरपेक्षैः स्वभावतः ।

स्नेहेन सर्वथा चित्ते धीयतां यदि रोचते ॥ १६ ॥

शब्दार्थः-हमने निरपेक्ष होय स्वभावतें ऐसैं लिख्योहे सो रुचेतो निश्चय स्नेह करिकें चित्तमें धारण करोगे ॥ १६ ॥ टीका-अब श्री-हरिरायजीअपने भाई श्रीगोपेश्वरजीप्रति तृतीय शिक्षापत्र संपूर्ण करत हे तामें कहतहे जो यह शिक्षापत्र हम तुमकों लिखेहे सो तुम यह मति जानियो जो भाईके संबंधकरिके लिखे हे अथवा कछु लौकिक स्वार्थको भाव यह मनमें हे तुमकों प्रसन्न करिवेके अर्थहु नाहीं हे निरपेक्षभावसों लिखेहे श्रीमहाप्रभुजीकी निधि घरमें विराजतहे तिनकी सेवासामग्रीमें अलौकिक भाव होय तो आनंदको अनुभव होय यातें लिखेहें तातें जो तुम्हारे चित्तमें रुचेतो यह उपर जितनो प्रकार कह्यो हे सो चित्तमें निश्चय धारण करिवेयोग्य पदार्थ हे काहूके आगें प्रकाश करिवेयोग्य नाहीं हे । यह मार्ग श्रीआचार्यजी महाप्रभुजीको हे सो भावात्मक गोप्य हे तातें स्नेह करि अपने चित्तमें सर्वभावको धारण करोगे ॥ १६ ॥

इति श्री हरिरायजीकृतं तृतीयं शिक्षापत्रं श्रीगोपेश्वर-
रजीकृतव्रजभापाटीकासमेतं समाप्तम् ॥ ३ ॥

शिक्षापत्र ४.

अब चतुर्थशिक्षापत्रमें भावना निरूपण करतहे उपर कहे जो सत्संग करि दुःसंगको त्याग करे ताके हृदयमें भगवान् पधारे सो भगवान् श्रीकृष्णविरुद्ध धर्माश्रयहे तिनके स्वरूपको ज्ञान होय सो स्वरूप अब आगे सिद्धांतपूर्वक निरूपण करतहे—

मूलं-प्रभोर्धर्माः श्रुतौ प्रोक्तास्तथा भागवतेऽपि च ।

अप्राकृताः स्वरूपैकनिष्ठा भिन्ना न रूपतः ॥१॥

शब्दार्थः—प्रभुके धर्म अप्राकृत (मायासंबंधरहित) ओर एक स्वरूपमेंही स्थित स्वरूपतें भिन्न नांही ऐसे श्रुतिमें तथा श्रीभागवतमेंहू निरूपण कीयेहें ॥ १ ॥ टीका—प्रभु श्रीकृष्ण हे तिनके धर्म श्रुतिमें विस्तारकरिके कहे हे ओर श्रीभागवतमेंहू प्रभुके सब धर्म कहे हे सो श्रुतिके तथा श्रीभागवत दोउके वचन प्रमाण जाननें, जिनके हृदयमें श्रुतिके वचन ओर श्रीभागवतके वचन प्रमाण नांही हे सो जीवकों आसुरी जाननें, जिनके हृदयमें श्रुतिके वचन ओर श्रीभागवतके वचन प्रमाण हे तिनकों शुद्ध दैवीजीव जाननें । सो श्रुतिहू भगवानके स्वरूपकों अप्राकृत कहतहे ओर श्रीभागवतहू श्रीठाकोरजीके स्वरूपकों अप्राकृत कहतहे सो प्राकृत ओर अप्राकृतमें यह तारतम्य हे जो अप्राकृत हे सो सदा एकरस केवल आनंदमयहे तहां लौकिक मायाके गुणको प्रवेश नांही हे ओर प्राकृत हे सो मायाजन्य हे मायाकृत गुण काम, क्रोध, मद, मत्सर, सुख, दुःख सब लगे हे सो कालपायके प्रकटहोय तथा कालपायके नष्टहोयजाय यह प्राकृत जाननों । तातें प्रभुको स्वरूप अप्राकृत जाने । अप्राकृत प्रभुको स्वरूप जान्यो कव-

जानियें जब प्रभुके स्वरूपमें ओर नाममें दृढ निष्ठा होय । श्रीठाकुर-
जीके स्वरूपकी सेवा कीये बिना रह्यो न जाय ओर श्रीठाकुरजीके
नाम श्रीठाकुरजीकी लीलासंबंधी कीर्तन बिना न रह्यो जाय तब
जानियें जो श्रीठाकुरजीके नामरूपमें निष्ठा भई. श्रीठाकुरजीसंबंधी
धर्ममें सगरी इंद्रिय मन देह लग्यो रहे तब जानियें जो या वैष्णवपर
प्रभु कृपा कीये ॥ १ ॥

मूलं-कर्तृत्वसर्वरूपत्वसर्वाधारत्वमुख्यकाः ।

व्यापकत्वविरुद्धात्मधर्माद्याःश्रुतिरूपिताः ॥ २ ॥

शब्दार्थः-कर्त्तापनो, सर्वरूपपनो तथा सर्वाधारपनो यह मुख्यधर्म
ओर व्यापकत्व तथा विरुद्धधर्माश्रयत्व आदि सर्वधर्म श्रुतिमें निरूप-
ण कीयेहे ॥ २ ॥ टीका-श्रुति ओर श्रीभागवत प्रभुको अप्राकृत कि-
यारूप कहतहे जो रूप श्रीठाकुरजी चाहे सोहि रूपको अपने भक्तनके
सुखदानार्थ धरि लेई सो श्रीभागवतमें प्रसिद्ध वर्णन हे जब हिरण्य-
कशिपुने प्रह्लादजीको बहुत दुःख दीये तब प्रभु श्रीनृसिंहरूप धरिकें
हिरण्यकशिपुको मारे प्रह्लादकी रक्षा करि लीनी तथा श्रीयशोदाजीको
मुख्य बालभाव हे तिनके बालक होय पलनामें झूलत हे ओर
ब्रजभक्तनको पतिभाव हे तातें उनको रतिदान मानमोचनहू
करत हे एककालावच्छिन्न सर्व लीला करत हे काहेतें जो सर्वके
आधाररूप मुख्य श्रीकृष्ण हे कर्तुं अकर्तुं अन्यथाकर्तुं सर्वसामर्थ्ययुक्त
हे सगरे व्यापक हे सबठोर श्रीकृष्णकीही सत्ता हे ओर सबतें न्यारेहे
येही विरुद्धधर्माश्रय जो सबमेंहे ओर सबतें न्यारेहे । याभांति वेद,
पुराण, श्रीभागवत भगवानको अलौकिक रूप निरूपण करतहे ॥ २ ॥

मूलं-ऐश्वर्याद्या अंतरंगधर्मा भागवते तथा ।

तेऽपि स्वरूपभेदेन मर्यादापुष्टिभेदतः ॥ ३ ॥

सर्वेऽपि च विभिद्यंत इति श्रीमत्प्रभोर्वचः ।

अतोऽत्र पुष्टिमार्गीयमंतरंगं विशेषतः ॥ ४ ॥

शब्दार्थः—तेसैं ऐश्वर्यादिक अंतरंगधर्म श्रीभागवतमेंहू निरूपण कीयेहे सोहू मर्यादा ओर पुष्टि दोयभेदसों स्वरूपके भेद करके सर्व धर्महू भेद पावेहैं एसे आपके वचनहे तासों यहां विशेषसों अंतरंग पुष्टिमार्गीय धर्महे ॥ ३ ॥ ४ ॥ टीका—श्रुति ओर श्रीभागवत दोय भावको स्वरूप कहतहे एकभावतो ऐश्वर्यकोहे प्रभुकों व्यापक सर्वके आधाररूप कहतहे सो मर्यादाभक्त ऐश्वर्य जानि भजन करतहे श्रुति नेतिनेति कहतहे ब्रह्मा, शिव, शेषादिक ऐश्वर्यभावसों भजन करतहे सो मर्यादाभक्तहे ओर प्रभुके अंतरंग भक्तहे सो स्नेहभावसों भजन करतहे नंद, यशोदा, ब्रजभक्तादिक पुष्टभक्तहे सो श्रीठाकुरजी ए-कहीहे परि भक्तनके भावकरि न्यारेन्यारेहू दीसतहे सो श्रीभागवतमें कहेहे जो जब अकूरजी श्रीठाकुरजीको मधुपुरीमें पधरायके लेगये तहां जाको जेसो भाव हतो तेसोही दर्शन भयो, कंसको वैरभाव हतो तातें कालरूप देखे, जोगीजन परमतत्त्व देखे, मथुरास्थस्त्रीजन भक्त परमकोमल सुकुमार देखे, जहां जेसो भक्तनको भाव तहां श्रीठा-रजी ताही भावसों विराजतहे मर्यादाभक्त ऐश्वर्यभावकरि आराधना क-रत हे. यह जानतहे जो प्रभुकों भूख प्यास नांही, कोटि ब्रह्मांडके कर्त्ताहे, पालनकरे, संहारकरे, तिनकों हम कहा देयगें ? प्रभु हमारी रक्षा क-रतहे यह भाव हे तिनसों कछु प्रभु मांगत नांही. ओर पुष्टिभक्त नंद, यशोदा, ब्रजभक्तादिककों स्नेहभाव हे जो एक क्षणमें भूखे होयगें शीतः उष्ण, लागत हे एसो भाव हे तहां श्रीठाकुरजी मांगिकें अंगीकार करत हे सो श्रीभागवतमें प्रसिद्धही निरूपण हे । ऐश्वर्यभावमें मर्यादारीति हे ओर स्नेहभावमें पुष्टिरीति हे ।

याभांति स्वरूपभेदतें न्यारे न्यारे रसको अनुभवहे सो दोउमार्ग प्रसिद्ध हे ॥ ३ ॥ सर्वमें व्यापी भगवान् हे सो शास्त्र, पुराण, श्रीभागवत, कहतहे ओर श्रीसुवोधिनीजी आदि ग्रंथमें श्रीआचार्यजी महाप्रभु सर्वव्यापक प्रभुकों कहेहे परंतु अंतरंग पुष्टिमार्गीय भक्तनको भाव सर्वोंपरहे सो काहेतें जो ज्ञानीहे तथा मर्यादामार्गीय भक्तहे सो भगवानको सर्वव्यापक जानिके भजन करतहे तिनकों स्वरूपानंदको अनुभव नांही केवल मोक्षके अधिकारी हे ओर पुष्टिमार्गीय भक्त हे सो सर्वोंपरहे श्रीठाकुरजीके अंतरंग सदा सेवा, शृंगार, भोग आदि-करिकें स्वरूपानंदको अनुभव करतहे तिनतें एकक्षण श्रीठाकुरजी-न्यारे नांही रहतहे तातें यह पुष्टिभक्ति विशेषकरि सर्वोंपरहे ॥ ४ ॥

मूलं-विरुद्धधर्माश्रयत्वं स्वमुखाय विचारयेत् ।

प्रभुः कुमार एवास्ति ब्रजे मातृपदांकगः ॥ ५ ॥

श्रीभागवतवाक्येन कौमारं जहतु ब्रजे ।

व्याख्यातं च तथैवाऽस्मदाचार्यैर्विवृतावपि ॥ ६ ॥

शब्दार्थः-अपने सुखके अर्थ प्रभुकों विरुद्धधर्माश्रयत्व विचारे, दोयभैया ब्रजमें कुमार अवस्थाकूं राखतभये एसे वाक्यतें ब्रजमें मातृ-पदांकगः (श्रीयशोदोत्संगलालित) प्रभु कुमारहीहे, श्रीमदाचार्यजीनें श्रीसुवोधिनीजीमेंहू एसोही व्याख्यान कीयोहे ॥ ५ ॥ ६ ॥ टीका-प्रभुको स्वरूप विरुद्धधर्माश्रयी हे यह विचार भक्तजनकों अवश्य हृदयमें करनो । वैष्णवको मुख्यधर्म येहीहे जो प्रभुकों विरुद्धधर्माश्रयी जाने काहेतें जो जहांताई भक्तनकों विरुद्धधर्माश्रयको ज्ञान न होय तहांताई प्रभुकी लीलामें असंभावना विपरीतभावना होय सो भक्ति-बीजको नाश करे ताको प्रकार कहत हे जो प्रभुकी लीलामें संदेह आवे जो दामोदरलीलामें प्रभुकी कटि छोटिसी ओर दोयअंगुरीको

बीच अंतर तामें श्रीयशोदाजी दाम जोरत जाय तोहू दोय अंगुरी घटे सो कैसें ? यह दोषबुद्धि सो असंभावना ओर माखनके लीये प्रभु क्यों रुदन कीये तथा मानादिक लीलामें प्रभु एसो दैन्य क्यों करत हे या भांति दोषबुद्धि आवे सो विपरीत भावना यह दोष कब जाय जब श्रीठाकुरजीकों विरुद्धधर्माश्रयी जानें यह मुख्य विचार वैष्णवकों कर्तव्य हे । प्रभु कुमार पांच वरसके परमसुंदर श्रीयशोदाजी-के अंकमें विराजित हे ओर भक्तनकों सर्वलीलाको अनुभव करावतहे, प्रभुकी सगरी लीला नित्य हे, आनंदरूप हे, जेसैं प्रभु आनंदरूप नित्य हे तेसैं ही प्रभुकी लीला हे सो आगैं वर्णन करत हे ॥ ५ ॥ श्रीमद्भागवतमें नित्यलीला कहे हैं जो कुमारलीला ब्रजमें राखिकें पौगंड किशोर वयकी लीला कीये 'कौमारं जहतुर्ब्रजे' (ब्रजमें कुमार अवस्थाकूं राखत भये) तासूं मनुष्यको बालपनो गये पीछे फेरी बालपनो या जन्ममें एकदिनहू न आवे ओर श्रीठाकुरजीकी सगरी लीला नित्य हे बाल अवस्थामें किशोरलीला करतहे किशोर अवस्थामें बाललीला करत हे, यह विरुद्ध धर्माश्रयी प्रभुकों जाननैं । ताहीति श्रीभागवतमें श्रीशुकदेवजी कहेहे कुमारलीला राखि दुसरी लीला कीये या श्लोकके व्याख्यान श्रीआचार्यजी महाप्रभु निबंध श्रीसुबोधिनीजी संसार्थ विवेचन करी कीये हे जो नित्यलीला ठोर ठोर संपादन कीये ताही भांति श्रीआचार्यजी महाप्रभु पुष्टिमार्गमें सेवा प्रकट कीये जामें वर्षके वर्ष जन्माष्टमी, दान, रास, होरी, फूल-मंडली, हिंडोरा, सब नित्यलीलाको अनुभव साक्षात् होत हे । याभा-

१ श्रीभागवतके अर्थकी सातरीतसों एकता करीहे । तामें श्रीसुबोधिनीजीमें चाक्षार्थ, पदार्थ, असरार्थ ये तीन अर्थ तथा निबंधमें "शास्त्रार्थ, स्कंधार्थ, प्रकरणार्थ, ओर अध्यायार्थ मिल चार अर्थ ऐसे सातरीतसों एकता करी हे । पदेऽक्षरे। एकार्यं सप्तधा जानन्नविरोधेन मृच्यते."

वतें वैष्णव नित्यलीलाको भेद(अभिप्राय)जानि स्मरण भजन करे ॥६॥

मूलं-ब्रज एव कुमारश्च कुमारीभावविद्धरिः ।

एकादश समास्तत्र गूढार्चिः सवलोज्ज्वलत् ॥ ७ ॥

एतद्वाक्यं मिश्ररूपं कुमारः केवलो हरिः ।

सामग्र्यपि तथैवास्ति यतो गोप्यः कुमारिकाः॥८॥

शब्दार्थः-कुमारिकाके भाव जानिबेवारे हरि ब्रजमेंहि कुमारहे ओर (श्रीभागवतके तृतीयस्कंधके द्वितीयाध्यायके छवीसमें श्लोकमें लिखे हे जो) ग्यारे वर्ष गूढप्रतापवारे श्रीवलदेवजीसहित तहां (ब्रजमें) वसे ॥ ७ ॥ यह वाक्य मिश्ररूप हे स्मृतिमें व्यापकरूप तथा ऐश्वर्य-ज्ञानादिधर्मसहित रूपको निरूपणहे दशमस्कंधमें 'कौमारं जहतु-ब्रजे' यह वाक्यमें कुमार अवस्था ब्रजमें राखी ऐसे निरूपणहे ओर तृतीय. स्कंधमें 'एकादशसमास्तत्र गूढार्चिः सवलोज्ज्वलत्' यह वाक्यमें ग्यारे वर्ष ब्रजमें वसे ऐसे मिश्र व्यापक कौमार तथा पौगंड किशोर अवस्थारूप प्रतिपादक वाक्य हे परंतु वस्तुतः केवल कुमार हरिहीहे काहेतें जो ब्रजभक्त (ऋषिरूपा) कुमारिकाहे ओर सामग्रीहूं तेसीहीहे ॥ ८ ॥ टीका-ब्रजमें प्रभु कुमार यातेहे जो कुमारी जो सोरहहजार अग्निकुमारिका पांच पांच वर्षकीहे उनके भावनीय भावनामें पांचवर्षके प्रभुहे काहेतें जो रसशास्त्रमें यह कहेहे जो जेसो भाव स्त्रीको होय तेसोही पति होय तब रसविशेष होय तातें कुमारिकाको प्रभु कुमाररूपसों भावकी वृद्धि करतहे । ओर ग्यारहवर्षकी लीला ब्रजमें सदाहे तामें वाललीलातें पौगंड किशोर सवही करतहे । कुमारिकाने गूढ भावसों कात्यायनी देवीको अर्चन कीयो (गूढभावतें छिपायें यातें जो हमारे भावको श्री-

१ " कुमारी चाऽभवद्धरिः" एसो पाठ कोड पुस्तकमेंहे सो सर्व भगवद्रूपहे या भावसों हे ताको अर्थ कुमारीरूप तथा कुमाररूप हरिमयेहें एसो हे.

नंदरायजी श्रीयशोदाजी आदि ब्रजमें कोउ न जाने काहेतें जो गूढ-
भाव प्रकट भयेतें रस जातरहतहे तातें सबसों छिपाय कात्यायनीको
अर्चन कुमारिकानें कीयो) ताकरिकें श्रीठाकुरजीकों अपने वश्य
कीये कुमारिकाको गूढभाव प्रभु जानिकें चीरहरणकरि सर्वांगदर्शन
करि अलौकिकदेह संपादनकीये पाछें वस्त्रहू अलौकिक करिकें दीये
वरदानदीये जो शरदूक्तुमें रास करि तुझारो मनोरथ पूर्ण करेगें
सो रासमें कुमारतें ग्यारहवर्षके किशोरवय धरिकें कुमारीनको
जैसे जैसे मनोरथ हतो सो सब संपूर्ण कीयो याभांति गूढभा-
वसों कात्यायनीको अर्चन करि कुमारिकानें प्रभु वश्य कीये ॥ ७ ॥
याभांति दोयवाक्यहे दोयप्रकारको भावहे श्रुतिवाक्यतें ऐश्वर्य
भाव तथा श्रीभागवतके वाक्यतें कुमारभाव सो मिश्रित, दोयरूप
प्रभुकेहे सो केवल कुमाररूप हरि कुमारिकाके भावकरिकें हे। यद्यपि
प्रभुकी स्थिति सगरेहे प्रभुके व्यापक धर्म ऐश्वर्य ज्ञानादिकें विचारिकें
मर्यादामागोंक्तप्रभु सगरेहे परंतु गोपकुमारिकाके पासही रसरूप
प्रभुहे कुमारिकाके भावविना रसरूप प्रभु तहां नांहीहे काहेतें जो
भावात्मक रसरूप प्रभु पात्रविना ओरठोर रहे नांही तातें भावरूप पात्र
कुमारिकाहे तातें कुमारिकाके पास भावात्मक प्रभुहे ॥ ८ ॥

मूलं-एवं सतीदृशे रूपे रासलीलादिरूपणम् ।

विरुद्धधर्माश्रयत्वबोधायैव हि युज्यते ॥ ९ ॥

शब्दार्थः—जब ऐसे मिश्ररूपहे (व्यापक, कुमार, पोंगंड, किशोर
एगें निरूपण कीयेहें) तब ऐसेरूपमें रासलीलादिक निरूपणहे सो
विरुद्धधर्माश्रयत्व बोधकेलीये हि घटेहे ॥ ९ ॥ टीका—जो रसात्मक
प्रभु कुमारिकाकेही पासहे सो रासलीलामें वर्णन हे जो वेणु वजाय
सगरे ब्रजभक्तनकों बुलायके पाछे श्रीठाकुरजी सगरे ब्रजभक्तनसों रम-

णकीयो तव सवनकों सौभाग्यमद भयो एक गुणातीत अग्निकुमारिकाकों मद नभयो तव श्रीठाकुरजी यह कुमारिकाकों लेयकें पधारे पाछें उनहूंकूं सौभाग्यमद भयो तव तहांते अंतर्धान होय यह गुणातीतभक्तके हृदयमें पधारे । जो प्रभु हृदयमें न होय तो एक क्षणमें दशमी अवस्था (मरण) भक्तनकी होयजाय सो जव गुणातीतकुमारिकानें बाहिर प्रकट प्रभुकों न देखे ताहीसमय मूर्च्छा खायके गिरी सो प्रभुनें दोयभुजासों उठायीहे तव वहभक्त बोली “ हा नाथ रमण प्रेष्ठ काऽसि काऽसि महाभुज ! । दास्यास्ते कृपणायामे सखे दर्शय सन्निधिम् । (हा नाथ ! हा रमण ! हा प्रिय ! कहांहो कहांहो हा बड़े भुजवारे ! आपकी दासी ओर दीन मोको हे सखे ! सन्निधान बताओ) तुम पास हो सो काहेतें जो महाभुजातें उठायकें रक्षाकीनीहें तो दर्शन देउ पाछें सगरे भक्त फेरि पुलिनमें आयकें गुणगान कीये पाछे निःसाधन होय रुदन कीयो तव उनहीके भीतरमेंतें बाहिर प्रकटे तातें कुमारिकाके पासही प्रभु हे ओर ऐश्वर्यधर्मकरिकें सबठोर व्यापक हे । या भांति विरुद्धधर्माश्रयको बोध कीयो सो वैष्णवकों अवश्य जान्यो चाहियें ॥ ९ ॥

मूलं—इदं हि पुष्टिमार्गीयं तदेव ज्ञायते बुधैः ।

गीतगोविंदाद्यपद्येऽप्येतदेव निरूप्यते ॥ १० ॥

शब्दार्थः—यह पुष्टिमार्गीय तत्त्वहे सो एसे ही बुध (पंडित) जानेहे काहेतें जो गीतगोविंदकाव्यके प्रथमश्लोकमेंहू श्रीनंदराय-जीके वचन कुमारअवस्थासूचक लिखेहे तथा श्रीस्वामिनीजीके संग क्रीडाहू लिखिहे सो एसेही निरूपण कीयेहे ॥ १० ॥ टीका—तहां कोई कहे जो कुमारिकाकेही पास प्रभु क्यों वसतहे ? तहां कहतहे जो कुमारिका पुष्टिमार्गीयहे यहबुद्धिकरिकें जाननों कुमारिकाके धर्म

जैसे धर्म जब आवे तब जानियें जो पुष्टिमार्गीयधर्म आयो एसो धर्म दुर्लभहे तातें अहर्निश कुमारिकाके भावकी भावना मनमें करनी दासत्व कीयेतें कुमारिकाकी कृपातें भाव जब हृदयारूढ होय तब प्रभुको अनुभव होय यह बुद्धिमें निश्चय करि कुमारिकाके भावकी भावना करियें सो श्रीआचार्यजीके पुष्टिमार्गमें उनहीके भावकी सेवाहे यहजानि मार्गकी रीतिसों सेवा करियें । श्रीआचार्यजी श्रीगुसांईजीके चरणकमलको आश्रय लेकें उनके भावरूपही पिता-पुत्रको जानियें । गीतगोविंदमें मानादिकविहार जयदेवनें निरूपण कीये सो कुमारिकाके भावकी सब लीला जाननी । याप्रकार प्रभु कुमारिकानके परवशहे रसके अनेकग्रंथहे सो गीतगोविंद आदिमें सब आये सो कुमारिकाकी लीला याप्रकार मनमें जानि भावना करनी ॥ १० ॥

मूलं-अन्यथा नंदवचनं तादृशं युज्यते कथम् ।

अतस्तु पुष्टिमार्गीयविरुद्धगुणसंश्रयः ॥ ११ ॥

शब्दार्थः—एसे न होय तो श्रीनंदरायको वचन प्रभुके विरुद्धधर्माश्रयत्व स्वीकार्ये विना घटे कैसे तासों पुष्टिमार्गीय प्रभु विरुद्धधर्माश्रयीहे ॥ ११ ॥ टीका—श्रीनंदरायजीके वचन सत्य जानने । काहेतें जो गोडदेशतें सोरहहजार कुमारिका

१ मेघमेंदूरमंवरं वनश्रवः श्यामास्तमालद्रुमैर्नक्तं भीरुरयं त्वमेव तद्विमं राधे !
यहं प्रापय । इत्थं नन्दनिदेशतथलितयोः प्रत्यध्वकुंजद्रुमं राधामाधवयोर्यजन्ति यमुना-
कले रहःकेलयः ॥

(राधे ! आकाश मेघनतें व्याप्त हे, तमालवृक्षनतें वनकी पृथ्वी श्याम हे, रात्रिमें यह डरपे हे तामूं तुम या (श्रीकृष्ण) कूं घर पहुँचाव. एसे श्रीनंदरायजीके वचनतें चले श्रीराधिकाजी तथा श्रीकृष्णकी श्रीयमुना किनारेके मार्गके निहुंजके विषे गुप्त विहारें जय पावत हे.)

श्रीनंदरायजी कंसको देवेकेलिये लाये सो वहकुमारिका पुष्टि-
मार्गीय हती तातें प्रभुकी सेवामें लागी तब श्रीनंदरायजी कंसको
नांही दीये कुमारिकाकी वोहोत सराहना करि पुत्रके सेवार्थ घरमें
राखि सो श्रीनंदरायजीके वचन बड़ेबड़े तादृशीय सराहना करतहे
तातें कुमारिकाको स्नेहभाव श्रीनंदरायजीमें अधिकहे । तातें श्रीठा-
कुरजी कुमारिकाके वशहे । एसो पुष्टिमार्ग सर्वोपरिहे जामें श्रीकृष्ण
भावात्मक रीतिसों सदा विराजतहे । सो पुष्टिमार्गमें प्रभु विरुद्धधर्मा-
श्रयस्वरूपसों विराजत हे । अव आगे श्लोकमें विरुद्धधर्माश्रयको
भाव प्रकाश करि वर्णन करतहे ॥ ११ ॥

मूलं-रसमार्गीयधर्मास्तु ते बोद्धव्या विचक्षणैः ॥

बालो रसिकमूर्खन्यः स्ववशोऽन्यवशः सदा ॥ १२ ॥

शब्दार्थः-विचक्षण जो चतुर पुरुषहे तिनके रसमार्गके धर्म स-
मजिवेयोग्यहे । श्रीठाकुरजी बालकहे तोहू रसिकके शिरोमणिहे
अपने वशहे तोहू सदा भक्तनके वशहे ॥ १२ ॥ टीका-रसमार्गकी
रीतिमें तथा मर्यादामें विरोधहे और पुष्टिमें विरोध नांही, पुष्टिमें विल-
क्षण रीतिहे सो कहतहे श्रीरामचंद्रजीके अवतारमें धर्मस्थापनकी रीति
हे तातें एकपत्नीव्रतहे ओर श्रीकृष्णावतारमें समस्तव्रजभक्तगोपभार्या-
सों रमणहू धर्मका स्थापनहे, ओरठोर लोकवेदमें जहां रसमार्ग तथा
रसशास्त्रवर्णनहे तहां धर्ममार्गमें विरोधहे, काहेतें जो रसशास्त्रमें
परकीयारमणमें अधिकरस वर्णन कीयोहे स्वकीयामें कछु न्यूनभावहे
सो जहां परकीयारमण भयो तहां धर्मस्थापन नांही ओर जहां धर्म-
स्थापनवर्णन शास्त्रमेंहे तहां परस्त्रीको मनकरिकें रमण विचारे तोहू
दोषहे यह मर्यादामार्गकी रीतिहे ओर पुष्टिमार्गमें श्रीठाकुरजी विग-

“लोकवत्तु लीला कैवल्यम्” यह व्याससूत्रमें लोकवत् जो लीलाहे सो
मोक्षहे ऐसं स्पष्ट निरूपणहे ।

जतहे सो सगरेधर्मको स्थापन करतहे ओर समस्तब्रजभक्तनसों रस-
शास्त्रोक्त रमणहू करतहे यह विलक्षणताहे । पुष्टिमार्गमें श्रीठाकुरजी
वालकहे पलनां झूलतहे ओर परमरसिकनके मुकुटमणि ग्यारहवर्षके
पोडशवर्षके एककालावच्छिन्नहे. अपने वश्यहे कोटानकोटि भांतिके
कोई साधन करे ओर ब्रह्मादिक शिवादिक कोटानकोटिवरसतें साधन
करतहे तिनकों कवहू दर्शन होतहे. वेद नेति नेति कहतहे काहूके
वश प्रभु नांही ओर सदा भक्तनके वशहे । श्रीयशोदाजी भक्तिकरिंके
बांधेहे सदा ब्रजभक्तनके आधीनहे भक्त कहतहे सोही करतहे अन्यथा
जानत नांही यह विरुद्धधर्माश्रय जाननों ॥ १२ ॥

मूलं--अभीतः सर्वथा भीतः साक्षेपो निरपेक्षकः ।

चतुरोऽपि महामुग्धः सर्वज्ञोऽप्यज्ञ एव च ॥१३॥

शब्दार्थः—निश्चय भयरहितहे तोहू भययुक्तहे, इच्छायुक्त तोहू
निरपेक्ष (इच्छारहित) हे, चतुरहे तोहू महामुग्धहे, सर्वज्ञहे तोहू कुछ
नांही जानत हे ॥ १३ ॥ टीका—प्रभु केसेहे भय करिंके रहितहे
काहेतें जो कालके कालहे रंचक भुकुटिविलासतें कोटानकोटि ब्रह्मांड
रचे ओर नाशहू करे सगरे देवता डरपत रहतहे तिनकों भयको
लेश नांही ओर भययुक्तहे सो श्रीठाकुरजी जब माटी खाई तब
श्रीयशोदाजी लकुटी लेके डरपावतहे जो माटी क्यों खाई? तब श्रीठा-
कुरजी डर करि नेत्रमें जलभरिंके कहतहे जो मैया मेनें माटी नांही खाई
याभांति भक्तनसों डरपत हे जो अप्रसन्न होय कवहू मान मति करे
ऐसे प्रभुहे । ओर प्रभुकों काहू वस्तुकी अपेक्षा नांही हे अक्षरब्रह्मसारि-
खो घरहे लक्ष्मीजीसारिखी रानीहे कोस्तुभमणि आभूषणहे इत्यादि
अलौकिक पदार्थ हे एकक्षणमें सर्व सिद्धकरे ऐसी मायासारिखी
दासी हे तिनकों कहा अपेक्षाहे तासों निरपेक्षहे ओर भक्तनकी

रंचकहू वस्तु होय ताकी लेवेकी अपेक्षाहे ब्रजमें श्रीयशोदाजी तथा ब्रजभक्तनसों नवनीत खिलोनां आदिके लीये आर करतहे । ओर प्रभु चतुरशिरोमणिहे कोटि ब्रह्मांडमें जो कोउ मर्यादा विना चले तिनकों दंड देतहे क्षणक्षणकी क्रिया ओर सवनके मनको भाव जानतहे ओर भक्तनके आगें महामुग्धहे बालकहे भक्त देतहे सोई आरोगतहे आपु कछु जानत नांही ओर सर्वज्ञहे सबठोर व्यापकहे सगरी सत्ता प्रभुकी हे तिनतें तीनलोकमेंहू कछु दूरे नांहीहे ओर भक्तनके आगें अज्ञ कछु जानत नांही खेलतमें हारजात हे चंद्रमाकों लेकें खेलनके लीये रुदन करतहे । एसे विरुद्धधर्माश्रयी प्रभुहे ॥ १३ ॥

मूलं-आत्मारामोऽपि गोपीनां सर्वदा रतिवर्द्धनः ।

पूर्णकामोऽपि कामार्त्तो ह्यदीनो दीनभाषणः ॥१४॥

शब्दार्थः-आत्मामें रमण करिवेवारे हे तोहू गोपीजनको सर्वदा रतिके वर्द्धन करिवेवारेहे पूर्णकाम हे तथापि कामकरिकें आर्त्त हे दीन नही हे तोहू दीन जैसे भाषणवारे हे ॥ १४ ॥ टीका-प्रभु सदा आत्माराम हे अपने आत्मामें रमण हे बाहिर नांही ओर गोपीजनके संग नित्य रमण करि नित्य नूतनकामकी वृद्धि करत हे ओर प्रभु पूर्णकाम हे साक्षान्मन्मथके मन्मथ हे तिनकों काम कहा वस्तु हे सर्व कामतें पूर्णहे तोहू कामकरि अतिआर्त्तहे तनक भूख प्यासमें मांगतहे गोपीजनके मानादिकभयतें कामविरहकरि व्याकुल होय सखीको वेप धरिकें आपु मनावत हे दीनताकरि रहित हे ईश्वरके ईश्वर हे त्रिलोकी जिनकों नमन करत हे सो दीनता क्यों करे ? तोहू भक्तनसों दैन्य करत हे जो में तुम्हारोहूं तुमविना में ओरकों नांही जानंत या भांति अनेक प्रकारके दैन्यके वचन कहत हे । यह विरुद्धधर्माश्रयत्व जाननों ॥ १४ ॥

मूलं-स्वप्रकाशोऽप्यप्रकाशो बहिष्ठोन्तः स्थितः सदा ।

अस्वतंत्रः स्वतंत्रोऽपि समर्थो न तथाऽपि च ॥ १५ ॥

शब्दार्थः—अपनेही तेजतें प्रकाशयुक्तहे तोहू (भक्तनके आगें) प्रकाशरहित हे बाहिर बिराजे हे तोहू सदा (भक्तनके) अंतःकरणमें बिराजेहे, स्वतंत्रहे तोहू (भक्तनकी पास) परतंत्रहे सर्वसामर्थ्ययुक्तहे तोहू (भक्तनके आगें) असमर्थहे ॥ १५ ॥ टीका—प्रभु अपनो प्रकाश सगरी त्रिलोकीमें करेहे ओर जिनको तेज अभिमान भयो ताको तत्काल नाश करि अपनोही प्रकाश राखे हे ओर भक्तनके आगें अपनो प्रकाश जानतही नांही जो भक्त करे सोहि होय, भक्त कहे सोहि आप करे, बाहिर स्थित हे सदा सर्वदा ब्रजभक्तनके संग अनेकलीला करतहे ओर सर्व प्राणीमात्रके अंतःकरणमें सदा स्थित हे, प्रभु सदा स्वतंत्र लीला करतहे अपनी इच्छातें एकक्षणमें ब्रह्मांड उत्पन्न करतहे तथा नाश करतहे ओर भक्तनके वश हे ब्रजभक्त कहत हे इहां बैठो तहांही बैठत हे भक्तनके आगें स्वातंत्र्यकी बात नांही करत हे भक्तनके मनोरथ अनुसार प्रभु कार्य करत हे, प्रभु सर्वसामर्थ्ययुक्त हे कर्तुं अकर्तुं अन्यथाकर्तुं सर्वसामर्थ्यवान् हे ओर भक्तनके आगें अपने सामर्थ्य-करि रहित हे ब्रजभक्त गोदमें लेय मन आवे तहां जात हे अपनो मनोरथ पूर्ण करतहे तहां प्रभु सामर्थ्यरहित होयरहतहे याभांति प्रभुको स्वरूप विरुद्धधर्माश्रयी हे ॥ १५ ॥

मूलं-एवं हि पुष्टिमार्गीयं विरुद्धस्वगुणालयम् ।

कृष्णं कृपालुं सततं शरणं भावयेद्बुद्धि ॥ १६ ॥

शब्दार्थः—एसे विरुद्ध अपने गुणके घर कृपालु पुष्टिमार्गीय--श्री-कृष्णके शरण की निरंतर हृदयमें भावना करे ॥ १६ ॥ टीका—याप्रकार विरुद्ध गुणके घर जो काहूतें जान्ये न जाय एसे रसात्मक भावा-

त्मक प्रभु पुष्टिमार्गमें विराजतहे सो उपर कहेहे ऐसे भक्तनपर परम-
कृपाल श्रीकृष्ण फलात्मकहे तिनकी निरंतर शरणजैयें मन कर्म वचन
करि सर्वभावसों शरण रहियें, अपने हृदयमें शरणकी भावना निरंतर
राखियें तब श्रीकृष्ण तो परम कृपालहे सो कृपाकरेंगे। सो श्रीआचार्यजी
महाप्रभु नवरत्न ग्रंथमें कहेहे “तस्मात् सर्वात्मना नित्यं श्रीकृष्णः शरणं
मम (तासों सर्वात्मतें श्रीकृष्ण मेरो शरणहे) तथा विवेकधैर्याश्रयमें
कहेहे “अशक्ये वा सुशक्ये वा सर्वथा शरणं हरिः” (अशक्यमें तथा
सुशक्यमें निश्चय हरिहि शरण)इत्यादि ठोरठोर श्रीआचार्यजी कहेहे
तातें शरणकी भावना हृदयमें कर्तव्यहे अष्टाक्षरको महामंत्र सर्वसिद्धि-
कर्त्ता जानि अष्टप्रहर स्मरण करियें सो विज्ञप्तिमें श्रीगुसाईजी कहेहे
“यदुक्तं तातचरणैः श्रीकृष्णः शरणं मम। तत् एवाऽस्ति नौश्चैत्यमैहिके
पारलौकिके” (जो तातचरण-श्रीमदाचार्यजीने “ श्रीकृष्णः
शरणं मम ”कह्योहे तातेंही यहलोक तथा परलोकमें निश्चितताहे)
तातें श्रीकृष्ण जो परमकृपालहे तिनकी भावना अपने हृदयमें करि
मन कर्म वचन करि शरण जैयें यह निश्चय सिद्धांत हे ॥ १६ ॥

मूल-असाधनः साधनवानसाधुः साधुरेव वा ।

शरणादेव निखिलं फलं प्राप्नोत्यसंशयम् ॥१७॥

शब्दार्थः-साधनरहित अथवा साधनकरिवेवारो असाधु अथवा
साधु हू शरणगयेतें संशयरहित समग्रफलकों प्राप्त होय ॥ १७ ॥
टीका-कोईजीवमें एकहू साधन नांहीहे ओर कोई जीव अनेक
प्रकारके साधन करतहे कोई जीव साधुहे परमसुशीलहे काम, क्रोध,
लोभ, मद, मत्सरतारहितहे, कोई असाधुहे, कामक्रोधादिक दोपसों
भयोंहे, ओर कोई जाति देवता, मनुष्य, ब्राह्मण, क्षत्रिय, वैश्य, शूद्र,
चांडालपर्यंत, पशु, पक्षि, आदि अखिलमेंतें कोई जीव श्रीठाकुरजीके

शरण जात है तिनकों निश्चय फलकी प्राप्ति होयगी यामें संदेह नांही प्रभुकी शरण यह सर्वोपरि साधनहै, जाकों प्रभुको शरण भयो सो जीव सर्वधर्म करिचूक्यो ओर अनेकसाधन करतहै परि प्रभुके शरण नांही आयो तहांताई फलकी प्राप्ति नांहीहै । तातें प्रभुके शरणगयेतें सगरो फल सिद्ध होतहै यह निश्चय सिद्धांत भयो ॥ १७ ॥

मूलं—भक्तिमार्गें साधनं च फलं शरणमेव हि ।

सर्वधर्मपरित्यागः स्वतंत्रं चेत्फलं हि तत् ॥१८॥

शब्दार्थः—भक्तिमार्गमें साधन ओर फल शरणहीहै तातें सर्वधर्म-परित्याग (अनन्य भक्ति) होय तो यह स्वतंत्र फलरूप शरण होय है ॥ १८ ॥ टीका—भक्तिमार्गमें साधनहू श्रीकृष्णशरणहै ओर फलहू श्रीकृष्णशरण है साधन फल न्यारो नांही साधनहू फलरूपहै तातें शरणहि मुख्यफलहै, सो भगवान् गीताजीमें कहेहै, “ सर्वधर्मान् परित्यज्य मामेकं शरणं ब्रज ” (सर्व धर्मको त्याग करिकें एक शरण-रूप मोकुं प्राप्त हो)या श्लोक उपर श्रीगुसांईजी न्यारी स्वतंत्रटीका कीयेहै तामें शरणकी भावना मुख्यकरि निरूपण कीयेहै एक श्रीकृष्णको आश्रय जाजीवमें भयो तहां सगरे धर्म सिद्धभये, तामें सर्वतें मुख्य फलरूप श्रीकृष्णको आश्रयहै यह भाव जानि अवश्य शरण कर्त्तव्यहै ॥ १८ ॥

मूलं—परोक्षे शरणं तादृच्छाहापुरुषयोगतः ।

कृपा चेत्तादृशानां हि तदा तद्द्वारकं भवेत् ॥१९॥

शब्दार्थः—अनवतार दशामें तेसे महापुरुषके योगतें शरण होयहै ओर जब तादृशीयकी कृपा होय तब तादृशीयद्वारा होय ॥ १९ ॥ टीका—श्रीकृष्णकी अवतारदशामें प्रसिद्ध शरण होय ओर श्रीकृष्णके परोक्षमें श्रीआचार्यजीद्वारा शरण सिद्ध होय श्रीआचार्यजीके परोक्षमें श्रीआचार्यजीके ग्रंथवचनानृत द्वारा शरण सिद्ध होय श्रीकृष्णकी प्राकट्यदशामें

तो प्रसिद्ध शरण होय परोक्षदशमें महापुरुष भगवदीयसों मिलिकें शरणको विचार करे सो यह पुष्टिमार्गकी रीतिहे । सेवासमय साक्षात् शरण ओर अनोसरमें भगवदीयसों मिलिकें शरणकी भावना करे काहेतें जो तादृशीय भगवदीयकी कृपातें ताही भगवदीय द्वारा शरण सिद्ध होय । तामें संयोग विप्रयोग दोय प्रकारको शरण सिद्ध होत हे । सेवामें तो संयोगशरण सिद्ध हे चरणस्पर्श करतहीहे तुलसी नित्य समर्पतही हे यह साक्षात् शरण भयो ओर अंतःकरणमें शरण भगवदीय द्वारा होय ॥ १९ ॥

मूलं-तेषामपि तु पारोक्ष्ये तदुक्तैर्वचनैः स्वतः ।

तत्प्रकाशितमार्गैकस्थितौ भवति सर्वथा ॥२०॥

शब्दार्थः—ऊपरके श्लोकमें कहे ऐसे महापुरुषके दू परोक्षमें विनने कहे वचनामृत करिकें स्वतः (आपतें) विनने प्रकट कीये मार्गमेंही मुख्यस्थिति होय, तब सर्वथा शरण सिद्ध होय ॥ २० ॥ टीका—उपर कहे जो संयोगमें साक्षात् शरण ओर परोक्षमें भगवदीयसों मिलिकें शरण सिद्ध होय सो इहां भगवदीय महापुरुषरूप श्रीआचार्यजी हे इनद्वारा शरण सिद्ध होय. श्रीआचार्यजीके परोक्षमें भगवदीयसों मिलिकें श्रीआचार्यजीके वचनामृतग्रंथद्वारा शरण सिद्ध होय । जो श्रीआचार्यजी पुष्टिमार्ग प्रकट कीये हे तिनमें स्थित होय तब सर्वथा शरण सिद्ध होय । काहेतें जो श्रीकृष्णके परोक्षमें श्रीआचार्यजी श्रीगुसाईजी श्रीवल्लभकुल तथा तिनके परोक्षमें (असन्निधानमें) उनके वचनकी भावना करे सगरे ग्रंथनको भाव कहे सुने उनके पुष्टिमार्गमें स्थित होयकें शरणकी भावना करे तो निश्चय शरण सिद्ध होय ॥ २० ॥

मूलं-संसारिणा सदा दुष्टसंगिनामन्नदोषतः ।

बहिर्मुखानां मत्तानां कुतो मार्गस्थितिर्भवेत् ॥२१॥

शब्दार्थः-सदा दुःसंग करिवेवारे, अन्नदोषतें बहिर्मुख, तथा उन्मत्त संसारीनकी पुष्टिमार्गमें स्थिति कहांसं होय? ॥२१॥ टीका-ऊपर कहे जो साक्षात् शरण ओर परोक्षदशामें श्रीआचार्यजीद्वारा शरण विनके परोक्षमें उनके ग्रंथवचनामृतद्वारा भगवदीयसों मिलिकें पुष्टिमार्गमें स्थितहोयकें शरण विचारे परंतु दुःसंग होय तो सगरो कीयो एक-क्षणमें जातरहे काहेतें जो संसारी जीवहे सो सदा दुष्टहे तातें दुष्टके संगतें निश्चय दुष्टता होय तातें संसारासक्त जीवहे तिनको संग कबहू नांही कर्त्तव्यहे सो संसारी बहिर्मुख केसें जानियें तहां कहतहे-लौकिकवि-प्यादिकमें तन मन धन करि उन्मत्त रहेअष्टप्रहर लौकिकावेश रहे, भगवद्धर्ममें मन नांही लागे, अभिमान अहंकार मनमें बोहोत रहे ऐसे संसारी जीवके हृदयमें यह पुष्टिमार्ग कबहू स्थित न होय एसो बहिर्मुख होय ताको संग करे तो पुष्टिमार्गमें नष्ट होयजायातातें संसारी बहिर्मुख को संगछोडिकें भगवदीयको संग करि शरणभावकी भावना करे ॥२१॥

मूलं-तदर्थं श्रीमदाचार्यचरणांबुरुहाश्रयः ।

सदा विधेयस्तेनैव सकलं सिद्धिमेप्स्यति ॥ २२ ॥

शब्दार्थः-ताके लीये श्रीमदाचार्यजीके चरणारविंदको आश्रय सदा कर्त्तव्यहे तासोंही सर्व सिद्धिकों प्राप्त होयंगे ॥ २२ ॥ टीका-जो कदाचित् बल्लभकुल तथा तादृशीयवैष्णवको संग न होय ओर कुछ ग्रंथवार्त्तामें अभिनिवेश न होय तो कहा करे तहां कहतहे जो दुःसंग (बहिर्मुखको संग) छोडिकें अपनेतें जितनी सेवा वनिआवे सो करे ओर अपने हृदयमें श्रीआचार्यजी महाप्रभुको दृढ आश्रय राखे श्रीमहाप्रभुजीके चरणकमलकी भावना अष्टप्रहर मन लगायकें करे

तो सकल मनोरथ निश्चय सिद्ध होय । काहेतें जो श्रीआचार्य-जीमहाप्रभु अलौकिक अग्निरूपहे सो जो वैष्णव श्रीआचार्यजी-महाप्रभुजीके शरण आयकें विनके चरणकमलको सदा मन लगायकें आश्रय करतहे तिनके सकल कार्य सिद्ध होय यह निश्चय सिद्धांतहे ॥ २२ ॥

मूलं-तदाश्रयोऽपि मनसः संगामावेन चेत्सताम् ।

तोषामावेन शिथिलो यदि दैवाद्भविष्यति ॥२३॥

तदास्माकं गतिः का वेत्येवं चिंताऽस्ति मे हृदि ।

लौकिकक्लेशसंबंधो हर्यंगीकृतलक्षणम् ॥ २४ ॥

शब्दार्थः-सत्पुरुषके संगके अभावतें मन प्रसन्न नहिरेहेवेतें जो कबहू विनको आश्रय शिथिल होयगो तब हमारी कहा गति होयगी यह चिंता मेरे हृदयमेंहे, लौकिक क्लेशको संबंधही हरिकी अंगीकृतिको लक्षणहे (लौकिकमें क्लेश होय तब वैराग्य होय जेसैं अंग, चित्रकेतु, पिंगला, कदर्य, इनको क्लेशतेंही लौकिकासक्ति छूटीहे) यह मनमें जाननों ॥२३॥२४॥ टीका-सदा मनकरि श्रीआचार्यजीको आश्रय करे सत्संगको अभाव होय भगवदीयको संग न होय तोहू मनतें आश्रय न छोडे अपने मनको सबठोरतें छोडिकें श्रीआचार्यजीके चरणकमलमें लगाव निरंतर तोषाभावकरिकें आश्रय शिथिल न करे । काहेतें जो भगवदीयके संगतें आश्रय वेगि सिद्ध होतहे भगवदीयके संग विना आश्रय वेगि सिद्ध नांहीहोतहे, भगवदीयको संग होयगो तबही में आश्रय करूंगो एसैं विचारिकें आश्रयको शिथिल नकरे, भगवदीय कहा जानियें कब मिले तहांतांइ आश्रय कीयेविना दुर्बुद्धि होयजाय तातें मनतें आश्रय न छोडे । जो होनहारहे सो होयगी जेसो देव रच्योहे तेसो होयगो में कहा करूं ? या भांति

शिथिलभाव मनमें न करे । जेसैतेसैं अपने मनको खेंचिके श्रीआचार्य-
 जीके चरणकमलमें लगावे सो श्रीआचार्यजी विवेकधैर्याश्रयग्रंथमें
 वर्णन कीयेहैं “ अशूरेणापि कर्त्तव्यं स्वस्यासामर्थ्यभावनात् ” (अशूर
 जो शूरवीर नहींहे तिनकुंहू अपने असामर्थ्यकी भावनातें धैर्य
 कर्त्तव्यहे) इंद्रिय देह तो लौकिकसुख चाहतहे भगवत्संबंधमें आदि-
 कालतें शिथिलहीहे तातें इंद्रिय देह तो भगवद्धर्मतें मनको शिथिल
 कीयो चाहतहे तासों इंद्रिय देह तो असुरहे परि मनमें असुरत्वकी
 भावना न करे, यह जाने जो नेत्रको मुख्यधर्म यहहे जो प्रभुको दर्शन
 करनो, हाथको यह धर्महे जो सेवा करनी अरु श्रवनसों भगवत्कथा
 सुननी, मुखसों भगवन्नाम लेनो, देहमें आलस्य न राखनो, तत्काल
 उठनो, भगवद्धर्ममें यह जाननो जो आज बने सो करिलेउं कालि कहा
 जानियें कहा होयगो । याभांति श्रीमहाप्रभुजीको आश्रय करे ॥२३॥
 अब वैष्णवके लक्षण कहतहे जो एक अपने श्रीकृष्णही गति जानि
 ओर अन्याश्रय न करे यह वैष्णवको मुख्य धर्महे, सो कब जानियें जब
 लौकिकक्लेशको संबंध होय तब मनमें चिंता करि पीडित न होय,
 काहेतें जो हरि अपनेजनको लौकिक क्लेश अनेकप्रकारको देतहे
 तोहू यह जीव अपनो धर्म न छोडे हरिकुंहि शरण कर मनमें चिंता न
 राखे यह अंगीकृत वैष्णवके लक्षणहे । जेसैं श्रीगुसांईजीके सेवक
 विठ्ठलदास, नारायणदासकीपास चाकरीकों गये तब नारायणदासनें
 विठ्ठलदासको एक परगनेपर पठाये तहां कल्लु पईसा दुटे तब नाराय-
 णदासनें विठ्ठलदासको बंदीखानो दीयो नित्य मारते सो विठ्ठलदा-
 सकी पीठकी खाल उतरि गई एसो दुःख पायो परंतु यह नांही कही
 जो मे वैष्णवहों पाछें श्रीगुसांईजी आप पधारे तब विठ्ठलदास दर्शनको
 आये तब श्रीगुसांईजी पुछे जो तेरी यह दशा क्यों हे तब विठ्ठलदासने
 कही जो देहको दंडहे सो भुगते छुटे तब श्रीगुसांईजी नारायणदा-

ससों कही जो या भांति मारे सों तोकों जीवपर दयाहूनांही आई ? तातें वैष्णवकों, परीक्षाकेलिये हरि क्लेश देतहे सो श्रीआचार्यजी महाप्रभु विवेकधैर्याश्रयग्रंथमें आश्रयके लक्षण कहेहे जो इतने दुःखमें हरिशरण राखे “ ऐहिके पारलोके च सर्वथा शरणं हरिः । दुःख-हानौ तथा पापे भये कामाद्यपूरणे । भक्तद्रोहे भक्त्यभावे भक्तेश्चा-तिक्रमे कृते । अशक्ये वा सुशक्ये वा सर्वार्थे शरणं हरिः ” (यहलोकमें, परलोकमें, निश्चय हरि शरणहे, दुःखकी हानिमें तथा पापमें, भयमें, कामादिककी अपूर्ति (अप्राप्ति) में, भक्तके द्रोहमें, भक्तिके अभावमें, भक्त अपनो अतिक्रम करे तब, अशक्यमें, सुशक्यमें, सर्व अर्थमें हरि शरणहे) इत्यादि वचनको विचार कर्त्तव्यहे जितनो लौकिक वैदिक देहसंबंधि दुःख होय तामें चिंतातुर न होय एक अपने प्रभुहीके शरण रहे यह अंगीकृत वैष्णवके लक्षणहे ॥ २४ ॥

**मूलं-लोके स्वास्थ्यमिति श्रीमदाचार्यवचनमृतात् ।
तदीयैः स्वामिहार्दज्ञैस्तोपः कार्यस्तु तेन हि ॥ २५ ॥**

शब्दार्थः—श्रीआचार्यजीके वचनमृत नवरत्नग्रंथमेंहे तामें आप आज्ञा करेहे (जो लोकमें तथा वेदमें हरि स्वस्थता नहिकरेंगे) तामों स्वामिके हृदयको अभिप्राय जानिवेवारे तदीयकों यह कारणतें संतोष करना ॥ २५ ॥ टीका—श्रीआचार्यजीमहाप्रभु नवरत्नग्रंथमें वचनमृत कहेहे “ लोके स्वास्थ्यं तथा वेदे हरिस्तु न करिष्यति ” (हरि लोकमें तथा वेदमें स्थिरता नकरेंगे) यह वचनतें अपने जननकी लौकिक वैदिकमें स्थिति भगवान् नांही करावतहे प्रभु लौकिक लुडायके अपनोही आश्रय सिद्ध करावतहे तब भगवदीय स्वामिके हृदयको अभिप्राय चिंतन करतहे जो लोक वेद कार्य प्रभुने नांही सिद्ध कीयो सो प्रभु भली करी जो लौकिक वैदिकतें

छुड़ाये । जो लौकिक सिद्ध होतो तो लौकिककार्यके आवेशमें प्रभुकों भूलिजातो जो वैदिक सिद्ध होतो तो मैं वैदिककार्यके आवेशमें प्रभुकों भूलिजातो तातें प्रभु करि सो बहुत भली करी या भांति स्वामिके हृदयके अभिप्रायकी मनमें भावना करि संतोष करि मनकों प्रसन्न राखे ताकों तदीय कहियें ॥ २५ ॥

**मूल-अतो हि लौकिकः क्लेशो नांतरः क्रियतां कचित् ।
बाह्यतस्तु प्रकर्तव्यो ह्यौदासीन्यप्रसाधनात् ॥२६॥**

शब्दार्थ:-तासों अंतरमें लौकिकक्लेश काहू समय नांही करनो और औदासीन्यकी सिद्धिके लिये बाहिरतें तो कर्त्तव्यहे ॥२६॥ टीका-अब उपर कहे जो श्रीठाकुरजी लौकिक वैदिक कार्य न सिद्ध करे तब भगवदीय मनमें संतोष करिकें क्लेश न करे प्रसन्न रहे पाछें लौकिक-वैदिक कार्य न करे तो गृहस्थाश्रम कैसे चले ? या भांति कोई संदेह करे तहां कहतहे जो लौकिक वैदिक सिद्ध न होय तब भगवदीय यह जाने जो मुख्यधर्म तो भगवत्सेवा स्मरण भगवदाश्रयही हे ओर में लौकिक वैदिक कार्यमें मन लगायो तातें प्रभु कार्य सिद्ध न कीयो सो भली भई अब लौकिकवैदिकमें मन नांही राखूंगो बने सोई करूंगो ऐसे विचारे । ओर बाहिर लोगनकों दिखायवेकेलीये कलु करे हृदयतें उदासीन रहे, भगवत्सेवासंबंधी कार्यमें मन राखे, लौकिकवैदिक कार्यतें अपने मनकों खेंची लेय या भांति लौकिकमें रहे अपनो धर्म काहूकों न जतावे लौकिकवैदिक क्रिया लोगनकों जतावे । याप्रकार भगवदाश्रय करे तो प्रभु प्रसन्न रहे ॥ २६ ॥

**मूल-दुःखं दुःसंगजं चान्यल्लौकिकाभिनिवेशजम् ।
सत्संगाभावजं चापि तथा मार्गस्थितेरपि ॥२७॥**

तत्तु मत्प्रभुपादाब्जकृपया सर्वथा मम ।

तदीयानां च संगेन क्षणाद्वीर्यमविष्यति ॥ २८ ॥

शब्दार्थः—एक दुःसंगजन्य दुःखहे दूसरो लौकिकावेशजन्य दुःखहे सत्संगके अभावजन्यहू दुःखहे तथा मार्गकी स्थितिकोहू दुःखहे (जो पुष्टिमार्गमें स्थिति कैसे रहे यह दुःखहे) ॥ २७ ॥ यह मेरो दुःख तो मेरे प्रभु (श्रीआचार्यजी) के चरणारविंदकी कृपातें ओर तदीयके संगतें क्षणमें निश्चय दूर होयगो ॥ २८ ॥ टीका—लौकिकावेश करावे एसो जो दुःसंग तिनको संग दुःखरूप जानियें वाको कह्यो कबहू नकरियें यह भक्तकी टेकहे । जेसैं प्रह्लादजी भगवद्भक्तहे उनको अपने प्रभुको स्मरण करिवेमें पिताही प्रतिबंधक भयो सो प्रह्लादजीको वोहोत समुझाये तब प्रह्लादजी न मानें तब उन प्रह्लादजीको वोहोत दुःख दीयो जो तू भगवानको स्मरण मति करे तब प्रह्लादजीने अपनो मरणसमान दुःख सह्यो परंतु भगवदाश्रय न छोड्यो तब प्रभु प्रसन्न होय प्रह्लादजीकी रक्षा करि ओर हिरण्यकशिपुको मारे । तेसेही वैष्णवको दुःसंग होय सो तो लौकिककार्यमें लगावे तातें इनको संग दुःखरूप जानि त्यागही करे ओर जो भगवद्धर्ममें लगावे ताहीको सत्संगकरे जो कदाचित् सत्संग नमिले तो अपने पुष्टिमार्गकी रीतिप्रमाण सेवा स्मरण न छोडे, दुःसंगको दुःखरूप जानि सवतें न्यारो चेठि श्रीआचार्यजी श्रीगुसांईजीको आश्रय मनमें दृढ राखि नित्य नियमसों सेवा स्मरण करे यह पुष्टिमार्गको सिद्धांत हे ॥ २७ ॥ पुष्टिमार्गीय जितनेजीव शरण आयेहे तिन सवनके प्रभु श्रीआचार्यजी महाप्रभुहे, एसे श्रीमहाप्रभुजीके पदकमलकी कृपातें सर्वथा तदीयको संग होय, भगवत्सेवा स्मरण सब चनि आवे, पुष्टिमार्गको सिद्धांत हृदयारूढ होय । तातें श्रीमहाप्रभुजीके

चरणकमलकी कृपातें तादृशीय भगवदीयको संग होय तिनके संगतें श्रीमहाप्रभुजी एकक्षणहू दूरि न रहे । सो चोराशी वैष्णवकी वार्त्तामें प्रसिद्धहे । जब श्रीआचार्यजी काशीमें आसुरव्यामोहलीला दिखाइ तब एक वैष्णव काशीतें भगवानदास पास आयकें सब समाचार कहे तब भगवानदासने कही जो तोकों भ्रम भयो होयगो श्रीमहाप्रभुजी एसी कवहू न करे तब यह वैष्णवने कही जो मैं अपनी आंखनसों देखिये आवतहू तब भगवानदासने मंदिरके किंवारी खोलि यह वैष्णवको श्रीआचार्यजीके दर्शन कराये आप बेठे पोथी वांचतहे तब वह वैष्णवके मनको संदेह गयो । तातें तादृशीयवैष्णवतें श्रीआचार्यजीमहाप्रभुजी क्षणएक न्यारे नांही रहतहे ऐसे वैष्णवको संग अवश्य करे तब श्रीआचार्यजीमहाप्रभु हृदयमें पधारे । भगवदीयको संग एसोहे ॥ २८ ॥

मूलं-ते दुर्लभा इति मनः खिन्नं भवति नित्यदा ।

यदा प्रभुः कृपापूर्णः कृपयिष्यति दैन्यतः ॥ २९ ॥

तदाचार्यपदासक्तास्तानुपस्थापयिष्यति ।

अस्माकं तु गतिर्नान्या श्रीकृष्णः शरणं मम ॥ ३० ॥

शब्दार्थः—एसे भगवदीय दुर्लभहे ताकरिकें निरंतर मन खेदयुक्त होयहे सो जब दैन्यकरिकें कृपापूर्ण प्रभु कृपा करेंगे ॥ २९ ॥ तब श्रीआचार्यजीके चरणारविंदमें आसक्तिवारे वह भगवदीयनको मिलावेंगे परंतु हमारे तो ओर कछु गति नांहीहे एक “ श्रीकृष्णः शरणं मम ” यह साधनहे ॥ (द्वितीयश्लोकके पूर्वार्द्धमें) “ तदाचार्यपदासक्तिस्तानुपस्थापयिष्यति ” एसे काहू पुस्तकमें पाठहे ताके

१ यह अर्थ मूलके अनुसार नांहीहे परंतु बोहोत पुस्तकमें हे तासो लिख्यो हे.

चरणकमलकी कृपातें तादृशीय भगवदीयको संग होय तिनके संगतें श्रीमहाप्रभुजी एकक्षणहू दूरि न रहे । सो चोराशी वैष्णवकी वार्तामें प्रसिद्धहे । जब श्रीआचार्यजी काशीमें आसुरव्यामोहलीला दिखाइ तब एक वैष्णव काशीतें भगवानदास पास आयकें सब समाचार कहे तब भगवानदासने कही जो तोकों भ्रम भयो होयगो श्रीमहाप्रभुजी एसी कचहू न करे तब यह वैष्णवने कही जो में अपनी आंखनसों देखिये आवतहू तब भगवानदासने मंदिरके किंवारी खोलि यह वैष्णवकों श्रीआचार्यजीके दर्शन कराये आप बैठे पोथी वांचतहे तब वह वैष्णवके मनको संदेह गयो । तातें तादृशीयवैष्णवतें श्रीआचार्यजीमहाप्रभुजी क्षणएक न्यारे नांही रहतहे ऐसे वैष्णवको संग अवश्य करे तब श्रीआचार्यजीमहाप्रभु हृदयमें पधारै । भगवदीयको संग एसोहे ॥ २८ ॥

मूलं-ते दुर्लभा इति मनः खिन्नं भवति नित्यदा ।

यदा प्रभुः कृपापूर्णः कृपयिष्यति दैन्यतः ॥ २९ ॥

तदाचार्यपदासक्तास्तानुपस्थापयिष्यति ।

अस्माकं तु गतिर्नान्या श्रीकृष्णः शरणं मम ॥ ३० ॥

शब्दार्थः—एसे भगवदीय दुर्लभहे ताकरिकें निरंतर मन खेदयुक्त होयहे सो जब दैन्यकरिकें कृपापूर्ण प्रभु कृपा करेंगे ॥ २९ ॥ तब श्रीआचार्यजीके चरणारविंदमें आसक्तिवारे वह भगवदीयनको मिलावेंगे परंतु हमारे तो ओर कछु गति नांहीहे एक “ श्रीकृष्णः शरणं मम ” यह साधनहे ॥ (द्वितीयश्लोकके पूर्वार्द्धमें) “ तदाचार्यपदासक्तिस्तानुपस्थापयिष्यति ” एसें काहू पुस्तकमें पाठहे ताकें

१ यह अर्थ मूलके अनुसार नांहीहे परंतु गोहोत्र पुस्तकमें हे तासो लिख्यो हे.

मूलं-सदा विरहभावेन भावात्मा भाव्यतां हरिः ।

कृष्णे हृदयदेशस्थः स्वामिनीनां कृपानिधिः ॥१॥

शब्दार्थः—सदा विरहभावकरिकें भावात्मा हरि, श्रीस्वामिनीजीके हृदयमें विराजिवेवारे, कृपानिधि, श्रीकृष्ण भावनीयहे ॥ १ ॥ टीका—सदा विरहकी भावना भावात्मक हरिकी करे तहां यह संदेह होय जो ब्रजमें श्रीकृष्ण प्रकटेहे तिनकों सबकोई जानतहे ओर तुम कहे भावात्मक श्रीकृष्णकी भावना करे सो भावात्मक श्रीकृष्ण न्या-रेहें सो कहां रहतहे ? कोन प्रकारसों उनकी भावना करे ? या भांति संदेह करे तहां कहतहे जो—श्रीकृष्णके क्रियात्मक ओर भावात्मक दोय स्वरूपहे । मथुरांतें वसुदेवजी लेय आये सो क्रियात्मक स्वरूप ओर श्रीयशोदाजीके घर प्रकटे सो भावात्मक स्वरूप, श्रीकृष्णकी दोय लीला हे वाललीला ओर किशोरलीला, वाललीला श्रीगोकुलमें ओर किशोरलीला श्रीवृंदावनमेंहे तातें वाललीलाके भावतें सेवा करे तथा किशोरलीलाके भावतें स्मरण करे सो श्रीगुसांईजी कहेहे “ सदा सर्वात्मना सेव्यो भगवान् गोकुलेश्वरः । स्मर्त्तव्यो गोपिकावृंदैः क्रीड-न् वृंदावने स्थितः ” (सदा सर्वात्मभावसों श्रीगोकुलके ईश्वर भगवान् सेव्य हे ओर वृंदावनमें स्थित ब्रजभक्तनके जुथसाथ क्रीडा करिवेवारे भगवान् स्मरण करिवे योग्य हे) इत्यादि वचनके अनुसार वाललीला श्रीनवनीतप्रियजीके स्वरूपमें तथा रासादिलीला श्रीगोवर्धननाथजीके स्वरूपमें हे सो विप्रयोगात्मक स्वरूप श्रीस्वामिनीजीके हृदयमें रहत हे, सो जब श्रीस्वामिनीजीके भावकी भावना करे जो श्रीस्वामिनीजी प्रभुकों कौनभांति लडावत हैं कौनभांति गुणगान करत हे प्रभुके संग कौनभांति लीला करतहे यह भाव विचारे तो श्रीस्वामिनीजी कृपानिधि प्रसन्न होय भावको दान करे तत्र भावात्मक

नमः ” “ स्मृतिमात्रार्तिनाशनाय नमः ” श्रीआचार्यजी कृपाके निधिहे ओर उनको नाम स्मरणमात्रमेंही सर्व आर्तिकों हरे हैं । तातें श्री-आचार्यजीकी कृपातें दैन्यआदि सगरे धर्म हृदयमें आवे, ओर मेरेमें तो एकहू साधन नांही हे एक ‘ श्रीकृष्णः शरणं मम ’ यहही गतिहे सो श्रीगुसांईजी विज्ञप्तिमें कहेहे “ यदुक्तं तातचरणैः श्रीकृष्णः शरणं मम । तत् एवाऽस्ति नैश्चित्यमैहिके पारलौकिके ” (हमारे पितृचरण श्रीमहाप्रभुजी “ श्रीकृष्णः शरणं मम ” यह वतायेहें ताकरिकें हमको यहलोकमें ओर परलोकमें निश्चितता हे सो श्रीहरिरायजी कहत हे जो श्रीआचार्यजी श्रीगुसांईजीके अनुसार मेरेहू एक अष्टाक्षरमंत्र “ श्रीकृष्णः शरणं मम ” येही गतिहे अष्टप्रहर याभांति शरणकी भावना करतहों । तातें जो जीव पुष्टिमार्गीयहे तिनहूके श्रीआचार्यजीको आश्रय करि अष्टाक्षरमंत्र कह्यो करनो यह सिद्धांत हे ॥ ३० ॥

इति श्रीहरिरायजीविरचितं चतुर्थशिक्षापत्रं श्रीगोपेश्वरजीकृतव्रजभापाटीकासमेतं समाप्तम् ॥४॥

शिक्षापत्र ५.

अत्र पंचमशिक्षापत्रमें विरहभावकरिकें भगवान् भावनीयहे ताको साधन दैन्यहे दैन्यको साधन तापभावहे यह निरूपणहे ॥ उपर कहे जो तन मन धन करि श्रीआचार्यजीके पदकमलको आश्रय करि अष्टाक्षरमंत्र एक गतिरूप करे ताको श्रीआचार्यजी कृपा करिकें दैन्यादि सर्व धर्म हृदयमें सिद्ध करे सो पंचम शिक्षापत्रमें वर्णन करतहे।

ओर निःसाधन दीनताहू नांही हे तातें भावाग्नि अतिदुर्लभ हे । यह् श्रीआचार्यजीको पुष्टिमार्गहे तामें तो यहरीतिहे जो शीतलभाव कवहू न करनो जेसैं कुंभनदासनें एकदर्शनके विरहमें गायो हे “ केतेदिन बीत गये विनुदेखे ” यांभांति आतुरता होय तब पुष्टिमार्गके भावको अनुभव होय ॥ २ ॥

मूल-तापभावः परं दैन्यं प्रकाशयति सर्वथा ।

दैन्येन दयया दीनबंधुः प्रादुर्भवत्यसौ ॥ ३ ॥

शब्दार्थः-तापभावहे सो उत्तमदैन्यको प्रकाश निश्चय करेहे ओर दैन्यसों दीनबंधु भगवान् दया करिकें प्रकट होयहे ॥ ३ ॥ टीका-अब जाप्रकार दैन्यहोय सो उपाय कहतहें. पेहेलें तो हृदयमें ताप होय जो सगरो जन्म बीत्यो, पुष्टिमार्गमें साक्षात् पुरुषोत्तम विराजतहे तिनको अनुभव कछु न भयो, मेरेमें कछु धर्म नांही हे, याभांति प्रभुविषयक ताप हृदयमें होय सो ताप सगरे दोषकों दूरीकरतहे । अनेक जन्मके कायिक, वाचनिक, मानसिक, पाप हृदयमें भरेहे ओर काम, क्रोध, मद, मत्सर, करि जीवको हृदय मलीनहे सो जब तापामि प्रगट होय तब सगरे दोषनको नाश होय ता पाछें दैन्य आवे तब देहकी ओर दशा होयजाय खान पान देहसंबंधी सुखदुःख सब छुटि जाय याभांति जब होय तब हृदयमें प्रभुको प्रकाश होय, काहेतें जो दीनबंधु श्रीठाकुरजी को नामहे सो जीवको दैन्य होय तब प्रभुको दया आवे सो श्रीभागवतमें निरूपणहे, जब द्रौपदीको दैन्य भयो तब प्रभु लाज राखि, गजेंद्रको दैन्य भयो तब प्रभु पधारे, रासपंचाध्यायीमें ब्रजभक्तनको जब दीनता भई “ इति गोप्यः प्रगायंत्यः प्रलपंत्यश्च चित्रधा । रुद्धुः सुस्वरं राजन् कृष्णदर्शनलालसाः ” (यहरीतिसों गोपीजन गानकरतहत ओर विचित्र बिलाप करतहत सो कृष्णके दर्शनकी इच्छासूं हे राजन् ! सुस्वर रुदन करन लागे) यह भावकी सिद्धि भई ता पीछें “ तासामाविर-

प्रभुको अनुभव होय, प्रभुके अनुभवको ओर उपाय नांही काहेतें जो श्रीकृष्णके हृदयमें श्रीस्वामिनीजीही स्थित हे ओर कछु (श्रीस्वामिनीजी विना) श्रीकृष्ण जानतही नांही तातें श्रीस्वामिनीजीको आश्रय करि भावात्मक हरि (श्रीस्वामिनीजी जिनको विरह करतहे तिन) की भावना करे तब श्रीस्वामिनीजी कृपा करि प्रसन्न होय तब प्रभु अपनो अनुभव जतावे ॥ १ ॥

मूलं—अस्माकमतिभाग्येन तदास्यं वल्लिरुद्धतः ।

अतः शीतलभावोऽस्मिन् मार्गे नैवोपयुज्यते ॥२॥

शब्दार्थः—पुष्टिमार्गीय जीवके अति भाग्यतें भावनात्मक प्रभुके मुखारविंदरूप अग्नि (श्रीआचार्यजी) प्रकट भयेहे तासों यह मार्गमें शीतलभाव उपयोगमें नांही आवे हे [विरहात्मकतापसों प्रभु अनुग्रह करे] ॥ २ ॥ टीका—यह विप्रयोग भावामि मेरे भाग्यमें तो नांही हे काहेतें जो यह भावात्मक अग्नि तो दास्य धर्म होय तिनके हृदयमें होय सो दास्य धर्महू अति कठिन महा दुर्लभ हे ओर दैन्य अति दुर्लभ हे सो कहतहे जो स्वामिको सुख चाहे अपनो न चाहे सो दास, जेस पद्मनाभदासजीकी वार्तामें श्रीआचार्यजीमहाप्रभुजी भोजनकों पधारे ताहीसमय जा व्योपारीको द्रव्य मार्गमें लुटायो हतो सो रोवत आयो तब पद्मनाभदासनें करजकाठीके वा व्योपारीको द्रव्य दीयो परि बोलन नांही दीयो श्रीआचार्यजीको श्रम नांही करिवे दीयो एसो दास्य धर्म कठिन हे, ओर दैन्यको प्रकार रासपंचाध्यायीमें प्रसिद्ध कह्योहे जो अंतर्धानसमय व्रजभक्तननें श्रीकृष्णलीलाहू कीये गुणगानहू कीयो ता-पाछें निःसाधन दीनताकी योग्यता भई । सो मेरेमें दासधर्महू नांहीहे

१ दास्य धर्मको अर्थ विस्तारसों लिख्यो हे सो मूल श्लोकके अनुसार नांही हे परंतु बोधोव पुस्तकमें हे तासों लिख्यो हे.

शब्दार्थः—तापात्मक श्रीआचार्यजीके चरणारविंदके आश्रयकी सिद्धि तो, विनके वाक्य श्रीसुबोधिनीजीआदि ग्रंथनमें श्रद्धासूं होय ओर उनके वचनामृतमें निष्ठा तो, निरंतर तादृशीय जनकी सेवातें होय ॥ ५ ॥ टीका—श्रीआचार्यचरणहे सो श्रीस्वामिनीजीके भावरूपजानने याभावसों श्रीआचार्यजीके चरणकमलको आश्रय करना ताकरि भावरूप विप्रयोगको दान होयगो सो श्रीआचार्यजीके चरणकमलको आश्रय कब होय ? जब श्रीआचार्यजीके वचनामृत श्रीसुबोधिनीजी आदि छोटे बड़े ग्रंथके भावमें निष्ठा होय तब श्रीआचार्यजीके स्वरूपको ज्ञान होय तापाछे श्रीआचार्यजीके चरणकमलमें भाव होय तब चरणकमलको आश्रय होय सो श्रीआचार्यजीके वचनामृतग्रंथनमें निष्ठा कब होय ? जब पुष्टिमार्गीय भगवदीयकी सेवा करियें तब भगवदीय कृपाकरिकें जतावे तबही जान्यो जाय तातें भगवदीयकी सेवा मन, कर्म, वचनकरिकें अवश्य कर्तव्यहे तिनकी कृपातें सर्व सिद्ध होय ॥ ५ ॥

मूलं—तदीया दुर्लभाश्चेत्स्युः श्रीभागवतसेवनम् ।

अथवा दैन्यभावेन स्मर्त्तव्यः सततं हरिः ॥ ६ ॥

शब्दार्थः—तदीय कदाचित् दुर्लभ होय तो श्रीभागवतको सेवन करे अथवा (श्रीभागवतको पाठ करिवेको ज्ञान न होयतो) दैन्यभावसों निरंतर हरिको स्मरण करे ॥ ६ ॥ टीका—श्रीआचार्यजीके वचनामृतमें निष्ठा भगवदीयकी सेवातें सिद्ध होयवेको उपर कह्यो सो पुष्टिमार्गीय भगवदीय अति दुर्लभहे सो जहांतांइ नमिले तहांतांइ नित्य श्रीभागवत—श्रीसुबोधिनीजीके सेवन नियमपूर्वक करे जब भगवदीय मिले तब सगरो भाव बतावे तहांताई आपही श्रीभागवत वांचे, जो श्रीभागवत—श्रीसुबोधिनीजीमें अभ्यास न होय, ज्ञान न होय तो दैन्यकरिकें निरंतर हरि (सर्व दुःखके हरनहार) भगवानको स्मरण

भूच्छौरिः स्मयमानमुखाम्बुजः । पीतांबरधरः सखी साक्षान्मन्मथ-
मन्मथः" (विनके मध्यमें हास्ययुक्त मुखारविंदवारे, पीतांबरधरिवेवारे,
मालायुक्त सांक्षात् कामकेहूकाम भगवान् प्रकट भये) यामांति प्रभु
पंधारे । तातें अहंकारतें प्रभु दूर रहे ओर दैन्यकरि प्रकटेहे तासों
दैन्य वारेनके हृदयमें प्रभु प्रकट होय अपने आनंदको अनुभव सर्वथा
करावे, प्रथम ताप होय ता पीछें दैन्य होय यह दैन्य कौनभांति होय
सो उपाय आगेंके श्लोकमें कहतहे ॥ ३ ॥

**मूलं-तदैन्यं स्यात् स्वामिनीनां तापभावविभावनात् ।
तद्भावनं भवेदेव तापात्मचरणाश्रयात् ॥ ४ ॥**

शब्दार्थः—श्रीस्वामिनीजीके तापरूपी भावको अनुसंधानकीयेतें
दैन्य होय ओर तापभावको भावन, विरहात्मक श्रीआचार्यजीके
चरणारविंदके आश्रयतें होय ॥४॥ टीका—दैन्यसिद्धि तो श्रीस्वामि-
नीजीके हाथहे काहेतें जो विप्रयोगभावके देयवेवारी श्रीस्वामिनीजी हे
तातें श्रीस्वामिनीजी जत्र कृपाकरे तव तापभावकी भावना होय सो
भावनाहू ब्रजभक्तनकी रीतिसों करनी सेवासमय न करनी सेवासों
पोंहोचिकें अनोसरमें करनी सो अपने मनकी कल्पनासों विप्रयोगकी
भावना न करनी श्रीस्वामिनीजीके चरणकमलको आश्रयकरि जाप्रकार
श्रीस्वामिनीजी विप्रयोगकी भावना करतहे, वेणुगीत, युगलगीत,
आदिमें वर्णनहे ता भावकी भावना करे, श्रीआचार्यजीको स्वरूप
तापात्मक जाने यामांति श्रीआचार्यजीके भावकी भावना करे श्री-
आचार्यजीके चरणको आश्रयकरे तव भाव सिद्ध होय । आश्रय केसैं
सिद्ध होय सो आगेंके श्लोकमें निरूपण करतहे ॥ ४ ॥

मूलं-तदाश्रयस्य सिद्धिस्तु तद्वाक्यपरिनिष्ठया ।

तन्निष्ठा सततं तादृक्तदीयजनसेवया ॥ ५ ॥

विषयैर्मुपितेक्षणम् । अस्तं कालाहिनाऽऽत्मानं कोन्यस्त्रातुमिहेश्वरः ।
 (संसाररूपी कुवामें गिरचो, विषयकरिकें मुद गयेहे नेत्र जिनके,
 कालरूपी सर्पने असनकीयो एसो जो आत्मा तिनको यह संसारमें
 रक्षा करिवेको अन्य कोन समर्थहे ?) याभांति अपनो दोष स्फुरचो तव
 न्यूनभाव होय प्रभुकी प्रार्थना करि तव प्रभु कृपाही कीये । तेसँही
 पुरुरवाकी कथा श्रीभागवतमें कहीहे “ पुंश्चल्यापहतं चित्तं कोऽन्यो
 मोचयितुं क्षमः । आत्मारामेश्वरमृते भगवंतमधोक्षजम् ” (व्यभिचा-
 रिणी स्त्रीनें हरिलीये ऐसे चित्तकों सर्व जीवनके आत्मामें रमण
 करिवेवारे ईश्वर-अधोक्षज (इंद्रियजन्यज्ञान जिनकुं नहि पहाँच सके
 ऐसे) भगवान् विना अन्य कोन छुडायवेमें समर्थ हे ?) ऐसे जब
 अपनो दोष पुरुरवाकों स्फुरचो तव प्रभु कृपा करि, सो यह मार्ग तो
 दैन्यहीकोहे या मार्गमें जहांताई दैन्य न आवे तहांताई फलसिद्धि
 नांहीहे और अपनकों उत्तम जाने तहांताई दैन्य न आवे तातें
 अपनकों न्यून (तुच्छ) जानिकें प्रभुके मिलवेको यत्न करे तो प्रभु
 दुःखको नाशही करे हरि सर्वदुःखके हर्ता श्रीकृष्ण सगरे मनोरथ
 पूर्णकरेंगे ॥ ८ ॥

मूलं-भवद्भिन्नैव कर्तव्यः क्षोभो मनसि सर्वथा ।

अस्मिन् मार्गे यथैवार्तिस्तथैव फलसन्निधिः ॥ ९ ॥

शब्दार्थः-तुम्हारे मनमें सर्वथा क्षोभ कर्तव्य नांहीहे काहेतें जो
 यामार्गमें जैसे आर्ति होय तेसँही फल नजीक होय ॥ ९ ॥ टीका-
 अपनकों न्यून (तुच्छ) माने और क्षोभसहित मनमें सर्वथा भावना
 करे सो श्रीगुसांईजी विज्ञप्तिमें कहेहे “ त्वदर्शनविहीनस्य त्वदीयस्य तु
 जीवितम् । व्यर्थमेव यथा नाथ ! दुर्भगाया नवं वयः ” (हे नाथ !
 आपके दर्शनकरिकें हीन जो त्वदीय (आपके शरण आये जीव) को

करे, निरंतर दैन्य भावसों जीव हरिको स्मरण करे जब श्रीठाकुरजी दुःख नांहीसहसकें ओर कृपाकरि पुष्टिमार्गीय भगवदीयको संग मिलावे तब तिनके संगतें सर्व कार्य सिद्ध होय ॥ ६ ॥

मूलं-अष्टाक्षरमहामंत्रो वक्तव्य इति निश्चयः ।

सर्वदा सर्वभावेन तेन सर्वं भविष्यति ॥ ७ ॥

शब्दार्थः—अष्टाक्षर महामंत्र सर्वदा सर्वभावतें कह्यो करनो ताकरिकें सर्व सिद्ध होयगो ॥७॥ टीका—जीव तो स्वभावकरि दुष्टहे जो कछु न बनि आवे तो अष्टाक्षरको महामंत्र जानि अष्टाक्षर “श्रीकृष्णः शरणं मम ” यह कह्यो करे काहेतें जो श्रीआचार्यजीमहाप्रभु वेद, पुराण, शास्त्र, श्रीभागवतमेंतें सार निश्चयकरि अष्टाक्षरमंत्र प्रकटकीयेहे सो अपने दैवीजीवनके अर्थहे तातें सर्वकालमें अष्टाक्षरमंत्रको जपे कबहू भूले नांही सर्वभावकरि अष्टाक्षरको जप करे तिनके सर्व कार्य निश्चय सिद्ध होय ॥ ७ ॥

मूलं-अस्माकं न्यूनतैवासीन्मिलनं यदभून्नहि ।

एतावती हरिः कृष्णः पूरयिष्यति तामपि ॥८॥

शब्दार्थः—अपनकों इतनी न्यूनताहे जो प्रभु ओर भगवदीयको मिलाप नांही भयो सो हरि श्रीकृष्ण वह न्यूनताकों हू पूर्ण करेंगें ॥८॥ टीका—उपर कहे ताभावात्मक विप्रयोगात्मक प्रभु ऐसे दुर्लभहे । तातें जीव अपनकों न्यून (तुच्छ) माने याभांति प्रभुके मिलवेको मन करे तत्र श्रीकृष्ण सर्वदुःखके हर्त्ता हरिहे सो सगरे मनोरथ पूर्ण करेंगे सो जीव तो स्वभावकरि दुष्टहे परंतु अपनमें कोउ अज्ञानकरिकें उत्तमता मानतहे ताहीतें प्रभु अपनो अनुभव नांही जतावतहे. श्रीभागवतमें पिंगला सारिखी जाकी महादुष्टक्रिया हतीवानें अपनकों तुच्छ मानिके वचन कह्यो “ संसाररूपे पतितः

इति श्रीहरिरायजीकृतं पंचमं शिक्षापत्रं श्रीगोपेश्वर-
जीकृतव्रजभाषाटीकासमेतं समाप्तम् ॥ ५ ॥

शिक्षापत्र ६.

अब छठे शिक्षापत्रमें भक्तनके अनिष्टकी निवृत्ति ओर इष्टकी प्राप्ति भगवानही करतहे यह निरूपणहे. अब उपर कहे ताभाव मनमें राखे विप्रयोगही मुख्य हे, आर्ति जेसी होय तेसोही फलको अनुभव होय तामें लौकिक क्लेश बाधक हे, लौकिक दुःखमें या भांति ज्ञान राखे तो दुःख न होय भगवद्धर्म रहे सो अब कहत हे.

मूलं-गृहभंगसमाचाराः श्रुताः श्रुतिविषायिताः ।

तदर्थं लिख्यते किञ्चित्समाधानाय चेतसः ॥१॥

* प्रथम उपोद्घातमें लिखिहे जो श्रीगोपेश्वरजीके बहुजी पधारिजायवेके दोय मास पेहेलें वा होनहारवातकू जानिके श्रीहरिरायजीने पत्र ४१ पठाये फेरि कितनेक दिन बीते तापाछें श्रीगोपेश्वरजीके बहुजीने लीला करी. ओर छठे पत्रमें यह समाचार केसहे ? एसी शंका होय ताको समाधान यह हे जो श्रीहरिरायजीने बहुजी लीला-पधारे पेहेलें वा वातकू जानिकें पत्र पठावने शुरू कीये. पांच पत्र पठाये ता पाछें श्रीबहुजीमहाराजने लीला करि सो समाचार सुनिकें श्रीहरिरायजीने यह पत्र लिख्यो तब तो श्रीगोपेश्वरजी पत्र बांचते नांही गवाखामें धरि राखते. सो छठो पत्र गृहभंग भये तापाछें आयो सोहू गवाखामें धरि राख्यो एसें तीन दिनताई शोकमें सग्न रहे तापाछें हरिजीवनदासकी विनतिसों पत्र बांचे पाछे भोजन करि दुसरे दिनतें टीका करिवेको प्रारंभ कीयो (अर्थात् दश शिक्षापत्र आये तब प्रारंभ कीयो) सो नित्य एकपत्रकी टीका करते एसें करत करत नव पत्रकी टीका करि तब नवमपत्रमें प्रेम, आसक्ति, ओर व्यसनके स्वरूपको निरूपण बांचिके गृहभंगको क्लेश निवृत्त भयो तब श्रीहरिरायजीको २० मो पत्र आयवेवारो हतो तामें जो इकीकृत लिखिहे (ताको टीपण हे सो देखनो) सो यथार्थ हे एसें श्रीकन्हैयालालजीमहाराज कोट्यवारे तथा श्रीविठ्ठलरायजीमहाराज अमरेलीवारे प्रभृतिवालकनकों विनति करी खुलासा लीयेतें अनुमान होय हे ।

जीवित दुर्भाग्यस्त्रीके यौवन बराबर व्यर्थहे) श्रीगुसाईजी कहतहे जो हे नाथ ! पुष्टिमार्गीय वैष्णव तुझारे कहावे सो तुझारे दर्शन विना जो कोय तदीय होय जीवतहे सो व्यर्थ जीवतहे वे बड़े अभागीहे या भांति अपनकों महाअभागी सर्व साधन करि हीन महादुष्टजानि मनमें आर्तिकरे जो हानाथ ! अब मेरी कोन दशा होयगी ? श्रीमहाप्रभुजीद्वारा तुझारे शरण में आयोहूं, मोमें एकदू धर्म नांही, याभांति नित्य दैन्य करे सर्वथा वारंवार विरहकरि उच्छ्वास लेय काहेतें जो यह श्रीआचार्य-जीके पुष्टिमार्गमें जाके हृदयमें जितनी आर्ति तितनीही फलसिद्धिहे, जाकों विरह नांही ताकों फलसिद्धिकी ढीलहे जाकों थोरो विरह ताकों थोरी फलसिद्धिहे जेसैं रासलीलामें जेसो जाको भाव तेसो ताकों रसदान दीयो वृक्षादिक, पशु, पक्षि, व्रजभक्तआदिनको अपने भावानुसार अनुभव भयो तेसेही पुष्टिमार्गीय वैष्णवनकों जेसी आर्ति तेसोहि फलरूप श्रीकृष्ण रसको संबंध करावे ॥ ९ ॥

मूलं-यथाकथंचित् कर्तव्यो व्यवहारो हि लौकिकः ॥

अपकीर्तिभयात्तेन बुद्धिशैथिल्यसंभवात् ॥ १० ॥

शब्दार्थः—अपकीर्तिके भयसो थोडोबोहोत लौकिकव्यवहार करनेो काहेतें जो अपकीर्ति करके बुद्धिमें शिथिलता होयवेको संभवहे ॥ १० ॥ टीका—विप्रयोग आर्तिको स्मरण तब होय जब लौकिक वैदिक कार्य छुटे सो संसारमें रहिके सब कर््यों चाहिये काहेतें जो लौकिक वैदिक कार्य छोडे तो लोकमें अपकीर्ति होय लोक बुरो कहे तब अपने मनमें क्षोभकरि क्रोध होय तो अपने मार्गमेंतें बुद्धि शिथिल होयजाय तातें लोगनकी अपकीर्तिके भयतें कुछ थोरोसो लौकिक वैदिक कार्य करे जामें अपनो धर्म गुप्त राखे मन व्यवहारादिकनमें न लगावे दोषचारि घंरी व्यवहार करे यह सिद्धांत भयो ॥ १० ॥

कर्त्तव्यहे, ओर श्रीकृष्ण बड़ेहे जिनको आर्यवंश जो सवतें उंचो यदु-
वंश तथा चंद्रवंशहू सवतें श्रेष्ठहे तथा वल्लभकुल सवतें श्रेष्ठहे. पृथ्वी-
पर तीनकुल श्रेष्ठ प्रसिद्धहे, ओर अवतार अनेकहे तामें तीन श्रेष्ठहे,
त्रेतामें दशरथजीके घर श्रीरामचंद्रजी तिनको रघुकुल, द्वापरमें श्री-
कृष्णको यदुकुल ओर कलियुगमें श्रीआचार्यजीको वल्लभकुल ये सवमें
श्रेष्ठ केवल भक्तोद्धारार्थहीहे तामें हमारे आचार्यजीके वंशमें श्रीकृष्ण
वालभावसों सेवनीयहे तातें मनमें कछु लौकिककेश होय तो श्रीठाकुर-
जी अप्रसन्न होयजाय तो अपनो धर्म जातरहे तातें श्रीकृष्ण प्रसन्न
रहे सोई करे ॥ २ ॥

मूलं-सर्वेश्वरश्च सर्वज्ञः कृष्णः सकरुणः सदा ।

असमर्थो ज्ञानशून्यो जीव इत्येव निश्चयः ॥३॥

शब्दार्थः-श्रीकृष्ण सर्वके ईश्वर, सर्वज्ञ, ओर सदा दयासहित हे
तथा जीव असमर्थ, ज्ञानशून्यहे एसोही निश्चयहे ॥ ३ ॥ टीका-अव
भगवानको ओर जीवको स्वरूप कहत हे. श्रीकृष्ण सर्वोंपर ईश्वरके
ईश्वर हे. ईश्वर वातें कहे जो मनआवे सोई करे, ब्रह्मादिक, शिवादिक,
इंद्रादिक कोउ श्रीकृष्णकी आज्ञा टारिवेकों समर्थ नांही हे, अजामिल-
सारिखेकों एक पुत्रके भावसों नारायणनामतें निर्भय करिदीयो ऐसे
सर्वकरणसमर्थहे, तातें सर्वेश्वर श्रीकृष्णहे ओर त्रिलोकीमें सर्वके हृदय-
की जानत हे तथा कोटानकोटी ब्रह्मांडमें सवठोर एक श्रीकृष्णही सर्व-
कर्त्ताहे सो सर्व जानतहे इनतें कछु छिप्यो नांहीहे ओर करुणावानहे।
ऐसे ईश्वर हे सो काहूके दुःख सुख केसे नांही जानतहोयगें ? परम
करुणाके निधिहे अपने भक्तनको रंचकहू दुःख नांही सहीसकत ऐसे
धर्म श्रीकृष्णहीमेंहे। ओर जीव असमर्थहे यह जीवको कियो कछुहू
नांही होत हे यह अपनी कृति मानत हे सो सगरो अज्ञान जाननों.

शब्दार्थः—कर्णमें विपरूप गृहभंगके समाचार सुने तासूं चित्तके समाधानके अर्थ कछु लिखत हैं ॥ १ ॥ टीका—तुम्हारे गृहभंगके समाचार हमने सुने सो सुनतहीं एसो दुःख भयो मानों हमारे श्रवणमें विष परयो सो दुःख हम कहालिखें ? परंतु तुम्हारे मनमें दुःख हे तदर्थ हम कछु शास्त्रोक्त समाधानपत्र लिखतहैं जो या समय हम तुम्हारि पास होते तो आछो परंतु भगवदिच्छातें दूर हों तासों लिखतहों जो ऐसे दुःखमें जब अपने पुष्टिमार्गीयधर्मको स्मरण होय तब जानियें जो श्रीआचार्यजीकी पूर्णकृपाहे तातें हम लिखतहैं जो भगवदिच्छाको ग्रहण करनो, मूलधर्म यहहे जो हृदयमेंते प्रभुको स्मरण प्रभुको आवेश जाप्रकार बाहिर न जाय सो कर्त्तव्यहे सो पत्र वांचिकें चित्तको समाधान करियो । या पत्रमें लौकिक कार्य तथा भगवद्धर्म सब वर्णितहे । जा रीतसों पुष्टिमार्गीय रहे भगवदिच्छा विचारे सो सब वर्णन हे तातें अपनो चित्त लगाय पत्र वांचि समाधान करियो ॥ १ ॥

मूलं-सदा यशोदातनुजो द्विभुजः सुद्विजद्वयः ।

सरोजास्यस्रवल्लालः स्मर्यतामार्यवंशजः ॥ २ ॥

शब्दार्थः—सदा श्रीयशोदाजीके पुत्र, द्विभुज, सुंदर दोय दांत-वारे, कमलसारिखे मुखारविंदतें लार जिनके सवत हे ऐसे आर्यवंशमें प्रकट भये श्रीकृष्णको स्मरण करो ॥ २ ॥ टीका—संसारके दुःखकरि मन दुःख पावे तों श्रीयशोदाजीके पुत्र, द्विभुज, (दोय भुजावारे) दोय दंतवारे, ओर मुखारविंदतें लार सवत हे ऐसे श्रीकृष्णको स्मरण

१ “ श्रीहरिरायजीके छोटे भाई श्रीगोपेश्वरजीके बड़ुजीनें लीला करी सो बड़ुजी सेवामें बहोतही श्रीगोपेश्वरजीकों अनुकूल हते. सो उपर वर्णन करेहें. ताही अर्थ श्रीगोपेश्वरजीकों शिक्षापत्र लिखें हैं. सो अब श्रीगोपेश्वरजीके मनको समाधान होय वा भांति लिखत हे ” या प्रकार प्रथमावृत्तिमें छप्पो हे सो असंगत जानि नीचे लिख्योहे ॥

कर्तव्यहे, ओर श्रीकृष्ण वडेहे जिनको आर्यवंश जो सवतें उंचो यदु-
वंश तथा चंद्रवंशहू सवतें श्रेष्ठहे तथा वल्लभकुल सवतें श्रेष्ठहे. पृथ्वी-
पर तीनकुल श्रेष्ठ प्रसिद्धहे, ओर अवतार-अनेकहे तामें तीन श्रेष्ठहे,
त्रेतामें दशरथजीके घर श्रीरामचंद्रजी तिनको रघुकुल, द्वापरमें श्री-
कृष्णको यदुकुल ओर कलियुगमें श्रीआचार्यजीको वल्लभकुल ये सवमें
श्रेष्ठ केवल भक्तोद्धारार्थहीहे तामें हमारे आचार्यजीके वंशमें श्रीकृष्ण
वालभावसों सेवनीयहे तातें मनमें कछु लौकिककेश होय तो श्रीठाकुर-
जी अप्रसन्न होयजाय तो अपनो धर्म जातरहे तातें श्रीकृष्ण प्रसन्न
रहे सोई करे ॥ २ ॥

मूलं-सर्वेश्वरश्च सर्वज्ञः कृष्णः सकरुणः सदा ।

असमर्थो ज्ञानशून्यो जीव इत्येव निश्चयः ॥३॥

शब्दार्थः-श्रीकृष्ण सर्वके ईश्वर, सर्वज्ञ, ओर सदा दयासहित हे
तथा जीव असमर्थ, ज्ञानशून्यहे एसोही निश्चयहे ॥ ३ ॥ टीका-अव
भगवानको ओर जीवको स्वरूप कहत हे. श्रीकृष्ण सर्वोपर ईश्वरके
ईश्वर हे. ईश्वर वातें कहे जो मनआवे सोई करे, ब्रह्मादिक, शिवादिक,
इंद्रादिक कोउ श्रीकृष्णकी आज्ञा टारिवेकों समर्थ नांही हे, अजामिल-
सारिखेकों एक पुत्रके भावसों नारायणनामतें निर्भय करिंदीयो ऐसे
सर्वकरणसमर्थहे, तातें सर्वेश्वर श्रीकृष्णहे ओर त्रिलोकीमें सर्वके हृदय-
की जानत हे तथा कोटानकोटी ब्रह्मांडमें सवठोर एक श्रीकृष्णही सर्व-
कर्त्ताहे सो सर्व जानतहे इनतें कछु छिप्यो नांहीहे ओर करुणावानहे।
ऐसे ईश्वर हे सो काहूके दुःख सुख केसे नांही जानतहोयगें ? परम
करुणाके निधिहे अपने भक्तनको रंचकहू दुःख नांही सहीसकत ऐसे
धर्म श्रीकृष्णहीमेंहे। ओर जीव असमर्थहे यह जीवको कियो कछुह
नांही होत हे यह अपनी कृति मानत हे सो सगरो अज्ञान जाननों.

अपने प्रभुको भूल्योहे मायाकरिकें मोहितहे, हृदयमें ज्ञानशून्यहे तातें अपनो सामर्थ्य जानतहे सो श्रीआचार्यजीमहाप्रभु वालवोधमें कहेहे जो जीव स्वभाव करिकें दुष्ट हे यह निश्चय हे प्रभु गुणनिधि हे जीव दोषनिधिहे तातें प्रभुकी इच्छाको जीव कैसें जाने ? ॥ ३ ॥

मूल-तस्येच्छा त्रिविधा प्रोक्ता मूलवेदस्वभेदतः ।

मूलेच्छया गृहीतानां नान्यथा कुरुते फलम् ॥४॥

शब्दार्थः—सो प्रभुकी मूल, वेद ओर स्व यह भेदसों तीनप्रकारकी इच्छाहे तामें मूलेच्छाकरिकें जिनको ग्रहण कीयोहे तिनको अन्यथा फल नाहीं करतहे ॥ ४ ॥ टीका—प्रवाहीसृष्टिकों लौकिकक्रिया, पुष्टि-सृष्टिकों भगवत्सेवा ओर मर्यादासृष्टिकों कर्ममार्गमें प्रवृत्ति. या भांति प्रभुकी इच्छा तीन प्रकारकीहे तातें यह श्रीआचार्यजी महाप्रभुसंबंधी सृष्टि पुष्टिसृष्टिहे तिनको तो निश्चय भगवानकी मूलेच्छाहे सोई ग्रहण कर्तव्यहे जो सर्वकार्य एक प्रभुहीको कीयो होयहे एसो ज्ञान मनमें दृढ राखनो चाहियें। ओर कर्ममार्गीयहे सो याभांति कहतहे जो जेसो कर्म करे तेसोही फल पावे एक कर्महीतें फल कहतहे प्रवाही माया-करि जानत हे जो मायाही सगरो कार्य करत हे या भांति प्रभुको कोउ जानत नाहीं तातें पुष्टिमार्गीयको मूल एक प्रभुकीही इच्छा जानि सर्वकर्ता प्रभु हे या भांति जान्यो चाहिये. अन्यथा ओर रीतिसं फलको न जाननों। जो कर्मकरि फल होयगो अथवा कोई

१ 'तस्येच्छा त्रिविधा लोकमूलवेदस्वरूपतः' एसो काह पुस्तकमें पाठहे [प्रभुकी मूल, वेद ओर स्वरूपतें तीन प्रकारकी लोकमें इच्छाहे] तामें मूलेच्छाकरिकें जो गृहीत हे तिनको ओर फल नही करे. सो आगेके श्लोकमें लिखे हैं, २ अन्यथा फल नाम जिनको जितनो कर्म करायवेकी ओर जितनो मुखदुःखादिक मोगवायवेकी प्रभुकी इच्छा होय तेसोही होय तासों अन्यथा नाहीं होय. ३ अन्यथाफलकी बात मूलके अनुसार नाहींहे.

साधनकरि फलकी सिद्धि होयगी ऐसे सर्वथा ओर भांति फलको चिंतन न करनो. अब तीनप्रकारकी सृष्टि तीनप्रकारकी भगवदिच्छा मानतहे सो आगे श्लोकमें कहतहैं ॥ ४ ॥

मूलं-प्रवाह एव नियतस्तेषु कृष्णविचारितः ।

मर्यादया गृहीतांस्तु प्रवर्तयति कर्मणि ॥ ५ ॥

शब्दार्थः—जो मूलच्छाके जीवहे तामें तो प्रवाहही श्रीकृष्णने विचारितहे ओर मर्यादाकरिकें जिनको ग्रहण कीयोहे तिनको तो कर्ममें प्रवृत्ति करावेहैं ॥ ५ ॥ टीका—प्रवाहिसृष्टि लौकिकइच्छा मानत हे श्रीकृष्णने उनको लौकिकही विचारिराख्योहे काहेतें जो प्रवाहिसृष्टिके जीव न्यारेहैं ओर क्रियाहू न्यारीहे सो पुष्टिप्रवाहमर्यादाग्रंथमें श्रीआचार्यजीमहाप्रभु कहेहैं “ जीवदेहकृतीनां च भिन्नत्वं नित्यता श्रुतेः ” ॥ (जीव, देह, कृतिको भिन्नत्वहे ओर याकी श्रुतिमें नित्यताहे) यह वाक्यतें प्रवाही सदा भ्रममेंहीहे. भक्तिमार्गमें कबहू आवे नांही ओर मर्यादाको ग्रहण करतहे सो जीव कर्ममार्गमें प्रवृत्तहे काहेतें जो वचनकरि प्रकटे हे सो ‘ वचसा वेदमार्गं हि ’ (वचन करिके वेदमार्गको उत्पन्नकीये) यहवाक्यमें निरूपणहे सो वेदमें श्राद्ध, होम, यम, नियम, व्रत, तप, दान, इत्यादि साधनसोही फल बतायेहैं, मर्यादा-

१ पुष्टि, प्रवाह ओर मर्यादाके जीव देह कर्मादिकनको भेद—

मार्गः	उनके देह.	उनके कर्म.
पुष्टिः	दैव.	भगवत्सेवा—स्मरणान्नि.
प्रवाहः	आमुर.	लौकिक कार्यनिर्वाहमात्र.
मर्यादा	दैव.	वैदिककर्म—अग्निहोनादि.

मार्गीय आछो कर्म करिकें स्वर्गलोकमें जातहे तहां सुख भोगकरिकें जब पुण्यहीन होतहे तब फरि यह संसारमें गिरतहे. उनको प्रभुकी प्राप्ति नांहीहे सो वह जानत नांही, केवल यह कर्ममार्गीय स्वर्गहीको फल जानतहे याभांति मर्यादासृष्टि वेद इच्छा मानतहे ऐसे प्रवाहि ओर मर्यादासृष्टिकों प्रकार कह्यो अब पुष्टिसृष्टिकों कहा कर्तव्यहे सो आगे श्लोकमें कहतहे ॥ ५ ॥

मूलं—स्वरूपेण वृत्तानां तु स्वतः सर्वं करोति हि ।

तच्चिंतयैव हि व्याप्तः कृपालुः सर्वतो विभुः ॥ ६ ॥

शब्दार्थः—अपने स्वरूपतें वृत्तजो जीवहे तिनकी चिंताकरिकें आप व्याप्तहैं ओर कृपालु सर्व करिवेमें प्रभु समर्थ हे ॥ ६ ॥ टीका—पुष्टिसृष्टि केवल भगवत्स्वरूपको आश्रय करे काहेतें जो भगवत्सेवार्थ पुष्टिसृष्टि करीहे “भगवद्रूपसेवार्थ तत्सृष्टिर्नान्यथा भवेत्” । (भगवद्रूपकी सेवाके अर्थ पुष्टिजीवकी सृष्टि करी हे जो यह प्रयोजन नांही हतो तो पुष्टिसृष्टिकों ही नांही करते) यह वाक्यतें पुष्टिसृष्टि अपने मनमें विचारे जो प्रभु अपने स्वरूपवलतें स्वतः आपही करेंगे यह जानि चिंता नांही कर्तव्यहे काहेतें जो प्रभुतो सगरे व्यापकहे सर्वठोर प्रभुही हे तहां चिंता काहेको करनी श्रीकृष्णहीको कीयो सबठोर होतहे ओर श्रीकृष्ण कृपालुहे अपने भक्तजनपर सदा कृपाही करत आयेहे ओर कृपा करेहीगें याभांति प्रभुको चिंतन करनो ओर श्रीकृष्ण विभुहे सर्व सामर्थ्ययुक्तहे काहुको दीयो ऐश्वर्य नांहीहे, ब्रह्मादि, शिवादि, इंद्रादि देवताहे तिनको भगवानने ऐश्वर्य दीयोहे तातें देवता फल दीयो चाहे तो प्रभुकी आज्ञा लेके देत हे स्वतः सामर्थ्य देवतामें नांहीहे तेसें श्रीकृष्ण नांहीहे आपुही सर्व सामर्थ्ययुक्तहे सो श्रीगुसांईजी विज्ञप्तिमें कहेहे “कर्तुं पुनरकर्तुं च ह्यन्यथाकर्तुमीश्वरे ।

सामर्थ्यं यन्मया दृष्टं त्वय्येवातो न संशयः ” (करिवेको, नकरिवेको ओर अन्यथाकरिवेको जो ईश्वरमें सामर्थ्य सो आप (श्रीठाकुरजी) मेंही मेंने देख्योहे तासों संशय नांहीहे) यह वाक्यते कर्तुं अकर्तुं अन्यथाकर्तुं समर्थ प्रभुहे ताते लौकिक वैदिकमें कछुहु अपनकों चिंता नांही कर्त्तव्यहे प्रभु आपुहीते सर्व करेंगे प्रभु सर्वसामर्थ्ययुक्तहे ॥ ६ ॥

मूलं-निवर्त्तयत्यनिष्टेभ्यः स्वकीयान् करुणानिधिः ।

यदि जीवाः स्वभावेन निवर्त्तेरन्न ते स्वतः ॥७॥

शब्दार्थः—जो जीव आपते स्वभाव करिके (अनिष्टको) निवृत्त न करे तो दयानिधि भगवान् स्वकीयकों अनिष्टते, निवृत्तकरतहे । अथवा तो जीव अपने स्वभावते प्रभुते निवृत्त नहोय तो यह स्वकीयजीवनकों करुणाके भंडाररूप भगवान् अनिष्टके निवृत्त करतहे ॥ ७ ॥ टीका—श्रीकृष्ण अनिष्टके निवृत्तिकर्त्ता हे सो अपने स्वकीयको अनिष्ट निश्चय दूरकरेंगे काहेते जो करुणानिधिहे. तहां कोई पूर्वपक्ष करे जो भगवान् तो समदर्शी हे सर्व प्राणिमात्रपर एकसीदृष्टिहे विश्वंभर सवनके भरणपोषणकर्त्ताहे सो तुम कहतहो जो अपने स्वकीयभक्तनपर करुणा करेंगे ओरनपर न करेंगे सों केसें? एसो कोई संदेह करे तहां कहतहे जो सगरे जगतकों आनंददाता प्रभुहे तोहु भक्तनकों अधिक आनंद देतहे सो निरोध-लक्षणमें श्रीआचार्यजीमहाप्रभु कहेहें “ सर्वानंदमयस्यापि कृपानंदः सुदुर्लभः ” (सर्व आनंदमयकेहु कृपानंद अत्यंत दुर्लभहे) यह वाक्यते सर्वकों आनंददाताहे परंतु कृपानंद दुर्लभहे सो

. १ सुदामाको वैभव देयवेकी इच्छाभई, दुर्वासाको चक्रदुःखनिवृत्ति करिवेकी इच्छा न भई ओर अजामिलकों (कृतिते अन्यथा) उद्धारिवेकी इच्छा भई सो प्रभुने कीयो एसो सामर्थ्य ईश्वरमेंहे ॥

श्रीभागवतनवमस्कंधमें दुर्वासा प्रति भगवान् कहेहैं “अहं भक्तपराधीनो ह्यस्वतंत्र इव द्विज ! । साधुभिर्गस्तहृदयो भक्तैर्भक्त-जनप्रियः” (मैं भक्तनके पराधीनहूं साधुभक्तजननें मेरो हृदय ग्रस्तकीयोहे ओर भक्तजन मोंकू प्रिय हे,) यह वाक्यतें भगवान् भक्तनके वश्यहे जगतके वश्य नांहीहे भक्तनके अर्थ अवतार प्रभु लेतहैं तातें अपने स्वकीयनको अनिष्ट वे योंही दूर करेंगे ऐसे करुणानिधिहे परंतु जीवको स्वभावहे जो रंचकदुःखमें धीरज नांही रहत चिंतातुर होत हे सो यह स्वभाव निवृत्त करिवेमें प्रभुही समर्थ हे ओर दूसरो कोउ नांहीहे ॥ ७ ॥

मूलं-अनिष्टमेव सर्वज्ञो बलादूरीकरोति हि ।

इष्टानिष्टविवेको हि जीवबुद्ध्या न जायते ॥ ८ ॥

शब्दार्थः—यह इष्टहे यह अनिष्टहे एसो विवेक जीवबुद्धितें नांही होयहे तासों (जीवकी इच्छा नांही होय तोहू) सर्वज्ञ प्रभु अपने प्रमेयबलतें अनिष्टकों दूरिकरतहैं ॥ ८ ॥ टीका—भक्तनके अनिष्टकों प्रभु जानतहैं. काहेतें जो सर्वज्ञहे अनिष्ट दूरिकरिवेमें बलवान् हैं सो आपही अनिष्ट दूरिकरेंगे. जेसैं प्रह्लादजीकों हिरण्यक-शिपुनें वोहोत दुःख दियो सो श्रीनृसिंहजी नांही जानत हते ? सर्व जानत हते परंतु भक्तनकी परीक्षालेवेकों प्रभु प्रथम नांही प्रकटे जब प्रह्लादजीकों वोहोत दुःख हिरण्यकशिपुनें दीयो ओर प्रह्लादजीकों भगवदाश्रय छुट्यो नांही, तब प्रभु प्रकट होय अनिष्ट दूर कीये. हिरण्यकशिपुकों मारे, तातें दुःखक्लेशमें भक्तनकों भगवदाश्रय न छोड्योचाहियें ओर प्रभुतो कृपाही करेंगे सगरो दुःख दूरिकरेंगे परंतु जीवबुद्धितें इष्ट अनिष्टको विवेक जान्यो नांहीजातहे जो मैं भगवद्भक्त होयकें अन्याश्रय करतहों लौकिक वैदिक चिंता करतहों

भगवान् तो जो करतहे सो भलीही करत हे, मेरो भोग तो वोहोत हे सो प्रभु थोरोहीमें निवृत्त करेंगे, मोपर प्रभु अनुग्रह कीयो जो यह दंड भयो याभांति धीरज जीवबुद्धितें नांही रहतहे तातें दुःख पावतहें॥८॥

मूलं—अविद्याया गृहीतानामणूनां भ्रमसंभवात् ।

अत एवं हि संसारं मन्यते सुखरूपिणम् ॥ ९ ॥

बाला इव करप्राप्तं सर्पमक्रीडनोचितम् ।

पितेव सहजस्निग्धस्तान्निवर्त्तयते बलात् ॥ १० ॥

शब्दार्थः—अविद्याकरिकें गृहीत ओर (स्वरूपतें) अणु ऐसे जीवकों भ्रमको संभवहे तासोंही बालक क्रीडामें नांही योग्य ऐसे सर्प हाथमें प्राप्तभयो ताकों जेसैं सुखरूप मानत हे तेसैंही जीव संसारकों सुखरूपें मानत हे तासों सहजस्नेहवारे पिताकीनाइ तिनकों बलात् निवृत्त करत हे ॥ ९ ॥ १० ॥ टीका—जीव प्रभुके स्वरूप जानिवेमें नांही समर्थ हे, काहेतें जो अविद्याकरिकें ग्रसित हे तातें मनको भ्रम दूर नांही होतहे. यद्यपि भ्रम छोटेहे अविद्यारूप भ्रम (में ओर मेरो इतनोही) हे ता भ्रमकों जीव टारी नांहीसकतहे. यद्यपि सर्व जानतहे जो क्षणभंगुर शरीर हे काल काहूकों छोडे नांही यह ज्ञानहू मनमें आवतहे तथापि जीवकी अहंता ममता नांहीछूटतहे काम, क्रोध, लोभ, मद, मत्सर, लौकिक दुःखमय याहितें चिंताग्रसित हे तातें देहसंवंधी संसारकों सुख सोहि सुखरूप मानिरह्योहे, तोहू प्रभु संसारतें छुडावेहींगे सो कोन प्रकार सो आगेश्लोकमें कहतहे ॥९॥ यद्यपि जीव संसारकों सुखरूप मानिरह्यो हे तहां प्रभु अपने भक्तनकों याभांति छुडावत हे, जो द्रव्यमें मन होय तो द्रव्यको नाश करे, जो स्त्रीपुत्रादिकनमें मन होय तो तिनको नाश करे या भांति भक्तनको मन जहां लौकिकमें लगे सो प्रभु दूरिकरत हे तब यह जीव स्वभावतें अनेकभांतिके दुःख

पावतहे परंतु प्रभु बाकूं लौकिकअर्थ देत नांही सो लौकिक दृष्टांतसं कहतहे, जेसैं अज्ञानी बालक होय सो खेलिवेकेलिये सर्पकों पकरिवेकों दोरतहे यह नांहीजानत जो यह कालहे काटेगो सो बालकतो अज्ञानी हे परंतु मातापिताको पुत्रमें सहजही खेहहे तासों सर्पकों पकरन नांही देतहें वह कालरूप सर्पतें निवृत्तही करतहे तेसैंही यह जीव संसारकों सुखरूप मानिरह्यो हे परंतु प्रभुको खेह भक्तपर हे कृपाकरि संसारतें छुडावनोहे तातें संसारसुखमें लागन नांहीदेतहे ॥ १० ॥

मूलं—यथा रुदंति ते बाला भ्रांताः संसारिणस्तथा ।

अत एव हि सर्वज्ञः कृष्णः संसारमोचकः ॥ ११ ॥

शब्दार्थः—जेसैं वह बालक [सर्प नांही लेवे दीयेसो] रुदन करतहे तेसैं संसारि भ्रांतियुक्त होयकें (लौकिकवस्तु गयेतें) खेदयुक्त होय हे परंतु श्रीकृष्ण तो सर्वज्ञ हे तासोंही अहंताममतात्मक संसारतें छुडायवेवारे हे (सो ताकेलीये लौकिकवस्तुकी प्राप्ति नांही होनदेत हे किंतु होय तासोंही छुडावत हे) ॥ ११ ॥ टीका—पिता स्नेह करि सर्पतें निवृत्त करत हे तब वह बालक अज्ञान करि रुदन करत हे जो मेरो खिलोना लेन नांही देत हे, तेसैं ही यह संसारी जीवपर प्रभु परमकृपा करि संसारमें मन हे ताही वस्तुकों हरिलेत हे तब यह जीव मनमें अहंता ममता करि दुःख पावत हे अज्ञानकरिकें प्रभुको गुण नांही मानत जो प्रभु कृपा करि संसारतें छुडायो. ओर प्रभु तो सर्वज्ञहे सो श्रीकृष्ण अपने भक्तनकों पुत्रवत् जानि संसार मोचन करत हे, जेसैं पुराणांतरमें कथा हे जो नारदजीको मन व्याह करिवेको भयो सो एक राजाकी बेटीको स्वयंवर हतो तहां सगरे देशदेशके राजा आये सो नारदजीके मनमें यह भयो जो में करूं तब नारदजीनें विचार्यो

जो राजाकी बेटी जाग्र प्रसन्न होय माला पहरावे तासों व्याह होयगो सो यासमय तो सुंदर रूप चहियें जो राजाकी बेटी रीझे. तातें सवतें सुंदर भगवान् हे उनको रूप लेआवुं, तव नारदजी भगवान् पास आये प्रभुनें बोहोत समाधान कीयो, पूछे जो नारदजी कछु आज्ञा करो, तव नारदजीनें कह्यो में तुम्हारो हूं मेरो भलो होय सो करियें, अपनो रूप मोकों देहु तो राजाकी बेटी व्याहि लाउं. तव प्रभु मुस-कायकें कह्यो जो तुम्हारो भलो होयगो सोई में करूंगो तुम जाओ मेनें मेरो रूप दीयो, तव नारदजी तो मायाके भ्रमते प्रभुके व्यंग वचन समुझे नांही जहां स्वयंवर हतो तहां आये सो श्रीठाकुरजीनें तो बोहोत बुरो मर्कटको टेडो मुख दीयोहे ओर नारदजी तो कामवश्यतें अज्ञानसों जानतहे जो में भगवान्को रूप पायोहों सो बारंवार जहां वह कन्या जाय तहां सन्मुख जाय वेठे सगरे लोक हसे जो कहां टेडो मुखकरि आयोहे सो नारदजीकों कामवश्यतें ज्ञान नांही पाछें प्रभु राजाको रूप धरिकें पधारे तव कन्यानें माला पहराई सो प्रभु लेगये, तव नारदजी निरास भये पाछें एकनें कही जो नारदजी अपनो मुखतो देखो सो नारदजी दर्पणमें देखे तो बांदरकोसो टेडो मुखहे तव भगवानपर बोहोत क्रोध कीयो जो जगतमें मेरी हांसी करवाई पाछें प्रभु समुझाये तव नारदजीकों ज्ञान भयो, सो नारदजी प्रथम तपस्या करत हते तव कामदेव तपस्यामें भंग करिवेकों सहाय (वसंत, मलया-निल, अप्सरोगण, विगेरे) समेत गयो सो नारदजीकों मोह न भयो तव कामदेव हार मानिकें फिरगयो तासों नारदजीकों अभिमान भयो जो में कामकों जीत्यो सो अभिमान प्रभु याभांति दूरिकीयो । या प्रकार प्रभु अपने भक्तनकों संसारतें छुडावतहे ॥ ११ ॥

मूलं-इत्येव रूप्यते नाम तथाविधमतः प्रभोः ।

संसारवैरी धरणीं प्रति शेषो न्यरूपयत् ॥१२॥

शब्दार्थः—धरणीशेषके संवादमें पृथिवी प्रति शेषजीनें संसारवैरी एसो नाम कह्योहे तासों तेसोहि प्रभुको नाम निरूपित होयहे । ओर 'तथाविधमतिः प्रभोः' एसो काहू पुस्तकमें पाठहे तदनुसार अर्थमें तेसी प्रभुकी मतिहू भक्तनके संसारकूं छुडायवेकीहे ॥१२॥ प्रभुको रूपहू संसारतें छुडावतहे ओर प्रभुको नामहू संसारतें छुडावतहे. ब्रजभक्त श्रीकृष्णको ललितत्रिभंगी स्वरूप देखिकें लोक, वेद, पति, पुत्र, घर सबमेंतें मन छोडिकें प्रभुकों भजे ओर नामकरिकें अजामिल आदि अनेक भक्तनके संसार छुटे, ओर विधि जो प्रभुकी सेवा करतहे तिनहूके सर्व संसार दूरिहोतहे तथा प्रभु अनेकविध लीला करतहे ताको स्मरण जो कोई करे तिनहूके सकल संसारदुःख दूरि होय जाय. ओर श्रीकृष्णकी मतिमें यह रहतहे जो भक्तनको संसार जाय मेरे पास आवे तब भलो होय येही प्रभु विचारतहे तातें धरणीशेषसंवादमें धरणी (पृथिवी) प्रति शेषजी कहेहे 'जो "संसार-वैरी" श्रीकृष्ण केसेहे जो संसारदुःखके वैरीहे जहां भक्तनकों संसार होय तहां आपु सब दूरिकरे श्रीकृष्णको रूप, नाम, लीला, आपु मनकरि भक्तनकों संसारतें दूरिकरि भलो होय सोई करतहे ॥१२॥

मूलं—मन्यामहे वयं भ्रांताः कृष्णविस्मृतिकारणम् ।

संसारमुत्तमं कृष्णस्तं कथं स्थापयेद्हरिः ॥१३॥

शब्दार्थः—अपने भ्रांत होयकें श्रीकृष्णकी विस्मृतिके कारणरूप संसारकों उत्तम मानतहे सो हरि वहसंसारकों कैसे स्थापन करे ? ॥१३॥

टीका—यह जीवके हृदयमें अनेकजन्मको भ्रमहे सो गद्यके श्लोकमें कहेहे जो अनादिकालको भ्रम यह जीवके हृदयमें छाय रह्योहे तातें अविद्याकरिकें श्रीकृष्णकों भूलिगयोहे तासोंहि यहसंसारकों उत्तम जानि यामें मनकों लगायोहे, संसारमें देहसंबंधी सुखदुःखनकों

मुख्य मानत है सो श्रीकृष्ण संसारकों कैसें राखें काहेतें जो हरि दुःख हरिवेचारेहे जहां सूर्य होय तहां अंधियारो कोन भांति रहे ? तेसैं हरि अविद्यारूप संसारतमके सूर्यरूप प्रभु भक्तनको संसार कैसें राखे ? जीव तो संसारसंबंधी सुख विचारतहे जो अब यह कार्य करूं तामें मेरे देहसंबंधी कुटुंबहू सुख पावे ओर मेंहू सुख पाउं ओर प्रभु यह विचारतहे जो यामें याको मनहे सो हरिलेउ सो यामेंतें मन छुटिकें मेरो आश्रय करे याभांति श्रीकृष्ण भक्तनको संसार हरतहे ॥ १३ ॥

मूलं—एवं तदीयैर्मनसि निधेयः स्वप्रभोगुणः ।

स्वस्मिन्नपि विनिश्चेया प्रभोरंगीकृतिर्ध्रुवा ॥१४॥

शब्दार्थः—एसें तदीयजनकों अपने मनमें अपने स्वामी श्रीकृष्णको गुण राखनों काहेतें जो अपनमें हू प्रभुकी अंगीकृति निश्चलहे एसो निश्चय राखनो ॥ १४ ॥ टीका—या भांति पुष्टिमार्गीय भगवदीय अपने (सो उपरतें ओरनकों दिखायवेके लीये कहे जो प्रभु करतहे सो भली करतहे ओर भीतरतें मन करि दुःख पावे एसें न करे) मनमें निश्चय यह धारण करे जो अपने अंगीकृत भक्तनके प्रभु रक्षकही हे कहा भयो दुःख आयो तो अपने स्वकीयनकों प्रभु दंड देतहे, जेसें स्त्री कछु मर्यादातें ओर भांति चले तो पति दंडदेय रीतिसों चलावे तेसेंही प्रभु अपने भक्तनके दोषनकों दूर करिवेकों दंड देतहे सो श्रीगुसांईजी चिज्ञप्तिमें कहेहे “ दंडः स्वकीयतां मत्वेत्येवं चेदिष्टमेव नः । अस्मासु स्वीयतां मत्वा यत्र कुत्र यदा तदा ” ॥ (दंड देनों सो अपने मानिकें देनो एसें होय तो अपनकों इष्ट हे काहेतें जो हमारेमें जहां तहां जब तब अपने हे एसों मानिके दंड द्योगे) यह वाक्यतें अपने स्वकीयकों प्रभु दंड दीये सोहू अनुग्रह जानि मनमें सुखी हे. तातें जहां जहां हमतें अपराध परे तहां तहां सुखेन

दंडदेनो उचित हे या बातमें हम मनमें सुखी हे या भांति भगवदीय अपने प्रभुको अनुग्रह जाने यह दुःखहू अनुग्रहरूप जानि प्रभुको गुण अपने हृदयमें धरे. काहेतें जो प्रभुपर दोष धरत हे सो वहिमुखेहे उनको पुष्टिमार्गमें अंगीकार नांही हे तातें निश्चय मन, वचन, कार्य करि यह जाने जो श्रीठाकुरजी अंगीकृतनिजभक्तनके रक्षकहे ॥ १४ ॥

मूलं—अतएवास्मदाचार्यैरुक्तं वरणलक्षणम् ।

“लोके स्वास्थ्यं तथा वेदे हरिस्तु न करिष्यति ॥ १५ ॥

शब्दार्थः—तासोंही अपने श्रीमदाचार्यजीने लोकमें तथा वेदमें स्वास्थ्य हरि तो नांही करेंगे ऐसे वरणको लक्षण कह्यो हे ॥ १५ ॥ टीका—उपर कहे जो भक्तनके रक्षक प्रभु दुःख क्यों देत हे ? जाभांति यहलोक परलोकमें भक्तजन सुख पावे तैसों क्यों नहीं करत ? ऐसे कोई कहे तहां कहतहे जो यह जीव स्वभावकरि दुष्ट हे जो लौकिक कार्यमें सुख पावे तो तहां आसक्त होय जाय जो वैदिककार्यमें सुख पावे तो तहां आसक्त होय जाय तो हृदयमेंतें प्रभुको आश्रय जातरहे आश्रय गयेसुं भक्तको नाश होय, तातें श्रीठाकुरजी लौकिकवैदिक कार्य सिद्ध न करे तब दुःख पायके उहकार्यमें मनहू न करे केवल प्रभुकोही आश्रय करे सो श्रीआचार्यजी महाप्रभुजी चारों वर्णके लक्षण श्रीसुत्रोधिनीजी निबंधमें कहेहे जो कोई जीव ब्राह्मण, क्षत्रिय, वैश्य, शूद्र, स्त्री आदि प्रभुकी शरण आवे ताकों प्रभु लौकिक वैदिकतें छुडायके अंगीकार करतहे ओर नवरत्नग्रंथमें कह्यो हे जो भक्तनकी लौकिक वैदिक स्थिति छुडायके अपनोही करतहे, यह विचारिकें हरिको आश्रय करनो यह सिद्धान्त सर्वोपरि हे ॥ १५ ॥

**इति श्रीहरिरायजीकृतं पण्ठं शिक्षापत्रं श्रीगोपेश्वर-
जीकृतव्रजभापाटीकासमेतं समाप्तम् ॥ ६ ॥**

१ चारो वर्णको जयें मूलके अनुसार नांही दे.

शिक्षापत्र ७.

अब सप्तमशिक्षापत्रमें लौकिकासक्ति नांही कर्त्तव्य हे ओर सेवामें आसक्ति कर्त्तव्य हे सो निरूपण हे । अब छठे शिक्षापत्रमें कहे जो लौकिक वैदिक प्रभु सिद्ध न करे तो प्रभुको गुणही मनमें धरे जो प्रभु भली करत हे सो यह धीरज कब होय जब भगवदीयको संग करि भगवत्स्मरणभजन करे, सो प्रकार आगे शिक्षापत्रमें कहतहे ॥

मूलं-सदा श्रीगोकुलाधीशः स्मर्त्तव्यः सर्वथा जनैः ।

तदीयैर्मिलितैः सर्वदोषचिंताविवर्जितैः ॥ १ ॥

शब्दार्थः—सर्व दोष ओर चिंतातें रहित जो तदीयजन तिनके संग मिलिकें सदा श्रीगोकुलके अधीश प्रभु निश्चय स्मरण करिवे योग्य हे ॥ १ ॥ टीका—पुष्टिमार्गीय भक्तजननकों सर्वथा यहही स्मरण क्यों कह्यो ? जो गायनके कुलके रक्षक कहि यह जताये जो निःसाधन गाय हैं तिनके प्रभु रक्षक हे, तेसेही जीव जब निःसाधन होय श्रीगोकुलाधीशको स्मरण भजन करे तब प्रभु दयाल हे सो अनुग्रह करेहीगे सो निःसाधन भावसों भजन स्मरण जब बने तब तदीय जन मिलेतें हृदयमें अनेक प्रकारके दोष काम, क्रोध, लोभ, मोह, मद, मत्सर, लौकिक वैदिक चिंता सो सर्व दूर होय, विना भगवदीयके संग कितनोहू भगवद्धर्म करे परंतु मनमेंतें दोष चिंता दूर न जाय. जेसे रासपंचाध्यायीमें सब भक्तनकों मद भयो एक मुख्य भक्तकों मद न भयो तब श्रीठाकुरजी एकभक्तकों अपने संग लेकें पधारे तब सगरे भक्तनकों अपने मदकी खबर नांही परी ओर प्रभुपर दोषवृद्धि भई जो हमकों छोडि गये या भांति सगरे भक्त प्रभुकों खोजिवेको चले पाछें एक भक्तहूकों मद भयो तब प्रभु तहांते अंतर्धान भये पाछें द्रुत द्रुत सब भक्त तहां आय पृछ्यो जो

तुमहूको श्रीठाकुरजी छोड़िगये? तब उनको अपने दोषको ज्ञान हतो सो कह्यो जो मेने मद कीयो ताकरि प्रभु अंतर्धान भये यह सुनतही उनके संगते सगरे भक्तनको ज्ञान भयो अपनो दोष स्फुर्यो जो हमको मद भयो ताते प्रभु छोड़ि गये या भांति श्रीआचार्यजी श्रीसुबोधिनी-जीमें निरूपण कीयेंहे ताते भगवदीयके संगविना दोष ओर चिंताको नाश न होय ताते भगवदीयसों मिलिके प्रभुको स्मरण करे सो श्रीआचार्यजी नवरत्नग्रंथमें कहेंहे “निवेदनं तु स्मर्त्तव्यं सर्वथा तादृशैर्जनैः” (निवेदन तो निश्चय तादृशीय जनसों मिलिके स्मर्त्तव्य हे) ॥ १ ॥

मूलं-न लौकिके मतिः कार्या भगवद्भाववाधिका ।

लौकिकं वैदिकं चापि स्वयं साधयिता प्रभुः ॥ २ ॥

शब्दार्थः-भगवद्भावको मिटायवेवारे लौकिकमें मति नांही करनी, ‘न लौकिकी मतिः कार्या’ ऐसे पाठमें भगवद्भावको बाध करे एसी लौकिकी मति न करनी काहेतें जो (एसी टेकवारेको) लौकिक ओर वैदिकहू प्रभु आप साधे हे ॥ २ ॥ टीका-अलौकिक पदार्थमें लौकिक बुद्धि न करनी काहेतें जो भगवद्भावमें लौकिक बुद्धि बाधक हे ताते प्रभुकी लीला, श्रीवल्लभकुल, भगवदीय, सेवा-सामग्री, ब्रज, श्रीयमुनाजी, श्रीगिरिराज आदि वृक्ष, लता, भगवद्भार्ता, ग्रंथ, कीर्त्तन, श्रीभागवत, इत्यादिकनमें लौकिकमति न करनी सगरी वस्तु प्रभु संबंधी जानि भावसंयुक्त सेवा स्मरण करे. लौकिकबुद्धि आवे तो अलौकिकभावमें बाधक होय तासूं लौकिकवैदिककार्यकी चिंता मनमें न राखे भगवत्कार्य मन लगायके करे लौकिक प्रभु आपही सर्व करि लेंगे, वल्लभकुल लौकिक वैदिक कार्य करि अपने भगवदीय सेवकको जतावत हैं जो तुम लोकवेदकी चिंता मति करो हम तुझारे अर्थ करत हैं तुम मुखेन प्रभुकी सेवा स्मरण करो ताते प्रभु लौकिक वैदिक आपहीते सिद्ध करेंगे ॥ २ ॥

मूलं—इदानीमीदृशः कालः प्रतिकूलः समागतः ।

यथाकथंचित् स्वमनः स्थापनीयं पदाब्जयोः॥३॥

शब्दार्थः—अब एसो विपरीत काल आयोहे तासों जेसेंतेसें अपनो मन (श्रीठाकुरजीके) चरणारविंदमें स्थापनों ॥ ३ ॥ टीका—अब कलिकाल महा कठिन हे याकालमें जो मिलतहे सो प्रतिकूल मिलतहे भगवदीयको संग दुर्लभहे सो वेगि नांही मिलतहे ओर जो मिलतहे सो लौकिककी कामनावारे स्वार्थके लीये मिलतहे उपरतें भलो सत्संग भली क्रिया दीसेहे ओर भीतर अनेकप्रकारकी लौकिक वासना भरी होय, तिनके संगतें फलसिद्धि न होय एसो संग यह कलिमें मिलतहे तातें जितनो बने तितनो अपने मनकों श्रीठाकुरजीके चरणारविंदमें लगावे प्रभुमें प्रीति बढिवेके लीये बहुत लोगनसों मिले परंतु तामें ओर भगवद्धर्म घटे सो न करे जितनोहे तितनेहीकी रक्षाकरि प्रभुके चरणारविंदमें मनकों स्थापे ॥ ३ ॥

मूलं—सेवायां च मनः स्थाप्य तत्साधकतयैव हि ।

गार्हस्थ्यार्थं विवाहेऽपि प्रयत्नः क्रियतां द्रुतम्॥४॥

शब्दार्थः—सेवामें मन स्थापनों ओर भगवत्सेवाकी साधकतातें (भगवत्सेवा भलीभांतिनों करिवेमें सहायताके लीये) हि गृहस्थाश्रम करनो चाहिये ताकेलीये विवाहमेंहू शीघ्र प्रयत्न करनो ॥४॥ टीका—श्रीठाकुरजीकी सेवा आदि भगद्धर्ममें मनको स्थापन करे ओर भगवत्सेवार्थ सगरी वस्तुको संग्रह करे. जो वस्तु भगवत्सेवामें साधक होय ताकों राखे जो सेवामें काम न आवे अथवा बाधक होय ताको त्याग करे, यह गृहस्थाश्रमहू भगवत्सेवार्थही जाने ओर विवाहादिकको प्रयत्न भगवत्सेवार्थही करे सो काहेतें जो गृहस्थाश्रम विना भगवत्सेवा भलीभांतिनों न होय तातें सेवार्थही करे सो श्रीभागवत-

नवमस्कंधमें भगवान् दुर्वासा प्रति कहेहे “ मत्सेवया प्रतीतं च सालो-
क्यादिचतुष्टयम् । नेच्छन्ति सेवया पूर्णाः कुतोऽन्यत् कालविप्लुतम् ”
(मेरी सेवातें साक्षात् प्राप्तभयी सालोक्यादि चतुष्टय (सालोक्य, सार्ष्टि,
सामीप्य, सारूप्य, इन चारो) मुक्तिनकों नांही इच्छतहे काहेतें जो
मेरी सेवातें पूर्णहे (सर्वार्थसिद्धि सेवाकोंही जानें हे) सो काल
जिनको नाश करेहे ऐसे अन्य (राज्यादिक) कों तो कैसे इच्छे ?)
यह वाक्यतें भक्त सेवामें प्रतीयमान चतुष्टयमुक्तिनकों नांही चाहतहे
ऐसे सेवा करिकें पूर्णहे तिनकों काल बाधा करे ऐसी वस्तुकी चाहना
कहांतें होय ? ॥ ४ ॥

मूलं-न भवेत् प्रायशा भोगे तदीयानां कचिन्मनः ।

तथापि चेद्भवेद्भोगो निवार्यः सर्वथैव हि ॥ ५ ॥

शब्दार्थः-भगवदीयनकों प्रायशः भोगमें मन कबहू नांही
होय तथापि कदाचित् भोगासक्त मन होय तो निश्चय ताको
निवारण करनो ॥ ५ ॥ टीका-तदीय जन अपने भोगकेलीये स्त्रीकों
न जानें परंतु भगवत्सेवार्थ जानें तथा भगवद्भक्त पुत्र होयवेकी
कामनासुं विषयकरे सो निरोधलक्षणमें श्रीआचार्यजीमहाप्रभु कहेहें
“ पुत्रे कृष्णप्रिये रतिः ” (भगवद्भक्त पुत्रमें प्रीति राखे) यह
वाक्यतें कृष्णमें प्रीति होय एसो पुत्र होय यह विचारि विषय
करे भगवत्सेवामें जो काम बाधक होय तो बाकी निवृत्तिके लिये
विषय करे ॥ ५ ॥

मूलं-भावोऽत्र साधनं मार्गं प्रमेयो भगवान् हि सः ।

प्रमाणं कृष्णसेवादौ स एव च फलं पुनः ॥ ६ ॥

शब्दार्थः-यह पुष्टिमार्गमें भाव साधन हे ओर प्रमेय भगवान् हे,
आदिमें श्रीकृष्णकी सेवा साधनरूप हे ओर फेरि सोही श्रीकृष्ण

फलहे ॥ ६ ॥ टीका—यह पुष्टिमार्गमें सगरी सेवाकी रीति साधनरूपा दीसत हे परंतु सगरी भावरूपहे, साधनरूपा दीसतहे सो फलरूपहे याको कारण कहा ? एसें कोउ कहे तहां कहतहे जो फल तो प्रभु अपने प्रमेयवलतें हाथ राखे जब चाहेंगे तब देयंगेही, यह निश्चय नांही जो इतने दिनमें फल होय ओर जीवस्वभावकरि फलकी मनमें चाहना रहतहे तातें सेवा साधनरूपा दीसतहे. जों सेवाहीकों फलरूप जानतहे तिनकों फलरूपहीहे तातें श्रीकृष्णकी सेवा प्रमाणरूप तथा फलरूप जानें. प्रमाणरूप जानि जे कोई सेवा करतहे तिनकों साधनरूपहे ओर प्रमेयरूप जानिके भगवत्सेवा करतहे तिनकों सेवा फलरूपहे जा भक्तके हृदयमें जेसो भावहे तिनकों तेसी प्राप्तिहे ॥ ६ ॥

मूलं-तस्मात् स एव संरक्ष्यो निधिरूपस्तु सर्वथा ।

एतद्विरुद्धं तत्सर्वं ज्ञात्वा ज्ञात्वा निवर्त्तयेत् ॥७॥

शब्दार्थः—तासों यह भगवद्भावही निधिरूपहे सो निश्चय रक्षा करिवेयोग्यहे ओर तामें विरुद्ध होय सो सर्व जानि जानि छुडाय देनो ॥७॥ टीका—याभांति अपने भावकी ओर प्रभुके स्वरूपकी रक्षा सर्व ओरतें करे, उपर कहिआये जो काल कठिनहे रंचक दुःसंग होयतो अपने प्रभुमेंतें वात्सल्य छुटि जाय तथा भगवत्सेवातें दूसरे साधनमें मन लागे तो सेवामें शिथिलता होयजाय तातें अपने भावकों निधिरूप जानि, अनेक दुःसंगतें भावकी रक्षा करि लेय, सो रक्षा करिवेको प्रकार कहतहे जो भगवत्सेवामें स्त्री प्रतिबंध करे तो बाहूको त्याग करियें स्त्रीको भाव न गिनियें. तेसेंही माता पिता पुत्र आदि जो प्रतिबंध करे तिनको त्याग करियें, याभांति देहसंबंधी तथा देशमें राजादिकको प्रतिबंध होय सो ज्ञान करि विचारि छोडे, एकवार न छूटे तो क्रमसों सब छोडे अपने भावकी रक्षा करिलेय ओर पुष्टिमार्गकी

सेवा सर्वोपरि जानि सेवाको भाव निधिरूप जानि गुप्त राखे यामांति रहे ताको श्रीमहाप्रभुजीकी कृपार्ते वेगि अनुभव होय. ॥ ७ ॥

इति श्रीहरिरायजीकृतं सप्तमं शिक्षापत्रं श्रीगोपेश्वर-
जीकृतव्रजभाषाटीकासमेतं समाप्तम् ॥ ७ ॥

शिक्षापत्र ८.

अब अष्टमशिक्षापत्रमें ऐहिक तथा पारलौकिकमें भगवान् ही चिंतनकरिवेयोग्यहे परंतु अन्याश्रय तो नांही कर्तव्यहे सो निरूपणहे उपर कहे ता प्रकारकरि भगवत्सेवा भावसहित करे ओर मनमें दृढ विश्वास राखे तो सर्व सिद्ध होय सो आगे कहतहैं

मूलं-ऐहिके पारलोके च सर्वसामर्थ्यसंयुतः ।

स एव गोकुलाधीशश्चितनीयस्तदा हृदि ॥१॥

शब्दार्थः—यहलोक ओर परलोकमें सर्वसामर्थ्ययुक्त श्रीगोकुलाधीशहे सोही सदा हृदयमें चितनीयहे ॥ १ ॥ टीका—श्रीगोकुलाधीशको अपने हृदयमें सदा चिंतन करे ओर सेवा करे तामें चिंता बाधकहे. एक तो यह जो मैं तो भगवत्सेवा करतहों सो मेरे लौकिक को निर्वाह कैसे होयगो ? ओर दूसरी यह जो मेरो अलौकिक कैसे सुधरेगो ? यह दोय चिंताको त्याग करे, यह ज्ञान मनमें राखे जो प्रभु सर्वसिद्ध करिवेमें सामर्थ्ययुक्त हे प्रभु लौकिकहू सिद्ध करेंगे काहेतैं जो श्रीगोकुलाधीशहे सो सर्वसामर्थ्यवान् हे यह विश्वास दृढ करि सदा नियमपूर्वक स्मरण करे. ॥ १ ॥

मूलं—विश्वासस्तत्र कर्त्तव्यो भद्रमेव विधास्यति ।
स्वदोषादेव तत्रापि दोषस्फूर्तिर्यतो भवेत् ॥२॥

शब्दार्थः—भगवानमें विश्वास करनो, भगवान् कल्याणही करेंगे. ओर वामें दोषकी स्फूर्ति होय सो अपने दोषतें होयहे ॥२॥ टीका—दृढ विश्वास मनमें राखे यह मुख्य विश्वास भावहे काहेतें जो विश्वास दृढ होय तो भगवद्धर्म थोरोहू वनि आवे तोहू वाको कल्याण होय ओर लोगनकों दिखायवेकों भगवद्धर्म बोहोत करे परि मनमें विश्वास न होय तो धर्ममें फलसिद्धि नाहीं होय सो श्रीआचार्यजी महाप्रभु विवेकधैर्याश्रयग्रंथमें कहेहैं “ब्रह्मास्त्रचातको भाव्यौ प्राप्तं सेवेत निर्ममः” (ब्रह्मास्त्र ओर चातककी भावना राखनी (जो अविश्वासतें ब्रह्मास्त्र निष्फल गयो ओर चातककों विश्वासहे तो मेघ जल देयहैं) ओर ममतारहित होय जो प्राप्त होय तिनकों सेवन करे) यहवाक्यतें जब हनुमान् सीताजीकी सुधि लेनकों लंकामें गयें हते तहां राक्षसनके वाग उजारि अनेकराक्षसनकों मारे तब रावणने इंद्रजितकों पठायो सो इंद्रजितने पहिले तो बहोत उपाय कीये परंतु हनुमानजी पकरे नजाय तब पाछें ब्रह्मास्त्र चलायकें प्रतीति कीनी तब हनुमानजी ब्रह्मास्त्रको माहात्म्य सत्यकरणार्थ वह ब्रह्मास्त्रमें बंधाये तब इंद्रजित् हनुमानकों लेकें रावणपास आयो तब रावणने कही जो एसो बलवान् वानरहे जिनने कितनेक राक्षसनकों मारेहे वाकों यह सूत्रके तारमें कैसे बांध्योहे ? याकों अब लोहकी जंजीरसांकलसों बांधो, तब ब्रह्मास्त्रके उपर लोहकी सांकलसों बांध्यो याभांति रावणकों अविश्वास भयो तब ब्रह्मास्त्र आपुही छुटी गयो और हनुमानजीने अपनो स्वरूप बढायो सो सगरी सांकल टूटिगई पाछें लंका सगरी जराई एसे अविश्वासतें ब्रह्मास्त्र नष्ट भयो, और चातक एक स्वांतिके बृंदको विश्वास राखतहैं

ओर जलही पृथ्वी उपर नांही जानत ताविश्वासते घन (मेघ) जड हे तोहू वाको मनोरथ पूर्ण करतहे. ताते वैष्णवको मुख्य विश्वास चाहिये अविश्वासहे सो आसुरधर्महे ओर विश्वासहे सो भगवद्धर्महे ताते जाके हृदयमें दृढ विश्वास होय ताको सर्वफलकी प्राप्ति होय. भक्त अपने दोषको वारंवार विचारे आपनको दोषरूप जाने दोषकी स्फूर्ति करि मनमें दोषकी भावना करे काहेते जो अपनों दोषहे ताको विचारे तो मनमें दीनता आवे जो में महादोषवतहों मोपर प्रभु कैसे दया करेंगे? याभांति दोषकी स्फूर्ति होय तो प्रभुकी परम कृपा जानिये सो भगवदीय गायेंहे “माधो हों पतितनको राजा, हों पतितनको नायक, हों पतितनको ईश” याभांति अपनको सवनते दोषरूप जाने तब जानिये जो दोषकी स्फूर्ति भई तब दीनता होय ओर तबहि प्रभु कृपा करे ॥ २ ॥

मूलं—आर्तिः फलं साधनं च ब्रजाधिपतिसंगमे ।

अतः सदा तदात्यैव स्थीयतां तत्कृपायुतैः ॥ ३ ॥

शब्दार्थः—ब्रजके अधिपति श्रीकृष्णके समागममें आर्तिहे सो हि साधन ओर सो हि फल हे तासों प्रभुकी कृपायुक्त होय वैष्णवकूं रहेनो ॥ ३ ॥ टीका—प्रभुको मिलवेकी आर्तिहे सो साधनहे वा आर्तिसमान कोउ साधन नांहीहे ओर फलहू आर्तिहे हृदयमें आर्ति होय तो भगवत्सेवा स्मरण सब होय ओर प्रभु कृपाकरि अनुभव करावे. ज्यों ज्यों आर्ति बड़े त्यों त्यों अधिक अनुभव प्रभु करावे, ताते आर्तिहे सो ब्रजाधिपतिके संगम करायवेमें कारणहे सदा विप्रयोग आर्ति करत करत आर्तिरूप होयजाय तब प्रभु कृपा करे जेसे अग्निके संबंधते नवनीत द्रवीभूत होय तेसेही विप्रयोग आर्ति जब होय तब प्रभुको हृदय द्रवीभूत होय सो

निरोधलक्षणमें श्रीआचार्यजीमहाप्रभु कहेहैं “क्लिशमानान् जनान् दृष्ट्वा कृपायुक्तो यदा भवेत् । तदा सर्वं सदानंदं हृदिस्थं निर्गतं बहिः” (आर्तियुक्तजनकों देखिकें प्रभु जब कृपायुक्त होय तब सदानंद भगवान् हृदयमेंसों बाहिर निकसेहे) यह वाक्यतें अति क्लेशसंयुक्त जीवकों देखे तब प्रभु कृपायुक्त होय हृदयमेंतें बाहिर पधारि दर्शन देय तातें आर्तिही पुष्टिमार्गमें साधनहे तथा आर्तिही फलहे जब विप्रयोगमें तद्रूप होय जाय तब प्रभु कृपा करें ॥ ३ ॥

मूलं-अन्याश्रयो महानेव बाधको भीयतां ततः ।

तत्क्षणेनैव सचेतो विमुखं च विधास्यति ॥ ४ ॥

शब्दार्थः—अन्याश्रय महान्ही बाधकहे तासों अन्याश्रयतें डरपनों काहेतें जो (जाक्षण अन्याश्रय भयो ताक्षणमेंही) सत्पुरुषके चित्तकों निश्रय बहिर्मुख करेगो ॥ ४ ॥ टीका—उपर कहे जो विप्रयोग आर्ति ही साधन ओर फल दोउहे तहां अन्याश्रय बाधकहे सगरी आर्तिकों दूरिकरे सगरे धर्मको नाशकरे तातें अन्याश्रयतें सदा डरपत रहनो सो हारितस्मृतिमें कहेहैं “ नान्यं देवं नमस्कुर्यान्नान्यं देवं निरीक्षयेत् । नान्यत्प्रसादमद्याच्च नान्यदायतनं व्रजेत् ” (शब्दार्थः—अन्यदेवकों नमस्कार न करनो, अन्यदेवके दर्शन न करने, अन्यदेवको प्रसाद नांही खानो ओर अन्यदेवके मंदिरमें नांही जानो) इत्यादि स्मृतिके वचन विचारि अन्यदेवको देखनेहू नांही नमस्कारादिक न करे प्रसाद कलु नलेय ओर अन्यदेवको आश्रय करे ताकों बहिर्मुख जानियें अपने भावकी रक्षार्थ अपने मनतें बाको बेगिही त्यागकरे काहेतें जो विमुखके एक क्षणहू संवंधतें दुर्बुद्धि उपजतहे सो श्रीगुसांईजी विज्ञप्तिमें कहेहैं “ अहं कुरंगीदृग्भंगिसंगिनांगीकृतोऽस्मि यत् । अन्यसंवंधगंधोऽपि कंधरामेव बाधते ” (जासों मे मृगकी दृष्टिसी चप-

लट्टिहारें ब्रजभक्तनके संगी जो श्रीकृष्ण तिनको अंगीकृतहों तासों
अन्यसंबंधकों गंधहू मेरी कंधराकोही बाधकरेंहे) यहवाक्यतें भगवद्भ-
क्तनकों अन्यसंबंध याभांति बाधकहे. तातें वहिर्मुखजीवको संग छोड़ि
अपने भावकी रक्षा करे निश्चय सिद्धांतहे ॥ ४ ॥

मूलं-तदीयेषु सदा स्थेयं सद्भावेनैव सर्वथा ।

त एव भक्तिमार्गस्य सहायत्वे निरूपिताः ॥५॥

शब्दार्थः-सदा भगवदीयमें सत्यभावकरिकेही निश्चय रहनो
काहेतें जो भगवदीयहे सो भक्तिमार्गकी सहायतामें निरूपितहे ॥५॥
टीका-भगवदीयके संग रहे तो वहिर्मुखता नहोय अन्याश्रयहू नहोय
प्रभुमें सुंदरभावहू बड़े सर्वथा शुद्धभावसों तदीयको संग करे यह संग
प्रभुकुं मिलनके अर्थ करे ओर कछु लौकिक वैदिक चाहना न राखे
यह भक्तिमार्गमें सहायतें भक्ति बड़े प्रभु कृपा करे तातें तदीयको संग
करे सो श्रीभागवतप्रथमस्कंधमें शौनकको वाक्यहे “तुलयां लवे-
नापि न स्वर्गं नापुनर्भवम् । भगवत्संगिसंगस्य मर्त्यानां किमुताशिषः”
(भगवानके संगी भक्तके एकक्षण बरोबर स्वर्गकों के मोक्षकों
नांही तुलना करतहे तो मरणधर्मवारे राज्यादिकके मनोरथकों
तो कैसे तुलना करे ?) भगवदीयको संग एक क्षण होय तासुख
समान स्वर्ग वा मोक्ष नांही हे एसो सत्संग हे ओर श्रीभागवत
एकादशस्कंधमें श्रीभगवान् उद्धवजीप्रति कहेहे “न रोधयति मां योगो
न सांख्यं धर्म उद्धव । न स्वाध्यायस्तपस्त्यागो नेष्टापूर्तं न दक्षिणा ॥
व्रतानि यज्ञश्छंदांसि तीर्थानि नियमा यमाः । यथावहंधे सत्संगः
सर्वसंगापहो हि माम् ॥ सत्संगेन हि देतेया यातुधाना स्रगा मृगाः ।
गंधर्वाप्सरसो नागाः सिद्धाश्चारणगुह्यकाः ॥ बहवो मत्पदं प्राप्ता-
स्त्वाप्नोत्याधवादयः ॥ (हे उद्धव ! मोक्ष योग वश नांही करतहे, नांही

सांख्य, नांही धर्म, नांही स्वाध्याय (वेदाभ्यास), नांही तप, नांही दान, नांही कूपारामादिक, नांही दक्षिणा, नांही व्रत, यज्ञ, छंद, तीर्थ, नियम, यम, यह काहू वश नांही करतहे जेसो सर्वसंगको मिटायवेवारो सत्संग मोकूं वश करे हे. सत्संग करिकें निश्चय दैत्य, यातुधान, पक्षी, मृग, गंधर्व, अप्सरा, नाग, सिद्ध, चारण, गुह्यक, वोहोत वृत्रासुर प्रह्लाद आदि मेरे चरणारविंदकों प्राप्त भयेहे) श्रीभगवान् उद्धवजीप्रति कहत हे जो मोकूं सत्संग वश करतहे ओर नांही योग, सांख्य, धर्म, तप, त्याग, नियम, व्रत, यज्ञ, तीर्थ, इत्यादि मोकों वश नांही करतहे ओर सत्संगके प्रभावतें दैत्य, राक्षस, खग, मृग, गंधर्व, अप्सरा, नाग, सिद्ध, चारण, मनुष्य कोय होय सो तरत भये तातें शुद्धभावसों भगवदीयको संग करे तो पुष्टिमार्गमें भगवदीयके सहायतें भक्ति बड़े सो चोराशीवार्त्तामें वर्णनहे जो गदाधरदासके आशीर्वादतें तथा संगतें माधोदासकों भक्ति भई ॥ ५ ॥

मूलं—अस्माकं तु तदीयानां प्रसंगोऽपि सुदुर्लभः ।

चेतोऽपि साधनाभावाद्धिमुखं तिष्ठति स्वतः ॥६॥

शब्दार्थः—आपनकों तो भगवदीयको प्रसंगहू अतिदुर्लभहे ओर चित्तहू साधनके अभावसों स्वतः (आपतें) विमुख रहे हे ॥ ६ ॥ टीका—हमकों तो तदीय [भगवदीय] को संगतो महाही दुर्लभ हे एकक्षणहू भगवदीय नांही मिलत एक तो यह दुःख हे, ओर दुसरो चित्तकरि साधन, स्मरण, भावना कछु भगवद्धर्म नांही वनत हे तातें भगवदीयके संगको अभावहे ओर अकेले चित्त भगवद्धर्ममें नांही लागत ताकरिकें बहिर्मुखता हृदयमें होत हे. प्रभु प्रसन्न करिवेके दोय यह उपायहे एक तो भगवदीयके संगतें प्रभुमें मन लगे तथा संग न होय तो अष्टप्रहर चित्त भगवल्लीलामें लग्यो रहे तो प्रभु कृपाकरे भग-

वदीयको अभाव होय ओर मन करि साधनको अभाव होय तब बहिर्मुखता होय सो हमको वनीहे अब हम क्या करें ? याभांति जीवनके अर्थ श्रीहरिरायजी दैन्य करतहे ॥ ६ ॥

मूलं—गतो हि भगवद्दासः स्वकार्याय विदेशके ।

ब्रजपालोऽपि चलितस्तेन मे दुःखितं मनः ॥७॥

शब्दार्थः—भगवानदास अपने कार्यके अर्थ विदेश गयो हे ओर ब्रजपालनामको सेवकहू परदेश गयो तातें मेरो मन दुःखितहे ॥७॥ टीका—एक भगवदीय भगवानदास हमारे पास हतो सोहू अपने कार्यार्थ विदेश गयो ओर ब्रजपालहू परदेशको गयो ताकरिकें मन दुःखीहे में उनके संगहू न गयो ओर उनको अपने पास न राखिसक्यो तातें सत्संगविना मन बोहोत दुःख पावतहे ॥ ७ ॥

मूलं—मयि यद्यपि नास्त्येव किञ्चित्तत्कृपया पुनः ।

यदस्ति तदपि स्वीयसाधनाभावतो गतम् ॥८॥

शब्दार्थः—यद्यपि मेरेमें कछु धर्म नाहीहे तोहू विनकी कृपातें जो कछुहे सोहू फेरि अपने साधनके अभावसों गयोहे ॥ [त्वत्कृपया एसो पाठ होय तो तुझारि कृपातें एसो अर्थ होयहे] ॥ ८ ॥ टीका—भगवदीय मेरे पासतें पधारे तासों जानतहों जो मेरेमें स्नेह होतो तो तुझारो संग ओर भगवत्सेवा घरहीमें सवहे सो काहेकों छुटते, परंतु मेरे हृदयमें स्नेह नाही हे तासों ऐसं वनीहे मोमें यद्यपि स्नेह नाही हे तोहू एक तुझारि कृपाको बल हे जो मोपें प्रसन्नहो मोतें लौकिक वैदिक कार्यहू नाही बनत तातें गृहस्थाश्रमके कामहूको नाहीहों ओर प्रभु प्रसन्न करिवेके पुष्टिमार्गीय सेवादि धर्म ताकोहू अभावहे सोहू नाही बनत तातें अब में सबओरतें निःसाधनहों ॥ ८ ॥

मूलं-एतादृशोऽर्थे संप्राप्ते स हरिः शरणं मम ।

ऐहिके परलोके च नैचित्यं तत एव नः ॥ ९ ॥

शब्दार्थः—एसो अर्थ प्राप्त भयो तामें सो हरि मेरे आश्रयरूपहे तासोंही हमकों यहलोक तथा परलोकमें निश्चितताहे ॥ ९ ॥ टीका—एसो निःसाधन जो में सो मेरे हरिशरणहि एक गतिहे सो श्रीआचार्यजी महाप्रभु विवेकधैर्याश्रयमें कहेहे जो मनमें येही आश्रय करे “ऐहिके परलोके च सर्वथा शरणं हरिः” यह लौकिक वैदिक सिद्धि न होयआवे तोहू हरिशरण सर्वथा करे ताकरि सर्वसिद्धि होयंगे तातें हरि शरणकरि सर्वओरतें निश्चितहों अब प्रभु अपनो करि लेहिंगे सो श्रीआचार्यजीमहाप्रभु कृष्णाश्रयग्रंथमें कहेहें “शरणस्थसमुद्धारं कृष्णं विज्ञापयाम्यहम्” (शरणमें रहे तिनको उद्धार करिवेवारे श्रीकृष्णकों में विज्ञप्ति करुंहूँ) यह वाक्यतें जो शरणस्थ भक्तहे तिनको उद्धार प्रभु निश्चय करेंगे साधन बने अथवा न बने, सो भगवान् भगवद्गीतामें कहेहे “सर्वधर्मान्परित्यज्य मामेकं शरणं ब्रज । अहं त्वां सर्वपापेभ्यो मोक्षयिष्यामि मा शुचः” ॥ (सर्वधर्मकों छोडिकें एक मोकों शरणहो तो में तोकों सर्वपापतें मुक्त करुंगो शोक मति करे) यह वाक्यतें हरिशरण कीयेहे तातें यालोकसंवंधी कार्य तथा परलोक दोउ ओरतें निश्चितहों ॥ ९ ॥

मूलं-कदाचिन्मिलनं चेत्स्यात् सद्भाग्येन भवादृशाम् ।

तदा को वेद चित्तस्य परावृत्तिः पुनर्भवेत् ॥ १० ॥

शब्दार्थः—मेरे भाग्यतें कदाचित् आप सारिखेको मिलन होयगो तब फेरि चित्तकी परावृत्ति (जो पाछो फिरनों सो, अर्थात् जो चित्तमें धर्म हतो सो गयो ऐसैं अष्टमश्लोकमें लिख्यो हे सो चित्तकी परावृत्ति) होय यह कोन जानतहे ? ॥ १० ॥ टीका—हमतो भगवदीयके

संग विना एसो दुःख पावतहे ओर जीवनकों तो कदाचित (कबहूक) भगवदीय मिलतहे तोहू उनके भाग्यमें भगवल्लीला, भगवत्सेवा, पुष्टिमार्गके रसको अनुभव नांही लिख्योहे तातें सत्संगमें उन जीव-नको मनही नांही लागतहे काहेतें जो अबही 'पुनरागमन (वहीत जन्म) संसारमें लेनोहे वोहोत अंतरायहे यह कहिकें श्रीहरिरायजी जतायो जो पहिलें तो भगवदीयको सत्संगही दुर्लभहे तोहू कबहूक भाग्ययोगतें आयमिलतहे तब जीवको मन नांही लागतहे तातें जाको मन सत्संगमें न लगे ताकों यह जानियें जो अबही या जीवके भाग्यमें अनुभव नांही लिख्योहे अबही यह जीव संसारमें वोहोत भमेगो इनकों अनेक जन्मको अंतराय जाननो ॥ १० ॥

मूलं-कियल्लेख्यं महाचिंतासमुद्रो हृदि वर्तते ।

स्थितेऽपि शिरसि प्राणनाथे चित्तविभेदतः ॥११॥

शब्दार्थः—मैं कितनो लिखों ? जो मेरे मस्तक उपर प्राणनाथ (श्री-ठाकुरजी) विराजतहे तो हू चित्तके विक्षेपतें हृदयमें महाचिंताको समुद्र रहतहे ॥ ११ ॥ टीका—जीवकों स्वभाव तथा जीवकी क्रिया देखिकें मेरे मनमें चिंता वोहोत होतहे सो मैं अपने मनकी चिंता कहांताई लिखों ? चिंताको समुद्र मेरे हृदयमें भयोहे (यह कहि यह जताई जो अपार चिंता हृदयमें समुद्रवत् भरीहे) कागदमें कहांताई लिखों सो चिंता दूरिकरिवेको मेरो सामर्थ्य नांही मेरे मनको सामर्थ्य होतो तो मैं उपाय करतो तातें एक मोकों भरोसोहे जो मेरे माये प्राणनाथ प्रभु विराजतहे सो श्रीआचार्यजीकी कृपातें मेरे चित्तकों शांत करेंगे यह बल मोकोंहे ॥ दूसरो अर्थ कहतहे ॥ चिंता-

१. पुनरागमनको अर्थ मूलके अनुसार नांहीहे. २. चित्तकों शांत करिवेको अर्थ मूलके अनुसार नांहीहे.

करिके मेरे प्राण माथे आयरहेहे एसी चिंता हृदयमें समुद्रवतहे तहां श्रीठाकुरजी मेरे प्राणके नाथहे सो प्राणकी रक्षाकरिवेके लीये मेरो दुःख [चिंताको समुद्र हृदमें उमड्योहे सो] प्रभुही शांत करेंगे. या भांति विप्रयोगको अनुभव करतकरत अपने हृदयमें तन्मयता होय ओर केवल निःसाधनता होय तो प्रभुके स्वरूपको अनुभव होय ऐसैं श्रीहरिरायजी आज्ञा करतहे. यह निरूपणकरि केवल रसात्मक स्वरूपको अनुभव कोन प्रकारसों होय? सो आगें शिक्षापत्रमें वर्णन करतहे॥ ११॥

इति श्रीहरिरायजीकृतम् अष्टमं शिक्षापत्रं श्रीगोपेश्वरजीकृतव्रजभाषाटीकासमेतं समाप्तम् ॥ ८ ॥

शिक्षापत्र ९.

अब नवमशिक्षापत्रमें प्रेम, आसक्ति ओर व्यसनको स्वरूप पृथक् निरूपण करतहे. उपरके पत्रमें दीनता करि निःसाधन होय तो अनुभव होय ऐसैं निरूपण कीयो सो अनुभव कोन प्रकार होय? सो आगें कहतहैं.

मूलं—कदा निजपतिः कृष्णः स्वविंवं दर्शयिष्यति ।

वद्धवर्हशिखं नीलकुंतलावरणाननम् ॥ १ ॥

शब्दार्थः—मयूरपिच्छतें बांधे नीलकुंतलके आवरणयुक्त मुखवारे अपने पति श्रीकृष्ण अपने स्वरूपको दर्शन कव देयंगे ॥१॥ टीका—श्रीकृष्ण हमारे पति तिनको दर्शन कव होयगो? (श्रीहरिरायजीनें मेरे पति यातें कहे जो व्रजभक्तनके भावभावित हे, अपनो देहानुसंधान

भूलिगये हे, अत्यंत विरहते वह भीतरको भाव बाहिर उमगिकें निक-
स्योहे तातें अपने पति कहे तथा श्रीआचार्यजीद्वारा ब्रह्मसंवंध भयोहे
तुलसी चरणारविंदमें समर्पिहे ऐसे ब्रह्मसंवंधको स्मरणकरि श्रीठाकुर-
जी हमारे पति हैं ऐसे कह्यो) सो श्रीकृष्ण अपने स्वरूपको दर्शन कव
देयंगे ? सो श्रीकृष्ण केसेहे मोरके स्वच्छ पिच्छके गुच्छा करिकें मुकुट
संवारि माये धरेहे ताको अभिप्राय यह हे जो मुकुटको शृंगार हे सो
श्रीस्वामिनीजीके रसदानार्थहे तातें मुकुट धरेहें सो वेगिही दर्शन देयकें
रसदान करेंगे, ओर नीलकुंतल (श्याम अलकावलि) मुखारविंदके
उपर आयरहीहे ऐसे श्रीकृष्ण कव दर्शन देयंगे ? ॥ १ ॥

मूलं—धूधनुःसंधितशरं कस्तूरीचित्रकांकितम् ।

इन्दीवरदलहृद्ध्यविशालनयनद्वयम् ॥ २ ॥

शब्दार्थः—भ्रुकुटिरूप धनुषमें सांध्योहे शर (बाण) जिनमें ओर
कस्तूरीके चित्रकरिकें चित्रित तथा कमलदलते बड़े विशाल दोय नेत्र
हे जिनके (अठारे श्लोकताई स्वरूपवर्णन हे जो ऐसे स्वरूपको दर्शन
कव देहिंगे यह पूर्वश्लोकमें संवंधहे) ॥ २ ॥ टीका—भ्रुकुटी धनुषकी
नाई तहां रसरूप कस्तूरीको तिलक तथा कपोलनमें कमलपत्र ओर
धनुषबाण ले हमारे मनकों कव मारेंगे ओर कमलके पत्रवत् बड़े अति
विशाल दोउ नेत्रकरि दर्शनदेय हमारे तापकों कव हरेंगे ? ॥ २ ॥

मूलं—मौक्तिकाभरणालंविमुनासं सरसाधरम् ।

त्रिरेखकंठविलसत्कंठाभरणभूषितम् ॥ ३ ॥

शब्दार्थः—मोतिनके आभरणकों आलंविहे सुंदर नासिका जिनकी,
सुधारससहित हे अधर जिनके, तीन रेखायुक्त कंठमें विशेष शोभित
जो कंठाभरण ताकरिकें भूषित हे ॥ ३ ॥ टीका—मुक्तानके नकवेसर
करिकें युक्त एसी लंबी जो नासिका सो अत्यंत सुन्दर दीसत हे ता

नकवेसरको मोती परम शोभा देतहे सो परमशोभायमान उज्ज्वल अरुण अधरपर आयरह्योहे सो मानों श्रीस्वामिनीजीको निर्विकार भाव अधरसुधाको पान करतहे, कंठमें तीन रेखाहे ताकरि सात्त्विक, राजस, तामस तीन प्रकारके भक्तनकी स्थितिहे अथवा त्रिलोकी मोहित होतहे. ओर श्रीकंठमें कंठाभरण (कंठसरी) आदि सोहतहे ऐसे श्रीकृष्ण हमकों दर्शन कव देयंगे ? ॥ ३ ॥

मूलं-प्रफुल्लगल्लयुगलं चिबुकाभरणान्वितम् ।

सुवर्णसूक्ष्ममणियुक्वनमालाविराजितम् ॥ ४ ॥

शब्दार्थः—प्रफुल्लितहे दोय गल्ल जिनके, चिबुक भूषण करिकें युक्त हे ओर सुवर्णके सूक्ष्ममणिकायुक्त वनमालाकरिकें विराजितहे ॥ ४ ॥ टीका—दोउ गल्लस्थल प्रफुल्लितहे सो युगलगीतमें वर्णनहे “वदरपांडुवदनो मृदुगंडः” (पके वेर जेसो श्वेतहे मुखारविंद जिनको ओर कोमलहें गंडस्थल जिनके) जेसैं पके वेरमें शुक चंचू मारे तेसैं इहां श्रीस्वामिनीजीके दंतस्पर्श होय ऐसे कपोलहे ओर चिबुकभूषणहे सो श्रीस्वामिनीजी अधरसुधाको अनुभव करे तहां रसके आधिक्यतें अधरतें स्रवतहे सो श्रीचंद्रावलीजी अनुभव करतहे ताको भावहे सो मधुराष्टककी टीकामें वर्णनहे एसो चिबुक विराजितहे. सोनेके छोटे मनिकाकी मालासों कंठ विराजितहे ऐसे श्रीकृष्ण कव दर्शन देयंगे ? ॥ ४ ॥

मूलं-उरःस्थललसत्स्वच्छवक्रवैयाघ्रबाहुजम् ।

रत्नव्यवहितस्थूलमुक्तामालांचितोदरम् ॥ ५ ॥

शब्दार्थः—उरःस्थलमें शोभितहे स्वच्छ टेडे वाघनखा जिनकों ओर रत्नके व्यवधानयुक्त वडे मोतिनकी मालाकरिके पूजितहे उदर जिनको ॥ ५ ॥ टीका—उरःस्थलपर उज्ज्वल वाघनखा वक्र लसतहें

सो प्रसिद्ध तो यह अर्थ जो श्रीयशोदाजी वालककी रक्षार्थ धरायेहे तथा श्रीस्वामिनीजीको नखक्षत उरपर भावसहित धरेहे, रत्नकरि गृहित नवरत्नयुक्त बड़ी माला (जाकों वैजयंती माला कहतहे सो) समस्त भक्तनके भावसों विराजितहे और बडेबडे मोतिनकी माला उदरपर विराजितहे ऐसे श्रीकृष्ण कव दर्शन देयंगे ? ॥ ५ ॥

मूलं—सुवर्णकृत्रिममणिस्थूलमालातिसुंदरम् ।

गुंजाफलमहन्मालालसदूरुयुगांतरम् ॥ ६ ॥

शब्दार्थः—सुवर्णके कृत्रिम मणिकातें स्थूल एसी जो माला ताकरिकें सुंदर और गुंजाकी बड़ी मालाकरिकें शोभितहे दोउ उरुको मध्यभाग जिनको ॥ ६ ॥ टीका—सोनेके कृत्रिम मणिकाकरि गूंथी परम सुंदरमाला पहिरेहे गुंजामाला श्वेत सुंदर गूंथेहे तामें चतुर्थ-स्वामिनीजीके यूथपतिके भावसों पहिरिहे मोहनमाला सो उरु जो धुटुताई पहिरेहे ऐसे श्रीकृष्ण कव दर्शन देहिंगे ? ॥ ६ ॥

मूलं—अनेकरत्नजटितकरकंकणभूषणम् ।

बाहुमध्यलसत्स्वर्णनिर्मितप्रथितांगदम् ॥ ७ ॥

शब्दार्थः—अनेक रत्नकरिकें जटित श्रीहस्तमें कंकणकोहे आभूषण जिनके ओर बाहुके मध्यमें शोभित तथा सुवर्ण (रत्नादिक) करिकें बनाये विस्तारवारेहे बाहु जिनके ॥ ७ ॥ टीका—अनेक रत्नकरि जटित ऐसे कंकण दोउ हस्तमें पहिरेहे ओर दोउ भुजानमें अंगद (बाहु) सोनेके रत्नजटित विराजितहे ऐसे श्रीकृष्ण कव दर्शन देयंगे ? ॥ ७ ॥

मूलं—अनेकपुष्पतुलसीवनमालातिलालितम् ।

विचित्रवर्णविलसत्कटिवासोविराजितम् ॥ ८ ॥

शब्दार्थः—अनेक हे पुष्प ओर तुलसी जामें एसी वनमाला करिकें बोहोत शोभित हे, ओर विचित्र वर्णवारे शोभित जो कटिवस्त्र ताकरिकें विराजित हे ॥ ८ ॥ टीका—अनेक प्रकारके पुष्प तुलसी-सहित ग्रथित एसी ललित वनमाला विराजित हे, सगरे ब्रजभक्तनके भावसों पंचरंगकी अति विचित्र कटिवास (काळनी) धरेहें सो प्रभु सहित चतुर्थ यूथपतिके भावसों कटिपर विराजित हे ऐसे श्रीकृष्ण कव दर्शन देयंगे ? ॥ ८ ॥

मूलं—कटिभावज्ञापिकातिकिंकिणीरवशोभितम् ।

पदद्वयगतस्वर्णमणिनूपुरमंडितम् ॥ ९ ॥

शब्दार्थः—कटिके भावकों जतायवेवारे किंकिणीके शब्द करिकें शोभित हे, ओर दोय चरणारविंदमें धरे सुवर्णमें जटित मणियुक्त नूपुर करिके मंडित हे ॥ ९ ॥ टीका—कटिमें किंकिणीके रव शोभित हे ता रवकरि ब्रजभक्तनकों अनेक रमणादिक लीलाके भावको सूचन करावत हे. दोय चरणकमलकी चाल परम सुंदर हे तिनमें मणिजटित सुवर्णके नूपुर सोहत हे ऐसे श्रीकृष्ण कव दर्शन देयंगे ? ॥ ९ ॥

मूलं—नखचंद्रप्रकाशैकप्रकाशितजगत्त्रयम् ।

पीतांबरोत्तरीयेषचलदंचलसुंदरम् ॥ १० ॥

शब्दार्थः—नखरूप चंद्रके प्रकाशनें मुख्य प्रकाशित हे तीन जगत जिननें, ओर पीतांबरको जो उत्तरीयवस्त्र सो थोरोसो चलायमान अंचल ताकरिकें सुंदर हे ॥ १० ॥ टीका—नखचंद्रके प्रकाशकरि तीन्यो जगतको प्रकाश करतहें आकाश, पाताल, भूलोक यह तीन्यो लोकमें जो भक्त हे तिनके हृदयमें प्रकाश करत हे ओरके हृदयको नखचंद्र प्रकाश नांही करतहे सो भक्त केसेहे जाने एक श्रीठाकुरजीके चरणारवि-

दको आश्रय कीयो हे तिनके हृदयमें नखचंद्र प्रकाश करत हे तथा यह ललित त्रिभंगि स्वरूप श्रीवृंदावनमें स्थित हे तिनको अनुभव एक ब्रजभक्तनकों हे सो राजसी, तामसी, सात्त्विकी एसे त्रिगुण भक्त हे तिनके हृदयमें यह नखचंद्र प्रकाश करत हे ओर पीतांबर सो ब्रज-भक्त श्रीस्वामिनीजीके उत्तरीयभावसों धारण कीये हे सो उत्तरीयके दोउ अंचल मंद सुगंध वायुकरि चलायमान हे ॥ १० ॥

मूलं-प्रदर्शितशिरोभेदं चलन्मकरकुंडलम् ।

नृत्यंतं नयनानंदं नितांतरतिसंप्रदम् ॥ ११ ॥

शब्दार्थः—'वतायोहे मस्तकको भेद जिननें, चलायमान मकराकृति हे कुंडल जिनके, नृत्य करतहे, नेत्रमेंहे आनंद जिनकों, ओर निरंतर रतिकों देवेवारे ॥ ११ ॥ टीका—मस्तकके दोउ ओर सुंदर श्रवणमें मकराकृति कुंडल धारण कीये हे सो सांख्ययोगको स्वरूप हे एसे श्रीकृष्ण नृत्य करत हे ताकरि ब्रजभक्तनके नयनकों परम आनंद देत हे भक्तनकों रतिरसको अनुभव करावत हे ॥ ११ ॥

मूलं-नितंविनीवृंदवर्त्तिरसानुभवलोलुपम् ।

विहरंतं विशेषेण रासलीलापरायणम् ॥ १२ ॥

शब्दार्थः—ब्रजभक्तनके वृंदमध्य विराजित हे ताकरि इनके रसानुभवकरिकें लुब्धहे, विहार करतहे ओर विशेषकरि रासलीलामें परायणहे अथवा रासलीलाको उत्तम हे स्थान जिनको एसे हे ॥ १२ ॥ टीका—ब्रजभक्तनके वृंदमें प्रभु विराजमानहे सो भक्तनकों रसानुभव करायवेमें परम चंचलहे सो यातें जो एककालावच्छिन्न समस्त ब्रजभक्तनकों दान करतहे रासादिकलीला करिवेमें प्रभु परमचतुरहे ॥ १२ ॥

मूलं—त्रिभंगललितं वेणुकलितं भुजयोरपि ।

वृंदावनैकफलितं वलितं स्वजनैः सह ॥ १३ ॥

शब्दार्थः—त्रिभंगस्वरूपहे तासों मनोहरहे, दोउ भुजमेंहू वेणु धारणकीये, वृंदावनके मुख्य फलरूपहे ओर स्वभक्तजनसहित मिलितहे ॥ १३ ॥ टीका—याभांति त्रिभंग स्वरूपकरि दोउ भुजानसों वेणुनाद करतहे सो श्रीवृंदावनके फलात्मक स्वरूप श्रीवृंदावनमें सदा विराजमानहे अपने स्वजन (ब्रजभक्तन) करिकें वेष्टितहे याभांति लीलासहित स्वरूपके प्रभु मोकों कव दर्शन देयंगे ? ॥ १३ ॥

मूलं—वादयंतं मुरलिकां मोहयंतं मनः सताम् ।

जगज्जडं प्रकुर्वंतं रोधयंतं च भक्षणम् ॥ १४ ॥

शब्दार्थः—मुरलीको नाद करतहे, सत्पुरुषके मनकों मोह करतहे, जंगमकों जड करतहे ओर पशुआदिके भक्षणको रोध करतहे ॥ १४ ॥ टीका—सुंदर सप्तसुरतकी मुरलिका वजायकें समस्तभक्तनके मनकों मोह करतहे. श्रीवृंदावनमें स्थित पशु, पक्षि, वृक्षादिकनकों मोह उपजावतहे, जडहे तिनकों चेतन ओर चेतन हे तिनकों जड करतहे सो पशुपक्षि चैतन्ययुक्तह सो जड होयकें स्थितहे एसे रहि वेणुनादा-मृतरसको पान करतहे ओर वृक्षपर्वतादि जडहे सो चैतन्ययुक्त होय मधुधारा वहतहे ॥ १४ ॥

मूलं—पशूनां पक्षिणां चैव मौनसंपादकं तथा ।

तरूणामंतरानंदमधुधारैकवार्धुकम् ॥ १५ ॥

शब्दार्थः—जव वेणुनाद करतहे तव पशु पक्षिनकों मौन करिबेवारे, ओर वृक्षनके मध्यमें आनंद करिकें मधुधाराको वर्षण करायवेवारे ॥ १५ ॥ टीका—पशु पक्षि वेणुनाद सुनिकें चंचलता छोडि मौन होय

रसपान करतहे यह आधिदैविक श्रीचूदावनके मुनिहे. पुष्टिलीलासं-
धि वृक्षादितें मधुकी धारा बरपतहे सो अंतःकरणमें भगवदीयनको
जब भगवत्स्वरूपको अनुभव होय तब आनंदतें देहमें पुलकावलि
होय सो श्रीचूदावनके वृक्षहे सो परमभगवदीयहे सो वेणुनादरस
अमृतको हृदयमें अनुभव करि अंतःकरणमें आनंद पाय मधुधारा
स्रवतहे ॥ १५ ॥

मूलं-हरंतं ब्रजभूतापं पदस्थापनतस्तथा ।

यमुनातीरमात्रैकजलक्रीडाकृतिप्रियम् ॥ १६ ॥

शब्दार्थः-चरणारविंदके स्थापनतें ब्रजकी भूमिके तापको हरिवे-
वारे तथा श्रीयमुनाजीके तटमात्रमें मुख्य जलक्रीडाकी कृतिहे प्रिय
जिनको ॥ १६ ॥ टीका-याभांति रासादिकलीला ब्रजभूमिमें करि
ब्रजभूमिके तापको हरतहे तथा ब्रजमें उत्पन्न भये सर्व प्राणिके तापको
हरतहे अथवा ब्रजमें अपने चरणारविंद स्थापनकरि सगरी गुल्मलता
औपधिआदिके तापको हरतहे; अथवा ब्रजमें सबठोर चरणचिह्न स्थाप-
नकरि यह जतावतहे जो कोउ ब्रजको आश्रय करेगो तिनकोहू ताप
दूर होयगो याभांति रासलीला अनेकभक्तनसों कीये तब श्रमजल
भयो तब श्रीठाकुरजी जानें जो यह भक्तनसहित श्रमजलहे यह रस
कहां देनो ? पाछें विचारे जो यह रसके पात्र श्रीयमुनाजीहे एसें
जानि भक्तनसहित श्रीयमुनाजीमें पधारे सो अपनी प्रिया श्रीस्वामि-
नीजीसहित जलक्रीडा करत भये. याभांति श्रीयमुनाजीको पात्र
जानि रसदान कियो, जलक्रीडा करि श्रमको निवारण कीयो एसे
श्रीकृष्ण कब दर्शन देयंगे ? ॥ १६ ॥

मूलं-रसात्मकरसात्मस्वभक्तवृंदसमन्वितम् ।

निजानुभवसंवेद्यं प्रकटंतं क्षणे क्षणे ॥ १७ ॥

शब्दार्थः—आप रसात्मक ओर रसात्मक अपने भक्तनके वृंद ताकरिकें युक्तहे, तथा अपने भक्तनके अनुभवार्थ सेवाज्ञानको क्षण क्षणमें प्रकट करिवेवारे ॥१७॥ टीका—रसात्मक श्रीकृष्णहे तेसेही श्रीकृष्णके आत्मारूप रसात्मक ब्रजभक्तनको अनुभव करावतहे. क्षणक्षणमें अधिक रसदान करतहे ताकरि भक्तनको भावहू क्षणक्षणमें अधिक प्रकट होतहे ऐसे रसदानकर्त्ता श्रीकृष्ण प्रभु कव दर्शन देयंगे? ॥ १७ ॥

मूलं—विरहे युगपत्सर्वनिजलीलानुभावकम् ।

साकारानंदरूपेण ब्रजभक्तहृदि स्थितम् ॥ १८ ॥

शब्दार्थः—विरहमें एककालावच्छिन्न अपने भक्तनको अपनी लीलाको अनुभव करायवेवारे, ओर साकार आनंदरूप करिकें ब्रजभक्तनके हृदयमें विराजमानहे ॥१८॥ टीका—ऐसे भावात्मक रसात्मक श्रीकृष्ण सो केवल शुद्ध विरह करे तव अपनी निजलीलाको अनुभव करावें सो जीव सगरे दिनरात्रि केवल विप्रयोग आर्तिकरि शुद्धहृदय होय तवही निजलीलाको अनुभव होय सो निजभक्त श्रीस्वामिनीजीहे तिनको विप्रयोगहे तिनहीको यह लीलाको अनुभवहे ऐसे भावात्मक श्रीकृष्णहे सो ब्रजभक्तनके हृदयमें साकार आनंदरूप सर्वलीलासंयुक्त विराजत हे काहेतें जो रसको स्वभाव हे जो पात्र विना रहे नांही सो रसात्मक साकार आनंदरूप श्रीकृष्णहे ता रसके पात्र ब्रजभक्तहे तातें ब्रजभक्तनके हृदयमें विरहरसात्मक प्रभु स्थिर रहतहे ॥ १८ ॥

मूलं—एवं दिदृक्षा सततं स्थापनीया निजे हृदि ।

सैवास्माकं प्रेमभावोऽन्यरागविनिवर्त्तकः ॥१९॥

शब्दार्थः—उपर अठारे श्लोकमें निरूपण कीये ऐसे स्वरूपके दर्शन करिवेकी इच्छा अपने हृदयमें स्थापन करनी यहही अन्यमें प्रीति मिटायवेवारो अपनो प्रेमभाव जाननो ॥१९॥ टीका—ऐसे श्रीकृष्ण-

के दर्शनकी इच्छा जाके मनमें होय सो निरंतर अपने हृदयमें यह स्वरूपको ध्यान करि स्थित करे, तहां कोई कहे जो तुम्हारे हृदयमें तो ऐसे प्रभु स्थित हे ध्यान करि तुम हृदयमें स्थित कीये हे तहां कहत हे जो मेरे हृदयमें प्रेमको अभाव हे, मेरेमें प्रेम नांही हे ओर यह स्वरूपतो प्रेमकरि धारण करे तब होय ओर मोकों तो अन्यराग-निवृत्तिही दुर्लभ हे तातें में तो अन्यरागनिवृत्तिकरिकें रहित हों. तहां कोई कहे जो तुम्हारेमें प्रेम तो दीसत हे, स्वरूपको वर्णन कीयेहे, प्रभुमें आर्तिहू हे, प्रभुमें आसक्तिहू हे, पुष्टिमार्गकी सगरी रीति हे, ताप्रमाण चलतहो तुमकों कहा बाधक हे ? तहां कहत हे ॥ १९ ॥

मूलं-ततः स्यादार्तिराधिका गेहदैहिकवाधिका ।

आसक्तिः सैव मार्गेऽस्मिन् गृहस्थास्वास्थ्यकारिका २०

शब्दार्थः—प्रेमभाव भये पीछे गृहकार्य तथा देहकार्यकों बाधकरिवे-वारी आसक्ति होय, यह पुष्टिमार्गमें गृहस्थको अस्वास्थ्य करिवेवारी सोहीहे ॥ २० ॥ टीका—हमकों गृहदेहसंवंधी लौकिक आर्ति हे सो यह भगवद्भावमें बाधक हे, काहेतें जो देहसंवंधी घर तामें लौकिक वैदिक कार्य हे ताकी आर्ति मनमें रहत हे सो बाधक हे ओर यह पुष्टिमार्गमें आसक्ति हे सो परमधर्म हे सो जाकी आर्ति प्रभुपर हे सो गृहस्थ घरमें कैसे स्वस्थ रहे ? गृहमें स्वस्थ जाको मन हे सो यह पुष्टिमार्गमें कोन भांति स्वस्थ होयगो ? यह कहिकें यह जताये जो जाकी आसक्ति प्रभुमें हे तासों देहसंवंधी लौकिक-वैदिक-क्रिया भलिभांतिसों न वनेगी ॥ २० ॥

मूलं-परितापोदयस्तस्मात् सर्वविस्मृतिकारकः ।

स एव व्यसनं यत्र प्रपंचस्फूर्तिनाशनम् ॥ २१ ॥

१ प्रेमके अभाव ओर अन्यरागकी निवृत्तिको अर्थ मूलके अनुसार नांही हे.

शब्दार्थः—यह आसक्तिते सर्व (प्रपंचकों) विस्मृति करिवेवारे परितापको उदय होय जामें प्रपंचकी स्फूर्तिको नाश होय सोही व्यसन कहिये ॥ २१ ॥ टीका—उपर कहे ताभांति प्रभुमें आसक्ति होय तव प्रभु दया करि आर्त्तिदान करे तो विप्रयोग होय, सो विप्रयोग भयो कव जानियें ? जब प्रभुसंवंध विना देहसंवंधी सर्वकार्यकी विस्मृति होय तव विप्रयोग भयो जानियें. पाछें प्रभुमें व्यसन होय सो प्रभुविना रह्यो न जाय एकक्षण युगसमान जाय यह व्यसनको स्वरूपहे ताव्यसनकरिकें प्रपंचकी स्फूर्तिको नाश होय केवल प्रभुपर तन्मयता होय ॥ २१ ॥

मूलं—एवंविधस्तु त्रिविधो भावो निःसाधनो मतः ।

अतस्तु दुर्लभा लोके तत्प्राप्तिर्भजतां नृणाम् ॥ २२ ॥

शब्दार्थः—एसे (प्रेम, आसक्ति, ओर व्यसन) तीनप्रकारको भाव निःसाधन कह्योहे तासों भगवत्सेवा करिवेवारेनकों एसे भावकी प्राप्ति लोकमें दुर्लभ हे ॥ २२ ॥ टीका—याभांति 'मन वचन क्रिया करि तीनप्रकारको भाव सिद्ध होय तव निःसाधन होयजाय सो याभांति निःसाधन होनो यालोकमें दुर्लभ हे, निरंतर जो श्रीकृष्णकी सेवा कीयो करे तव निःसाधन होय ॥ २२ ॥

मूलं—चक्रे करुणया कृष्णो भावात्माऽऽख्यं तथाविधम् ।

मूर्तिमद्भावसंवंधात्तत्प्राप्तिरिति वेद यः ॥ २३ ॥

शब्दार्थः—श्रीकृष्ण करुणाकरिके भावात्मक मुखारविंदरूप तेसैं श्रीमदाचार्यजीकों प्रकट कीये अथवा 'भावात्माख्यं' एसे पाठ होय तो भावात्माहे नाम जिनको एसे श्रीआचार्यजीकों प्रकट कीये,

१ मन वचन क्रियाको अर्थ मूलके अनुसार नाहीं हे, शब्दार्थ रत्नमंजूरी टीकाके अनुसार हे.

मूर्तिमान् भाव जो श्रीआचार्यजी तिनके संबंधतें यह तीनभावकी प्राप्तिहे एसें जो जानत हे तिनको ताभावकी प्राप्ति होय हे ॥ २३ ॥ टीका—यह भाव विधिपूर्वक कव सिद्ध होय? जब श्रीकृष्ण भावात्मके मुखारविंदरूप श्रीआचार्यजीमहाप्रभुजीकी कृपा होय तब भाव सिद्ध होय. भाव सिद्ध भयो कव जानिये? जब श्रीकृष्णस्वरूप मूर्तिमान्हे यह भाव सिद्ध रहे जो येही साक्षात् श्रीकृष्ण भावात्मक हमारे पतिहे यह मन वचन क्रियाकरि भाव होय तब प्राप्त होय. यह भाव कैसे होय सो आगे कहतहें ॥ २३ ॥

मूलं—प्रमेयबलतो नान्यत्साधनं तत्र भाव्यताम् ।

अतः सर्वैः प्रकर्तव्यो निजाचार्यपदाश्रयः॥२४॥

शब्दार्थः—यह भावमें प्रमेयबल बिना ओर साधन नांहीहे एसे जाननों तासों सर्वको अपने श्रीआचार्यजीके चरणारविंदको आश्रय विशेषकरि कर्तव्य हे ॥ २४ ॥ टीका—श्रीकृष्णके स्वरूपमें एसो भाव जीवके साधनतें न होय, श्रीकृष्णही प्रमेयबलतें भावको दान करे तबही भाव होय तातें पुष्टिमार्गकी रीतिसों तन मन धनसों प्रीतिसहित सेवा करे अपने श्रीआचार्यजीमहाप्रभुजीके चरणकमलको आश्रय करे तो श्रीआचार्यजी प्रमेयबलतें भावदान करे तातें मार्गकी रीतिसों सेवा ओर श्रीवल्लभाचार्यजीके चरणकमलको आश्रय यह निश्चय मन लगायके कर्तव्य हे यह सिद्धांत सर्वोपर हे ॥ २४ ॥

मूलं—तदभावे न वै भावि फलमेतन्न संशयः ।

अतएवास्मदीशैस्तु ग्रंथे श्रीवल्लभाष्टके ॥ २५ ॥

स्वामिन्! श्रीवल्लभेत्येतत्पद्येऽखिलमुदीरितम् ।

तदाश्रयो न वचनैः किं तु तन्मार्गनिष्ठया ॥२६॥

शब्दार्थः—मार्गकी रीतिसों सेवा ओर श्रीआचार्यजीके चरणकमलको आश्रय यह दोऊको अभाव होय तो भावरूप फल नाहीं होय यामें संशय नाहीं, तासोंही अपने प्रभु श्रीगुसांईजीनें तो श्रीवल्लभाष्टकमें “स्वामिन् श्रीवल्लभाभे” यह श्लोकमें सर्व निरूपण कीयोहे. सो विनको आश्रय केवल वचनकरिकें नाहीं होयहे किंतु विननें प्रकट कीये एसें पुष्टिमार्गमें निष्ठा होय तब आश्रय सिद्ध होय ॥ २५, २६ ॥ टीका—उपरकहे ताभांति श्रीआचार्यजीके चरणारविंदको आश्रय करि भगवत्सेवा करे तब श्रीआचार्यजी भावदान करे तब भावात्मक रसमें तद्रूप होयजाय तब यह पुष्टिमार्गीय फलकी निश्चय प्राप्ति होय. संशय नाहीं सो हमारे श्रीगुसांईजी वल्लभाष्टकमें कहेहे ॥ २५ ॥ “स्वामिन् श्रीवल्लभाभे क्षणमपि भवतः सन्निधाने कृपातः प्राणप्रेष्ठब्रजाधीश्वर-वदनदिदृक्षार्चितापोजनेषु । यत्प्रादुर्भावमाप्नोत्युचिततरमिदं यत्तु पश्चादपीत्थं दृष्टेऽप्यस्मिन्मुखेदौ प्रचुरतरमुदेत्येव तच्चित्रमेतत् ” (हे स्वामिन् श्रीवल्लभरूप अग्नि क्षणहू आपके समीपमें (आपकी) कृपातें प्राणप्रिय श्रीब्रजाधीश्वर श्रीकृष्णके मुखारविंदके दर्शनकी इच्छाकी आर्ति भक्तजननमें प्रकट होयहे सो अत्यंत युक्त है, परंतु जो पाछेहू यह मुखारविंदरूप चंद्र दृष्ट भयेहू (यह आर्ति) अत्यंत उत्पन्न होयहे यह आश्चर्यहे) इत्यादि वचनकरि यह वचनके अनुसार आश्रय ओर यह पुष्टिमार्गमें निष्ठा होय तब सगरी लीलाको अनुभव होय सो आश्रय ओर मार्गमें निष्ठा कोन प्रकार होय सो आगे कहतहे ॥ २६ ॥

मूलं—मार्गनिष्ठा न स्वभावः किं तु तादृग्गुरुदितैः ।
गुरुदितानि वाक्यानि न स्वतो ह्यनुवादतः ॥ २७ ॥

शब्दार्थः—मार्गमें निष्ठा अपने ज्ञानकरिकें न होय किंतु ऐसे गुरु-
के वचनामृतसों होय, ओर यह वचनामृत अपनी बुद्धिपरिकल्पित न
होय परंतु पुष्टिमार्गके सिद्धांतके अनुवादरूप होय ॥ २७ ॥
टीका—पुष्टिमार्गमें निष्ठा गुरुके बोध कीयेविना न होय जब गुरु प्रसन्न
होय कृपा करिकें बोध करे तब मार्गमें निष्ठा होय ओर यहजीवकों
गुरुके वचनमें दृढ़ विश्वास होय, विश्वासकरि गुरुके वचनकों वारंवार
अर्थसहित भावना करे अपने मनसों अर्थभावना न होय तो तादृ-
शीय वैष्णवसों मिलिकें गुरुके वचनको अनुवाद करे वारंवार भावना
करे ॥ २७ ॥

मूलं—अनुवादो न स्वबुद्ध्या किं तु मूलक्रमागतः।

अथापि तत्र चापेक्ष्यो दृढः स्वाचार्यसंश्रयः ॥२८॥

शब्दार्थः—अनुवाद अपनी बुद्धितें न करनो किंतु मूलक्रमतें प्राप्त
अर्थ करनो, ता पीछेंहूयामें अपने श्रीआचार्यजीको दृढ़ आश्रय चा-
हियें ॥२८॥ टीका—गुरुके वचनको अनुवाद अपनी बुद्धितें कल्पना
करि न करे जो मूलक्रमतें श्रीआचार्यजीमहाप्रभु सुवोधिनीजी निबं-
धादि ग्रंथ कीयेहे ताको भाव विचारे तो श्रीमहाप्रभुजीकी कृपातें श्री-
सुवोधिनीजी आदिमें जान्यो जाय सो श्रीआचार्यजीके चरणारविंदको
दृढ़ आश्रय होय तब श्रीआचार्यजी कृपा करे तातें श्रीआचार्यजीके
चरणारविंदको दृढ़ आश्रय करि श्रीसुवोधिनीजी निबंधमें जाक्रमसों
भावहे ताक्रमसों अपने हृदयमें भावना करि सेवा करे ॥ २८ ॥

१ श्रीआचार्यजीके प्रकट कीये पुष्टिमार्गीय सिद्धांतके ग्रन्थ यहां “वचनामृत”
शब्दसे लिये जायहे, तासूं गुरुकी आज्ञाहू अपने मनमें आवें एसी न होय किंतु श्री-
आचार्यप्रकटित ग्रन्थानुसार होय. ग्रन्थको अर्थहू अपनी बुद्धिपरिकल्पित न करे
किंतु इनके (टीकाकार श्रीगुरुपूज्यमजी प्रभृतिनं कीये अर्थके) अनुवादरूप करे ।

२ एतन्मार्गीय विद्वान् जो पारंपर्यतें गुरुके मुखतें वा ग्रन्थानुवादको आश्रय
वान्ते आये होय सो हि अर्थ मान्य करनो एखो श्लोकको अभिप्राय हे ।

मूलं-एतादृशेन गुरुणाऽवगत्य निखिलं जनः ।

आश्रित्य च निजाचार्यान् सदानंदं सदा भजेत् ॥ २९ ॥

शब्दार्थः-भक्तजन ऐसे गुरुते सर्व जानिकें अपने श्रीआचार्यजीको आश्रय करिकें सदानंदरूप श्रीकृष्णको सदा भजन करे ॥ २९ ॥

टीका-याभांति कोई वैष्णव गुरुकी आज्ञाप्रमाण समग्र जानिकें चले तो श्रीआचार्यजी महाप्रभु अपनो आश्रय निश्चयही देंहि यामें संदेह नाहीं. सदा आनंदरूप “श्रीआचार्यजीहें यहभावसों भजनकरे ओर लौकिक वैदिकमें आनंद तुच्छहे सदा नाहीं. लौकिकमें विषयादिसुख ताकरि नरकमें जाय ओर स्वर्गादि सुख सो पुण्य क्षीण भये संसारमें परे दुःखी होय ओर श्रीआचार्यजी सदा एकरस आनंदरूपहे सो श्री-गुसाईजी सर्वोत्तमजीमें श्रीआचार्यजीमहाप्रभुजीके नाम कहेहैं “आनंदाय नमः” “परमानंदाय नमः” इत्यादि वचनके भावसों जाननें ओर श्रीआचार्यजीकी नामावलीमें नामहे “आनंदमूर्त्तये नमः” “यह श्री-आचार्यजीको स्वरूपहे सो मूर्त्तिमान् आनंदमयहे सदा एकरस हे या-भांति प्रेमसों भजन करे.” तहां कोई कहे जो श्रीआचार्यजीमहाप्रभुके यह पुष्टिमार्गमें सगरे जीव श्रीआचार्यजीको आश्रयकरि सेवा करतहैं ओर तुम कहे भावसों भजन करे सो कहा? तहां कहतहे ॥ २९ ॥

मूलं-भजनं भावरूपस्य भावेनैवोपपद्यते ।

चेतस्तत्प्रवणं सेवा ह्यत एव निरूपिता ॥ ३० ॥

शब्दार्थः-भावरूप श्रीकृष्णको भजन (सेवा) भावकरिकेंही प्राप्त होयहे तासोंही श्रीआचार्यजीमहाप्रभुनें सिद्धांतमुक्तावलिमें प्रभुमें चित्त प्रवण (लीन) होय सो सेवा ऐसें निरूपण कीयेहे ॥ ३० ॥

१ मूलमें सदानंद शब्द हे ताको अर्थ श्रीकृष्णपर (रत्नमट्टजीकी) टीकाके अनुसारहे ओर यामें श्रीआचार्यजीपर लिख्योहे तामूं जितनो विशेषहे तहां “ ” ऐसे चिह्न कीयेहे सो काहनें भावसों लिख्योहे एसो अनुमान होयहे.

टीका—भजन सेवा सो भावसों करे काहेतें जो भावविना आगें मानसी फलरूप न होय तातें तनुजा—वित्तजा भावसों करे तव फलरूप मानसी सिद्ध होय. सो श्रीआचार्यजी महाप्रभु सिद्धांतमुक्तावलिग्रंथमें कहे हैं “कृष्णसेवा सदा कार्या मानसी सा परा मता” (सदा श्रीकृष्णकी सेवा करनी सो मानसी उत्तमहे) सदा श्रीकृष्णकी सेवा करे तिनकों मानसी सेवा सिद्ध होय “चेतस्तत्प्रवणं सेवा तत्सिद्धयै तनुवित्तजा” (चित्त प्रभुमें एकाग्र होय सो सेवा, ताकी सिद्धिके लीये तनुजा तथा वित्तजा करनी) जेसैं नदीको प्रवाह रात्रिदिवस एकरस चले ताभांति अष्टप्रहर चित्तमें मानसी (तिनकों साधिवेचारी तनुजा वित्तजा भाव करि करे तव) सिद्ध होय. तनुजा वित्तजाहू भावसहित मन लगायकें करे तवही बने तव सिद्ध होय याभांति श्रीआचार्यजी निरूपण कीये-हे, मानसी सिद्ध भई होय तिनके लक्षण केसैं जानियें? तहां कहत हे ॥ ३० ॥

मूलं-तस्यां तु विस्मृतिर्भाव्या जगतः सर्वथा ध्रुवम् ।

तदभावे मानसी तु सेवनान्नैव सिद्ध्यति ॥ ३१ ॥

शब्दार्थः—यह मानसीसेवामें तो सर्वथा जगतकी निश्चल विस्मृति होनी चाहियें, ताके अभावमें सेवनतें मानसी सिद्ध नाहीं होय ॥ ३१ ॥
टीका—तनुजा वित्तजा सेवा मन लगायकें करे तो सगरे जगत, देह-संवेधी पदार्थकी विस्मृति होय मानसी सेवाको यह भावहे जो सगरे जगतकों सर्वथा भुलावे यह निश्चय जाननों अपनों देहानुसंधान खान-पान निद्रादि सब भूलिजाय याभांति भावाविष्ट होय मनमें सेवाकरि स्वरूपानंदको अनुभव करे तव जानियें जो भावरूप मानसी सेवा सिद्ध भई सो प्रथम तनुजा वित्तजा सेवाहू दुर्लभहे तहां मानसी कहांतें सिद्ध होय? तातें तामें बाधकहे सो कहतहें ॥ ३१ ॥

मूलं-तद्वाधकानांन्द्रियाणि विषया लौकिकी मतिः ।

प्रतिबंधस्तथोद्वेगो भोगोऽप्यत्रैव लौकिकः ॥३२॥

शब्दार्थः—इंद्रिय, विषय, लौकिकबुद्धि, प्रतिबंध, तथा उद्वेग और यहां लौकिकभोग यह सर्व मानसी सेवाके बाधकहै ॥ ३२ ॥ टीका—तनुजा वित्तजा^१ सेवा मन लगायके करे तामें दशो इंद्रिय बाधक है काहेतें जो इंद्रियके देवताहै तिनकों विषय प्रियहै सो भगवत्सेवामें इंद्रिय बाध करतहै सो कोन भांति जो सेवा करिवेमें विषयादिक बुद्धि होय. लौकिक बुद्धि होय जो सेवा तो नित्य करतहों, घरको लौकिक कार्यहू करनोहे, भूखहू वोहोत है या भांति लौकिकबुद्धि होय तब सेवामें मनकों उद्वेग होय सो जेसैं बने तेसैं बेगि करि अनोसर करावे तब श्रीठाकुरजी तो मनकी लौकिकबुद्धि जाने सो सेवामें प्रतिबंध करे एसो लौकिक वैदिक कार्य तथा विषयादिकको कार्य मनमें प्रेरे जो सेवामें प्रतिबंध होय मनमें उद्वेगतें प्रतिबंध होय तब भगवत्सेवा तनुजा वित्तजा न बने, पाछें खानपानादि विषय-भोगमें मन चले, पाछें विषयादिक करे, पाछें केवल लौकिक होय-जाय. सो सेवाफलमें श्रीआचार्यजीमहाप्रभु कहेहै “उद्वेगः प्रतिबंधो वा भोगो वा स्यात्तु बाधकः” (उद्वेग, प्रतिबंध अथवा भोग बाधक होय) इत्यादि वचनसों जाननो जो इंद्रिय तथा मन विषयमें मगहै ताकरि प्रथम उद्वेग पाछें प्रतिबंध पाछें भोग पाछें केवल लौकिक होयजाय. तहां कोई कहे जो इंद्रियनकों विषयमें जोडे एसी बुद्धि सेवामें क्यों होतहै ? तहां कहतहै ॥ ३२ ॥

मूलं-दुष्टान्नभक्षणं चापि ह्यसमर्पितभक्षणम् ।

असत्संगः सर्वथा हि भावबाधक इष्यते ॥३३॥

शब्दार्थः—दुष्टके अन्नको भक्षण अथवा दुष्ट [अपवित्र] अन्नको भक्षण ओर असमर्पितको भक्षण तथा असत्संग (दुःसंग) यह सर्वथा भावके बाधक हे ॥ ३३ ॥ टीका—इंद्रियादि मनमें विषय यातें होतहे एकतो दुष्टप्राणीकी सत्ताके अन्नको भक्षण करे अथवा दुष्टक्रिया करि अन्न लावे भक्षण करे तथा असमर्पित खाय तथा असत् (वहिर्मुख) को संग करे यह तीन्यो सर्वथाही बाधक कहे हे सो न्यारे न्यारे कहतहे. दुष्ट अन्न वोहोत बाधकहे सो पद्मपुराणमें कहेहे “ अवैष्णवानामन्नं च पतितानां तथैव च । अनर्पितं तथा विष्णोः श्वमांससदृशं भवेत् । अनिवेद्य तु यो भुंक्ते हरये परमात्मने । पतंति पितरस्तस्य नरके शाश्वतीः समाः ” (अवैष्णवको अन्न तथा पतितको अन्न तथा जो अन्न प्रभुकों अर्पित नांही कीयो सो श्वमांस (कुत्ताके मांस) वरोवर होय ॥ जो हरि परमात्माकों अर्पण कीयेविना आप खाय हे तिनके पितृपितामहादि वोहोत वर्षताई नरकमें गिरेहे) यहवचनतें अवैष्णवको अन्न होय तथा पतित [चांडालादि तेली धोवी नीच] को अन्न तथा असमर्पित अन्न यह श्वमांस सदृशहे एसो अन्न खायेतें इंद्रिय बुद्धि सर्व नष्ट होय जाय असुरवत् होय तथा असमर्पित अन्नकों खाय तो पितृसहित नरकमें जाय तातें श्राद्धहू प्रसादि अन्नसों करे ओर कूर्मपुराणमें कहेहे “ अनर्पयित्वा गोविंदे यो भुंक्ते धर्मवर्जितः । शुनो विष्टासमं चान्नं नीरं तत्सुरया समम् ॥ (गोविंदकों अर्पण कीयेविना धर्मरहित जो खायहे सो अन्न कुत्ताके विष्टावरोवर ओर जल सुरा [मदिरा] वरोवरहे) यहवचनतें गोविंद जो श्रीकृष्ण तिनकों अर्पे विना असमर्पित जो खातहे सो सकल धर्मकरि रहितहे उह अन्न श्वानकी विष्टासमानहे उह खानहारो निश्चय असुरहे सो दुष्टसंगतें असमर्पित अन्न खाय तातें एकतो दुष्टको अन्न तथा असमर्पित तथा असत्संग यह तीन्यो बाधकहे. जो दुष्टसंगहे ताकरि अन्यसंबंध

होय तव देह इंद्रिय सब बहिर्मुख होयजाय विषयके ध्यानमें तत्पर होय तातें वैष्णव होय सो मनमें विचार राखे दुष्टको अन्न, असमर्पित अन्न तथा दुःसंग इनको संबंध कबहू न करे ॥ ३३ ॥

मूलं-तस्मात्त्यक्त्वा दुष्टसंगं कृत्वा स्वाचार्यसंश्रयम् ।

तदीयजनसंसर्गं स्थित्वा मार्गं तथा गुरौ ॥ ३४ ॥

कृत्वा विषयवैराग्यं परितोषं विधाय च ।

सदानंदं सदानंदं फलप्राप्त्यै सदा भजेत् ॥ ३५ ॥

शब्दार्थः—तातें दुःखको त्याग करिकें अपने श्रीआचार्यजी श्रीमहाप्रभुजीको आश्रय करिकें ओर तदीयजनके संबंधनिमित्त तथा गुरुनिमित्त मार्गमें स्थित होय विषयमें वैराग्य करिकें ओर संतोष करिकें निरंतर आनंद होय तेसैं सदानंदरूप श्रीकृष्णको सदा भजन (सेवा) करे ॥ ३४ ॥ ३५ ॥ टीका—दुष्टके संगको त्याग करे काहेतें जो दुष्टके संगतें बुद्धि विगरे असमर्पित खाय अन्याश्रयहू करे तातें दोषको मूल दुष्टसंगहे ताको त्याग करे, ओर श्रीआचार्यजी महाप्रभुजीके चरणारविंदको आश्रय करे ओर पुष्टिमार्गीय भगवदीयको संग करे ओर पुष्टिमार्गीयकी रीतिप्रमाण मार्गमें स्थित होय गुरु कहे ताप्रमाण क्रिया सब करे यह पांचो प्रकार स्नेहयुक्त करे. दुःसंगको त्याग १, श्रीआचार्यजीके चरणारविंदको आश्रय २, भगवदीयको संग ३, पुष्टिमार्गमें स्थिति ४, गुरु कहे ताप्रकार सेवा ५, यह पांचो प्रकार भगवदीयवैष्णवको कर्तव्यहे ॥ ३४ ॥ विषयमें वैराग्य होय तबही सर्वधर्म बनी आवे सो श्रीआचार्यजीमहाप्रभुजी संन्यासनिर्णयमें कहे हे “विषयाक्रांतदेहानां नावेशः सर्वथा हरेः” (विषयाक्रांत देह (अर्थात् देहस्य इंद्रिय) हे तिनजीवनके हृदयमें सर्वथा हरिको आवेश नांही हे) यह वाक्यतें जाजीवके हृदयमें विषयको ज्ञान होय, देहमें विषयकी कामना होय

ताके हृदयमें हरि भगवानको आवेश सर्वथा न होय तार्ते विषयादि देहसंवंधी कार्यतें वैराग्य होय ओर मनमें संतोष होय यथालाभ संतुष्ट (जो भगवदिच्छातें आय प्राप्तहोय ताहीमें संतोष) होय जब विषयादिकमें वैराग्य होय तबही संतोष होय ओर लौकिक वैदिक देहसंवंधी चिंता सब छोडि सदा आनंदमें रहे सो हृदयमें संतोष होय तब हृदयमें आनंद आवे चिंता न होय तब भगवद्धर्ममें मन लगे ताहीतें श्रीआचार्यजीमहाप्रभुजी नवरत्नग्रंथमें कहेहैं “चिंता कापि न कार्या निवेदितात्मभिः कदापि” (निवेदित हे आत्मा जिननें एसें जो वैष्णव हे तिनकूं कछुहू चिंता कर्त्तव्य नांहीहे) निवेदितभक्तहे सो चिंता न करे सदा आनंदमें रहे तब सदानंदरूप जो श्रीकृष्ण श्रीवृंदावनमें स्थित ब्रजभक्तसंयुक्त फलरूप उपर कहे हे तिनकी सेवा सदा करे तब सर्वोपर फलप्राप्ति होय ॥ ३५ ॥

इति श्रीहरिरायजीकृतं नवमं शिक्षापत्रं श्रीगोपेश्वरजीकृतब्रजभाषाटीकासमेतं समाप्तम् ॥ ९ ॥

शिक्षापत्र १०.

अब दशमशिक्षापत्रमें लौकिक क्लेशको संबंध होय तोहू प्रभुमें दोषारोप न करना ओर प्रभुको आश्रय न छोडनो, चातकपक्षिवत् दृढ विश्वास राखिकें रहनो भगवान् भक्तनको हितही करेंहे, यह निरूपणहे। उपर कहे हे जो विषयमें वैराग्यकरि यथालाभ संतोष राखि प्रसन्नतासों शुद्धहृदयतें भगवत्सेवा करे तो फलप्राप्ति होय, सो श्रीकृष्ण फलदान देवेको जब विचार करे तबही वने, श्रीकृष्णके मनको अभिप्राय जानि-

वेको जीवको सामर्थ्य नांहीहे प्रभु कोन भांति कहा फल देयंगे सो आगे शिक्षापत्रमें कहतहे.

मूलं—को वेद कीदृशः कृष्णाभिप्रायः स्वजने मतः ॥

स्वानंदसिद्धये राति निजार्तिं दर्शनादिषु ॥ १ ॥

शब्दार्थः—स्वजन जो तदीयहे ताके निमित्त श्रीकृष्णको कहा अभिप्रायहे सो कोन जाने, परंतु प्रमेयबलतें एसो जान्यो जातहे जो अपने आनंदकी सिद्धिके लीये दर्शनादिकमें अपनी आर्तिको दान करतहे ॥ १ ॥ टीका—श्रीकृष्णको अभिप्राय जानिवेको 'वेदहूको सामर्थ्य नांहीहे तासों नेति नेति पुकारतहे, यद्यपि वेद भगवत्स्वरूपहे भगवानके श्वासतें प्रकटेहे तथापि श्रीकृष्णको अभिप्राय जानिवेमें समथ नांहीहे तो अपनी बुद्धितें में कहा जानूंगो ? तोहू श्रीआचार्य-जीमहाप्रभुजीकी कृपातें में कछु अपनी मति अनुसार कहतहों काहेतें जो वेदहे सो प्रभुके बंदीजनहे सदा गुण गावतहे बाहिर ईश्वरताको माहात्म्य कहतहे ओर में तो श्रीकृष्णको दासहूं तातें प्रभुकी कृपा मोपरहे श्रीकृष्ण आनंदरूपहे सो अपने आनंदको जव पुष्टिमार्गीय जीवकों अनुभव कराववेकी इच्छा करतहे जो फलाने भक्तकों आनंद सिद्ध करिवेको विचारहे तव वह भक्तकों श्रीकृष्णके दर्शन होतहे तातें यह जाननो जो श्रीकृष्ण अपने सेवककों आनंद-दानकों विचारे तव अपने दर्शनकी आर्ति सिद्ध करावे उह सेवकके हृदयमें ताप होय जो में कव श्रीकृष्णको दर्शन करूंगो याहीमें स्मरण सेवा कीर्तन सब जाननो काहेतें जो इनसों प्रभुके दर्शनविना रह्यो न जाय तातें भगवद्धर्म करिवेमें प्रीति होय ॥ १ ॥

मूलं—संसाररागाभावाय लौकिकार्तिं तथा पुनः ।

मदाभावाय च स्वार्तिं शरीरार्तिं प्रयच्छति ॥२॥

१ वेदको अर्थ मूलके अनुसार नांहीहे.

शब्दार्थः—संसारमें स्नेहहे ताकी निवृत्तिके अर्थ लौकिक आर्त्ति देतहे फेरि मदकी निवृत्तिके अर्थ ज्ञातिसंवंधि आर्त्ति अथवा धनकी आर्त्ति तथा शरीरकी आर्त्ति [रोगादि पीडा] देतहे ॥ २ ॥ टीका—यह संसार देहसंवंधी जितनो पदार्थ होय तिनमेंते राग छूटे तब श्री-कृष्ण कृपा करे ताते लौकिककी आर्त्ति देतहे सो लौकिक छुडायवेके लीये देतहे ओर मदको अभाव होय (मेंही सर्वकर्ताहों एसो अभिमान छूटे) येहू श्रीकृष्णकी कृपाते होय ओर अपने शरीरकी आर्त्ति जो दुःखादिक तथा धनकी आर्त्ति सोही मदकी निवृत्तिके अर्थहे ताते येहू श्रीकृष्णकी कृपाते जानियें ॥ २ ॥

मूलं—संगाभावाय बंध्वार्त्ति देशार्त्ति दैन्यसिद्धये ।

मोहाभावाय भगवान् साधनार्त्ति ददाति हि ॥३॥

शब्दार्थः—जो बंधु बहिर्मुख [सगेसंवंधी] होय तिनको संग मिटायवेकों इनको नाश इनसों क्लेश इत्यादि आर्त्ति देतहे ओर दीनताकी सिद्धिके अर्थ देशकी आर्त्ति (विदेशगमन) देतहे तथा मोहकी निवृत्तिके अर्थ साधनकी आर्त्ति देतहे (जो हमारे फलाने साधनको यह फल भयो एसो मोहन उपजे) ॥ ३ ॥ टीका—संगको अभाव होय भगवदीयको संग न होय तो बंधु जो देहसंवंधी कुटुंब तिनसों क्लेश होय अथवा तिनको वियोग होय तो यह विचारे जो तिनते कहा संबंधहे मेरे आत्मसंवंधी तो भगवान्हे कामतो उनसोंहीहे याभांति विचारि श्रीकृष्णकी कृपाही माने ओर देशार्त्ति जो अपने जहां रहत होय कुटुंब घर मित्र जहां होय तादेशमें दुःख होय तोहू मनमें ऐसे जाने जो श्रीकृष्णकी कृपाते दैन्य सिद्ध होय ताके लीये यह क्लेशहे काहेतें जो प्रभु प्रसन्न करिवेकों दीनताही साधनहे सो श्रीगुसांईजीनें विज्ञप्तिमें कह्यो हे “ आचार्यचरणेरुक्तं दैन्यं त्वत्तोपसाधनम् ” ॥ (श्रीआचार्यजीमहाप्रभुजी श्रीसुबोधिनीजी आदि

ग्रंथमें कहेहे जो आपको प्रसन्न करिवेको दैन्य साधनहे) यह वचनते दीनतारूप साधनते प्रभु प्रसन्न होय सो दीनता श्रीकृष्णकी कृपाते सिद्ध होतहे. ओर मोहको अभाव होय श्रीकृष्णविना ओर स्त्री, पुत्र, पति, मित्र, घर, द्रव्य, देह, यहलोक, परलोक, कहूं मोह नहोय येहू श्रीकृष्णकी कृपाते होय ओर भगवानकूं मिलवेके पुष्टिमार्गकी रीतिके साधन (भगवत्सेवा, स्मरण, कीर्तन, जप, पाठ, भगवद्भार्तादिक) हे सोहू श्रीभगवान् कृपा करिकें करावे तवहीं वनि आवे ॥ ३ ॥

मूलं-प्रारब्धभोजनार्थं वा परीक्षार्थं विलंबनात् ।

निर्वाहार्थं तथा वेदसाध्यार्थातिं प्रयच्छति ॥४॥

एवमार्तिप्रदानेऽपि परमानंददायिनः ।

समाश्रयो न मोक्तव्यो दृढः स्वाचार्यसंश्रयैः ॥५॥

शब्दार्थः—प्रारब्धभोग करायवेके लिये अथवा परीक्षाके लिये भगवान् विलंब करें ताते निर्वाहके अर्थ, तेसेही वेदसाध्य जो अर्थ (स्वर्गादिक) इनसंवंधी आर्ति (पीडा) देहें अर्थात् लोकवेदकी असिद्धि राखेहें ॥ ४ ॥ ऐसे आर्ति देतसतेहू अपने जो श्रीआचार्यजी तिनके सुंदर आश्रयवारे वैष्णवके आनंददाता (श्रीकृष्ण) को दृढ आश्रय सर्वथा न छोड़नो ॥ ५ ॥ टीका—उपर कहे ताप्रकार लौकिक आर्ति कराय भगवत्संवंधकी आर्ति जब श्रीकृष्ण कृपा करे तब होय, जहां ताई उपर कही इतनी आर्तिमें दृढ आश्रय न रहे तहां ताई परमानंदको दान न होय सो सगरे साधनमें जीवके हाथ एकहू नांहीहे श्रीकृष्णही सर्व सिद्ध करि पाछें पुष्टिमार्गके परमफलरूप परमानंदको दान करतहे यह आशय में अपनी युक्तिसों नांही कहतहों श्रीआचार्यजीके चरणकमलको आश्रय दृढकरिकें कहतहों

जो सर्व श्रीकृष्णही करतहे सो श्रीआचार्यजी नवरत्नग्रंथमें कहेहे
 “ सर्वेश्वरश्च सर्वात्मा निजेच्छातः करिष्यति ” (प्रभु सर्वके ईश्वर
 ओर सर्वके आत्माहे सो अपनी तथा अपने भक्तनकी इच्छासों करेंगे)
 तातें अपने तो मुख्य श्रीआचार्यजीके चरणकमलको आश्रय करि
 लौकिक आर्त्तिमेंहू मन (चलायमान हे ताकों उपर कहे ताप्रमाण
 समुझायकें) दृढ राखनो यह कर्त्तव्यहे ॥ ४ ॥ ५ ॥

मूलं-स्वतः कृष्णः सदानंदो निजानंदं प्रदास्यति ।

तदाशयैव स्थातव्यं सर्वैश्चातकपक्षिवत् ॥ ६ ॥

शब्दार्थः—आपतें श्रीकृष्ण सदा आनंदरूपहे सो अपने भक्तनकों
 अपनो आनंद विशेष करिकें देहिंगे तातें चातकपक्षिकी नाई इनकी
 आशातें रहेनो ॥ ६ ॥ टीका—श्रीकृष्ण आपुही आनंदरूपहे परम
 दयालहे सर्व प्राणिमात्रकों आनंद देतहे ऐसे श्रीकृष्ण अपने दासकों
 आनंद करे सो उचितहीहे दासपर तो कृपा करिकें ओर अधिक
 दान करेंगे यह निश्चय श्रीकृष्णको भरोसोहे श्रीकृष्णके नामतें सगरे
 कार्य सिद्ध होय यह श्रीभागवतद्वादशस्कंधमें श्रीशुकदेवजी कहेहें
 “ कलेदोपनिधे राजन्नस्ति लोको महान् गुणः । कीर्त्तनादेव कृष्णस्य
 मुक्तबंधः परं ब्रजेत् ” (हे परीक्षित ! दोपके भंडाररूप कलियुगको
 एक बड़ो गुणहे जो श्रीकृष्णके कीर्त्तनसोंही मुक्तबंध होय परकों प्राप्त
 होय) यह वाक्यतें यद्यपि कलियुग दोपरूपहे तोहू श्रीकृष्णके नामतें
 संसार छुटि जाय भक्ति प्राप्तहोय सो भगवदीय गायेहे । रागविहागरो ।
 “ करिहे कृष्णनाम सहाय । अधमता उर आनि अपनी मरत हे अकु-
 लाय ॥ १ ॥ अधम अग्नितें उधारे सो कहा तेरो भार । कोन उद्यम
 अपने निज करि सक्यो निस्तार ॥ २ ॥ नेक ऊयो करि भरोसो
 चसत जाके गाम । सो क्यों ममता छांडि हेले जीवन जाको नाम

॥ ३ ॥ वरद विविध भुलायवो करि हरि न धरिहे लाज । तोपें गदाधर निगम आगम वक्त कितवे काज ॥ ४ ॥ ” एसे प्रभुको नाम दयालहे तहां प्रभु दया करि अपने भक्तनको आनंद देहि तहां कहा कहेनो तहां दृष्टांत कहतहें जो चातकपक्षिवत् दास विश्वास करि रहे काहेतें जो चातकपक्षी जड (मेघ) को स्मरण करतहे सो मेघ वाको मनोरथ पूर्ण करतहे तो श्रीकृष्ण तो परम आनंदरूपहे दया करि सब करेंगे ॥ ६ ॥

मूलं-लौकिकार्त्तरगणनं परमानंदचितनात् ।

यथा न गणयेद्रोगी तिक्तभेषजभक्षणम् ॥ ७ ॥

शब्दार्थः—परमानंदके चिंतनतें लौकिकआर्त्तिकों नांही गिने जेसैं रोगी करूई औषधि खातहे सो रोग निवृत्तिके अर्थ खातहे तेसैं संसारकी निवृत्तिके अर्थ लौकिक आर्त्तिकों सहन करे ॥ ७ ॥ टीका—लौकिक देहसंबंधी संसारकी आर्त्ति करि खेद पावे तहां प्रभुकों चिंता न होय प्रभुके अर्थ यह जीव जब आर्त्ति करे तब प्रभुकों चिंता होय तातें वैष्णवनकों लौकिक आर्त्ति नांही कर्तव्यहे प्रभुकी आर्त्ति (विप्रयोग) करे. परमानंदरूप भगवानके गुण विचारि विचारि अपने दोष विचारि विचारि चिंतन करे तब प्रभुके हृदयमें दया आवे सो निरोधलक्षण-ग्रंथमें श्रीआचार्यजीमहाप्रभुजी कहेहें “ क्लिश्यमानान् जनान् दृष्ट्वा कृपायुक्तो यदा भवेत् । तदा सर्वं सदानंदं हृदिस्थं निर्गतं बहिः ” ॥ [आर्त्तियुक्त भक्तजनकों देखिकें प्रभु जब कृपायुक्त होय तब हृदयमें सर्व सदानंदरूपहे सो बाहिर निकसेहे] अपने जनको विप्रयोग-केश प्रभु जब देखत हे तब दर्शन देतहे सो श्रीभागवतरास-पंचाध्यायीमें वर्णनहे जो ब्रजभक्तकों मद भयो तब प्रभु अंत-

ध्यान भये पाछें भक्तनकों विरह करिकें अत्यंत क्लेश भयो तब श्रीठाकुरजी कृपा करिकें प्रकट भये तेसैंही यह पुष्टिमार्गमें ब्रजभक्तनके भाव करि मनसों क्लेश होय तब प्रभु कृपा करे तातें लौकिकार्ति छोडिकें प्रभुको विरहकरि परमानंदको चिंतन करे तो प्रभु कृपा करे तहां दृष्टांत देतहें जो जाके रोग होय सो तिक्त औपधिकों खातहे यद्यपि औपध बहुत कखई हे सोही रोगी रोगनिवृत्त्यर्थ प्रीतिसों खातहे तेसैंही जाकों संसाररूप काम, क्रोध, मद, मत्सरादि सबनको रोगसदृश ज्ञान भयो हे सो रोग निवृत्तकरणार्थ लौकिकार्तिकों सहन करि परमानंदके चिंतनरूप औपध खाय तब प्रभु कृपा करि सगरो दुःख निवृत्त करे तातें लौकिकार्ति छोडिकें प्रभुके विप्रयोगको चिंतन करे तब प्रभु प्रसन्न होय ॥ ७ ॥

मूलं-अहितं निजभक्तानां विदधाति हरिर्न हि ।

समस्तानां सखा स्वीयभक्तानां न कथं भवेत् ॥ ८ ॥

शब्दार्थः—अपने भक्तनको अहित हरि सर्वथा नांही करतहे काहेतें जो समस्त जगतके सखा हे सो अपने भक्तनके सखा कैसें नहोय ? ॥ ८ ॥ टीका—श्रीकृष्ण कैसे हे जो अपने भक्तनको अहित [बुरो] कबहु न करे सदा हितही करेंगे सो महाभारतमें भीष्मभक्तके वचन सत्य कीये अपनो पण छोड्यो पाछें अंतसमय कृपाहू करी, जेसैं श्रीनंदरायजी अंबिकापूजनको गये अन्याश्रय कीयो ताकरि सुदर्शनसर्पनैं ग्रसि ही लीये पाछें प्रभुके निजभक्त भये तब प्रभु कृपा करि सुदर्शनसर्पतें छुड़ाये तेसैंही पुष्टिमार्गीयकों कछू दोपनिवृत्तिकरणार्थ प्रभु दुःख दे तो मनमें चिंता नांही कर्तव्यहे पाछें प्रभु हितही करेंगे काहेतें जो समस्तजीवनके पालनकर्त्ता भगवान् हे सो अपने भक्तनके उपर कृपा करे यामें कहा आश्चर्यहे निश्चय अपने भक्तके उपर कृपा करत

आयेहे सो अवहू करतहे ओर आगे करेंगे याभांति पुष्टिमार्गीय वैष्णव प्रभुके गुण विचारि स्मरण भजन करे यह सिद्धांत भयो ॥ ८ ॥

इति श्रीहरिरायजीकृतं दशमं शिक्षापत्रं श्रीगोपे-
श्वरजीकृतव्रजभाषाटीकासमेतं समाप्तम् ॥ १० ॥

शिक्षापत्र ११.

अब ग्यारहमे शिक्षापत्रमें भक्तनके कर्तव्य (गुणगान, दुःखभावन, दैन्य, ओर त्याग यह) चतुष्टयको निरूपणहे. उपर कहिआये जो प्रभु अपने भक्तनको वूरो कवहू न करेंगे हितही करेंगे परंतु भक्तिमार्गकी रीतिकों न छोडे सो आगे वर्णन करतहे जो याभांति भक्तनकों रहेनो।

मूलं—सर्वदा सर्वभावैकहेतुभूतेषु सर्वथा ।

श्रीमदाचार्यपादेषु स्थाप्यतां तन्मयं मनः ॥१॥

शब्दार्थः—निरंतर सर्वभावके मुख्य हेतुभूत (कारणरूप) श्रीआ-
चार्यजीके चरणारविंदमें मनकों तन्मय करि निश्चय स्थापन करनो ॥१॥
टीका—अब भगवद्भक्तके लक्षण कहतहे सर्वदा (सर्व कालमें) सर्व
भावके हेतुभूत श्रीमदाचार्यजीके चरणकमलमें अपने मनकी स्थिति
करनी एक इनहीको दृढ आश्रय करनो सो अपने मनसों तन्मयहोय
करनो मन वचन कर्म करि श्रीआचार्यजी महाप्रभुके चरणकमलकोही
आश्रय राखे ॥ १ ॥

मूलं—तत एव कृतार्थत्वं निश्चयः क्रियतां हृदि ।

आसुरत्वं विनिश्चेयमन्यत्तत्साम्यवादिषु ॥२॥

शब्दार्थः—श्रीआचार्यजीके चरणकमलमें मन स्थापन करना तासोंही कृतार्थताहे एसो निश्चय हृदयमें करना ओर इनतें अन्य तथा वरोवर कहिवेवारेके विषे आसुरपनेको निश्चय करना ॥ २ ॥ टीका—उपर कहे जो श्रीआचार्यजी महाप्रभुजीके चरणकमलमें मन राखे सो कृतार्थरूप हे यह सिद्धांतमें कोई वादीको विश्वास न होय बाद करे ताकों निश्चय आसुरही जाननों, काहेतें जो यह सिद्धांत वेद, शास्त्र, गीता, श्रीभागवतके प्रमाणतें सिद्ध हे तामें विश्वास न होय ताकों निश्चय आसुर जाननो ॥ २ ॥

मूलं—श्रीकृष्णः सर्वदा स्मर्यः सर्वलीलासमन्वितः ।

भक्तैकहृदयस्थायी सकलः पुरुषोत्तमः ॥ ३ ॥

शब्दार्थः—सर्वलीला [वेणुगीत युगलगीतादिक] युक्त, भक्तनके हृदयमें स्थित अंशकलासहित श्रीकृष्ण पुरुषोत्तम सर्वदा स्मरणकरिवे योग्यहे ॥ ३ ॥ टीका—श्रीकृष्ण फलात्मक, रसात्मक, भावात्मक, स्वरूपात्मकहे तिनको स्मरण सदा करना, लीलासहित भक्तनसहित स्मरण करना काहेतें जो रसात्मक श्रीकृष्ण ब्रजभक्तके संग अष्टप्रहर लीला करतहे एसे श्रीकृष्णको स्मरण करिये ताकरि हृदयमें सदा पुरुषोत्तम स्थित रहे यह रीति भक्तकी हे, जाको ध्यान करे सो हृदयमें आवे लोकिकाविष्ट हृदयमें संसार भरचो रहे ओर प्रभुको स्मरण करे तो प्रभु [सगरे यद्यपि हे तोहू] भक्तके हृदयमें लीलासहित स्थित होय ॥ ३ ॥

मूलं—गुणगानं तथा दुःखभावनं दैन्यमेव च ।

तथा त्यागः सिद्धदृशः कृत्यमेतच्चतुष्टयम् ॥ ४ ॥

शब्दार्थः—गुणगान तथा दुःखकी भावना [विप्रयोगार्ति] ओर दैन्य तथा त्याग [लोकिक वैदिक आसक्ति छोडनी] यह चारो

सिद्ध दृष्टिवारेके कृत्यहे ॥ ४ ॥ टीका—श्रीठाकुरजीकी लीलाको गुण-
गान करे, विप्रयोगदुःखकी भावना करे, दैन्य करे, ताकरि सब लौकिक
वैदिक त्याग करे, यह चारो कृत्य अवश्य करे काहेतें जो प्रथम गुणगान
करे ताकरिकें जितने दोष होय तितने भस्म होय जाय शुद्ध हृदय होय
जाय तब अपने दोष स्फूरे अपनकों तुच्छ जाने प्रभुकों सर्वोपरि जाने जो
मेंतो कछु साधन कीयो नांही मेरो अंगीकार प्रभु कैसें करेंगे? याभांति
विचारिवेतें निःसाधनताकी भावना मनमें होय तब दीनता होय तब
प्रभु बिना ओर कछु न सुहाय पाछें लौकिक वैदिक सब त्याग होय यह
चतुष्टय प्रकारहे सो पुष्टिमार्गीय साधन ओर फलरूप जानि कर्त्तव्यहे ॥ ४ ॥

मूलं-गुणगानं भागवतात् सेवया दुःखभावनम् ।

तद्दैन्यभाववद्दैन्यं त्यागो विरहभावतः ॥ ५ ॥

शब्दार्थः—श्रीमद्भागवतके [मननपूर्वक] पाठसों गुणगान करनो,
सेवा करि दुःखकी भावना करनी [जो प्रथम चोरासी दोसोवावनकी
पास प्रभु मांगिमांगिकें अरोगते एसें मोकों कब होयगो यह दुः-
खकी भावना करनी जो दैन्य प्रभुकी कृपाको कारण हे सो दैन्य-
भावनतें दैन्य सिद्ध होय ओर विरहके भावसों [संन्यासनिर्णयमें
कह्यो हे सो] त्याग सिद्ध होय ॥ ५ ॥ टीका—ऊपर श्लोकमें जो
चतुष्टयकर्त्तव्य बताये सो कोन भांति सिद्ध होय सो कहतहे जो साध-
नरूप गुणगानसों सर्वदोष दूरिहोय ओर फलरूपतें भगवानको दर्शन
सिद्ध होयहे जेसें ब्रजभक्त वेणुगीत युगलगीत गायकें निर्वाह
करतहे तेसेंही वैष्णव सेवाके अनोसरमें गुणगान करे जो प्रभुकी
सेवाको कब समय होय यह 'दुःखकी भावना होय यह गुणगानतें

१ शब्दार्थमें जो दुःख लिख्योहे सो रत्नमट्टकी टीकाके अनुसार लिख्योहे
तेसेंही दैन्य ओर त्यागहे ता टीकाके अनुसार लिख्योहे.

सेवाको दुःख मनमें होय ताकरि निःसाधनता सिद्ध होय कितनीहू सेवा करे परंतु मनमें यहही दुःख रहे जो जन्म सगरो बृथाही गयो कछु भगवत्सेवा न वनी यह दैन्य सिद्ध होय याभांति दैन्यकी भावना करत करत सर्व देहसंबंधी पदार्थमें त्याग उत्पन्न होय तब शुद्ध विप्रयोगकी भावना होय यह सर्वोपरि मुख्य फलहे पाछें सर्व लीलाको अनुभव होय चतुष्टयप्रकार फल होय ॥ ५ ॥

मूलं-एतच्चतुष्टयं सिद्धं यदि नान्यदपेक्षितम् ।

सर्वस्य मूलं सत्संगस्तदभावे न सिद्ध्यति ॥ ६ ॥

शब्दार्थः—ऊपर श्लोकमें कहे यह चतुष्टय जब सिद्ध भये तब दूसरो कछु इच्छित नांहीहे ओर सबको मूल सत्संगहे ताको अभाव होय तो वह फल सिद्ध न होय ॥ ६ ॥ टीका—ऊपर कहे यह चतुष्टय प्रकार जाको सिद्ध होय ताको ओर साधनकी अपेक्षा कछु नांही तातें प्रथम गुणगान करे ओर भगवत्सेवा करि दुःखकी भावना करे दैन्ययुक्त होय सर्व त्याग करि विप्रयोगकी भावना करे यह फलरूप साधन सिद्ध भये पीछें दूसरे साधनकी अपेक्षा नांहीहे सो यह चतुष्टय फलरूप पदार्थ सत्संगतें सिद्ध होय तातें सर्वको मूल सत्संग हे सो भागवतमें प्रथमस्कंधमें शौनकको वाक्य हे “ तुल्याम लवेनापि न स्वर्गं नापुनर्भवम् । भगवत्संगिसंगस्य मर्त्यानां किमुताशिषः ” (भगवद्भक्तके संगके क्षणकी तुलना स्वर्ग ओर मोक्षहू नांही करेहे तहां मनुष्यके मनोरथरूप राज्यादिककी तुलना न होय यामें कहा कहनो ?] ओर एकादशस्कंधमें उद्धवजीप्रति भगवान् कहेहे “ न रोधयति मां योगो न सांख्यं धर्म उद्धव ! । न स्वाध्यायस्तपस्त्यागो नेष्टापूर्त न दक्षिणा ॥ १ ॥ व्रतानि यज्ञा-श्छंदांसि तीर्थानि नियमा यमाः । यथावरुंधे सत्संगः सर्वसंगापहो

हि माम् ॥ २ ॥ सत्संगेन हि दैतेया यातुधानाः खगा मृगाः । गंधर्वा-
प्सरसो नागाः सिद्धाश्चारणगुह्यकाः ॥ ३ ॥ विद्याधरा मनुष्येषु वैश्याः
शूद्राः स्त्रियोऽत्यजाः । रजस्तमः प्रकृतयस्तस्मिस्तस्मिन् युगेऽनघ ॥ ४ ॥
वहवो मत्पदं प्राप्तास्त्वाष्ट्रकायाधवादयः । वृषपर्वा बलिर्वाणो मयश्चाथ
विभीषणः ॥ ५ ॥ सुग्रीवो हनुमानृक्षो गजो गृध्रो वणिक्पथः । व्याधः
कुब्जा ब्रजे गोप्यो यज्ञपत्न्यस्तथा परे ॥ ६ ॥ ते नाधीतश्रुतिगणा
नोपासितमहत्तमाः । अत्रतातस्तपसः सत्संगान्मामुपागताः ॥ ७ ॥ ”
(मोकों योग वश नांही करेहे, न सांख्य, धर्म, न स्वाध्याय (वेदजप),
तप, त्याग, न इष्ट (अग्निहोत्रादि), पूर्त (कृवा वगीचा), न दक्षिणा,
॥ १ ॥ व्रत, यज्ञ, छंद (रहस्यमंत्र), तीर्थ, नियम, यम, (ये कोउ वश
नांही करेहे) सर्वसंगकों मिटायवेवारो जेसो सत्संग मोकों वशकरेहे
॥ २ ॥ सत्संग करिकें दैत्य, राक्षस, खग (पक्षि), मृग, गंधर्व,
अप्सरा, नाग, सिद्ध, चारण, गुह्यक ॥ ३ ॥ विद्याधर, मनुष्यमें
वैश्य, शूद्र, स्त्रियें, अंत्यज (नीचजातिवारे), रजोगुण तमोगुण प्रकृ-
तिवारे यहयहयुगमें, हे पापरहित ! ॥ ४ ॥ वोहोत मेरे चरणारविं-
दकों प्राप्त भये वृत्रासुर, प्रह्लादादिक, वृषपर्वा, बलि, वाणासुर, मय-
दानव ओर विभीषण ॥ ५ ॥ सुग्रीव, हनुमान्, जांबवान्, गर्जेंद्र,
जटायु, तुलाधार, धर्मव्याध, कुब्जा, ब्रजमें गोपीजन, यज्ञपत्नी तथा
ओर ॥ ६ ॥ ये नांही पठितहे वेद जिनने, नांही सेवितहे वृद्धादिक जि-
नने, ओर नांही व्रत के तप करिवेवारे एसेहू केवल सत्संगतें मोकों
प्राप्त भये ॥ ७ ॥) इत्यादि वचनतें भगवान् कहेहे जो हे उद्धव ! सांख्य,
धर्म, स्वाध्याय, तप, त्याग, व्रत, यज्ञ, छंद, तीर्थ, नियम इत्यादि मोकों
वश नांही करतहें, ओर सत्संगकरि जीव मोकों वश करिलेतहे एसो
सत्संगहे, सत्संगके प्रतापतें दैत्य, राक्षस, खग, मृग, गंधर्व, अप्सरा,
सिद्ध, चारण. मनुष्य, सब कृतार्थ भये तातें सर्वसाधनको मूल सत्संगहे,

सत्संगतें तद्रूपभाव हृदयारूढ होय भावकी सिद्धि होय, तातें भगव-
दीयको सत्संग अवश्यही करनो यह सिद्धांत भयो ॥ ६ ॥

इति श्रीहरिरायजीकृतं एकादशं शिक्षापत्रं श्रीगोपे-
श्वरजीकृतव्रजभाषाटीकासमेतं समाप्तम् ॥ ११ ॥

शिक्षापत्र १२.

अब द्वादशशिक्षापत्रमें श्रीस्वामिनीजीके वाक्यनकी भावना
अहर्निश करनी सो निरूपण करतहैं—उपर कहे चतुष्टय प्रकार सिद्ध-
भये पीछें कोन भांति अनुभव होय सो आगें शिक्षापत्रमें कहतहैं—

मूलं-भावनीयं सदा चित्ते स्वामिनीजल्पितं मुहुः ।

तापक्लेशैरयं मार्गः श्रीमदाचार्यरूपितः ॥ १ ॥

शब्दार्थः—वारंवार चित्तमें श्रीस्वामिनीजीके वचन (विप्रयोगदशाके
हा नाथ ! हा प्रिय ! हा रमण ! कहाँहो ? हा महाभुज ! आपकी दीन दासी
मेंहूँ इनको दर्शन देहो इत्यादि) भावनीयहै, काहेतें जो यह मार्ग विरह-
तापके क्लेशसहित श्रीमदाचार्यजीनें निरूपण कीयोहै ॥ १ ॥ टीका—
श्रीकृष्णके विप्रयोगमें श्रीस्वामिनीजी कोन प्रकार वारंवार जल्पना
करतहे या भांति पुष्टिमार्गीय भगवदीय चित्तमें भावना करे सो
प्रेमामृतमें कहतहे “ एकदा कृष्णविरहाद्व्यायंती प्रियसंगमम् । मनो-
वाष्पनिरासाय जल्पतीदं मुहुर्मुहुः ” ॥ (एक दिन श्रीकृष्णके विरहसों
प्रियसंगमको ध्यान करतें श्रीस्वामिनीजी हृदयके अश्रु निकासिवेकों
वारंवार ऐसे शब्द करतहे) श्रीस्वामिनीजी श्रीकृष्णके मिलन अर्थ

विप्रयोग करि वारंवार जल्पना करतहे यहभाव सर्वोंपरिहे तेसही यहपु-
ष्टिमार्ग तापक्लेशरूपहे काहेतें जो श्रीस्वामिनीजीके तापक्लेशभावात्मक
श्रीमहाप्रभुजीहे तातें इनने प्रकटकीयो पुष्टिमार्गहू तापक्लेशरूपहे ताहीतें
तापक्लेशकरिकें यहमार्गकी फलसिद्धि हे तातें विरहकरि श्रीस्वामिनीजी
जाप्रकार भावसहित अनुभव करतहें सो भावकी भावना करनी.
श्रीस्वामिनीजीकी भावनाको स्वरूप आगे कहतहे ॥ १ ॥

मूलं-दर्शनं देहि* गोपीश ! गोकुलानंददायक ! ।

गोविंद ! गोपवनिताप्राणाधिप ! कृपानिधे ! ॥२॥

शब्दार्थ:-हे गोपीजनके ईश ! हे गोकुल (धेनुकुल अथवा भक्त-
कुल) को आनंद देवेवारे ! हे गोविंद ! हे ब्रजभक्तनके प्राणपति !
हे कृपाके भंडार ! दर्शन देहो ॥ २ ॥ टीका-श्रीस्वामिनीजी कहतहे
जो हे गोपीजनके ईश ! हमकों दर्शन देहो काहेतें जो तुम गोपिनके
पति-ईश-राजाहो तातें राजा अपने प्रजाकों दुःख न देय सुखही
देतहें यह मर्यादाहे, तेसही हे श्रीकृष्ण ! हम तुह्यारी प्रजाहे तातें
हमकों दर्शन देहो, ओर तुम गायनके कुलकों आनंददाताहो सो
गायेंहू तुह्यारे दर्शनविना व्याकुलहे तातें गायनकों दर्शन द्यो, तथा
वनमें गायनकों चराय आनंद दीये अत्र वेगि पधारि हमकों आनंद
द्यो. काहेतें जो तुम गोविंदहो गायनके इंद्रहो, सो इंद्र अपने भोगमें
आसक्त बहुतहे तेसैं तुम ब्रजभक्तकों सुख देहो, काहेतें जो गोप-
वनिताके प्राणके अधिपतिहो तुह्यारे दर्शनके मिलें गोपवनिता
जीवतहे सो एसे श्रीकृष्ण कृपानिधि हमकों वेगिही दर्शन देहो.
याभांति श्रीस्वामिनीजी लीलासहित प्रभुके नाम लेय विलाप
करतहे ॥ २ ॥

* चार युधहे ओर दस एक युधमें सोरह शृंगारात्मक सोरह श्रीस्वामिनीजी हे
तिनके भावमं चोसठ नाम श्रीठाकुरजीके या शिक्षापत्रके अंतपद्यंतमें आवे हे, तिनके
अंक नामपें लिखे गये हे.

मूलं—गोपाल ! पालितव्रज ! निजव्रजसुखांबुधि ।

परमानंदं नंदादिरुचिरोत्संगलालित ! ॥ ३ ॥

शब्दार्थः—हे गोपाल (गायनके पालन करिवेवारे) ! हे व्रजभक्तनके पालनहार ! हे अपने व्रज अथवा अपने भक्तनके समूहके सुखके समुद्र ! हे परम आनंदरूप ! हे श्रीनंदरायजी आदिके रुचिर गोदमें खेलिवेवारे ! (हमकों दर्शनदेहो यह पूर्वश्लोकको संबंध पंद्रहमें श्लोक ताई चलेगो) ॥ ३ ॥ टीका—हे गोपाल ! तुम गायनके पालनकर्ताहो ओर यह व्रज तुम्हारोहे तिनसवनको पालन करि सगरे व्रजके सुखदाता हो तुम सुखके समुद्रहो यह व्रज तुम्हारोहे तामें व्रजभक्त पशु, पक्षि, गाय, गोपाल, जड, चेतन, सबकों सुखदाताहो ऐसे सुखके समुद्र ! हमकों सुख देहु, तुम परमानंदरूपहो तुमकों नंद यशोदादि उत्संगमें लेके लालन पालन करतहे ऐसे श्रीकृष्ण ! हमकों दर्शन देहु ॥ ३ ॥

मूलं—सदानंद निजानंदसमुदायप्रदायक ! ।

दामोदर ! दयांर्द्रा ! दीनानाथ ! दयापर ! ॥ ४ ॥

शब्दार्थः—हे सदा आनंदरूप ! हे निजभक्तनों आनंदसमुदायके देयवेवारे ! हे दामोदर (भक्तवश्य) ! हे दयाकरिकें जो आर्द्रहे बिनके उपर आर्द्र ! हे दीनताकों प्राप्तभक्तनके चारेओरतें नाथ [रक्षक] ! हे दयापर ! ॥ ४ ॥ टीका—हे श्रीकृष्ण ! तुम तो सदा आनंदरूपहो, व्रजमें समुदित जीवमात्रके आनंददाताहो, ओर श्रीयशोदाजीनें दाम उदरसो बांधेहे ऐसे भक्तनके वश्यहो, दया करि तुम्हारो हृदय आर्द्र [भीजी रह्यो] हे ओर दीननाथहो जो अतिदीनभक्त होय [जिनके कोउ नांही] तिनके तुमहो ओर दयापरहो सर्वपर तुम्हारि दयाहे सो हे श्रीकृष्ण ! दया करि हमकों दर्शन देहो ॥ ४ ॥

मूलं--पुरुषोत्तम ! सर्वांगरुचिर ! प्रेमपूरित ! ।

अनंगरूपं परम ! प्रिय ! गोपवधूपति ! ॥ ५ ॥

शब्दार्थः—हे पुरुषोत्तम ! हे सर्व अंगमें सुंदर ! हे प्रेमकरिकें पूरित ! हे कामदेवके समस्तरूपतें उत्कृष्ट ! हे प्रिय ! अथवा हे गोपवधूके पति ! ॥ ५ ॥ टीका—हे पुरुषोत्तम ! सर्वतें पर ऐसे सर्वोपर तुझारे सर्व अंग रुचिरहे जाआंगको दर्शन होतहे तहां नेन लागि रहतहे सो भगवदीय गायेहे ॥ रागनट—“रूप देखि नेनां पलक लागे नहीं । श्रीगोवर्धनधर-के अंगअंगपर निरखि नेन मन रहत तहिं ” याभांति सर्वांगरुचिरहो ओर प्रेमकरि पूरितहो सर्वांगमें प्रेमरस भरिरह्योहे आधिदैविक अनंग-रूप परमसुंदरहो गोपीजनकों तुम परमप्रियहो तुमकों गोपीजन परम-प्रियहे गोपवधूके पति तुमहीहो जेसैं भूज्यो अन्न खेतमें डारे तो उपजे नांही तातें भूज्यो अन्न बीजके काम न आवे देखिवेको अन्नहे तेसैंही गोप हे. तिनकी वधूके पति तुमही हो ऐसे श्रीकृष्ण हमकों वेगि दर्शन देहो ॥ ५ ॥

मूलं--ब्रजावलंबसुकटे ! लंबकेश ! कलानिधे ! ।

विरहार्तिहर ! स्वीयमनोहरणतत्पर ! ॥ ६ ॥

शब्दार्थः—हे ब्रजके आलंबनसुंदरकटिवारे ! हे लंबायमान केशवारे ! हे कलाके निधिरूप ! हे विरहकी आर्तिकों हरिवेवारे ! हे स्वीय(अपने भक्तनके) मनकों हरिवेमें तत्पर ! ॥ ६ ॥ टीका—ब्रजके अवलंब तुमही हो सगरो ब्रज तुझारे आश्रय होय एक तुमहीकों जानत हे ओर तुझारे केश बड़े लंबे कुटिल (टेडे) हे सो मानो मधुपपंक्ति आय रहीहे ओर कलानिधिहो सूर्यमें षोडश कला हे तिनको इतनो प्रताप हे तो तुम तो कलाके निधिहो सो तुझारे प्रतापगुण कहांताई वरने यामें काहूको सामर्थ्य नांही अपने स्वीय [निज] भक्तनकी आर्तिके

हरणहारे ओर अपनो सुंदर मुख श्रीअंग दिखाय तथा अनेक लीला-
करि समस्त ब्रजभक्तनके मनकों हरणकरिवेमें परायण ऐसे हे श्रीकृष्ण !
हमकों वेगि दर्शन देहो ॥ ६ ॥

मूलं—मनोविनोद ! भावाब्धे ! भाववद्धृदयस्थित ! ।

चंचलीकृतचित्त ! स्वभावांदोलितरूपधृक् ! ॥७॥

शब्दार्थः—हे मनके विनोदरूप ! भावके समुद्र ! ओर भाववारेके
हृदयमें विराजिवेवारे ! तथा भक्तनको चंचलकीयोहे चित्त जिननें ओर
अपने भक्तनके भावकरिके आंदोलितरूपकों धारण करिवेवारे ! ॥७॥
टीका—ब्रजभक्तनके मनको विनोद जो आनंद ताके दाता तुमही हो
तुमहीकरि ब्रजभक्त आनंद पावत हे ओर भावके समुद्रहो, जाभावसों
भजे सोई सिद्ध होय. कोउ आपके भावको पार न पावे जगतमें सगरे
भावहे सो तुम्हारी कणिकारूपहे तुम भावके समुद्रहो ओर भावहीकरि
भक्तनके हृदयमें स्थितहो जाभक्तके हृदयमें जो भाव तहां ताहि रीतिसों
विराजतहो ओर अपने भक्तनको चित्त चलायमान करो हो आप ही
चंचलहो भक्त कोउ गृहके कामकाज करतहोय तहांतिं चित्तकों चलायके
अपनमें लगावतहो भावकरि सर्वांग भरेहे, अपने भक्तनको जो जो भाव-
रसहे सो तुम्हारे स्वरूपमें भरिरह्योहे ऐसे श्रीकृष्ण मोकों दर्शन देहो ॥७॥

मूलं—महामुग्ध ! सदादुग्धपानतत्परमानस ! ।

नवनीताल्लिप्तमुख ! पयोविंदुयुंताधर ! ॥ ८ ॥

शब्दार्थः—हे महामुग्ध ! हे सदादुग्धपानमें तत्पर मनवारे ! हे नव-
नीतकरि चायों ओर लिप्त मुखवारे ! हे दुग्धविंदुकरिके युक्त अधर-
वारे ! ॥ ८ ॥ टीका—अपने निजभक्तनमें महामुग्धहो, आप कछु ज्ञान
राखत नांही जो भक्त कहे सोई करो सदादुग्धपानमें तत्परहो मनकरि
क्षणक्षणमें श्रीयशोदाजके स्तनके दुग्धपान करनमें तत्परहो तथा

व्रजभक्त दूध सवारिकें देत हे ताके पानमें तत्पर हो, मनहू वाहीमें हे मुखमें नवनीत लिपट रह्यो हे ताकरि परम अद्भुत शोभा देतहे दूधकी चूंद अधरमें लगि हे ताकरि अधर शोभायमान हे ऐसे श्रीकृष्ण हमकों दर्शन देहो ॥ ८ ॥

मूलं-अलकंवृतवदन ! मदनाधिकसुंदर ! ।

कपोलविलंसद्राग ! कस्तूरीतिलकांचित ! ॥ ९ ॥

शब्दार्थः—हे अलककरिकें व्याप्त वदनवारे ! हे कामदेवतें अधिक सुंदर ! हे कपोलमें शोभित रंगवारे ! हेकस्तूरीके तिलककरिकें पूजित ! ॥ ९ ॥ टीका—सुंदर अलकनकरि आवृत ऐसे वदनकमल शोभायमान हे ओर सगरो श्रीअंग कामसों अधिक सुंदरहे ॥ कोटिकाम वारने यह सुंदरतापर करियें ॥ दोउ कपोलनपर कमलपत्रमें लालकुंकुमादिरागसों सवारैहो ओर कस्तूरीको तिलक भालमें विराजमान हे ऐसे श्रीकृष्ण हमकों दर्शन देहो ॥ ९ ॥

मूलं-सिंजनूपुरशोभाढ्य ! नखभूषणंभूषित ! ।

सघोषसूक्ष्मसुकटिविलसत्क्षुद्रघंटिक ! ॥ १० ॥

शब्दार्थः—हे शब्दायमाननूपुरकी शोभा करिकें युक्त ! हे नखके भूषणकरिकें शोभित । हे शब्दसहित सूक्ष्मकटिमें शोभित क्षुद्रघंटिकावारे ॥ १० ॥ टीका—दोउ चरणकमलमें स्वर्णनूपुरसों शोभाकी आढ्यता जो एसी शोभा त्रिलोकीमें नाहीं दशोनखनपर नखभूषणसहित नखावलि विराजितहे सो कोटिसूर्यचंद्रकी कांति लजावतहे ओर सूक्ष्मकटिपर क्षुद्रघंटिका विलास करत हे तासों वारंवार सुंदर शब्द होत हे ऐसे श्रीकृष्ण हमकों दर्शन देहो ॥ १० ॥

मूलं-राजहृदयवैयाघ्रनखभूषणभूषित !

कंजलोचनलोलाक्ष ! विशालाक्षविलक्षण ! ॥ ११ ॥

शब्दार्थः—हे शोभायमान वधनखाके भूषणसों भूषित ! हे कमल-सारिखे चपलनेत्रवारे ! हे विशाल नेत्रकरिकें विलक्षण ! ॥ ११ ॥ टीका-हृदयके उपर बाघको नख सुवर्णमें जटितकरि नखभूषण श्रीयशोदाजी पहिरायेहे जो मेरे पुत्रकों काहूकी दृष्टि न लगे सो वक्ष.स्थलमें नख-भूषण शोभत हे नेन कमलसमान अतिलोल चंचल हे जेसैं कमल शीतल हे तापहारक हे तेसैंही श्रीठाकुरजीके नेत्रकमल सगरे भक्तनके हृदयके तापहारकहे ओर नेत्रनकरि अनेक भक्तनकों रसदान करत हे संकेत सूचनकरतहे ताकरि लोचन चंचलहे ओर नेत्र कमलवत् बड़े विशालहे घूर्णायमान आरक्त विलक्षणहे ताकी उपमा काहूसों कही न जाय अनिर्वचनीयहे ऐसे श्रीकृष्ण हमकों अव कृपाकरि दर्शन देहो ! ११

मूलं-दीनैकशरण ! स्वीयसर्वसामर्थ्यसंयुत !

ब्रजराजसुत ! स्वीयजननीकंठभूषण ! ॥ १२ ॥

शब्दार्थः—हे दीनके मुख्य आश्रयस्थान ! हे अपने सर्वसामर्थ्य-करिकें संयुक्त ! हे श्रीनंदारायजीके पुत्र ! हे अपनी माता श्रीयशोदाजीके कंठके आभूषणरूप ! [कंठकों ग्रहणकरिके टेरेवेवारे] ॥ १२ ॥ टीका-दीन जो निजभक्त तिनके शरण्यहो अपने स्वीयभक्त दीनहोय शरण रहेहे तिनकों सर्वभांति प्रभु रक्षा करतहे काहेतैं जो श्रीकृष्ण सर्वसामर्थ्ययुक्तहे सो श्रीभागवतनवमस्कंधमें भगवान् दुर्वासाप्रति कहेहैं “ ये दारागारपुत्राप्तान् प्राणान् वित्तमिमं परम् । हित्वा मां शरणं याताः कथं तांस्त्यक्तुमुत्सहे ? ” [जो स्त्री, गृह, पुत्र, आप्त, प्राण, द्रव्य, यह-लोक, ओर परलोककों छोडिकें मोकों शरण आये तिनकों छोडिवेकों में केसैं उत्साह करूं !] यहवाक्यते श्रीठाकुरजी कहे जो ऐसे भक्त

स्त्री, धर, पुत्र, प्राण, वित्त, सर्व मोकों समर्पनकरि एक मेरे शरण होय रहेहे तिनकों छोड़िवेकी कैसे इच्छा करूं ? मैं उनकी अष्टप्रहरही रक्षा करतहों. ताते दीन होय जो भक्त शरणहे तिनकी रक्षा प्रभु आपही करतहे श्रीकृष्ण सर्वसामर्थ्ययुक्तहे ब्रजराज जो श्रीनंदरायजी तिनके पुत्र अपनी स्वीयजननी श्रीयशोदाजीके कंठके भूषणहो ऐसे श्रीकृष्ण हमकों दर्शन देहो ॥ १२ ॥

मूलं—हा ॐकृष्ण ! हा सदानंद ! हा वृंदावनभूषण ।

हा नंदराजेंतनय ! हा यशोदाकेंखेलन ! ॥१३॥

शब्दार्थः—हा फलात्मक ! हा सदा आनंदरूप ! हा वृंदावनके भूषण ! हा श्रीनंदरायजीके पुत्र ! हा श्रीयशोदाजीके अंकमें खेलिवेवारे ! ॥१३॥ टीका—हा कृष्ण ! श्रीकृष्णनाम फलात्मकहे सर्ववेदस्मृतिको सार सो ब्रजभक्त श्रीकृष्ण यहनामको स्मरण जप करतहे ताहीते श्रीआचार्य-जीमहाप्रभुजी हू अष्टाक्षर—पंचाक्षरमें यहही सर्वोंपरि श्रीकृष्णहीको शरण बतायो हे विरहकरि हा कृष्ण ! कहे. हा सदानंद ! तुमतो सदा आनंदरूप एकरसहो सो हमकों आनंद देहो हा वृंदावनभूषण ! श्रीकृष्ण ! तुम तो श्रीवृंदावनते एकक्षणहू वाहिर नांही जात काहेते जो वाके भूषणरूपहो हा श्रीनंदरायजीके पुत्र ! हा श्रीयशोदाजीके अंकमें खेलिवेवारे ऐसे श्रीकृष्ण हमकों दर्शन देहो ॥ १३ ॥

मूलं—हा गोपिकेश ! हा नाथ ! हा गोकुलपुरंदर ! ।

हा हा ब्रजजनार्तिघ्न ! हा हा निःसाधनाधिप ! ॥१४॥

शब्दार्थः—हा गोपिकाके ईश ! हा नाथ ! हा गोकुलके इंद्र ! हा हा ब्रजजनकी आर्तिकों हरिवेवारे ! हा हा निःसाधन जनकों अधिक रक्षा

ॐ इतने श्लोकताई शृंगारस्वरूप करिकें संयोगरसकी भावना करिकें अथ सेदात्मक संवोधनते विप्रयोगात्मकभाव निरूपण करतहे.

करिवेवारे ! ॥ १४ ॥ टीका—हा गोपीजनके ईश राजा ! हा नाथ ! तुम तो हमारे नाथ हो ताते हमारी रक्षा वेगिही करो जेसे पंचाध्यायीमें विरह-करि भक्त कहतहे “ हा नाथ ! रमण ! प्रेष्ठ ! कासि ? कासि ? महाभुज ! । दास्यास्ते कृपणाया मे सखे ! दर्शन सन्निधिम् ” [हा नाथ ! हा रमण ! हा प्रिय ! हा महाबाहो ! कहांहो ? कहांहो ? आपकी दीन दासी में हूं ताकों समीप दर्शन द्यो] तेसेही इहां कहे जो हा नाथ ! हे गोकुलके पुरंदर ! जेसे इंद्र एकक्षणहू भोग नांही छोडत तेसे तुम गोकुलके इंद्र होय क्यों वेठि रहोहो हमकों आनंद देहो. ब्रजजनके आर्तिके हरणहार ! तुम ब्रज-भक्तनके दुःख कवहू नांही सहोहो काहेते जो इंद्रयज्ञ छोडि गिरिराजको पूजनरूपयज्ञ कीये तब इंद्रने सगरे ब्रज वोरिवेकों मेघ पठाये सो गोवर्धन उठाय सगरे ब्रजकी रक्षा कीनी अव विरहसमुद्रमें डूवतहे सो तुमही काढिवेमें समर्थहो ताते वेगि यहआर्ति हरो ओर तुम केसेहो निःसाधन भक्तनके अधिपतिहो सो हम विरहकरिकें व्याकुलहें देह, इंद्रिय, मन सगरो शिथिल होयरहोहे साधनकरि रहितहों सो हमकों दर्शन देकें आर्ति हरो ॥ १४ ॥

मूलं—हा हा नंदादिसर्वस्व ! हा हाऽनंगनवांकुर ! ।

हा निरालंबनालंब ! हाहांऽधलेंकुटिप्रिय ! ॥ १५ ॥

शब्दार्थः—हा हा श्रीनंदरायजी आदिनके सर्वस्व । हा हा कामदेवके नवीन अंकुररूप ! हा आलंबन [आश्रय] रहितके आलंबनरूप ! हा हा अंधके लकुटिवत् प्रिय ! ॥ १५ ॥ टीका—नंदादि, गोप. गोपी, सखा, गाय, सर्वके एक तुमही सर्वस्व हो तुमविना सगरो पदार्थ तुच्छहो एक तुमही सर्वके जीवनप्राणहो ओर तुम अनंग जो कामदेव ताको नवांकुरहो अनंगरूपवृक्षमें नूतन अंकुररूप आप प्रकटहो साक्षात् मन्मथ के मन्मथहो कामदेवहू तुमको देखि मोहित भयो तो हम सगरी मोहित होय यामें कहा कहेनो ? जाको कछहू अवलंब नांही हे तिनके तुमही

अवलंबहो यह कहिकें यह जताये जो सर्वठोरतें आश्रय छोडि एक श्रीकृष्णको आश्रय करे तब प्रभु आश्रय देहिं तातें निरालंबके अवलंब श्रीकृष्णहे, ओर जेसैं अंधकों लकुटि प्रियहे वाहि अवलंबहे तेसैं हमारे तुम प्रियहो अवलंबहो तुहारेही अर्थ सगरी क्रिया करतहैं याभांति समस्त श्रीस्वामिनीजी विप्रयोग करतहैं ॥ १५ ॥

मूलं—एवंविधानि सततं जल्पितानि मुहुर्मुहुः ।

अवगत्य च भावेन भावनीयान्यहर्निशम् ॥१६॥

शब्दार्थः—एसे श्रीस्वामिनीजी निरंतर जल्पना करत हे सो वारंवार भावसों जानिकें अहर्निश तिनकी भावना करनी ॥१६॥ टीका—या प्रकार निरंतर श्रीस्वामिनीजी वारंवार जल्पना करतहे तब श्रीठाकुरजी पधारिकें समस्त श्रीस्वामिनीजीकों दर्शन देकें उनके मनोरथ पूर्ण करतहे सो यामें ६४ नाम कहेहैं ताको अभिप्राय यहहे जो प्रभु चारि-यूथके पतिहे सो एक एक यूथके श्रीस्वामिनीजी पोडशपोडशनाम पोडशशृंगारात्मकरसको अनुभव लीलासहित करतहैं तातें चोसठ नाम कहे. अब श्रीहरिरायजी कहत हे जो तुम याभांति श्रीस्वामिनीजीके विरहभावकी भावना अहर्निश करो तब श्रीस्वामिनीजीकी कृपातें हृदयमें भाव स्थित होयगो तब प्रभु अपनो अनुभव करावेंगे यह सिद्धांत सर्वोपरिहे ॥ १६ ॥

इति श्रीहरिरायजीकृतं द्वादशशिक्षापत्रं श्रीगोपेश्वरजीकृतव्रजभाषाटीकासमेतं समाप्तम् ॥ १२ ॥

शिक्षापत्र १३.

अब त्रयोदशशिक्षापत्रमें सर्वतें चित्तकों निवृत्तकरि एक प्रभुचरित्रमें निरुद्धकरि पूर्वशिक्षापत्रमें कह्योहे तारीतिसों भावना करनी

यह निरूपणहे. उपर कहि आये याप्रकार विप्रयोग करे तो श्रीस्वामि-
नीजीकी कृपातें भाव सिद्ध होयपरंतु यह काल महाकठिनहे सत्संग
नाहीहे दुःसंग वोहोतहे सर्वकी बुद्धि भ्रष्टहे इत्यादि विप्रयोगके बाधक
दोषकों विचारि विचारि दीनता करे तो प्रभु प्रसन्न होय सो उपाय
कहतहे—

मूलं-कालः करालः समुपागतोऽयं मतिं सतां
द्रागहरत् समस्ताम् । श्रीवल्लभाचार्यसमा-
श्रितानां यः कालकालः शरणं स एव ॥१॥

शब्दार्थः—यह काल महाकराल आयोहे सो समस्त सत्पुरुषनकी
मतिकों शीघ्र हरण करे हे तातें श्रीआचार्यजीमहाप्रभुजीको आश्रय
करिवेवारेनकों कालके कालरूप प्रभु ही शरणहे (तासों जो श्रीम-
दाचार्यजीके शरण आये तिनकों काल प्रतिबंध नाहीं करिसकतहे)
॥ १ ॥ टीका—यहकाल महाकराल कठिनहे सो सत्पुरुषकी मतिकों
हरि लेतहे तो ओरजीवकी कहा गतिहे ? तातें यहकलियुगने अपने
बलतें सर्वजीवकी बुद्धि हरि लीनीहे तहां कोई कहे जो कोईकों छोड्यो
हे ? एसी शंकाके समाधानमें श्रीहरिरायजी कहतहे जो श्रीआचार्यजी-
महाप्रभुजीको आश्रय तन मन धनकरि करतहे तिनकों काल नाहीं
बाधक हे प्रत्युत उनको सहायक हे सो थोरे दिनमें फल सिद्ध होयवेकी
रीति एकादशस्कंधमें कहीहे “ कायेन वाचा मनसेन्द्रियैर्वा बुद्ध्यात्मना
वानुसृतस्वभावात् । करोति यद्यत्सकलं परस्मै नारायणायेति समर्पये
त्तत् ” [शरीरतें, वाणीतें, मनतें, वा इंद्रियनतें, बुद्धितें, आत्मातें अथवा
अपने स्वभावतें जो जो करेहे सो नारायणके लिये अर्पण करे] याभांति
श्रीआचार्यजीद्वारा प्रभुकों समर्पकें पाछें निश्चित होय श्रीआचार्यजी-
महाप्रभुको आश्रयकरिकें रहे तिनकों काल नाहीं बाधक हे सो

द्वादशस्कंधमें श्रीशुकदेवजी : कहेहे—“कलेदोपनिधे राजन्नस्ति ह्येको महान् गुणः । कीर्तनादेव कृष्णस्य मुक्तबंधः परं ब्रजेत्” [हे परीक्षित ! दोषके निधिरूप कलियुगको एक बड़ो गुण हे जो श्रीकृष्णके कीर्तनतेंही बंधमुक्त होयकें परकों प्राप्त होय] यद्यपि हे राजन् ! कलियुग यहकाल दोषको निधि हे परंतु एक यामें महागुण हे जो श्रीकृष्णके नामको कीर्तन करत हे सो सर्व दोषतें छूटिकें प्रभुकों पावत हे. तातें श्रीआचार्यजीप्रकटित भाव जावैष्णवकों भयो तिनकों यह कलि परम सुंदर हे ॥ १ ॥

मूलं-न सेवा न कथा नैव भावनं नापि संश्रयः ।

नित्यमुद्विग्नमनसा कथं कालः प्रयास्यति ॥ २ ॥

शब्दार्थः—जिनकों सेवा नांही, कथा नांही, भावनहू नांही, ओर सम्यक्प्रकारसों आश्रय नांहीहे एसेनकों नित्य उद्विग्न मन करिकें काल कैसें व्यतीत होयगो ? ॥२॥ टीका—मुख्य पुष्टिमार्गकी रीति जो भगवत्सेवा सोहू नांही करत तथा श्रीआचार्यजीके ग्रंथादिककी कथा सुनतही भगवद्धर्म हृदयमें आवे सो कथाहू नांही सुनत, कोउ अकेलो होय द्रव्यादिक सहाय नांही होय अंग रोगि होय तासूं भगवत्सेवा न वने ओर कोउ भगवदीयके पास कथा सुने सो भगवदीय न मिले तो मनही करि प्रभुके नाम अष्टाक्षर शरणमंत्रकी भावना मनमें विचारे यह न वने तो लौकिक वैदिक सुखदुःख सर्व छोडी एक श्रीआचार्यजीकेही चरणकमलको आश्रय राखे, याभांति कवहू भगवद्धर्ममें मन न लगावे ओर देहसंबंधी संसाराग्निमें (सुखदुःखकरिके) जरे अष्टप्रहर सुखदुःखमें हाय हाय करे तिनकों यह काल बाधही करे तहां कोई कहे जो कलिके दोष वोहोतहे सो सेवा ओर कथातें कहा होय ? तहां कहतहे जो नवम-स्कंधमें दुर्वासाप्रति भगवान् आपु कहेहें “ मत्सेवया प्रतीतं च सालो-

क्यादिचतुष्टयम् । नेच्छन्ति सेवया पूर्णाः कुतोऽन्यत्कालविप्लुतम् ”
 [मेरी सेवा करिके साक्षात् प्राप्त भई एसी सालोक्यादिक चतुर्विध मुक्ति-
 कौहू मेरे भक्त इच्छा नाहीं राखतहे काहेतें जो सेवातें पूर्णहे सो काला-
 दिकतें नष्ट होय ऐसे राज्यादिककी इच्छा तो कैसें करे ?] यहवचनतें भ-
 गवान् कहतहे जो जीवकों मेरी सेवातें प्रतीत प्राप्त जो सालोक्य १,
 सामीप्य २, सायुज्य ३, सारूप्य ४, चारों मुक्ति सोहू नाहीं इच्छितहे ऐसे
 सेवाकरि पूर्णहे तिनको काल कहा करिसके ? मेरेहू नाहीं चलतहे. ओर
 भगवानकी कथा केसी हे “ तस्माद्गोविंदमाहात्म्यमानंदरससुंदरम् ।
 शृणुयात् कीर्तयेन्नित्यं स कृतार्थो न संशयः ” ॥ (तासों आनंदरस
 करिके सुंदर गोविंदको माहात्म्य सुने ओर इनको कीर्तन करे सो कृ-
 तार्थ होय वामें संशय नाहीं) ओर द्वितीयस्कंधमें राजापरिक्षितको
 वाक्यहे “ प्रविष्टः कर्णरंध्रेण स्वानां भावसरोरुहम् । धुनोतु शमलं कृष्णः
 सलिलस्य यथा शरत् ” (कर्णरूपरंध्रतें अपने भक्तनके भावकमलात्मक
 हृदयप्रति प्रविष्ट श्रीकृष्ण मलकों मिटाये देतहें शरदऋतु जेसैं जलके
 मलकों मिटावे) यह वाक्यतें जो श्रीठाकुरजीकी कथारूप सुंदर अमृ-
 तकों नित्य कर्णद्वारा पान करतहे सो कृतार्थहे तिनके कर्णरंध्रद्वारा
 श्रीठाकुरजीकी कथारूप अमृत हृदयमें जातहे तिनके सगरे दोष
 हृदयतें दूर होत हे. कथा कहे, सुने, अनुवाद करे, यह तीनों जीव
 कृतार्थ होय जेसैं गंगाजल ल्यावे सो ल्यायेववारो तथा आसपासके
 सगरे पवित्र होय तेसैं कथाहे. तातें भगवद्धर्ममें मन होय ताकों यह
 काल बाधक नाहीं हे ओर सर्वको बाधक हे ॥ २ ॥

मूलं—सत्संगो दुर्लभो दुष्टसंगः संचितनादृते ।

अनायासेन संसिद्धः का गतिर्मे भविष्यति ॥३॥

शब्दार्थः—सत्संग दुर्लभहे ओर दुःसंग बिनाविचारे श्रमविना
 आछीतरेहसों सिद्ध होयहे सो मेरी कहा गति होयगी ? ॥ ३ ॥ टीका—

सत्संगतो महादुर्लभहे यहजीवतो स्वभावकरिकें दुष्ट हे तातें दुष्टसंग विनाचिंतितही आपतें विनाजतन दश दिशातें आवतहे सो जीवकों भगवद्धर्ममें लगन नाहीं देत हे दुष्टसंगको गंधहू वाधक होत हे तो दशोदिशातें दुःसंग होय सो वाधक होय यामें कहा कहेनो? सो श्री गुसाईंजी विज्ञप्तिमें कहेहे “अहं कुरंगीदृग्भंगिसंगिनांगीकृतोस्मि यत् । अन्यसंबंधगंधोऽपि कंधरामेव वाधते” (जासों में हरिणीके दृष्टिकीसी चपलदृष्टिवारे ब्रजभक्तनके संगि श्रीकृष्णको अंगीकृतहों तासों अन्य संबंधको गंधहू मेरी कंधारकोंही दुःखदे हे) या भांति अन्य संबंधके गंधहूतें गरों कटे एसी श्रीप्रभूनकी आज्ञाहे ओर मेरे तो दशदिशातें दुष्टसंग विनाचिंतन आवत हे सो मेरी अब कहागति होनहार हे सो मोकों जानि नाहीं परत हे ॥ ३ ॥

मूलं—संग्राहयितुमखिलं तैः क्रीडयितुमेव च ।

शकलीकर्तुमधुना प्रभोर्बालचिकीर्षितम् ॥ ४ ॥

शब्दार्थः—समग्र चराचरवस्तुको संग्रह करवेकों ओर इनके संग क्रीडाकरिवेकोंही तथा अब सवनकों भिन्न करिवेकों प्रभुकी बालक्रीडा करिवेकी इच्छा हे (सो कोन जाने?) ॥ ४ ॥ टीका—उपर कहे हे जो दुःसंगतें संसारी लोक अहंता ममता करि भरे हे तिनकों ग्रहण-करि पास राखि ऐसे खिलोनामें क्रीडतहूं संसारीतें अष्टप्रहर मिलाप हे सो मे कहा करूं? जगतमें ऐसीही मनुष्य मोकों मिलत हे सो हे प्रभु आधुनिक जीवकों तुमही नचावतहो काष्ठकी पुतरीवत् दोरी तुझारे हाथ हे सगरे यंत्र हे तुम यंत्रीहो जाभांति वजावतहो तेसीही वाजत हे ओर तुम तो बालककीनाई क्रीडा करतहो सहजमें हम तथा सगरो जगत् यह माया करि भ्रमत हे याभांति कहि अब अपनी उपर कृपा करिवेको प्रार्थना दीनतासो करतहे ॥ ४ ॥

मूलं--हा नाथ ! हा कृपानाथ ! गोपीनाथ ! दयानिधे !

ब्रजनाथ ! रमानाथ ! निजनाथ ! जगत्पते ! ॥ ५ ॥

शब्दार्थः—हानाथ ! हाकृपानाथ ! गोपीजनके नाथ ! दयाकेनिधि !
 ब्रजकेनाथ ! लक्ष्मीकेनाथ ! अपने भक्तनकेनाथ ! ओर जगतकेपति !
 (हमारी उपर दया करो एसी प्रार्थना अष्टश्लोकमेंहे तहांताई समस्त
 संबोधनको संबध हे) ॥ ५ ॥ टीका—हा नाथ ! हमारे तुम नाथहो
 स्वामीहो तातें तुम बिना हम ओर कोनसों सुखदुःख कहें ? अब यह
 संसारदुःख नांही सह्यो जातहे तुम अपने जानि दया करो, हा कृपा-
 नाथ ! तुम आगें आगेंतें अपने जीवनपर कृपाकरत आयेहो सो अब
 हमपर कृपाहींकरो काहेतें जो तुम गोपीजनके नाथहो गोपीजन निः-
 साधनहे तिनपर सदा कृपांकरि सगरेकार्य सिद्ध कीये तेसैं हमहू
 निःसाधन हे हमपर कृपाकरो ओर तुम ब्रजके नाथहो कंससंबंधी
 अनेकदैत्य आये तिनसवनकों मारेअग्नितें, जलतें, कालियतें, विपतें,
 सर्वप्रकार अपने ब्रजकी रक्षाही कीनी तेसैं हमारी रक्षा करो, लक्ष्मीनाथ
 हो ऐसे प्रभु हमपर प्रसन्न हो, ओर अपने निजभक्तनके नाथ हो भक्त
 प्रसन्न रहे सुख पावे सोई करत हो सो श्रीभागवत नवम स्कंधमें दुर्वासा
 प्रति भगवान् कहेहे “ अहं भक्तपराधीनो ह्यस्वतंत्र इव द्विज ! । साधु-
 भिर्यस्तहृदयो भक्तैर्भक्तजनप्रियः ” (हे विप्र ! परतंत्र होय तेसैं मैं
 भक्तनके पराधीनहों ओर साधु मेरे भक्त हे तिननैं मेरो हृदय ग्रहण
 करिलीनोहे तासों भक्तनही प्रियहे जिनकों एसो मेंहू) मैं भक्तनके
 पराधीन हों स्वतंत्र नांहीहों. हे विप्र ! भक्तजन मोंकों वोहोत प्रिय हे
 मैं भक्तनके हृदयमें सदा रहतहों याभांति तुम अपने निजभक्तनके
 नाथहो तातें दया करो ओर जगतके पति हो सगरे जगतमें तुमही
 करत हो सोई होत हे तातें तुम कृपा करोगे तब यहकाल हमकों
 निश्चय दुःख नांही देयगो ॥ ५ ॥

मूलं-गोकुलाधीश ! गोपीश ! ब्रजाधीश ! ब्रजप्रिय ! ।

ब्रजानंद ! निजानंद ! गोकुलानंद ! गोप्रिय ! ॥ ६ ॥

शब्दार्थः—हे गोकुलके अधीश ! गोपीकाके ईश ! हे ब्रजके अधीश ! हे ब्रजहे प्रिय जिनको ऐसे ! हे ब्रजके आनंदरूप अथवा ब्रजमेंहे आनंद जिनको ऐसे ! हे अपने भक्तनके आनंदरूप ! हे गायनके कुलको अथवा समस्त इंद्रियनको आनंदरूप ! हे गायें हे प्रिय जिनको ऐसे ! [दया करो] ॥ ६ ॥ टीका—हे श्रीकृष्ण ! तुम गोकुलाधीश गोकुलके राजा हो सगरेगोकुलवासी तुमही करि शोभितहे गायनके रक्षक तुमही हो गोपीजनके ईश तुमही हो ओर सगरे ब्रजके राजा तुमही हो ब्रज तुमको प्रियहे तुम ब्रजको प्रियहो सो दशमस्कंधमें ब्रह्मार्जिनैं कह्योहे “ अहो भाग्यमहो भाग्यं नंदगोपब्रजौकसाम् । यन्मित्रं परमानंदं पूर्णं ब्रह्म सनातनम् ” (श्रीनंदरायजीके ब्रजमें रहन-हारे सगरेनको अहो भाग्य देखो जिनके सदा आनंदरूप पूर्ण ब्रह्म मित्रहे) यहवचनतैं ब्रजके जन नंदयशोदा गोपगोपीके परमभाग्य हे जिनके मित्र श्रीकृष्ण परमानंदरूपहे सगरे ब्रजके आनंददाताहे ओर निजभक्तनकोहू अपनो आनंददान करतहे. गायनके कुल तिनको आनंददाताहे काहेतैं जो गाय आपको वोहोत प्रियहे सो भगवदीय गायेहे “ आगे गाय पाछें गाय इतगाय उतगाय गोविंदाको गायनमें रहिवोही भावेरी ” ऐसी गाय प्रियहे ऐसे श्रीकृष्ण हम उपर कृपा करे ॥ ६ ॥

मूलं—हा कृष्ण ! हा दयासिंधो ! हा राधावर ! सुंदर ! ।

दीनेषु सततं श्रीमन्निजाचार्याश्रितेषु च ॥ ७ ॥

दुष्टेषु दोषपुष्टेषु भाग्यमुष्टेषु मत्प्रभो ! ।

निःसाधनेषुन्मतिषु दयां कुरु दयां कुरु ॥ ८ ॥

शब्दार्थः—हा कृष्ण ! हा दयाके समुद्र ! हा श्रीस्वामिनीजीके वर ! हा सुंदर ! दीन ओर श्रीनिजाचार्यके चरणके आश्रित, ॥ ७ ॥ दुष्ट, दोषते पुष्ट भये, भाग्यहीन ओर साधनरहित तथा (आचार्यजीके आश्रयते) उत्कृष्ट मतिवारे भक्तनकी उपर हे हमारे प्रभु ! दया करो दया करो ॥ ८ ॥ टीका—हाकृष्ण ! तुम निःसाधन फलात्मकहो सो हमपर कृपा करो ओर तुमतो कृपा करोहींगे यह निश्चयहे परंतु हमको धीरज नांही रहतहे ताते विज्ञप्ति करतहे सो श्रीगुसांईजी विज्ञप्तिमें कहेहे “ अंबुदस्य स्वभावोऽयं समये वारि मुंचति । तथापि चातकः खिन्नो रटत्येव न संशयः ” (मेघको यह स्वभावहे जो समय भये जल छोडे तोहू खेदयुक्त चातकहे सो रटन करयोही करतहे यामें संशय नांहीहे) मेघको स्वभावहे स्वातिनक्षत्रमें वरसके समय आये जलदान करतहे परंतु चातक अपनी रटना वर्षादिनलों रटिबोई करे तेसेही श्रीकृष्ण अपने भक्तनपर निश्चय कृपा करेंगे परंतु भक्तनको आर्तिही कर्त्तव्यहे. हे दयासिंधो ! अब तुम वेगि ही दया करो, काहेतें जो तुम दया करो तो सगरो अनुकूल होय माया बाधक नहोय ओर तुम जहांतांई दयामें ढील करतहो तहांतांई माया करि हम दुःख पावतहे सो श्रीगुसांईजी विज्ञप्तिमें कहेहे “ नाथेऽनुकूलतां याते सर्वे यांत्यनुकूलताम् । तस्मिंस्तद्विपरिते तु सर्वमेव भवेत्तथा ” (स्वामी अनुकूल होय तो सर्व अनुकूल होय ओर यह विपरीत होय तबतो सब तेसेही विपरीत होय) हे नाथ ! तुम्हारे अनुकूलतें सर्व अनुकूलहे ओर तुम्हारे विपरीततें सर्व जगत्में विपरीत भयोहे तातें तुम वेगि दया करो. तुम श्रीस्वामिनीजी के वर हो परमसुंदर हो ओर हम वोहोत दीन दुःखीहैं तातें कृपाकरो तो भलीहे मेरे दोष देखिकें कृपामें ढील करतहो परंतु निरंतर अपने श्रीआचार्यजीमहाप्रभुजीकी कानिकरिकें कृपाकरो. याभांति दीनता करत करत अपने दोषकी

स्फूर्ति होय प्रथम विरहकरि प्रभुके [लीलासंवंधी] नाम कहे ताकरि अति दीनता ओर अपने दोषकी स्फूर्ति होय ॥ ७ ॥ मैं बड़ो दुष्टहों अपार अनेक भांतिके कायिक मानसिक वाचनिक एसी अपारदुष्टता करि दुष्टहों, भाग्यमें भगवद्धर्म नांही लिख्योहे बुद्धि गईहे शून्यहों, हे मेरे प्रभु ! इतनो भरोसोहे जो तुम मेरे प्रभुहो मैं निःसाधनहों मोतें साधन एकहू नांही बनतहे एसो जो मैं तिनपर बेगिही दया करो मेरे दोष मति देखो. कोई कहे जो प्रभुहे दोष क्यों नदेखे गुणदोष होय सो देखेचाहियें याभांति कहे तहां श्रीगुसांईजीनें विज्ञप्तिमें कह्योहे “ वलिष्ठा अपि महोपास्त्वत्कृपाग्रेऽतिदुर्वलाः । तस्या ईश्वर-धर्मत्वाद्दोषाणां जीवधर्मतः ॥ अपराधेऽपि गणना नैव कार्या ब्रजाधिप ! । सहजैश्वर्यभावेन स्वस्य क्षुद्रतया च नः ” (मेरे दोष वलिष्ठहे तोहू आपकी कृपाके पास अतिदुर्वलहे काहेतें जो कृपा हे सो ईश्वर को धर्महे ओर दोषनको जीवधर्मत्वहे. हमारी तुच्छतातें जो अपराध होय तामें आपके सहज ऐश्वर्यभावकरिकें हे ब्रजके अधिप ! गणना नांही कर्तव्यहे) यद्यपि मेरे दोष ब्रह्मोत वलिष्ठ हे तोहू तुझारि कृपाके आगे दुर्वलहे तुझारि कृपा ईश्वरधर्मरूपहे ताकीपास दोष जीवधर्महे सो कहांताई रहेगो तातें कृपाकरो ओर तुम ब्रजके अधिपति हो निःसाधन फलात्मक हो तातें हमारे अपराधहे तिनकी गणना करनी तुझारे उचित नांहीहे काहेतें जो सहजहींमें तुझारो एसो ऐश्वर्यहे जो यहदोष महाक्षुद्रहे सो कहाहे ? पुत्रके भावतें अजामिलनें नारायण नामलीयो सो कालके बंधनतें छूट्यो तुमतो श्रीकृष्ण दयालु हो सो जीवके दोष देखतहीनांही तातें हमपर कृपाकरो ॥ ८ ॥

मूलं-निवर्त्य सर्वतश्चेतो निरुद्धय चरिते हरेः ।

हृदिकृत्य कृपावश्यं स्थायीतां सज्जनैः सह ॥ ९ ॥

शब्दार्थः—चित्तकों सर्व (लौकिक) तें निवृत्त करिकें चरित्रमें निरुद्ध करिकें (प्रभुकी) कृपाके वश्य जो निरोधहे ताकों हृदयमें स्थापित करिकें सज्जन (पुष्टिमार्गीय भक्त) के संग रहेनो ॥ ९ ॥ टीका—हे श्रीकृष्ण ! यह संसारमें देहसंबंधी अहंता ममता करि मेरो चित्त फसिरह्योहे ताकों यह संसारतें निवृत्त करो सर्वओरतें निरोध करि अपनेमें लगावो जेसैं ब्रजभक्तनको चित्त दही, दूध, मांखन, इत्यादिकमें हतो ताकी चोरी करि अनेक लीला करि अपनेमें लगायो तेसैंही हमारे मनको निरोध करि अपनमें लगावो अपने हृदयमें विचारो जो यह हमारे हे एसैं जानि अवश्य कृपा कर्तव्यहे अपने सज्जनके हृदयमें सदा स्थितहो सो हम पर कृपा करो ॥ ९ ॥

मूलं—अदृष्टदुःखितमुखोऽननुभूतसुखेतरः ।

स्वदुःखितातिकरुणः स कृष्णः शरणं मम ॥ १० ॥

शब्दार्थः—(उपरश्लोकमें कहे ताप्रकार चित्तकों निरुद्ध करिकें भक्तनके संग रहिकें शरणकी भावना करनी सो दोय श्लोकतें निरूपण करतहैं) जिननं दुःखयुक्त (भक्तनको) मुख नांही देख्योहे, दुःखको अनुभव नांही कियोहे ऐसे ओर अपने दुःखितनकी उपर अति दयायुक्त ऐसे श्रीकृष्ण मेरो शरण (आश्रयस्थान) हे ॥ १० ॥ टीका—हे श्रीकृष्ण ! तुम अपने भक्त जो दुःखक्लेशकरि पीडित होय सो नांही देखिसकतहो भक्त प्रसन्न रहे सो तुमकों भावतहे भक्त दुःखित होय ग्लानमुख होय सो तुम नांही देखिसकतहो काहेतें जो सर्व प्राणिमात्रके तुम सुखदाताहो सो भक्तनको दुःख कैसे देखोगे यहविचारिकें हमकों बड़ी चिंता होयहे जो अब भक्तनको क्लेश सहन लागे, सो विज्ञप्तिमें श्रीगुसाईजी कहतहे “ जानामि मंदभाग्योऽहं यदर्थं गोकुलेश्वरः । भक्तक्लेशासहिष्णुत्वस्वभावं कुरुतेऽन्यथा ” (मैं मंदभाग्य

१ यह अर्थ रत्नभट्टकी टीकाके अनुसार लिख्योहे.

वारोहूं ऐसे जानुहूं जाके लीये गोकुलके ईश्वर (श्रीकृष्ण) भक्तके क्लेशकों नांही सहीसके ऐसे अपने स्वभावकों अन्यथा करतहे में यह जानतहों जो मेरे अव मंद भाग्य हे, हे गोकुलेश्वर ! तुम भक्तक्लेश कवहू नांही सहत सो स्वभाव मेरे लीये फेरे अव सहतहो तो में कहा करूं ? सर्व भूतप्राणिमात्रके तुमही सुखदाताहो ओर अपने निजभक्तको दुःखित देखिके अत्यंत करुणाही करतहो ऐसे भक्तनके करुणा-सिंधु श्रीकृष्ण मेरे शरणहो ऐसे शरणकी भावनाही करतहो ओर कहा करिसकों ॥ १० ॥

मूलं-अमंदपरमानंदो निजानंदाश्रयस्थितः ।

स्वरूपानंददाता च स कृष्णः शरणं मम ॥११॥

शब्दार्थः—अधिक उत्तम आनंदरूप, ओर अपने आनंदके आश्रय-रूप श्रीमदाचार्यजी अथवा ब्रजभक्तादिक तिनमें स्थित, ओर (रसात्मक) स्वरूपके आनंद देयवेवारे सो श्रीकृष्ण मेरो शरण (आश्रय-स्थान) हे ॥ ११ ॥ टीका—हे श्रीकृष्ण ! तुम वोहोत आनंदकरि पूरितहो परमानंदरूपही हो तुम अपने निजभक्तनके आनंददाताहो जो कोउ तुम्हारे आश्रयकरिके रहे हैं तिनके आश्रयरूप आपही हो तिनकों स्वरूपानंदको दान करतहो. दशमस्कंधमें श्रीनंदरायजी उद्धवजीप्रति कहेहे “मनसो वृत्तयो नः स्युः कृष्णपादांबुजाश्रयाः । वाचोऽभिध्यायिनी नान्ना कायस्तत्प्रह्वणादिषु” (हमारे मनकीवृत्ति श्रीकृष्णके चरणारविंदको हे आश्रय जिनकों ऐसी होऊ ओर वाणी इनकेनामकों उच्चार करिवेवारी तथा शरीर इनकों दंडवत्प्रणामादिकमें होऊ) मन, वचन, काय करि श्रीकृष्णके पदांबुजको जो आश्रय हे तिनकों ओर कार्य कछु नांही कर्तव्यहे सब सिद्धमयो ताते जा भक्तने तुम्हारो आश्रय कीयोहे तिनके स्वरूपानंदके दाताहो ऐसे जो श्रीकृष्ण सो मेरे शरण (आश्रयस्थान)

होऊ सो नवरत्नमें श्रीआचार्यजीमहाप्रभुजी कहेहैं “ तस्मात्सर्वात्मना नित्यं श्रीकृष्णः शरणं मम ” [तासों निरंतर सर्वात्मकरिकें श्रीकृष्ण मेरे शरणहे] नित्य श्रीकृष्णकी शरणभावना कर्तव्यहे ओर भगवद्गीतामें श्रीकृष्ण कहेहैं “ सर्वधर्मान् परित्यज्य मामेकं शरणं ब्रज । अहं त्वां सर्वपापेभ्यो मोक्षयिष्यामि मा शुचः ” (सर्वधर्मकों छोड़िकें एकमोको शरणहो मैं तोकों सर्वपापनतें छुड़ाऊँगो शोक मतिकर) इत्यादि अनेक वचनहे तातें हे श्रीकृष्ण ! मोतें कछुहु धर्म नाहीं बनि आवत एक तुझारी शरणकी भावना कीयेतें फलसिद्धि होय ऐसे जानि सोही करतहों ॥ ११ ॥

इति श्रीहरिरायजीकृतं त्रयोदशं शिक्षापत्रं श्रीगोपेश्वरजीकृतब्रजभाषाटीकासमेतं समाप्तम् ॥ १३ ॥

शिक्षापत्र १४.

अब चतुर्दशशिक्षापत्रमें प्रभुके चरणारविंदमें चित्तकों स्थापन करनो, अन्याश्रय ओर दुःसंग नाहीं करनो, निवेदनमंत्रको अनुसंधान करनो, ओर अपने आचार्यके चरणारविंदको दृढ़ आश्रय राखनो, येही वैष्णवको लक्षणहे यह निरूपणहे । उपर कहेजो शरणकी भावना कियेतें सर्व फलसिद्धि होय सो भावना सिद्ध होय एसो उपाय कहतहे ।

मूलं—श्रीमत्प्रभुपदयुगले स्थाप्यं चेतश्चमत्कारि ।

तदनुग्रहणादेव हि भवति तदीयस्य सर्वतः सकलम् १

शब्दार्थः—श्रीठाकुरजी तथा श्रीगुसांईजीके चरणारविंदमें चमत्कारयुक्त चित्तकों स्थापन करनो कोहेतें जो इनके अनुग्रहतें ही तदीय-

कों सर्वप्रकारकरिकें सर्व सिद्ध होय ॥ १ ॥ टीका-श्रीसहित ऐसे मेरे प्रभु जो श्रीगुसाईजी तिनके दोउ चरणारविंदमें अपनो चित्त स्थापन करनो सो दोउ चरणकमल चित्तकों परम चमत्कारि भक्तिरसको अनुभव करावतहे तामें वामचरणके आश्रयतें पुष्टि-रसको अनुभव होतहे ओर दक्षिणचरणके आश्रयतें मर्यादाभक्ति-रसको अनुभव होतहे सो श्रीगुसाईजी ललितत्रिभंगग्रंथमें कहेहे “पुष्टि-भक्ति स्थिरीकृत्य मर्यादां च तदाश्रिताम् । कृत्वा वृंदावनक्षोणीमयथा-पूर्वसंस्थितः” (पुष्टिभक्तिकों स्थिर करिकें मर्यादाकों पुष्टिकी आश्रित करिकें श्रीवृंदावनभूमिप्रति पूर्व नहींभये तेसैं स्थितहे) इत्यादि वचनतें श्रीवृंदावनमें ललितत्रिभंगी होय प्रभु वेणुनाद करतहे तहां पुष्टिरूप वामचरणपें स्थितिहे ताके आश्रित मर्यादाभक्तिरूप दक्षिण-चरण टेडोहे ऐसे प्रभुके दोउ चरणके आश्रयकरि मनलगाईये ताकरि इनके अनुग्रहतें तदीयके सर्वकल्याण सब ठोर सिद्ध होतहे यहकहिकें यहजताये जो दोउ श्रीकृष्णके चरणकमलमें चित्त लगावे तिनको कल्याण होय सो नवमस्कंधमें भगवान् दुर्वासाप्रति कहेहे “ ये दारागारपुत्रास्तान् प्राणान् वित्तमिमं परम् । हित्वा मां शरणं याताः कथं तांस्त्यक्तुमुत्सहे” (जो स्त्री, घर, पुत्र, लौकिक हितैपी, प्राण, धन, यहलोक ओर परलोककों छोडिके मोकों शरण आये तिनकों त्यागकरिवेमें में केसैं उत्साह करूं ?) श्रीकृष्णकों घर, स्त्री, पुत्रप्रा-णादि सर्व समर्पणकरि शरणरहे तिनकों प्रभु कचहू नाहीं छोडत सो श्रीकृष्णाश्रयमें श्रीआचार्यजी कहेहे “ शरणस्थसमुद्धारं कृष्णं विज्ञायाम्यहम् ” (शरणआये तिनको उद्धार करिवेवारे श्रीकृष्णकों में विनति करूंहे) यहवाक्यतें शरणस्थजीवको निश्चय उद्धारहीहे ॥१॥

मूलं-अन्याश्रयस्तदीयैकपदाश्रयविरोधकृत् ।

प्रभोरुदासीनतायाः कारणं त्यज्यतां द्रुतम् ॥२॥

शब्दार्थः—तदीयके चरणको आश्रयवारेनको विरोध करिवेवारे
 अन्याश्रय हे अथवा तदीयको स्थानक जो ब्रज ताको आश्रय जो
 निवास ताको विरोध करिवेवारोहे ओर प्रभु (श्रीठाकुरजी तथा
 श्रीगुसांईजी) की उदासीनताको कारणहे सो शीघ्र त्याग करना ॥
 ॥ २ ॥ टीका—उपर कहे जो श्रीकृष्णके चरणमें मन लगावे तो सर्व
 सिद्ध होय तहां अन्याश्रय महा बाधकहे सो एसो बाधकहे जो
 भगवदीयकों हू चरणकमलके आश्रयमें विरोधही करे तो ओर जीव
 कहा वस्तु ? तेसो तो गिरेहीं तासों अन्य देव मनुष्य राजा इनको
 आश्रय न करे तहां कहतहें “ भगवत्पदपद्मपरागजुपो नहि युक्ततरं
 मरणेऽपितराम् । इतराश्रयणं गजराजधृतो न हि रासभमप्युररीकुरुते ”
 (भगवानके चरणारविंदकी रजकों सेविवेवारेकों मरणतें अधिक दुःख-
 मेंहू ओरको आश्रय युक्त नहीं जो हाथी उपर बैठो होय सो रासभ (गधा)
 कों नांही कबुल करे) भगवानके चरणकमलकों छोडि अन्यदेवको
 आश्रय एसोहे जेसे हाथीकी अस्वारी छोडि गधापें चढे । हारितस्मृ-
 तिम कहेहे “ नान्यं देवं नमस्कुर्यान्नान्यं देवं निरीक्षयेत् । नान्यप्रसा-
 दमद्याच्च नान्यदायतनं ब्रजेत् ॥ अनन्यशरणा ये तु तथैवानन्यसा-
 धनाः । अनन्यभोगभोग्या ये ते तु सर्वेऽधिकारिणः ” (अन्यदेवकों नम-
 स्कार नांही करे, अन्यदेवकों देखे नांही, अन्यप्रासादकों खाय नांही,
 अन्यदेवके मंदिरमें जाय नांही, अनन्यहे शरण जिनको तेसेही अन-
 न्यहे साधन जिनको, ओर ओरनके भोग्यको भोग नहि करिवेवारे
 जो हे सो सर्वअधिकारीहे) इत्यादि वचनतें ओरदेवकों नमस्कार
 नकरे, अन्यदेवको प्रसाद नलेय, अनन्य प्रभुकी शरण रहे, एक श्री-
 कृष्णकी साधन सेवा स्मरण करे तव प्रभु प्रसन्न होय । अन्यआश्रय
 करे ताके उपर प्रभु उदासीन होयजाय जो में कहादेवेमें समर्थ नांहीहुं

जो अन्याश्रय करतहे? जेसें दामोदरदास संभलवारेकी स्त्रीनें रंचक अन्याश्रय कीयो तातें पुत्र म्लेच्छ भयो वोहोत खेद पाये तातें वैष्णव भगवदीय अन्याश्रयकों निश्चयही शीघ्र त्याग करे ॥ २ ॥

मूलं—असत्संगस्य च त्यागो भावबाधकता यतः ।

यथा व्याघ्रो बाधकः स्याच्छरीरादेः शरीरिणः ॥ ३ ॥

शब्दार्थः—असत्संगको त्याग करनों काहंतें जो असत्संगततें भगवद्भावको नाश होय जेसें शरीरी जो जीवहे तिनके शरीरादिकको बाधक बाध हे सो शरीरको नाश करतहे (तासों जीव बाधतें दूर रहतहे तेसेंही असत्संगको जानिकें तातें दूर रहेनो) ॥ ३ ॥ टीका—अन्याश्रय छोडे काहेतें जो भगवद्भावमें असत्संग बाधकहे ताको लौकिकदृष्टांत कहतहे जेसें बाघ (नाहर) के आगें मनुष्य जाय तो बाके शरीरको विघ्नही होय ताकरि देहको नाश होय तेसेंही असत्संग होय तो भगवद्भावको निश्चय नाश होय असत्संगतें जडभरतकों तीन जन्म लेने परे द्विविदवानरकों नरकासुरके संगतें श्रीवलदेवजीसों लरनो पयों तातें असत्संग महाबाधक जानि तत्काल छोडनो ॥ ३ ॥

मूलं—असत्संगस्तथा प्रोक्तः श्रीमदाचार्यपंडितैः ।

अध्यासः स्वशरीरादौ तदीयत्वप्रकारतः ॥ ४ ॥

शब्दार्थः—श्रीमदाचार्यजी जो महापंडित हे तिनने अपने शरीरादिकमें तदीयपनाके प्रकारसों जो अध्यास ताकुं असत्संग कह्योहे अथवा शरीरादिकमें [अहंताममतात्मक] अध्यासकुं असत्संग कह्यो हे ओर यह देह तदीय (भगवत्संबंधी) हे यहप्रकारतें जाने सो सत्संगहे ॥ ४ ॥ टीका—असत्संग महादुःखरूपहे सो हमारे श्रीआचार्यजी महाप्रभुजी महापंडितनें वेद, शास्त्र, पुराण, श्रीभागवत, सर्वमधिक श्रीमुग्धोधिनीजी आदि ग्रंथ प्रकट कियेहें तामें अन्याश्रय ओर असत्संग

महाबाधक ठोरठोर निरूपणकियोहे तातें भगवदीयके संग रहे उनके संगतें सगरो असत्संग छुटि जाय एसें अन्याश्रयतेंहू बचे ॥ ४ ॥

मूलं-विधाय सर्वथा भीतिं विधेयेतरयोगतः ।

सत्संगेन स्वमार्गैकनिष्ठत्वेन च सर्वथा ॥ ५ ॥

समर्पणाऽनुसंधानं विधेयं मिलितैः सदा ।

इदमेवाऽस्मदाचार्यमार्गे साधनमुत्तमम् ॥ ६ ॥

शब्दार्थः—कर्त्तव्य ओर अकर्त्तव्यके योगसों सत्संगकरिके ओर सर्वथा पुष्टिमार्गमेंही एकनिष्ठपना करिकें असत्संग प्रति निश्चय भय करिकें मिले एसें भगवदीयनके संग निवेदनमंत्रको अनुसंधान सदा करनो यहही अपने श्रीआचार्यजीमहाप्रभुजीके पुष्टिमार्गमें उत्तम साधनहे ॥ ५ ॥ ६ ॥ टीका—याभांति असत्संगसों महा भय राखे यह निश्चय सिद्धांत मनमें जानियें जो जीवकों यह योग्य हे, यह कर्त्तव्य हे, एसें जानि जितनो भगवद्धर्म वने तितनो करे परंतु असत्संग न करे, सत्संग करे, जा भगवदीयकी पुष्टिमार्गमें निष्ठा होय ताहीकों संग करे ओरको न करे काहेतें जो एतन्मार्गीय भगवदीयके संगतें अपने पुष्टिमार्गकी सगरी रीति जाने मार्गमें पूर्ण निष्ठा होय जब भाव बड़े ओर सब सिद्ध होय ॥ ५ ॥ श्रीआचार्यजीमहाप्रभुजीद्वारा श्रीठाकुरजीको सर्व समर्पण कियोहे एसे भगवदीयसों मिलिकें सदा विचारे जो में कहा समर्पण कियो ? अव में कहा क्रिया करतहों ? कितनी वस्तु प्रभुमें अंगीकार होत हे ? कोनसी इंद्रिय बहिर्मुख हे ? तथा कितने दिनतें प्रभुतें विछुरयो हों सो अव श्रीआचार्यजीमहा-प्रभुजीनें कृपा करिकें मिलायदियो हे सो में कोनप्रकार सेवा स्मरण करूं ? इत्यादि भाव भगवदीयसों मिलिकें विचारे भगवदीयसों देन्य राखे जो वे कृपा करिकें बतावे येही श्रीआचार्यजीमहाप्रभुजीके यह

पुष्टिमार्गमें उत्तम साधनहे. भगवदीयके संग निवेदनको स्मरणकरे ताहीतें नवरत्नग्रंथमें श्रीआचार्यजीमहाप्रभु कहे हे “ निवेदनं तु स्मर्त्तव्यं सर्वथा तादृशैर्जनैः ” [निश्चय तादृश जनके संग निवेदनको स्मरणकरे] भगवदीयको संग सर्वथा करनो तथा सर्वदा करनो उनसों नित्य निवेदनको प्रकार सुनिकें अपने मनमें भावराखनो यह सत्संगही श्रीआचार्यजीमहाप्रभुजीके मार्गमें उत्तमते उत्तम साधनहे सोई करे यातें विरुद्ध साधन न करे ॥ ६ ॥

मूलं-स्वाचार्यचरणद्वन्द्वदृढाश्रयणमादृतैः ।

विधेयं तेन सकलमस्मिन् मार्गे भविष्यति ॥७॥

शब्दार्थः—अपने आचार्यजीके दोउ चरणको दृढआश्रय आदर-युक्तहोयकें करनो; ताकरिकें यहपुष्टिमार्गमें सर्वसिद्ध होयगो ॥ ७ ॥

टीका—अपने श्रीवल्लभाचार्यजीके दोउ चरणारविंदको दृढआश्रय जो कोई पुष्टिमार्गीय जीव आदरपूर्वक करे तिनकों यहसवोंपरि पुष्टिमार्गको सिद्धांत हृदयारूढ होय तातें दैवी जीवनकों श्रीआचार्यजीमहाप्रभुजीके चरणकमलको दृढ आश्रय निश्चयही कर्त्तव्यहे ताहीकरिकें सकल कार्य सिद्ध होयगो ॥ ७ ॥

इति श्रीहरिरायजीकृतं चतुर्दशशिक्षापत्रं श्रीगोपेश्वरजीकृतव्रजभाषाटीकासमेतं समाप्तम् ॥ १४ ॥



शिक्षापत्र १५.

अब पंचदश शिक्षापत्रमें भगवानकी लीलाके अनुसंधानपूर्वक भगवत्स्मरण करनो यह निरूपणहे. उपर कहे जो भगवदीयको संग

करे अपने श्रीआचार्यजीके दोउ चरणारविंदको आश्रय करे तो यह पुष्टिमार्गको फल सिद्ध होय सो श्रीमहाप्रभुजीके चरणकमलको आश्रय कोनभांति होय सो यह शिक्षापत्रमें कहत हे-

मूलं-यदंगीकृतजीवानां न दुःखं लेशतोऽपि हि ।

सदानंदः "सदानंदतत्स्मृतिः क्रियतां सदा ॥१॥

शब्दार्थः-जिनको प्रभुने अंगीकृत किये ऐसे जीवनकों रंचकहू दुःख नांहीहे सदानंद ऐसे प्रभुसो सदा आनंदरूप हे तिनकों स्मरण सदा करनो ॥ १ ॥ टीका-अपनो अंगीकृत जो जीव यह पुष्टिमार्गमें शरण आयोहे तिनकों रंचकहू दुःख होय सो श्रीआचार्यजीमहाप्रभु नांही सहीसकत अपने जीवनको सकल दुःख दूर करि सदा आनंदको दान करत हे ॥ १ ॥

मूलं-यो निजानतिसंतप्तान्स्वकृते वीक्ष्य विस्मितः ।

प्रादुर्भवत्यचिरतस्तत्स्मृतिः क्रियतां सदा ॥२॥

शब्दार्थः-जो प्रभु अपने लिये अति (विप्रयोगामितें) तप्त अपने भक्तजकों देखिकें विस्मित होय शीघ्र (आचार्यरूप) प्रकट होयहे तिनकी स्मृति सदा करनी ॥ २ ॥ टीका-यहजीव जादिनतें भगवानतें विछुरयो तादिनतें चौराशी लक्षयोनिमें भ्रमतहे जन्ममरणके अनेक प्रकार दुःखपावतहे संसारामिमें महासंतसहे यद्यपि दैवी जीवहे तोहू अपनो दासपनो ओर प्रभुको स्वरूप भूलिगयो ताकरि संसारमें महादुःखीहे याभांति अपनी कृतिकरिकें दुःखी होतहे सो श्रीठाकुरजी देखिकें विस्मित भये ओर मनमें खेदपाय कहे जो हमारे दैवीजीव वोहोत दुःखीहे तव करुणा करि श्रीकृष्ण आपही श्रीआचार्यजीमहाप्रभुजी-

१ सदानंदा एमो पाठहे ताके अनुसार अर्थ-सदा आनंदरूप होयकें सदा आनंदरूप इनकी स्तुति करनी.

स्वरूप अगितें प्रादुर्भूत होय अपने दैवीजीवनके अनेक चिरकालके सगरे दुःख दूरि कीने ऐसे श्रीआचार्यजीमहाप्रभु भक्तवत्सलपरमदयाल हे तिनको स्मरण सदाही कर्त्तव्यहे ॥ २ ॥

मूलं—यः स्वतःसेवकानां हि पराश्रयनिवारकः ।

कृपासरित्पतिः कृष्णस्तत्स्मृतिः क्रियतां सदा ॥३॥

शब्दार्थः—जो आपतें अपने सेवकों अन्याश्रयनिवारण करिवेवारे श्रीकृष्ण दयाके सागरहे सदा तिनकी स्मृति करनी ॥ ३ ॥ टीका—जेसें श्रीकृष्ण सगरे ब्रजभक्तनको अन्याश्रय छुड़ाये गिरिराजद्वारा आपु अरोगे अंघिकापूजनमें श्रीनंदरायजीको दंड देयकें छुड़ाये तेसें श्रीआचार्यजीमहाप्रभु अपने सेवकनको पराश्रय [अन्य देवको भजन] छोडाय एक श्रीकृष्णहीको भजन बताये, सर्व ओरते निवृत्त करि एक श्रीकृष्णहीकी शरण किये सो श्रीकृष्ण कृपाके समुद्रहे जाको अंगीकार करतहे ताको फेरि कबहू छोडत नांही भक्तपर कृपाही करत हे सो नवमस्कंधमें दुर्वासाप्रति भगवान् कहे हे “अहं भक्तपराधीनो ह्यस्वतंत्र इव द्विज ! । साधुभिर्ग्रस्तहृदयो भक्तेर्भक्तजनप्रियः ” (हे द्विज ! मैं परतंत्रकी नाई भक्तके पराधीनहों ओर साधुभक्तननें मेरो हृदय ग्रस्यो हे तासोंही भक्तजन मोकुं प्रिय हे भगवान् कहे-हे, हे द्विज दुर्वासा ! मैं तो भक्तके वश पराधीनहों स्वतंत्र नांही हों मोको अपने हृदयमें धरि लीनोहे मोको भक्तजन वोहोत प्रियहे ऐसे कृपालु श्रीकृष्णहे तिनकी प्राप्ति अपने भक्तजीवनको कराये ऐसे श्रीआचार्यजीके चरणकमलको स्मरण सेवकनको अहर्निश कर्त्तव्यहे ॥ ३ ॥

मूलं—हृदयस्थः समस्तानां धुनोति विषयादरम् ।

दयादामोदरः श्रीमांस्तत्स्मृतिः क्रियतां सदा ॥ ४ ॥

शब्दार्थः—समस्त भक्तनके हृदयमें रह्ये ऐसे दयाकरिकें दामोदर भये ऐसे श्रीमान् विषयमें (भक्तनको) आदर मिटावे ऐसेहे तिनकी स्मृति सदा करनी ॥ ४ ॥ टीका—श्रीकृष्ण सर्व प्राणिमात्रके हृदयमें स्थितहैं सो भक्तनके हृदयमें होय यामें कहा कहनो ? परंतु जीव (विषयादि, खान, पान, देहसंबंधी संसारसुखमें आदर करि मनको लगावे हे ताकरि) हृदयमें प्रभुहे तिनको भूलि गयोहे अनेक विषयके लीये भ्रमत हे ओर प्रभु दामोदर हे श्रीयशोदाजी उपर दया करि आपु बंधाये ऐसे शोभायमान श्रीकृष्ण तथा श्रीआचार्यजी एकरूप जानि तिनके स्मरण वैष्णवकों सदा कर्त्तव्य हे ॥ ४ ॥

मूलं-यःप्राणप्रेष्ठगोपीनां संगं गोपयति स्वतः ।

निलायनादिलीलाभिस्तस्मृतिः क्रियतां सदा ॥५॥

शब्दार्थः—जो प्रभु प्राणप्रिय गोपीजन गोपांतरस्थित होय तिनके संगमकों निलायनादि [छुपि छुपिकें खेलनरूप] क्रीडाकरिकें आपतें गोप्य करतहे तिनकी स्मृति सदा करनी ॥५॥ टीका—स्वामिके संग गोपीजनकों रसात्मकताकों गोप्य करतहे जामें श्रीनंदरायजी, श्रीयशोदाजी, और अनेक गोप जाने नांही याभांति ब्रजभक्तनकों रसदान करतहे सो गोपीजन श्रीठाकुरजीके प्राणप्रियहे सो उद्धवजीसों भगवान् दशमस्कंधमें कहे हैं “ ता मन्मनस्का मत्प्राणा मदर्थे त्यक्तदैहिकाः । ये त्यक्तलोकधर्माश्च मदर्थे तान् विभर्ष्यहम् ” [यह गोपी मेरेमेंहे मन जिनको मेरेमेंहे प्राण जिनको अथवा मेंहूं प्राण जिनको, ओर मेरे अर्थ सर्व दैहिकधर्म जिनने त्याग किये हे एसीहे तो जो मेरे अर्थ लोकधर्मको त्याग करिवेवारेहे तिनकों में पोषण करूंहे) तन, मन, प्राण, देह प्रभु-अर्थ अर्पण कियोहे ओर प्रभुके अर्थ लोक, वेद, धर्म त्याग कियोहे तातें श्रीकृष्णकों प्राणसमान प्रियहे. प्रभु कैसे दयालु हे सो तृतीयस्कंधमें

उद्धवजी कहे हे " अहो वकीयं स्तनकांलकूटं जिघांसया पाययदप्य-
साध्वी । लेभे गतिं धान्युचितां ततोऽन्यं कं वा दयालुं शरणं
ब्रजेम " (अहो दुष्टपूतनाने मारिवेके लियेहू स्तनको विष जिनको
प्यायो सो पूतनाहू माताके योग्य गतिको प्राप्तभई तासो अन्य एसो
कोन दयालु होय जिनके शरण जईये) पूतना अपने स्तनमें कालकूट
(विष) लगाय प्यावनलागी एसी राक्षसीको श्रीकृष्ण माताकी गति
दीनी तव जो भक्त दूधआदि नानाप्रकारकी सामग्री अरोगावतहे एसे
ब्रजभक्तनके वश्य भगवान् होय यामें कहा केहेनो ? एसे श्रीकृष्ण प्राण-
प्रेष्ठ गोपीको सबतें छिपायकें रसदान करत हे नित्य रासादिलीला
करतहे एसे रसात्मक श्रीकृष्णको स्मरण सदाही कर्तव्यहे ॥ ५ ॥

मूलं—य उद्धवेन भक्तेन स्वस्वरूपमबोधयत् ।

गोपिकानां हृदंतस्थस्तस्मृतिः क्रियतां सदा ॥६॥

शब्दार्थः—जो प्रभु अपने भक्त उद्धवको स्वरूपको बोध करत भये
ओर गोपिकाके हृदयकी भीतर रहेहे अथवा गोपिकाके हृदयमें रह्ये एसे
स्वरूपको उद्धवजीद्वारा गोपिजनको जिनने बोध कियो तिनकी स्मृति
सदा करनी ॥ ६ ॥ टीका—श्रीकृष्ण उद्धवजीको निजभक्त जाने तव वि-
चारे जो उद्धवजीने वोहोत सेवाकरि अव ब्रजलीलाको अनुभव होय
तो आछो सो अनुभवतो श्रीस्वामिनीजीके हाथहे भावात्मक स्वरू-
पतो श्रीस्वामिनीजीके ओर ब्रजभक्तनके हृदयमें स्थितहे तातें योगको
मिपकरिकें उद्धवजीको अपने निजस्वरूपके बोधार्थ भगवानने ब्रजमें
पठाये तव गोपीजनने भगवानके सखा जानि अपनी सगरी
लीला उद्धवजीको दिखाई तव उद्धवजीको अनुभव भयो तव

१ यहश्लोक भाषाकी टीकावारे पुस्तकमें ७ मो लिख्यो हे परंतु रत्नभट्टकी
टीकाके अनुसार यहां लिख्योहे तथा संगतिहू एसी दीखेहे . . .
१२

अपने योगकों भूलिगये, वंदन करन लागे “ नायं श्रियोऽगु !
 नितांतरतेः प्रसादः स्वयंपितां नलिनगंधरुचां कुतोऽन्याः । रासोत्स-
 वेऽस्य भुजदंडगृहीतकंठलब्धाशिपां य उदगादुव्रजवल्लवीनाम् ॥ १ ॥
 आसामहो चरणरेणुजुपामहं स्यां वृंदावने किमपि गुल्मलतापैधीनाम् ।
 या दुस्त्यजं स्वजनमार्यपथं च हित्वा भेजुर्मुकुंदपदवीं श्रुतिभिर्वि-
 मृग्याम् ॥ २ ॥ वंदे नंदव्रजस्त्रीणां पादरेणुमभीक्ष्णशः । यासां हरि-
 कथोद्गीतं पुनाति भुवनत्रयम् ॥ ३ ॥ ” (रासोत्सवमें भगवानके श्रीहस्त-
 करिकें ग्रहण कियो एसो जो कंठ ताकरि प्राप्तभयेहे सर्व मनोरथ
 जिनके ऐसे जो ब्रजभक्त तिनकों जो प्रसाद भयोहे सो निरंतर
 प्रीतिवारी लक्ष्मीजीकों नांहीभयो कमलसरिखोहे गंध तथा कांति
 जिनकी ऐसी अप्सरानकों हूं नांही भयो तो दुसरेनकों कहासों होय ?
 ॥ १ ॥ जो ब्रजभक्त पति पुत्र संबंधि सगरो कुटुंब तथा वेदमर्यादा
 छोड़िकें श्रुतिनतें विमृग्य [दुंढिवे योग्य] श्रीकृष्णकी पदवीकों प्राप्त
 भये काहेतें आपश्रुतिरूपाहें तिनकी चरणरेणुको सेवन करतहे ऐसे
 जो वृंदावनके प्राणी होवेमें तो योग्यता नांहीहे तासों गुल्म लता
 औपधिनमें कछुहू में होउं अर्थात् सात्त्विक, राजस, तामस, जो स्था-
 वरहे तिनमें कछुहू में होउं ॥ २ ॥ जिनकी हरिकथाको स्वतंत्र निकस्यो
 एसो रटन तीन लोककों पवित्र करतहे ऐसे जो ब्रजभक्त तिनके
 चरणकमलकी रजकों क्षण प्रति दंडवत् करतहूं ॥ ३ ॥ यह दशा उद्धव-
 जीकी भई सो गोपीजनके चरणकमलकी रजकी आशा करिकें
 गुल्म लता औपधीकी प्रार्थना करी सो भावात्मक भगवान् ब्रज-
 भक्तनके हृदयमें स्थितहे तो भावरूप श्रीआचार्यजीमहाप्रभुजीहें
 तिनके चरणकमलको स्मरण सदा करे ॥ ६ ॥

मूलं-यः स्वमाहात्म्यबोधाय प्रादुर्भावितवान्स्वयम् ।

प्रभुः श्रीवल्लभाचार्यास्तत्स्मृतिः क्रियतां सदा ॥ ७ ॥

शब्दार्थः—जो प्रभु (अपने भक्तनों) अपना माहात्म्य जतायवेके लिये आप श्रीवल्लभाचार्यजीको प्रकट करतभये तिनकी स्मृति सदा करनी ॥ ७ ॥ टीका—श्रीकृष्ण उद्धवजीको अपने निजभक्त जानि (अपने स्वरूपको आपु नांही जताये) गोपीजनके पास पठाये तहां यह जताये जो भगवान् कृपाकरे ताहूतें अधिक भगवदीयद्वारा स्वरूपको बोध होय सो सर्वोपरिहे तेसेंही दैवी जीव संसारमें प्रभुको भूलि गये तब श्रीठाकुरजी अपने स्वरूपमाहात्म्यबोधार्थ श्रीआचार्यजीको पठाये तब श्रीआचार्यजीमहाप्रभुजी पृथ्वी पर प्रादुर्भूत (प्रकट) भये भूमि उपर स्थित होय दैवीजीवनको स्वरूपानंदको अनुभव कराये ऐसे श्रीकृष्ण सर्व सामर्थ्ययुक्त हैं तिनके चरणकमलको स्मरण सदा कर्त्तव्य हे ॥ ७ ॥

मूलं—यस्य स्मरणमात्रेण सकलार्तिविनाशनम् ।

तत्क्षणादेव भवति तत्स्मृतिः क्रियतां सदा ॥ ८ ॥

शब्दार्थः—जिनके स्मरणमात्रतेंही सवनकी सर्व आर्तिको नाश तत्क्षणतेंही होय हे तिनकी स्मृति सदा कर्त्तव्य हे ॥ ८ ॥ टीका—एसे श्री कृष्णरूप भावात्मक श्रीआचार्यजीमहाप्रभुजीके चरणारविंदको स्मरणकरतमात्रही सकल आर्ति, संसारके दुःख सर्वदोषको नाश होय जाय ओर तत्काल श्रीवल्लभदेव श्रीकृष्णदेव वा जीवके उपर प्रसन्न होय तातें यह पुष्टिमार्गीय वैष्णवनको यह धर्म निश्चय हे जो ऐसे श्रीमहाप्रभुजीके चरणकमलको स्मरण मन लगायकें अहर्निश करनो जेसें ब्रजभक्त रात्रिदिवस स्मरण करतहैं तेसेंही करनो ॥ ८ ॥

इति श्रीहरिरायजीकृतं पंचदशं शिक्षापत्रं श्रीगोपेश्वरजीकृतब्रजभाषाटीकासमेतं समाप्तम् ॥ १५ ॥

शिक्षापत्र १६.

अब पौडश शिक्षापत्रमें, अहर्निश भगवत्सेवन, स्मरण कीर्तन करे तिनकों भगवान् निरोध करतहे तथा ऐहिक पारलौकिक स्वतः-सिद्ध करतहैं तासों भक्त कछू चिंता न करे यह निरूपणहे। उपर कहे ताभांति महाप्रभुजीको स्मरण करे तो प्रभु प्रसन्न होय तब प्रभुके स्वरूपको ज्ञान होय ओर अपनो दोष स्फुरे सो प्रकार कहतहैं—

मूलं—सदा स्वभक्तहृदयावासः स्वाचार्यभावितः ।

यशोदाऽतिप्रियः श्रीमान् नंदसूनुर्व्रजेश्वरः ॥ १ ॥

स्मरणीयो यथाशक्ति सेवनीयस्तथा पुनः ।

तादृशैः सह संगेन कथनीयश्च सर्वथा ॥ २ ॥

शब्दार्थः—सदा अपने भक्तनके हृदयमें विराजिवेवारे, अपने श्रीआचार्यजीके भावसों भावित, श्रीयशोदाजीकों अति प्रिय, शोभा-युक्त, श्रीनंदरायजीके पुत्र, व्रजके इश्वर ॥ १ ॥ स्मरण करिवे योग्य तथा अपनी शक्ति अनुसार सेवा करिवेयोग्यहे फेरि तादृशीनके साथ संगकरिकें निश्चय (इनकी लीलाकी) कथा कर्तव्यहे ॥ २ ॥ टीका—सदा श्रीठाकुरजी अपने भक्तनके हृदयमें वसतहे सो केसेनके हृदयमें वसतहे ? तहां कहतहैं जो श्रीआचार्यजी महाप्रभुजीकों भावकरि प्रसन्न कीयेहे श्रीआचार्यजीके भक्त हे एसे पुष्टिमार्गीय भगवदीयनके हृदयमें प्रभु सदा विराजतहे सो प्रभु केसेहे ? श्रीयशोदोत्संगलालित श्रीयशोदाजीकों अति प्राणप्रिय श्री (शोभा) सहित नंदसूनु नंदरायजीके पुत्र सो दशमस्कंधमें नंदमहोत्सवमें शुक्रदेवजी कहे हे “नंदस्त्वात्मज उत्पन्ने जाताह्लादो महामनाः” (श्रीनंदरायजी अपने

आत्मज (आत्मानें अथवा देहमें उत्पन्नभये ऐसे पुत्र) उत्पन्न भये तब आल्हादयुक्त ओर बड़ेमनवारे भये) नंदरायजीके आत्मामें उत्पन्न भये ऐसे श्रीकृष्ण ब्रजके राजाहे सो सदा ब्रजहीमें भक्तनके संग विहार करत हे ऐसे श्रीकृष्ण पुष्टिमार्गमें सेव्यहे सो एतन्मार्गीय भगवदीय [श्रीआचार्यजीके कृपापात्र] हैं तिनके हृदयमें बसतहे तथा श्रीठाकुरजीके हृदयमें भक्त बसतहे सो श्रीभागवतनवमस्कंधमें भगवान् दुर्वासा प्रति कहेहे “साधवो हृदयं मह्यं साधूनां हृदयं त्वहम् । मदन्यत्ते न जानंति नाहं तेभ्यो मनागपि” (साधुहे सो मेरो हृदयहे ओर में साधूनको हृदय हों मोतें अन्य यह भक्त नांही जानतहे ओर में इनसों कछुहू अन्य नांही जानतहों) भगवान् कहे भक्तनके हृदयमें मेंहों मेरे हृदयमें भक्तहे भक्त मोतें अन्यजानत नांही ओर भक्ततें ओरकों में जानतही नांही ऐसे श्रीकृष्ण हे ऐसे ब्रजमें सदा विहारकर्ता नंद-यशोदाजीके पुत्रहे तिनहीको स्मरण करनो काहेतेजो ऐसे भावात्मक प्रभु ब्रजभक्तनके वश्यहे तातें ब्रजभक्तनसहित स्मरण करनो ओर सेवाहू ऐसही भक्तनके भावसहित करनी तथा तादृशीयभगवदीयसों मिलिके श्रीकृष्णकी कथा हू सर्वथा नित्य नियमसों सुननी ॥२॥

मूलं—अहर्निशं ब्रजाधीशः प्रपंचास्मृतिसाधकः ।

स्वकीयपक्षपाती च निजसक्त्या विरोधकृत् ॥३॥

स्मरणीयः कृपापारावारो विदितरूपवान् ।

स एवास्मत्सर्वकर्ता चिंताणुरपि नो हृदि ॥ ४ ॥

शब्दार्थः—अहर्निश प्रपंचकी विस्मृतिके साधक, अपने भक्तनके पक्षपाती, ओर अपनी आसक्ति करायकें निरोध करिवेवारे श्रीब्रजाधीश ॥३॥ कृपाके समुद्र ओर वेणुगीतमें “वर्हापीडं” यह श्लोकमें नटवर रूप जतायोहे सो रूपवारे स्मरणीयहे सोही अपनों सर्व सिद्ध

करिवेवारेहें तासों हृदयमें अणुमात्र चिंता नांही कर्त्तव्य हे ॥४॥
टीका—स्मरण, सेवा, कथा, वार्त्ता, अहर्निश एक ब्रजाधीशकी करे
तो यह प्रपंच देह संबंधी लौकिक वैदिक सबकी विस्मृति होय येही
(स्मरण, सेवा, कथा, वार्त्ताही, प्रपंच विस्मृतिको साधन तथा पुष्टि-
मार्गीय भगवद्धर्म हे ओर नांही सो ब्रजाधीश अपने भक्तनके पक्षपातीहे
अपने सामर्थ्य करि भक्तनको सब ठोरतें निरोध सिद्ध करत हे ओर जो
जप, तप, यज्ञ, होम, तीर्थ, व्रतादिक मर्यादामार्गके साधन हैं तामें
अनेक कालादिदोष प्रतिबंधक होतहे तामें प्रभु रक्षा नांही करतहे
ओर भगवद्धर्ममें प्रभु रक्षा करतहें जेसं प्रह्लादके अर्थ प्रभु स्तंभतें प्रकटे
भक्तकी रक्षा कीनी तातें श्रीकृष्णको स्मरण सेवादिक मनलगायकें
करनो तहां कालादिक कुछ बाधक न होयगो अपने भक्तनके पक्षपाती
भगवान् हे सो अपनी आसक्तिको सामर्थ्य भक्तनमें धरि सब ठोरतें
निरोध करतहे ॥३॥ ऐसे श्रीकृष्णको स्मरण सदाही कर्त्तव्यहे सो
श्रीकृष्ण परमकृपालुहे सो वेद, शास्त्र, श्रीभागवतमें प्रसिद्ध हे । पष्ठ-
स्कंधमें कहेहे “सांकेत्यं पारिहास्यं च स्तोभं हेलनमेव वा । वैकुण्ठनाम-
ग्रहणमशेषाघहरं विदुः ॥१॥ अज्ञानादथवा ज्ञानादुत्तमश्लोकनाम यत् ।
संकीर्त्तितमघं पुसां दहेदेधो यथाऽनलः ॥२॥” (संकेतयुक्त, हास्ययुक्त,
मशकरिमें कह्यो, अपराधतें लियो, एसोहू वैकुण्ठ (भगवान्) के
नामको ग्रहणहे सो सर्व पापकों हरिवेवारो हे एसें ऋषि जानतहे
॥ १ ॥ अज्ञानतें अथवा ज्ञानतें उत्तमयश्वारे भगवानके नामको
कीर्त्तनहे सो अग्नि जेसं काष्ठकों जरावतहे तेसं सर्वपापकों जराय देतहे
॥२॥ यह वचनतें ओर श्रीआचार्यजी महाप्रभु नचरत्नग्रंथमें कहेहें
“अज्ञानादथवा ज्ञानात्कृतमात्मनिवेदनम् । येः कृष्णसात्कृतप्राणैस्ते-
पां का परिदेवना ” (अज्ञानसों अथवा ज्ञानसों प्रभुके आधीन प्राणवारे
जिन भक्तननें आत्मनिवेदन कियोहे तिनकों लौकिक वैदिककी

[विधिनिषेधादिककी] चिंता कहाहे ? कछु नांही) इत्यादि-
वचनसों जाननों जो सेवा स्मरणादिक भगवद्धर्म जानिकें करे अथवा
अनजाने करे तो हू प्रभु कृपा करे सो श्रीमहाप्रभुजीके चोराशी वैष्ण-
वकी वार्त्तामें कहेहें जो गदाधरदासनें शाककी कही सो माधवदास
ले आयो ताकरि माधवदासकों भक्ति भई याभांति प्रभु सेवा मानिले-
तहे याभांति प्रभुकी कृपा शास्त्रमें प्रसिद्ध हे तातें प्रभुही हमकों अप-
ने जानि सर्वकार्य सिद्ध करेंगे तातें भगवदीयकों लौकिक वैदिककी
चिंता तथा अपने उद्धारकी चिंता नांही कर्त्तव्य हे ॥४॥

मूलं-सतामप्यसतां वाऽपि स्वकीयानां कृपानिधिः ।

करिष्यति स्वतः सर्वमतश्चिंता न काऽपि हि ॥५॥

शब्दार्थः-सत् [सात्त्विक] असत् [तामस] अथवा सत् ब्रजभ-
क्त असत् अपनेहू उनके शरण जाय उनके भये तिनके सर्व मनोरथ
कृपाके निधिरूप प्रभु आपुही करेंगे तासों निश्चय कछुहू चिंता नांही
हे ॥ ५ ॥ टीका-प्रभुकी यह प्रतिज्ञाहे जो भक्तनके उपर सदा कृपाही
करतहे सो प्रतिज्ञा सत्यहे मन, वचन, क्रिया, तीनों करि अपने स्वकीय
भक्तनपर कृपाहीहे कृपानिधि एसो प्रभुको नाम हे सो त्रिविधनामा-
वलिमें नाम कहेहें “भक्तजनकल्पवृक्षाय नमः”, “भक्ताधीनाय नमः”
इत्यादि बोहोत नाम हे सो प्रभु स्वतः आपुही सर्व सिद्ध करेंगे तातें
अपने कछुही चिंता नांही कर्त्तव्य हे ॥ ५ ॥

मूलं-सत्संगाऽभावतो नित्यमसत्संगस्वभावतः ।

वर्तते विषयाऽवेशैश्चक्राऽऽरूढेव मन्मतिः ॥ ६ ॥

शब्दार्थः-[अव श्रीहरिरायजी वैष्णवनकों दीनताभाव शिष्याय-
वेके लिये पांच श्लोकमें अपनी व्यवस्था लिखतहे] सत्संगके अभावसों
ओर नित्य दुःसंगके स्वभावसों विषयके आवेश करिकें मेरी मति

चक्रमें आरूढ होय तेसैं भ्रमित हे ॥ ६ ॥ टीका—अब श्रीहरिरायजी कहतहे उपर कहे जो चिंता नांही कर्तव्यहे प्रभु सर्वप्रकार रक्षा करेंगे तोहू भगवदीयनके संगको अभाव हे जो सत्संग होय तो दुःसंग बाधा न करे सो सत्संग तो यह कालमें दुर्लभहे ओर असत्संग यत्न विना यह कलिकालके स्वभावतें सिद्ध हे सो हृदयमें विषयावेश करावत हे यद्यपि भगवद्धर्मादिक करतहों तोहू विषयको आवेश हृदयमें रहतहे सो आवेश जहां ताई होय तहां ताई प्रभुको आवेश होय नही सो श्रीआचार्यजीमहाप्रभु संन्यासनिर्णयमें कहेहें “ विषयाक्रांतदेहानां नावेशः सर्वदा हरेः ” [विषयाक्रांत देहवारेनके हृदयमें निरंतर अथवा निश्चय हरिको आवेश होय नही] इत्यादि वचनतें असत्संगतें विषयको आवेश होतहे ताकरिकें मेरी बुद्धि चक्रारूढकीनाई दशो दिशा फिरे हे प्रभुमें विश्वास नांही होतहे चिंतातें अनेक संसारको दुःखही आय लगतहे ताकरि बुद्धि मलीन हे ॥ ६ ॥

मूलं—नैतस्मिन् समये कोऽपि सहायो मम वर्तते ।

विना श्रीवल्लभाचार्यचरणांबुरुहाश्रयात् ॥ ७ ॥

शब्दार्थः—यह समयमें श्रीवल्लभाचार्यजीके चरणाविंदके आश्रय विना मोकों काहू सहाय नांहीहे ॥ ७ ॥ टीका—दुःसंग करि विषयावेशतें मन भ्रमतहे अनेक दुःख पावतहों भगवदीय कोउ मिलत नांही तातें यह कराल कालमें मेरी सहाय कोन करनहारो हे एक श्रीवल्लभाचार्यजीके चरणकमलको में आश्रय कीयो हे सोई मेरे सहाय हे ओर कोउ सहाय करिवेमें नांही समर्थ हे यह करिके श्रीहरिरायजी यह जताये जो यह कलिकालमें श्रीआचार्यजीके चरणकमलको आश्रय कीये हे तिनकों तो सर्व फलकी सिद्धि होयगी ओर जिनके

? सर्व फलप्राप्तिमें कालदोष, संगदोष, तथा अन्नदोष बाधकहे सो श्रीआचार्यजीको आश्रय जिनकों दद होय तिनकी सब क्रिया इन श्रीमहाप्रभुकी आज्ञानुसार बिचेरु, पैयें, और आश्रयकों अनुसरिके होय ताते यह उपरकहे दोष बाधक न होय.

श्रीआचार्यजीके चरणकमलको आश्रय नांहीहे सो कोटानकोटि साधन करो परंतु संगदोष कालदोषतें विषयावेश करि चक्रारूढकी नांइ अमेगो उनकों कछु फलसिद्धि नांहीहे तातें यह पुष्टिमार्गीय वैष्णवनों श्रीआचार्यजी महाप्रभुजीके चरणकमलको दृढ आश्रय निश्चयही कर्तव्य हे ॥ ७ ॥

मूलं-ततश्च्युता मतिः कालबलात् केवललौकिके ।

नित्यं स्थिता ततो भीतिर्भूयसी जायते हृदि ॥८॥

शब्दार्थः—कालबलसों आश्रयतें मति निकस गई हे ओर केवल लौकिकमें नित्य रही हे ताकरिकें हृदयमें वोहोत बडो भय हे ॥ ८ ॥ टीका—में अपने श्रवणसों कालको दुःख सुन्यो हे जो जन्ममृत्युसमान ओर कोई दुःख नांहीहे यह अनेक बार बडेनके मुखतें सुन्यो हे ओर मनहूमें कालदुःख आवतहे तोहू यह काल एसो कठिनहे जो बलात्कार करि सगरो ज्ञान धरयो रहतहे केवल लौकिकही कार्य बनि आवत हे याभांति नित्यही लौकिककार्यमें स्थितिहे ताकरि अपने हृदयमें वोहोत भय बारंवार पावतहों जेसैं परीक्षितराजाकों कालको भय भयो तब प्रभुकी कृपातें शुक्रदेवजी भगवदीय आय उह कालभय निवृत्त कीयो तेसैं अब मेरे मनमें वोहोत भय भयोहे सो श्रीआचार्यजीके कृपापात्र भगवदीयके संगतें दूर होय सो मोकों दुर्लभहे तातें भयकरि बारंवार हृदय कंपायमानहे ॥ ८ ॥

मूलं-किंवा को वेद भगवान् करुणात्मा चिकीर्षति ।

न जाने तेन मे चेतः खिन्नं भवति सर्वथा ॥९॥

शब्दार्थः—करुणात्मा भगवान् कहा करिवेकी इच्छा करत हे सो कोन जाने ? में नांही जानतहों ताकरिकें मेरो चित्त निश्चय खेदयुक्त होय हे ॥ ९ ॥ टीका—करुणात्मा भगवान्के अभिप्रायकों कोन जाने ?

काहूँसों नांही जान्यो जातहे कोटानकोटि साधन करे परंतु भगवानके हृदयके अभिप्रायको ज्ञान न होय काहेतें जो भगवानकी करुणा होय तो सर्व जान्यो जाय मन वचन करि भगवद्धर्म सेवा स्मरण वनि आवे सो प्रभुकरुणा विना कहुं दृढ विश्वास नांही होत हे तातें में अपने चित्तमें निश्चयही खेद पावतहों जहां तांइ प्रभुकी कृपा नांहीं तहांताइ सर्वथा सर्वकार्यमें दुःखहीहे ॥ ९ ॥

मूलं-विशेषः प्रेमजित्पत्राद्बोधव्यः सकलोऽपि हि ।

अनेनैव वयं किंचित्स्वास्थ्यं मन्यामहे हृदः ॥ १० ॥

शब्दार्थः—विशेष सकलहुं समाचार प्रेमजिरूप पत्रों (अर्थात् प्रेमजी वैष्णवके मुखसों) अथवा प्रेमजीके पत्रसों जाननें यह प्रेम-जीतेंही हमारे हृदयके कलु स्वास्थ्यकों हम मानतहें ॥ १० ॥ टीका—ओर विशेष समाचार प्रेमजी वैष्णवके पत्रमें लिखि पठाये हे सो यह पत्रतें बोध न होय तो वामें देखिकें मन लगायकें वांचि जाननें तातें करुणात्मा प्रभुकेहि हमहे यह जानि हृदयमें किंचित्स्वास्थ्य (धीरज) हे जो प्रभु कृपाही करेंगे काहेतें जो भगवद्धर्म जानिकें करियें अथवा अनजाने कलु वनि जाय तोहू प्रभुकृपा करे सो नवरत्नग्रंथमें कहेहैं “अज्ञानादथवा ज्ञानात्कृतमात्मनिवेदनम् । यैः कृष्णसात्कृतप्राणैस्तेषां का परिदेवना ” (अज्ञानसों अथवा ज्ञानसों प्रभुके आधीन प्राणकरिकें जिननें आत्मनिवेदन कियोहे तिनकों कहा लौकिक कर्तव्यकी चिंता हे ?) सो निवेदन तो कोई प्रकार भयोहे तातें मनमें स्वास्थ्य हे जो प्रभु करुणा करेंगे ॥ १० ॥

इति श्रीहरिरायजीकृतं षोडशं शिक्षापत्रं श्रीगोपे-
श्वरजीकृतव्रजभाषाटीकासमेतं समाप्तम् ॥ १६ ॥

शिक्षापत्र १७.

सप्तदश शिक्षापत्रमें त्यागके द्वैविध्य निरूपणपूर्वक अत्यागको निरूपण तथा जीवके स्वरूपनिरूपणतें मार्गस्थितिकी दृढ अशक्यताहे तासों अपने आचार्यजीके चरणारविंदको दृढ आश्रय करिके दुःसंग तथा अविश्वासके अभावकरिकें सर्व फलकी प्राप्ति होय सो निरूपणहे । उपरकहे जो भगवानके अभिप्रायकों कोन जाने तातें मनमें खेदहे ताहू प्रभु करुणात्माहे ताकरि कछु मनमें धीरजहे सो प्रभु करुणा करे तव उत्तम मध्यम भगवद्धर्म वनि आवे तहां कोउ कहे जो भगवद्धर्म तो एकसो हे उत्तम मध्यम कहा ? तहां कहतहे—
मूलं-यदुक्तमस्मदाचार्यैर्गौणमुख्यविभेदतः ।

त्यागो गृहधनादीनामथवा कृष्णयोजनम् ॥ १ ॥

शब्दार्थः—जो अपने आचार्यजी श्रीमहाप्रभुजीने गौण ओर मुख्य भेदसों त्याग दोय प्रकारको संन्यासनिर्णयादिग्रंथमें कह्योहे तामें गृहधनादिकको त्यागहे सो गौण त्यागहे अथवा गृहधनादिकनको श्रीकृष्णमें विनियोग करनो सो मुख्य त्यागहे ॥ १ ॥ टीका—श्रीआचार्यजी महाप्रभु भक्तिवर्द्धिनी—आदि—ग्रंथमें उत्तम, मध्यम, प्रकार कहेहें “अव्यावृत्तो भजेत्कृष्णं पूजया श्रवणादिभिः । व्यावृत्तोऽपि हरौ चित्तं श्रवणादौ यतेत् सदा” (अव्यावृत्त होय पूजा तथा श्रवणादि करिकें श्रीकृष्णकों भजे ओर व्यावृत्त होय तोहू हरिनिमित्त जो श्रवणादिक तामें सदा यत्न करे) यह वचनतें श्रीकृष्णकी कथा, सेवा, स्मरण, अव्यावृत्त होयकें करे यह मुख्य, ओर व्यावृत्तिहू करे परंतु मन हरिमें राखे यह गौण सो श्रीहरिरायजी कहतहे जा

घर, धन, लौकिक, वैदिक, सब त्याग करि प्रभुको भजन करे जैसे गदाधरदास अव्यावृत्त रहे जलकी लेंटि भरी पद्मनाभदास छोला धरे यह मुख्य प्रकार यह न बने तो सर्व श्रीकृष्णके अर्थ लगावे राजसेवा करे तामें सगरो धन गृह लगावे तोहू प्रभु कृपा करे ॥ १ ॥

मूलं-वैराग्यपरितोषादेरत्यागोऽपि निरूपितः।

तथा विषयभोगस्य त्यागोऽपि विनिबोधितः ॥२॥

शब्दार्थः-वैराग्य, ओर परितोषादिकनको अत्यागहू निरूपण कियोहे ओर विषयभोगको त्यागहू विशेष करिकें निरंतर बतायोहे ॥ २ ॥ टीका-वैराग्य ओर संतोषको त्याग न करे काहेतें जो वैराग्य होय तो यह संसारमें लौकिक देह संबंधी सुख दुःख हृदयमें बाधा न करे भगवद्धर्म बन्यो जाय ओर संतोष होय तो सहजमें आय प्राप्त होय ताही करि आनंद रहे लोभ करि पाप आचरण न करे काहेते जो श्रीआचार्यजीमहाप्रभुजी श्रीसुबोधिनीजी निबं-धादि ग्रंथमें कहेहैं “अचौर्याणामपापानां” (चोरी करिवेवारेन होय तथा पापी नहोय तिनके द्रव्यको प्रभु अंगीकार करे] चोरीकरि पा-पकरि कछु त्यावे ताद्रव्य (अन्न) प्रभु कैसें अरोगे ? ताते वैराग्य संतोषादिक धर्म न छोडनो ओर विषयभोगको त्याग करना काहेतें जो विषय बहुत कियेते हृदयमें विषयको ध्यान होय जाय पाछें विष-यावेश सगरे देहमें होय तो प्रभुको आवेश न होय सो संन्यासनि-र्णयमें श्रीआचार्यजी कहेहैं “ विषयाक्रांतदेहानां नावेशः सर्वदा (सर्वथा) हरेः ” (विषयकरिकें आक्रांत देहवारेनको निरंतर अथवा निश्चय हरिको आवेश न होय) ताते विषयाभोगकोहू अवश्य त्याग करना ॥ २ ॥

मूलं-तथा सत्संगमाऽत्यागः सर्वत्रैव विशेषतः ।

अन्याश्रयपरित्याग उक्तो बाधकरूपतः ॥३॥

शब्दार्थः—तेसेही सर्वजगोहू विशेष करिके सत्संगको अत्याग हे ओर बाधकरूपसों अन्याश्रयको चार्योंओरसों त्याग कह्यो हे ॥३॥ टीका—भगवदीयको संग न त्यागे यह सत्संग वोहोत बडोहे सर्वोपरि कर्तव्य हे सो श्रीभागवतप्रथमस्कंधमें शौनकको वाक्यहे “तुल्यमलवेनापि न स्वर्गं नापुनर्भवम् । भगवत्संगिसंगस्य मर्त्यानां किमुता-शिषः” (भगवद्भक्तके संगके एकलववरोवर नांही स्वर्गकों के नांही मोक्षकों हम तुलेहें तहां मनुष्यनके आशिषनकी तुलना तो कैसे करे ?) सत्संगके सुखसमान स्वर्गलोक, अपवर्ग, (मोक्षहू) नांही हे तातें भगवदीयको संग छोडनो नांही जहां भगवदीय होय तहां आपु जायके सर्वथाही संग करे ओर अन्याश्रयकों शीघ्रही त्याग करे काहेतें जो यह (अन्याश्रय) भावमें बाधकहे. श्रीनंदरायजी अंबिका-पूजनकों गये सो सर्पनें ग्रसे श्रीगुसांईजीकी सेवकनी डोकरीने हाक-मको कही तुम मोकों जीवाई इतनो कहत प्रभु अंतर्धान भये दामो-दरदासकी स्त्रीने अन्याश्रय कियो सो पुत्र म्लेच्छ भयो तातें अन्या-श्रयको सर्वथा त्याग करनो सो अन्याश्रय बडो बाधक हे ॥ ३ ॥

मूलं-एवं निरूपितौ त्यागाऽत्यागौ सर्वत्र सर्वशः ।

न जीवाः स्वबलात्किंचित्कर्तुं शक्नुवते स्वतः ॥४॥

शब्दार्थः—एसें सर्वप्रकारसों सर्वत्र त्याग ओर अत्याग निरूपण कियेहे सो जीव अपने बलसों कुछ करिवेमें समर्थ नांहीहे ॥ ४ ॥ टीका—याभांति निरूपण श्रीआचार्यजीमहाप्रभुजी सुबोधिनीजी आदि ग्रंथमें कियेहे सो विचार करि त्याग करनो होय ताको त्याग करनो अत्याग करनो होय ताको अत्याग करनो भगवद्धर्ममें साधक होय

ताको अत्याग यह विचार राखे परंतु जीवको बल नांहीहे न त्यागि सके न राखि सके ब्रह्मादिक, शिवादिक, नारदादिक, बड़े त्यागी हे तिनकों हू त्याग कछु वश्यमें नांही तो तुच्छ जीवको कहा सामर्थ्य ? चाको कियो कछु नांही होत हे जीवतो मायाके वश्य स्वभावकरि दुष्ट होय रह्यो हे ! ॥ ४ ॥

मूलं-अतः कथं भवेन्मार्गस्थितिर्जीवेषु सर्वथा ।

फलाशाऽपि कथं कार्या जनैस्तत्रास्थितौ पुनः ॥५॥

शब्दार्थः—तासों जीवके विषे मार्गस्थिति सर्वथा कैसें होय ओर मार्गमें स्थिति विना फिर मनुष्य फलकी आशाहू कैसें करे ? ॥५॥

टीका—एसें दुष्ट क्रिया करिवेवारे दुष्ट जीव हे तिनकी यह सर्वोपरि पुष्टिमार्गमें स्थिति सर्वथा नहोय अष्टप्रहर लौकिक विषयादिकमें पड्योहे सो पुष्टिमार्गमें कोनभांति स्थिति होय ? सर्वथा न होय तो यह जीव पुष्टिमार्गीय फलकी आशा कैसें करे ? यह स्थिति नांही तो फल कहांति सिद्ध होयगो जीवतो तुच्छ अरु दुष्टहे तिनकोंहू जाप्रकार लौकिकतें छुटिवेकी सिद्धि होय सो उपाय कहत हे ॥ ५ ॥

मूलं-तथाऽपि श्रीमदाचार्यचरणाश्रयणादपि ।

अशक्यमपि यच्छक्यं तद्भवेत्सर्वथैव हि ॥६॥

शब्दार्थः—तोहू श्रीमदाचार्यजीके चरणारविंदके आश्रयसों जो अशक्यहे सोहू सर्वथाही शक्य होय ॥६॥ टीका—यद्यपि जीव अनेक दोषसों भरयोहे याजीवसों दोष नांही छूटत एसे हू जाजीवनें श्रीआचार्यजीमहाप्रभुके चरणकमलको दृढ आश्रय कियोहे तिनकों दोषको त्याग अशक्यहे तोहू शक्य होय ओर पुष्टिमार्गीय फलसिद्धि होय सो श्रीगुसाईजी कहेहैं “चित्तेन दुष्टो वचसाऽपि दुष्टः कायेन दुष्टः क्रियया च दुष्टः । ज्ञानेन दुष्टो भजनेन दुष्टो ममापराधः कतिधा

विचार्यः ॥१॥ संसारसागरे ममजीवोद्धारपरायणम् । आश्रये त्वत्पदां-
भोजं पुरुषोत्तम ! सदगुरो ! ॥२॥ ” (चित्तकरिकें दुष्ट, वचनकरिकें
दुष्ट, कार्याकरिकें दुष्ट, क्रियाकरिकें दुष्ट, ज्ञानकरिकें दुष्ट ओर भजन-
करिकें दुष्टहों सो मेरो अपराध कितने प्रकारको विचारिवेयोग्यहे ?
॥१॥ संसाररूप समुद्रमें ममजीवके उद्धार करिवेमें तत्पर ऐसे तुम्हारे
चरणारविंदकों हे श्रीपुरुषोत्तम ! हे सदगुरो ! मैं आश्रय करूँ ॥२॥)
“श्रीमहाप्रभुजी कहेहैं “शरणस्थसमुद्धारम्” [शरणमें रहे तिनके उद्धार
करिवेवारे] “अशक्ये वा सुशक्ये वा सर्वथा शरणं हरिः” [अशक्यमें
तथा सुशक्यमें निश्चय हरि शरणहे] याभांति निःसाधन होय
श्रीआचार्यजीमहाप्रभुजीके चरणकमलको दृढ आश्रय करे तिनकों यह
पुष्टिमार्गको फल निश्चय होयगो ॥ ६ ॥

मूल—यदि दुःसंगदोषेण न भवेच्छिथिलं मनः ।

यदि वा कालदोषेणाविश्वासोऽपि भवेन्न हि ॥७॥

शब्दार्थः—(उपर श्लोकमें कह्यो जो श्रीमदाचार्यजीके चरणार-
विंदके आश्रयसों अशक्यहू शक्य होय तामें बाधकहे सो बाधक
नहोय तब अशक्यहू शक्य होय सो कहतहे) जो दुःसंगके दोष
करिकें जब मन शिथिल नहोय ओर काल दोषकरिकें जब अवि-
श्वास नहोय तब अशक्यहू शक्य होय ॥ ७ ॥ टीका—उपर कहे जो
आश्रयतें निश्चय फलसिद्धि होय तामें जो दोष महा बाधकहे तिनसों
बचे तो फलसिद्धि होय एकतो दुःसंग होय तो तादोषतें भाव घटि
जाय मन शिथिल होयजाय तातें आश्रय जातरहे भरतकों मृगके
दुःसंगतें तीन जन्म भये द्विविदवानर रामभक्त हतो सो नरकासुरके
संगतें श्रीवलदेवजीसों लख्यो ऐसैं ओर वोहोत जीव दुःसंगतें गिरेहैं
तथा कालदोषतें विश्वास न रह्यो जहां अविश्वास भयो तहां आश्रय
छूट्यो तब यह जीव निश्चय गिर्यो ॥ ७ ॥

मूलं—“अविश्वासो न कर्त्तव्यः” इत्युक्तेः स तु बाधकः ।

अयमेवाऽस्य मार्गस्य मूलमाश्रयसाधकः ॥८॥

शब्दार्थः—अविश्वास नहि करना काहेतें जो बाधकहे एसे श्रीआचार्यजीमहाप्रभुजीने विवेकधैर्याश्रयमें कह्यो हे तासों यह बाधक हे काहेते पुष्टिमार्गको आश्रय सिद्धकरिवेवारो यह विश्वासहे सोही मूल हे ॥ वृक्षको मूल स्थित होय तो समग्रवृक्ष स्थित रहे तेसेही विश्वास दृढ होय तो पुष्टिमार्गीयधर्म—आश्रय दृढ रहे ॥८॥ टीका—अविश्वास न करनों सो श्रीआचार्यजी महाप्रभुजी विवेकधैर्याश्रयग्रंथमें कहेहैं “अविश्वासो न कर्त्तव्यः सर्वथा बाधकस्तु सः । ब्रह्माऽस्त्रचातको भाव्यौ प्राप्तं सेवेत निर्ममः” (अविश्वास नांही करना यह निश्चय बाधकहे ब्रह्मास्त्र ओर चातकपक्षीकी भावना करनी) जो ब्रह्मास्त्रमें अविश्वासतें हनूमान् लोहकी सांकलमें बांधे न रहे ओर चातकको विश्वासहे तो मेघ जलदेतहें तेसे विचार ओर ममतारहित होय प्राप्तको सेवन करना यह वचनतें अविश्वास सर्वथा न करे रावणको अविश्वास भयो तब ब्रह्मास्त्र छुटिगयो हनूमानने लंका जराई चातकको विश्वास हे तो मेघही मनोरथ पूर्ण करतहे तातें अविश्वास आसुरधर्महे सो सर्वथा न करे यह श्रीआचार्यजीमहाप्रभुके पुष्टिमार्गमें मूल हे सर्वोपरि आश्रयको साधक विश्वास ही हे ॥ ८ ॥

मूलं—आश्रयेणैव सकलं सिद्धिमेति न संशयः ।

पृथक्शरणमार्गोक्तिरत एव प्रभोरपि ॥ ९ ॥

शरणस्थसमुद्धारकृतिविज्ञापनादपि ।

विवेकधैर्यभक्त्यादिसाधनाभाववादतः ॥ १० ॥

शब्दार्थः—आश्रय करिकेही सर्व सिद्धि होय यामें संशय नांही तासोंही “पृथक्शरणमार्गोपदेष्टा” एसे नाम श्रीगुसाईजीने कहेहे ॥ १० ॥

ओर विवेक, धैर्य, भक्त्यादिक साधनके अभाववादतें शरणमें रह्ये ऐसे जीवनको उद्धारकरिवेकी विज्ञप्तिकरि तासोंही आश्रयतें सकल सिद्ध होयेंगे ॥ १० ॥ टीका—जाजीवकों प्रभुमें दृढ आश्रय भयो तिनको सकल कार्य निश्चय सिद्धभयो यामें संशय नाहीं, श्रीकृष्ण फलात्मक पुष्टिपुरुषोत्तमकी शरणको यह पुष्टिमार्ग, अपने दैवी जीवनके अर्थ श्रीआचार्यजीमहाप्रभुजीने न्यारो प्रकट कियोहे ॥ ९ ॥ श्रीआचार्यजी-महाप्रभु कृष्णाश्रयग्रंथमें कहेहैं ‘शरणस्थसमुद्धारं कृष्णं विज्ञापयाम्यहम्’ (शरणमें रह्ये ऐसे जीवको उद्धार करिवेवारे (अथवा उद्धार करिवे निमित्त) श्रीकृष्णकों में विज्ञप्ति करूँहूँ) याभांति श्रीमहाप्रभुजीने श्रीकृष्णसों कहि अपने पुष्टिमार्गीय सेवकनकों शरण सिद्धकिये ओर विवेकधैर्याश्रयमें कहे साधनको जीवनमें अभावहे विवेकधैर्यभक्त्यादि-रहितहे तिनहूँकों शरण कियेहे ओर विवेकधैर्याश्रयमें कहेहैं “अशक्ये वा सुशक्ये वा सर्वथा शरणं हरिः” (अशक्यमें तथा सुशक्यमें निश्चय हरि शरणहे) याभांति पुष्टिमार्गीय शरण, विनसाधनके जीवनकों सिद्ध किये ओर मर्यादामार्गमें भगवद्गीतामें भगवानने शरणमार्ग कह्यो हे “सर्वधर्मान् परित्यज्य मामेकं शरणं ब्रज। अहं त्वां सर्वपापेभ्यो मोक्षयिष्यामि मा शुचः” सर्वधर्मकों छोड़िकें एक मोकों शरणहो, मैं तोकूँ सर्वपापतें मुक्त करूँगो शोक मति करे) भगवान् कहे हे अर्जुन ! तूं सर्वधर्म छोड़िकें मेरि शरण आव मैं सगरे पापनकों दूरिकरिमें मोक्ष करूँगो. यह मर्यादाकी रीतिहे जो पाप दूर करिकें फल देय ओर श्रीआचार्यजी महाप्रभुजीने तो अपने जीव यद्यपि दोषसहित विवेक, धैर्य, आश्रय, रहितहे तोहूँ तिनकों शरण सिद्ध कियेहे ॥ १० ॥

मूलं—सन्मार्गविद्धिः सततं कृतप्रभुपदाश्रये ।

तदुक्तवाक्यभावार्थविभावनपरायणैः ॥ ११ ॥

शब्दार्थः—सन्मार्गकों जानिवेवारे तथा निरंतर कियो हे प्रभु (श्रीकृष्ण तथा श्रीगुसांईजी) के चरणारविंदको आश्रय जिनने ऐसे ओर इनने कहे वाक्य [गीताजी तथा विज्ञप्ति आदि] को जो भावार्थ ताकी विशेष भावनामें तत्पर ऐसे [भगवदीयन] के संग सदा रहेनो यह संबंध तीसरे श्लोकमें मिलेगो ॥ ११ ॥ टीका—पुष्टिमार्गमें जो जीव श्रीआचार्यजीद्वारा शरण आयेहैं तिनकों श्रीआचार्यजी निश्चय प्रभुके पदको आश्रय आपुही सिद्ध करेंगे अपने जीवनके अर्थ तो यह शरण-मार्ग प्रकट कियोहे तातें श्रीआचार्यजीमहाप्रभुके वाक्यकी भावना अष्टप्रहर करे जो मेरेलिये श्रीमहाप्रभुजी प्रतिज्ञा करि शरण सिद्ध कियोहे याभांति वचनके भावमें अष्टप्रहर परायण रहे, दृढ विश्वास राखे, श्रीकृष्णके सन्मुख कृष्णाश्रय ग्रंथको पाठ करे, तो सकल कार्य सिद्ध होय ॥ ११ ॥

मूलं-यथाशक्तिस्वमार्गीयप्रभुसेवापरैरपि ।

विरुद्धकृतिसंदेहदाहनोद्योगतत्परैः ॥ १२ ॥

शब्दार्थः—यथाशक्ति अपने (श्रीमहाप्रभुजीके प्रकटित) मार्गमें सेव्य प्रभुकी सेवामें तत्पर ऐसेहू विरुद्ध कृतिमें जो संदेह ताको अथवा विरुद्ध कृति तथा संदेहके दाहनको जो उद्योग तामें तत्पर ऐसेनके संग रहेनो ॥ १२ ॥ टीका—यथाशक्ति पुष्टिमार्गीय भगवत्सेवा जितनी वने तितनी करे, “अकाले वा सुकाले वा विकाले वा ” (समयविना, आछे समयमें, अथवा विपरीत समयमें) या भांति तीनो वचन श्रीआचार्यजीमहाप्रभु कहे हैं. श्रीभागवत-अष्टमस्कंधमें ब्रह्माजी कहे हैं “ यथा हि स्कंधशास्त्रानां तरोर्मूलावसेचनम् । एवमाराधनं विष्णोः

१ यह उच्चारण भाषाकी टीकावारे पुस्तकमें त्रयोदशश्लोकमें हे. और यहां त्रयोदश श्लोकको पंचोदं हे परंतु रत्नमंजरी टीकाके अनुसार इहां लिख्यो हे.

“सर्वेपामात्मनश्च हि” (जेसे वृक्षके मूलकों (जलको) सिंचनहे सो चडी शाखा छोटी शाखा पत्रताई प्राप्तहोयहे, ओर पत्रशाखामें सिंचन करे तो कछु फँड नहोय उलटो विगार होय तेसैं विष्णुको आराधनहे सो सर्वदेवनको तथा आत्माकोही आराधन होयहे ओर अन्य देवको आराधनहे सो वह देवकों तथा प्रभुकोंहू प्राप्त नांही होय) भगवानकी सेवा करि सो वृक्षके मूलमें जल दीयो तातें शाखा पत्र सर्व हयों होय तेसैं ओरदेवनकी सेवा पत्रशाखावतहे तातें प्रभुकी सेवा करनी सो पुष्टिमार्गीय भगवदीयको मुख्य धर्महे ओर पुष्टिमार्गमें जितनो विरुद्धहे ताकों अश्वित् जाननो जो यातें जरुंगो याभांति भय मानि छोडिवेको उद्यम राखे जो एतन्मार्गविरुद्ध कृतिको त्यागही करनो ॥ १२ ॥

मूलं-निरंतरं स्वमार्गीयसतां संगसमन्वितैः ।

स्थेयं संसारविमुखैः स्वगुरुं प्रणतैरपि ॥१३॥

शब्दार्थः-निरंतर स्वमार्गीय सत्पुरुषके संग करिकें युक्त तथा अहंताममतारूप संसारतें विमुख ओर अपने गुरु श्रीमदाचार्यजीकों अत्यंत नम्रीभूत (नमनपूर्वक श्रीआचार्यजीकी आज्ञामें रहिवेवारे) ऐसे भगवदीयके संग रहेनो ॥१३॥ टीका-पुष्टिमार्गीय भगवदीयको संग निरंतर करे सो भक्तिवर्द्धिनीमें, श्रीआचार्यजीमहाप्रभु कहे हैं “ सेवायां वा कथायां वा यस्यासक्तिर्दृढा भवेत् ” (सेवामें अथवा कथामें जिनकी आसक्ति दृढ होय) सेवासों पोहोचिकें भगवदीयके सुखतें सुननो काहेतें जो निरोधलक्षणमें कहेहैं “ महतां कृपया यद्वत्कीर्तनं सुखदं स्मृतम् । न तथा लौकिकानां तु स्निग्धभोजनरुक्षवत् ” (महत्पुरुषकी कृपातें कीर्तन जेसो सुखदेयवेवारो सुन्योहे तेसो लौकिकके संगतें नांहीहे महत्संगहे सो स्निग्ध (घृतयुक्त) भोजन बरोवरिहे

ओर लौकिक संगहेसो रूख (घृतविनारूखे) भोजन बरोवरि हे) भगवदीयके संग कथा हे सो सुंदर स्निग्धहे महाप्रसादभोजनहे तातें सर्वदोष जाय ओर लौकिक जनके मुखकी वार्त्ताहे सो रूखो आसुरी भोजन हे तातें स्वमार्गीयवैष्णवनको संग कर्त्तव्यहे ओर यह लौकिक संसारतें विमुख रहे अपने गुरुके शरण रहि दीन होय प्रणिपत्तिमें रहे “ त्रायस्व भो जगन्नाथ ! गुरो ! संसारबह्निना । दग्धं मां कालदष्टं च त्वदीयशरणागतम् ” (हे जगतके नाथ ! गुरो ! संसाररूप अग्नितें जरयो ओर कालरूप सर्पनैं डस्यो एसो आपके शरण में आयो हों ताको रक्षण करो) याभावकरिकें गुरुकी शरणागत रहे काहेतें जो गुरुकी कृपा होय तो प्रभु कृपा करे ओर गुरु अप्रसन्न होय तो प्रभु अप्रसन्न होय “ हरौ रुष्टे गुरुस्त्राता गुरौ रुष्टे न कश्चन ” (प्रभु अप्रसन्न होय तो गुरु रक्षाकरे ओर गुरु अप्रसन्न होय तो कोई रक्षा न करे) तातें गुरुतें प्रणिपातयुक्त रहे या भांति वैष्णव रहे ताकों श्रीआचार्यजीमहा-प्रभुजीकी कृपातें पुष्टिमार्गीयसिद्धांतके फलको अनुभव होय ॥ १३ ॥

इति श्रीहरिरायजीकृतं सप्तदशं शिक्षापत्रं श्रीगोपे-
श्वरजीकृतव्रजभापाटीकासमेतं समाप्तम् ॥ १७ ॥

शिक्षापत्र १८.

अष्टादश शिक्षापत्रमें भगवदीयनकों केवल उदरभरणार्थें कार्य करनो उचित नाहीं किंतु विरह करिकें सर्वत्र भगवत्स्फूर्तितें लीलाति-रिक्त सृष्टिमें आनंदरहित जानि जो कछु उपायकरिकें प्रपंचको विस्मरण करि श्रीकृष्णकों हृदयमें स्थापनकरे ओर श्रीमदाचार्यजी तथा

श्रीगुसाईजी ओर श्रीस्वामिनीजी आदिसों अन्यमें भगवन्तुल्यबुद्धि न करनी यह निरूपण है. उपर शरणको ओर सेवाको प्रकार कहे तामें यह काल बाधकहे सो जीव नाहीं जानत तिनको जाभांति ज्ञान होय सो निरूपण करतहें—

मूलं—कालः स्वकार्यं कुरुते न जानाति जनो यतः ।

प्रमाद्यति हरेः कार्यं स्वात्मकार्यंऽतिविह्वलः ॥ १ ॥

शब्दार्थः—काल [सर्वको आयुष्यहरिवे रूप] अपनो कार्य करतहे सो जीव नाहीं जानतहे जासों प्रभुके कार्य सेवादिकमें प्रमाद करतहे ओर अपने कार्यमें बोहोत विह्वल है ॥ १ ॥ टीका—यह काल अपनो कार्य किये जातहे क्षण क्षणमें जीवकी आयुष्यकों हरतहे ओर जीव नाहीं जानत जो मेरी आयुष्य दिनदिन घटतहे काल नित्य लियेजातहे यह ज्ञान जीवकों नाहीं होतहे तासों अपने कार्यमें प्रमादी होयरह्योहे. लौकिक, वैदिक, संसारको काम, देह इंद्रियनको पोषण, विषयादिक, अनेक कार्यकी चिन्ता करिकें प्रसितहे तातें प्रमादीहे ताकरि ज्ञान नाहीं होत जो काल सगरी आयुष्यकों भक्षण करतहे मेरी कहा गति होयगी ? मोकों कहा कर्तव्यहे ? यह ज्ञान नाहीं होत है अनेक कार्यमें प्रमादीहे ओर अपने कार्यमें विह्वलहे देहसंबंधी संसारको कार्यहे तामें तत्परहे आत्मसंबंधी भगवद्धर्म, सेवा, स्मरण, कीर्तन, वार्त्ता, कथा इत्यादि कार्यमें विह्वल नाहीं होतहे ॥ १ ॥

मूलं—केवलौदरिकत्वं तु तदीयानां न चोचितम् ।

न पूरयेत् किमुदरं सेवकानां कृपानिधिः ॥ २ ॥

शब्दार्थः—तदीयनकों केवल उदरभरणसंबंधी व्यापार करनो उचित नाहीं काहेतें जो कृपाके निधि प्रभु अपने सेवकनके उदरकों

कहा नांहीपुरे ? पुरेहींगे ॥ २ ॥ टीका-उपर कहे जो लौकिककार्यमें विह्वलहे सो केवल उदरभरणके कार्यमें तत्परहे सो यह पुष्टिमार्गीय वैष्णवनों उचित नांही काहेतें सो श्रीकृष्ण तो कृपाके निधिहे सगरे जगत्के भरणपोषण कर्त्ताहे सो कहा अपने सेवकनको पालन नांही करेंगे ? सेवकनके उपरतो सदा कृपा करतही आये हे याभांति वैष्णव श्रीठाकुरजीको विश्वास मनमें राखि सर्वदा भगवद्धर्म आचरण करे तथा व्यवहारविना न चले तो अनवरसमें प्रहर एक तथा घडी चार व्यवहारहू करे ओर मनमें यह जाने जो जितनो मिलनहार होयगो सो प्रहर एक तथा घडी चारमें सब मिलिरहेगो यह विचार वैष्णव मनमें राखे भगवानको माहात्म्य विचारे जो प्रभु सर्वसामर्थ्ययुक्तहे सब सिद्ध करेंगे ॥ २ ॥

मूल-चिंता कापि न कार्येति प्रभुवाक्यं विचिंत्यताम् ।

अज्ञानिनो ज्ञानिनश्च यदि स्यात् समता कृतौ ॥ ३ ॥

तदा तु साधनाभावात् किं वृत्तं ज्ञानतः फलम् ।

शब्दार्थ:-नवरत्नमें श्रीमहाप्रभुजी कहेहैं जो चिंता कछु नांही करनी ताकी उपर विवरणमें श्रीगुसाईजी कहेहैं जो लौकिक चिंता तो भगवदीयकों होय नांही परंतु भगवदर्थ हू चिंता न करनी एसो प्रभुको काक्यहे सो विचारनो ओर जब अज्ञानी ओर ज्ञानीनकी कृतिमें तुल्यता निरूपण करीहे तासों साधनको अभाव होय तवतो साधनके अभावसों ज्ञानतें कहा फल भयो ? ॥ ३ ॥ टीका-मनमें चिंता न करे सो नवरत्नमें श्रीआचार्यजीमहाप्रभु कहेहैं " चिंता कापि न कार्या

१ नवरत्नमें कर्माहे जो अज्ञानसों अथवा ज्ञानसों जिनने निवेदन कियोहे तिनकों कछु चिंता नांही करनी तामें ज्ञानी ओर अज्ञानी तुल्य गिनेहे तामें ज्ञानीनको फल होय सो आगं श्लोक देह कृत्तिके निरूपण कियोहे.

निवेदितात्मभिः कदाऽपि। भगवानपि पुष्टिस्थो न करिष्यति लौकिकीं च गतिम्” (निवेदन कियोहे आत्मा (आत्मसंबंधी सर्व) जिनने ऐसे वैष्णवनों कछहू चिंता नांही कर्त्तव्यहे काहेतें जो जिनकों निवेदित भयोहे ऐसे भगवानहू पुष्टिस्थहे सो लौकिकगति नांही करेंगे,) इत्यादि वचनको चिंतन अहर्निश मनमें करे यह न जाने जो में तो कछू जानत नांही प्रभु कैसे कृपा करेंगे ? यह विचारनो जो प्रभुकों ज्ञानी भक्त ओर अज्ञानी भक्त दोउ बराबरहे सो नवरत्नमें श्रीआचार्यजी कहेहैं “अज्ञानादथवा ज्ञानात् कृतमात्मनिवेदनम्” (अज्ञानसों अथवा ज्ञानसों जिनने आत्मनिवेदन कियोहे तिनकों कहा चिंता हे ?) यह निवेदन श्रीआचार्यजीद्वारा ज्ञानकरि कियो अथवा अज्ञानतें काहूकी देखादेखि कियो तोहू चिंता नांही कर्त्तव्यहे काहेतें जो अगिको यह स्वभावहे जो अनजाने हाथ धरे अथवा जानिके हाथ धरे सो भस्म होय यह लौकिक अगिमें इतनो सामर्थ्यहे तो यह तो श्रीआचार्यजीद्वारा निवेदन कियो ताकों लौकिक गति क्यहू नहोय. श्रीभागवतपठस्कंधमें कहेहैं “अज्ञानादथवा ज्ञानादुत्तमश्लोकनाम यत्। संकीर्तितमघं पुंसां देहेदेधो यथाऽनलः” (अज्ञानसों अथवा ज्ञानसों ग्रहण कियो एसो जो उत्तमयश्वारे भगवानको नामहे सो अगि काष्टकों जरावेहें तेसैं पापकों जारिदेतहे) अज्ञानतें ओर ज्ञानतें भगवन्नाम ले तो सकल दोष भस्म होयजाय इत्यादि वचनकी भावना मनमें राखि चिंता रंचकहू नांही करनी एक प्रभुको आश्रय मनमेंराखि तहां जीवबुद्धितें यह चिंता होय जो साधन कछू नांही तब ज्ञानतें कहा फल सिद्ध होय ? सोहू चिंता नांही कर्त्तव्यहे जो साधन नांही बने तोउ श्रीआचार्यजीके अंगीकारतें निवेदनकी फलसिद्धि हे ओर ज्ञानवारे भक्तनों जो विरहभावना होय मो आगे श्लोकमें कहतहे ॥ ३ ॥

मूलं—विरहेण हरिस्फूर्त्या सर्वत्र क्लेशभावनात् ॥४॥

लीलातिरिक्तसृष्टौ हि निरानन्दत्वनिश्चयात् ।

यथाकथंचिद्विस्मृत्य प्रपंचं हृदये न्यसेत् ॥५॥

शब्दार्थः—जो ज्ञानवारेहें तिनकों लीलाव्यतिरिक्तपदार्थमें आनंद-रहितको निश्चय होयवेसूं सर्वत्र क्लेशकी भावना होय तासों विरहकरिकें हरिकी स्फूर्ति होय ताहिसों जेसेतेसें प्रपंचको विस्मरणकरिकें श्रीकृष्णकों हृदयमें स्थापन करे ॥४॥ टीका—जब श्रीआचार्यजीमहाप्रभु जीवकों विप्रयोगदान दे तब विरह हृदयमें होय, क्लेशकी भावना होय, हरि सर्व दुःखहर्त्ताको विरह सबठोर होय, श्रीठाकुरजीके संबंधविना ओर कछु न सुहाय, क्षणक्षणमें विप्रयोगकी भावना होय याभांति जाकों विप्रयोग अग्नि हृदयमें प्रकट होय तिनहीकों ये पुष्टिमार्गीयफलको अनुभव होय लीलासंवंधरहित जो प्रवाहीसृष्टिहे सो निरानंदहे उनकों प्रभु अपने आनंदको दान कबहू नांही करतहे वे चर्पणीकीनाई सदा संसारमें भ्रमतहे उनकों यह संसारही फलहे उनकों भगवल्लीलासंवंधको आनंद नांहीहे आनंदकरि रहितहे यहनिश्चय जाननों ओर भगवल्लीलासंवंधी देवी सृष्टिहे सो श्रीमहाप्रभुजीद्वारा शरण आय सत्संगकरि एकही वार जिनकों यह प्रपंच नांही छुटत सो थोरो थोरो क्रमक्रमतें छोडतहें अहर्निश अपने मनमें विचार करि प्रभुको स्मरण करतहें यह ज्ञान हृदयमें होतहे जो हमतो प्रभुके दासहे अज्ञानकरि प्रभुकों भूलि गयेंहें हमारो तो धर्म यहहीहे जो प्रभुकी सेवा स्मरण करने या भांति देवीजीवकों ज्ञान होतहे आसुरीजीवनकों नांही होतहे ॥४॥

१. पुष्टिमार्गीय ओर मर्यादामार्गीयके संबंधवारे ओर अंगीकाररहित होय सो धर्माचरण करे परंतु उनकी रुचिस्थिर न होयवेसूं जो भ्रमतहे सो चर्पणी जानने.

मूल-कृष्णं गूढं सदानंदं तथा लीलायुतं सदा ।

रसं स्वसमनामानं भक्तभावात्मकं पुनः ॥ ६ ॥

शब्दार्थ:-[पूर्वश्लोकमें श्रीकृष्णको हृदयमें स्थापन करे ऐसे कह्यो सो श्रीकृष्ण केसेहे? सो आगे निरूपण करतहैं] गूढ, सदा आनंदरूप, तथा लीलायुक्त, सदा रसरूप, अपनो नाम जो सचिदानंदात्मक (कृष्ण) हैं तिन वरोवर नामवारे (ब्रह्मरूप) ओर फिर भक्तनके भावात्मक ऐसे कृष्णको हृदयमें स्थापन करे ॥ ६ ॥ टीका-श्रीकृष्ण केसेहैं? महागूढ सर्वोपरि हैं जिनको वेदआदि पार नांही पावतहे 'नेति नेति' कहतहे, बुद्धिवानीतें अगोचरहे ओर सदा आनंदरूपहे, एकरसरूपहे जिनके आनंदकी एककणिकामें सगरे जगतको आनंदहे सो श्रीकृष्णाश्रयमें श्रीआचार्यजीमहाप्रभुजी कहेहैं " प्राकृताः सकला देवा गणितानंदकं बृहत् । पूर्णानंदो हरिस्तस्मात् कृष्ण एव गतिर्मम " (सर्वदेव प्राकृत हे (इनके आनंदकी गिनती होतहे जो मनुष्यनके शत आनंद होय जब मनुष्यगंधर्वको एक आनंद होय ऐसे गिनत गिनत) अक्षरब्रह्महू आनंदकी गणनावारेहे ओर श्रीकृष्ण पूर्णानंदहैं सो मेरी गति होउ) ओरदेवता तो प्राकृतहे तिनको आनंदहू प्राकृत हे अक्षरानंदहू सगरे आनंदकी गणनामेंहे अपार नांहीहे ओर श्रीकृष्ण पूर्णानंदहे जाके आनंदको पार नांही श्रीकृष्ण सदा आनंदरूप हैं ओर सदा ब्रजभक्तनके हित रसरूप लीलामें मगहैं भक्तनके संग मानादिक लीलानमें रसबुद्धि करतहैं आपु रसरूप अपने भक्तनसों मान छोडेहैं दीन होय मनावतहे सो गीतगोविंदमें कहेहैं-स्मरगरलखंडनं मम शिरसि मंडनं धेहि पदपल्लवमुदारम् " याभांति प्रार्थना करतहैं जो अपनो चरणारविंद मेरे मस्तक उपर धरो तुझारो पदपल्लव मेरे मस्तक को शृंगारहे या भांति अनेक दैन्यकरतहैं ब्रजभक्तनके भावात्मकहैं श्रीकृष्णको रस ब्रजभक्त भावकरिकें अनुभव करतहे ॥ ६ ॥

मूलं—यशोदोत्संगललितं मुग्धभावसमावृतम् ।

प्रपंचवैरिणं बाधहेतुलौकिकनाशनम् ॥ ७ ॥

शब्दार्थः—श्रीयशोदाजीके उत्संगमें शोभित, मुग्धभावमें अति-सुंदर, प्रपंचके वैरी ओर सेवामें बाधरूप लौकिक हेतुनको नाश करिवेवारे (श्रीकृष्णकों हृदयमें स्थापन करे) ॥७॥ टीका—श्रीकृष्ण कैसेहैं ? श्रीयशोदाजी अपने उत्संगमें लेय खिलावतहे सो परम शोभा देतहैं, मुग्धवालककीनाई श्रीयशोदाजीके कंठमें वेष्टितहे, प्रपंच जो यह देहसंबंधी स्त्री, पुत्र, पति, घर, लौकिक वैदिक कार्य, ताके वैरी हैं श्रीयशोदाजी रंचकहु भूमिमें प्रभुकों धरिकें दूध उफनत हतो सो सहारन गई सो श्रीठाकुरजी (जाने मोतें दुग्ध विशेष प्रिय हे यह) न सहि सके दधिके माट फोरिडारे ओर वामें मांखन भयो हतो सो बंदरनकों खवायदियो यह कहिकें यह जताये जो मोकों छोडिकें गृह-कार्य करेंगे ताको गृहकार्य लौकिक, वैदिक, कछु न सिद्ध होयगो. जो जो भक्तनें प्रभुको आश्रय कियो तिन सवनको प्रपंच नष्ट भयो काहेतें जो प्रपंचमें आसक्ति बाधकहे तासों लौकिक, काम, क्रोध, मद, मत्सर, अहंता, ममता, मायाकृत लौकिक सवनके नाशकर्ताहे ओर अपनेमें आसक्तिवारे भक्तनको लौकिक सब दूर करतहे ॥ ७ ॥

मूलं—स्वप्रवेशाय कामादिसर्वदोषनिवारकम् ।

स्वाथत्यक्ताखिलस्वीयपरमार्त्तिमहोत्सवम् ॥८॥

शब्दार्थः—अपने प्रवेशके अर्थ (हृदयमेंतें कामादिदोष निकसे तब प्रभुको आविर्भाव होय ताके लिये) कामादिक सर्व दोषनकों निवृत्त

१ यहां 'स्वायं त्यक्त्वा' एसो ह पाठ काहू पुस्तकमें दिखेहे. ताको अर्थ—अपने स्वार्थ (रमण) कूं छोडिके ह अंतर्हित होय सब भक्तनहूं अतिदान देयवें—परम उत्सववारे श्रीकृष्णकों हृदयमें स्थापन करने.

करिवेवारे ओर अपने लिये त्यक्तकियेहे अखिल (लौकिकवैदिक) जिननें
 ऐसे स्वीय-भगवदीयनकी विप्रयोगकी आर्ति करिकें हे वडो उत्सव
 जिनकों (एसे श्रीकृष्णकों हृदयमें स्थापन करे) ॥ ८ ॥ टीका-एसे
 श्रीकृष्ण जब भक्तनके हृदयमें प्रवेश करनको विचार करतहैं ताही
 समय उहभक्तके हृदयके काम, क्रोध, मद, मत्सर, आदि सकल दोष
 दूरी करतहैं यह कहिकें यह जताये जो जहांताई भक्तके हृदयमें कामादि
 दोष भरेहे तहांताई श्रीकृष्ण हृदयमें नांही पधारें जब दोष दूरी होय
 तब जानियें जो प्रभु हृदयमें निश्चयही पधारें, श्रीकृष्ण भक्तके हृदयमें
 पधारिकें (लौकिक वैदिक कार्य छोडिकें अपने दर्शनकी आर्तिवारे
 भक्तनको विरह होतहे सो) परमआर्ति (दुःख) देतहैं सो महा उत्सव-
 रूप जानतहैं सो ब्रजभक्तनकों सिद्धहे जिनके हृदयमें भावात्मक
 श्रीकृष्ण विराजतहैं तातें गृहकार्य नांही वनिआवत सगरोदिन वेणु-
 गीतयुगलगीतादिको गान करिकें बीतावत हैं ओर रासपंचाध्यायीमें
 प्रभु अंतर्धान भये पाछें ब्रजभक्तनकों महा विरह भयो तब फेरी प्रभु
 प्रकटे रसदान किये सो विरह न होतो तो प्रभु केसे प्रकटतें? तातें
 श्रीकृष्णमें जितनी विरहआर्ति अधिक होय सो महोत्सवरूप हे ॥ ८ ॥

मूलं-श्रीमदाचार्यहृदयशेषपर्यंकशायिनम् ।

अनंतभावरूपात्मगोपीरमणतत्परम् ॥ ९ ॥

शब्दार्थ:-श्रीमदाचार्यजीके हृदयरूप शेषशय्यामें पोढिवेवारे ओर
 अनंत भावरूप हे स्वरूप जिनको एसे ब्रजभक्तनके संग रमण करिवेमें
 तत्पर (श्रीकृष्णकों हृदयमें स्थापे) ॥ ९ ॥ टीका-एसे भावात्मक
 श्रीकृष्ण श्रीआचार्यजीके हृदयमें भक्तनसहित लीलांकरतहैं जेसें क्षीर-
 सागरमें शेषशय्याहे तेसेंही श्रीआचार्यजीको हृदय शय्यारूपहे तहां
 शेषशय्यापर नारायण पोढेहैं यहां श्रीकृष्ण भावात्मक रसात्मक पोढेहैं

वहां एकलक्ष्मी संगहे यहां अनेक भावात्मक कोटानकोटि ब्रजभक्तनके संग रमणमें तत्परहैं सो श्रीआचार्यजी अपने हृदयको भाव जतायके दशमस्कंधके श्रीसुबोधिनीजीमें कहेहैं “नमामि हृदये शेषे लीलाक्षीरा-
 विधशायिनम् । लक्ष्मीसहस्रलीलाभिः सेव्यमानं कलानिधिम्” (हृदय-
 रूप शेषमें लीलारूप क्षीरसागरमें पोढिवेवारे ओर अनेक लक्ष्मीकी लीलाकरिकें सेव्यमान कलाके निधिरूप श्रीकृष्णकों मे प्रणाम करूंहूं)
 याभांति अपने श्रीआचार्यजीके हृदयमें प्रभु लीला करतहैं तिनकों (मंगलाचरणमें) नमस्कार करि श्रीसुबोधिनीजी प्रकट कियेहे याभांति श्रीआचार्यजीमहाप्रभु अपने निजभक्तनकों अपने हृदयकी लीला प्रकटकरि दिखावतहैं सो भक्त याभांति लीलासहित श्रीआ-
 चार्यजीमहाप्रभुजीको स्मरणकरे तो अनुभव होय ॥ ९ ॥

मूलं-मधुपालिजवोद्युत्तरोमालिसुविराजितम् ।

प्रसन्नवदनांभोज करुणारसवद्दृशम् ॥ १० ॥

शब्दार्थः—भ्रमर पंक्तिके वेगयुक्त रोमपंक्तिकरिके विशेष शोभित ओर प्रसन्नहे मुखारविंद ऐसे ओर करुणा [दया] रसवारीहे दृष्टि जिनकी (ऐसे श्रीकृष्णकों हृदयमें स्थापन करे) ॥ १० ॥ टीका-श्री-
 कृष्ण कैसेहैं नाभिकमल पास रोमावलिहे सो भ्रमरकी पंक्तिकी नाई शोभादेतहे मुखारविंद अत्यंत प्रसन्नहे ब्रजभक्तनके संग अनेकलीला करतहैं ताकों आनंदभयोहे ताकरि वदनकमल अति प्रफुल्लितहे करुणारस संयुक्तहे भक्तनके उपर करुणारसयुक्तहे भक्तनके उपर करुणादृष्टि करि रसपान करावतहैं ॥ १० ॥

मूलं-वर्हिपिच्छशिरोभूषं शृंगाररसरूपिणम् ।

एवंविधानंतगुणं विधाय हृदये सदा ॥ ११ ॥

तस्य सेवां प्रकुर्वीत यावज्जीवं स्वधर्मतः ।

न फलार्थं न भोगार्थं न प्रतिष्ठाप्रसिद्धये ॥१२

शब्दार्थः—मयूरके पिच्छकोहे मुकुट जिनको ऐसे ओर शृंगाररसरूप
 ऐसे अनंतगुणवारे श्रीकृष्णकों सदा हृदयमें स्थापन करिकें ॥ ११ ॥ स्वध-
 र्मसों जीवे तहांताई इनकी सेवा करे फलके अर्थ, भोगके अर्थ,
 ओर प्रतिष्ठाकी सिद्धिके अर्थ नांही करे ॥ १२ ॥ टीका—वर्हि जो मो-
 रके पिच्छ ताको मुकुट सवारिकें मस्तकपे धरेहे सोई शृंगार रसरूपहे.
 मोर जब रसदान करतहे तब नृत्य करतहे तेसैंही श्रीठाकुरजी मोरकें
 मुकुटको शृंगार करि भक्तनकों रसदान करतहैं तातें मोरमुकुटको
 सिंगारहे सो शृंगार रसरूपहे या भांति रासादिक लीलामें अनेक
 जलस्थल लीलासंयुक्त श्रीकृष्णकों अपने हृदयमें ध्यान करि,
 स्मरणकरि, दर्शन करि हृदयमें सदाहि नित्य नियमकरि धारण
 करे ॥ ११ ॥ उपर कहे ऐसे शृंगाररसरूप श्रीकृष्णको सदा
 हृदयमें मानसी सेवासों ध्यान करे सो प्रथम तनुजा वित्तजा
 सेवा मन लगायकें करे तब मानसी सिद्ध होय सो सिद्धांतमुक्तावलि
 ग्रंथमें श्रीआचार्यजीमहाप्रभु कहेहैं “ कृष्णसेवा सदा कार्या मानसी
 सा परा मता” [कृष्णसेवा सदा करनी सो मानसी उत्तमहे] श्री-
 कृष्णकी सेवा सदा करे तिनकों मानसी सेवा सिद्ध होय यह पुष्टि-
 मार्गीय वैष्णवनको धर्महे जो श्रीकृष्णकी सेवा सदा करे जेसैं ब्राह्मण
 गायत्री न जपे तो ब्राह्मणपनो जाय तेसैं वैष्णव होयकें भगवत्सेवा
 न करे तो वैष्णवता जाय तातें श्रीकृष्णकी सेवा अपनो स्वधर्म
 जानिकें करे. कछु लौकिक, वैदिक, मोक्ष, आदि फलकी आशा
 राखिकें सेवा न करे में सेवा करूंगो तो मोकों वैष्णव जानिकें कोउ
 कछु दे जाय यह लोभ मनमें न राखे ओर प्रतिष्ठाके अर्थहु

सेवा न करे मैं सेवा करूंगो तो मेरी बड़ाई होयगी लोक भलो वैष्णव जानेंगे या भांति अपनकों प्रसिद्ध करिवेके लिये सेवा न करे सो श्रीभागवतनवमस्कंधमें भगवान् दुर्वासाप्रति कहेहैं " मत्सेवया प्रतीतं च सालोक्यादिचतुष्टयम् । नेच्छंति सेवया पूर्णाः कुतोऽन्यत् कालविप्लुतम् " (मेरी सेवा करिकें प्राप्त भये ऐसे सालोक्यादि चारे मोक्ष तिनकों नांही चाहतहैं काहेतें जो सेवाकरिकें पूर्णहैं सो कालमें डूबे ऐसे राज्यादिकों केसेंचाहे ?] इत्यादि वचनसों श्रीभगवान् कहतहैं जो भक्त मेरी सेवा करी पूर्णहै ता करि प्रतीत चारोप्रकारकी मुक्ति [सालोक्य, सामीप्य, सायुज्य, सारूप्य] में देतहों सो नांही लेतहैं ऐसे पूर्ण निष्कामहैं तिनकों कालवाधित पदार्थ कहाहे ? या भांति मनपूर्वक सेवा करे सो वैष्णवको स्वधर्महे ॥ १२ ॥

मूलं—श्रीमदाचार्यमार्गेण नान्येनापि कदाचन ।

न कल्पितप्रकारेण न दुर्भावसमन्वयात् ॥१३॥

शब्दार्थः—श्रीमदाचार्यजीनें सर्वनिर्णयमें सेवाप्रकार निरूपण कियोहे तारीतिसों सेवा करे अन्यमार्गतें कवहु न करे कल्पितप्रकारसों [ग्रीष्मऋतुमें आभरण धरनें इत्यादिकसों] न करे ओर दुर्भाव आयजाय [जैसे थोरी समृद्धिमें आभरण वस्त्रादि उत्तम न मिलें तासों दुर्भाव आवे] तेसें न करे ॥ १३ ॥ टीका—वै णव सेवा करे सो श्रीआचार्यजीमहाप्रभुजीके पुष्टिमार्गकी रीतिहे ताअनुसार करे कदाचित् भूलिकेहु अन्यमार्गकी रीतिसों न करे ओर अपने मनतें कल्पित प्रकारसोहु न करे जो प्रकार न जाने सो पुष्टिमार्गीय भगवदीयसों पुछिलेय मनकल्पित सर्वथा न करे दुर्भावसों न करे जो जैसें लौकिककार्यहे तेसें सेवाहुहे ऐसे अथद्वासों न करे प्रीतिपूर्वक सर्वोपरि परमफलरूप ज्ञानिकें सेवा करे ॥ १३ ॥

मूलं-तत्त्वं विदित्वा परमं यशोदोत्संगलालितम् ।

श्रीमदाचार्यतत्पुत्रान् हित्वाऽस्मत्स्वामिनीरपि ॥१४॥

तत्तुल्यबुद्ध्या नाशः स्यात्सर्वथेति विनिश्चयः ।

एतावती सती शिक्षा संक्षिप्ता ध्रियतां हृदि ॥१५॥

शब्दार्थः—श्रीयशोदाजीके उत्संगमें लालित श्रीकृष्णकों परमतत्त्व जानिकें श्रीमदाचार्यजी, इनकेपुत्र, ओर श्रीब्रजभक्तनकों छोड़िकें इनके तुल्य बुद्धितें सर्वथा नाश होय यह निश्चयहे इतनी सत्य संक्षेप शिक्षा हृदयमें धारण करनी ॥ १४ ॥ १५ ॥ टीका—वैष्णव भगवत्सेवा करे ओर यह चारों पदार्थकों परमतत्त्व जाने श्रीयशोदोत्संगलालित प्रथमतत्त्व, सो श्रीगुसांईजी कहेहैं “जानीत परमं तत्त्वं यशोदोत्संगलालितम् । तदन्यदिति ये प्राहुरासुरांस्तानहो बुधाः” (श्रीयशोदोत्संगलालित श्रीकृष्णकों परमतत्त्व जानें तातें अन्य अथवा सो अन्य ऐसे जो कहे तिनकों आसुर जानने) याभांति प्रथमतत्त्व श्रीयशोदोत्संगलालित, श्रीआचार्यजीमहाप्रभु दूसरो तत्त्व, श्रीगुसांईजी (श्रीविठ्ठलनाथजी) तृतीयतत्त्व, अस्मत्स्वामिनीजी (ब्रजभक्त) चतुर्थतत्त्व, यह परमतत्त्व अपने मनमें जाने ॥१४॥ उपर कहे चारों तत्त्व श्रीकृष्ण, श्रीआचार्यजी, श्रीगुसांईजी, श्रीस्वामिनीजी समान लौकिकमें काहूकों जाने इनको शीघ्रही नाशहोय वाकों असुर जाननो सो वार्त्तामें कहेहे जो मीरांवाईके घर रामदासजीनें श्रीआचार्यजीके पद गाये तब वाईनें कही जो कलु श्रीठाकुरजीके पद गाओ यह सुनतहि रामदासनें कही जो दारी रांड यह पद कहा तेरे खसमकोहे ? आजु पीछें तेरो मुख न देखूंगो पीछें मीरांवाई वोहोत मनुहार करि राखन लागी परंतु न रहे उह गाम छोड़िदियो ओर छीतस्वामी वीरवलके इहां वरसोंदी लेन गये हते तहां गायो “छीतस्वामी गिरिधरन श्रीविठ्ठल येही तेही

तेही येही कुछ न संदेह " यह सुनिकें वीरवलनें कही देशाधिपति पूछेगो तो कहा जवाव दोगे यह सुनतही छीतस्वामी कहे जो मेरे भाये तो तुही म्लेच्छहे आजु पीछें तेरो मुख न देखूंगो एसे कहिकें वरसोंदी छोडिकें चले आये एसी टेक वैष्णव राखे तातें यह चारो तत्वकों लौकिकमें कोई ईनसमान जाने ताको निश्चय नाश होय. अब श्रीहरिरायजी कहतहें जो या प्रकार पत्रमें शिक्षा लिखेहे सो तुम विचारिकें हृदयमें अवश्यही धारण करियो ॥ १५ ॥

मूलं-अन्येऽपि चोपदेष्टव्या यदि स्युरधिकारिणः ।

मिलन्ति स्वेच्छया श्रद्धायुताः पृच्छन्ति चेत्तदा ॥ १६ ॥

शब्दार्थः—जो अन्यहू अधिकारी मिले ओर श्रद्धायुक्त होय अपनी इच्छातें पूछे तो इनकोहू उपदेश करनो ॥ १६ ॥ टीका—यह ऊपर शिक्षा कहीहे सो ओरकें आगे मति कहियो कोई शिक्षाकें अधिकारलायक होय ताकेही आगे कहियो सो भगवदिच्छातें आपुही आयकें प्रार्थना करि श्रद्धायुक्त होय पूछे, चित्तलगायकें सुने, तासों कहियो अपनी इच्छातें बुलायके मति कहियो यह सर्वांपरि सिद्धांतहे तातें अधिकारी पात्रविना रस नांही ठहरे यह जानिकें ओरके आगे मति कहियो ॥ १६ ॥

मूलं-जीवतत्परतासिद्धौ कृपालुस्तेषु तुष्यति ।

यथा विपयिणां तोषो द्वतिकासु तथा हरेः ॥ १७ ॥

शब्दार्थः—जीवकी भगवत्परताकी सिद्धि होय तब कृपालु प्रभु भगवद्भक्त्यादिक करिवेवारेउपर प्रसन्न होय जैसे कामीपुरुषनको संतोष दृतीके उपर होयहे तेसे हरिको संतोष भगवद्भक्त्या करिवेवारे भक्तनकी उपर होयहे ! ॥ १७ ॥ टीका—उपर कहे ताप्रकार यह जीव भगवद्धर्ममें तत्पर होय तब यह पुष्टिमार्गीय फल सिद्ध होय जैसे प्रह्ला-

दकों हिरण्यकशिपुनें वोहोत दुःख दियो परंतु प्रह्लादजीनें अपनी तत्परता भगवद्धर्म भगवानको आश्रय न छोड्यो तब श्रीनृसिंहजी प्रकट होय प्रतिबंध दूर किये फल सिद्ध भये तेसेही पुष्टिमार्गीय वैष्णव पुष्टिमार्गमें तत्पर होय तो फल सिद्ध होय. प्रभु कृपालु हे सो ऐसे भक्तनके उपर संतोष पावे प्रसन्न होय जेसें विषयीकों दूतीमें संतोष होय तेसेही श्रीभगवान् अपने भक्तकी अनन्यता देखिके ताकी उपर वोहोत प्रसन्न होतहे प्रसन्न होय अपने दासके सगरे कार्य पूर्ण करतहे सदा कृपा करतहे प्रतिबंध दूर करिके फल देतहे यह निश्चय सिद्धांतहे॥१७॥

इति श्रीहरिरायजीकृतमष्टादशं शिक्षापत्रं श्रीगो-
पेश्वरजीकृतत्रजभाषाटीकासमेतं समाप्तम् ॥ १८ ॥

शिक्षापत्र १९.

एकोनविंशतितम-शिक्षापत्रमें यह कराल कलिकालमें कुसंगते सत्पुरुषनकीहू बुद्धि नाश पावतहे तहां सत्संग तो अत्यंत दुर्लभहे तासों निरंतर अष्टाक्षरमंत्रको उच्चार करिके मन श्रीमदाचार्यैकशरण करनो सो निरूपणहे. उपर कहे ताप्रकार वैष्णव तत्पर रहे तो फल सिद्ध होय तामें यह कलिकाल महाबाधकहे यासो बचे तो फल-सिद्धि होय सो आगे कहतहे-

मूल-इदानीं वर्त्तते कालः करालः कलिरीदृशः ।

यस्मिन् विनश्यति मतिः सतामपि कुसंगतः॥१॥

शब्दार्थः-अब एसो कराल कलिकालहे जामें सत्पुरुषकीहू मति

कुसंगतें नष्ट होयजायहे ॥ १ ॥ टीका—यह अव जो काल वर्तमानहे सो महाकरालहे प्रसिद्ध याको प्रवाह देखियतहे काहेतें जो सत्पुरुषकी मतिहू कुसंगतितें भ्रष्ट भईहे तो अज्ञानीकी बुद्धि भ्रष्ट होय यामें कहा केहेनो ? एसो कठिन काल आयोहे ॥ १ ॥ तहां कोई कहे जो सत्पुरुषकी बुद्धि क्यों भ्रष्ट भई ? तहां कहतहैं—

मूलं-सत्संगो दुर्लभो यत्र सततं सत्प्रसंगतः ।

कथाः कृष्णचरित्रैकयुता नित्यं भवंति हि ॥२॥

शब्दार्थः—सत्संग दुर्लभहे जा सत्संगमें सत्पुरुषके प्रसंगसों श्रीकृष्णके चरित्रकरिकें युक्त एसी कथा नित्य होतहे ॥ २ ॥ टीका—सत्संगतो वोहोत दुर्लभहे मिलत नाहीं निरंतर दुःसंगतें सत्प्राणीकी बुद्धि नाश भईहे एकक्षण हू भगवदीयको प्रसंग दुर्लभ भयोहे तो सदा कहाँते होय ? जब निरंतर भगवदीयको संग होय कृष्णकी कथा कृष्णकी लीला प्रीति-सों सुने नित्य श्रीकृष्णकी सेवा करे, सो जो भगवदीय आपहू भगवत्सेवा करत होय कथा लीला सुनत होय एसो भगवदीय होय आपहू करे ओरकों बतावे ताकों संग करे जेसैं भीज्यो कपरा होय सो सूके कपराकों भीजावे तेसेही आपु भगवद्धर्ममें तत्पर होय ओरहूकों तत्पर करे ॥ २ ॥

मूलं-निजाचार्यपदांभोजसेविनस्तु सुदुर्लभाः ।

अदंभिनः कृष्णसेवाकथाचिंतनतत्पराः ॥ ३ ॥

शब्दार्थः—अपने श्रीआचार्यजीके चरणारविंदकों सेवन करिवेवारे ओर दंभरहित तथा श्रीकृष्णकी सेवा कथाके चिंतन करिवेमें तत्पर ऐसे भगवदीय तो दुर्लभहैं ॥ ३ ॥ टीका—ओर भगवदीय केसैं होय ? जो अपने श्रीआचार्यजी महाप्रभुजीके चरणकमलकी सेवामें अहर्निश जाको मन होय ऐसे अनन्य पुष्टिमार्गीय भगवदीय वोहोत दुर्लभ हे

अदंभी होय, पाखंडी न होय, श्रीकृष्णकी सेवामें तत्पर होय, श्रीकृष्णकी लीलाचिंतनमें तत्पर होय काहूके दिखायवेके लिये सेवा न करत होय, मनसों शुद्ध होय, ऐसे भगवदीय तो या कालमें वोहोत दुर्लभहैं ॥ ३ ॥

मूलं-अहं तु सर्वथा नित्यं तथा सत्संगवर्जितः ।

क्लिश्यामि मनसा नूनं निरानंदेन नित्यशः॥४॥

शब्दार्थः-अब श्रीहरिरायजी अपनकों सत्संगके अभावको निरूपण करतहैं जो में तो सर्वथा नित्य ऐसे सत्संगकरिकें वर्जितहों(तासों) आनंदरहित मनकरिकें नित्य क्लेश पावतहों ॥ ४ ॥ टीका-ओर में केसोहूं जो सर्वथा नित्य सत्संग करिकें वर्जितहों मोको तो सत्संग मिलत नांही तातें में मनमें वोहोत क्लेश पावतहों जो मोको भगवदीयको संग न भयो जो भगवदीयको संग होय तो श्रीकृष्ण सदा आनंदरूपहे तिनके आनंदको अनुभव होय, भगवदीय विना आनंद करि नित्य रहितहों ॥ ४ ॥

मूलं-बाष्पनिःसरणोपायं न पश्यामि महीतले ।

को वा मदीयहृदयदुःखं दूरीकरिष्यति ॥ ५ ॥

शब्दार्थः-अश्रुके निकसवेको उपाय (भक्तकों) पृथिवीके तलमें में नांही देखतहों तासों मेरे हृदयकों जो दुःखहैं तिनकों कोन दूर करेगो ? ॥ ५ ॥ टीका-अब श्रीहरिरायजी दीनताके आवेशमें कहतहैं जो में यह महीतल (पृथिवीमें) वासं कियो सो काहेतें कियो जब हरिशरणको उपाय न बनि आयो काहेतें जो पृथिवी उपर आय हरिशरण न करे ताको जन्म वृथाहे सो प्रह्लादजी श्रीभागवतसप्तमस्कंधमें कहेहैं-“कौमार आचरेत्प्राज्ञो धर्मान् भागवतानिह । दुर्लभं मानुषं जन्म तदप्यश्रुवमर्थदम् ” (कुमार अवस्थामें

बुद्धिमान् यह संसारमें भगवद्धर्मको आचरण करे काहेतें जो मानुष-जन्म दुर्लभहे फेरि निश्चल नांहीहे तोहू अर्थ देवेवारोहे) ओर एकादश-स्कंधमें जनकविदेह कहेहैं—“दुर्लभो मानुषो देहो देहिनां क्षणभंगुरः । तत्रापि दुर्लभं मन्ये वैकुण्ठप्रियदर्शनम् ” (देहिजीवको यह मनुष्यको देह दुर्लभहे ओर क्षणभंगुरहे तामेंहू भगवद्धर्मको दर्शन दुर्लभ मानूहूँ) यह वाक्यतें यह मनुष्यदेह महाउत्तमहे कौमार अवस्थामें प्रभुही शरण करि भगवद्धर्म करनो उचित हे काहेतें जो क्षणमें भंग होय-जाय तो अंतकालसमय कछु नांही वनि आवेगो फेरि यह देह मिलनो दुर्लभहे तातें भगवद्धर्म भगवानको दर्शन दुर्लभहे यहदेहसो वने सो अवश्य कर्तव्यहे सो मोसो तो कछु न भयो तातें यह देहको महाशोकहे जेसे चिंतामणि पायके कोडिके पलटे देई फेर चिंतामणिके गुण सुने तब अनेक दुःख पावे तेसैं यह देह पायके लौकिकमें लगावे हरिशरण नांही करे ताको जन्म वृथाहे तातें में हरिशरणको उपाय नांही कियो सो हृदयमें महादुःखहे यह मेरे हृदयको दुःख दूरि करे एसो कोन हे ? ॥ ५ ॥

मूलं-ब्रजवासस्तथा श्रीमद्यमुनादर्शनं गतम् ।

दूरे गोवर्धनदृशिदूरे तन्नाथदर्शनम् ॥ ६ ॥

शब्दार्थः—ब्रजमें वास तथा श्रीमद्यमुनाजीको दर्शन तथा यमुनाजीके स्वरूपको ज्ञान तथा श्रीगिरिराजके स्वरूपको ज्ञान ओर श्रीगोवर्धननाथजीको दर्शन सर्व दूरि गये ॥ ६ ॥ टीका—हरिशरणको साधन कछु न वनि आयो ब्रजवासहू न भयो ब्रजदेशहे सो महाउत्तमहे प्रभुशरण करिवेको स्थलहे तहां परे रहियें तो प्रभु अपनो जानिकें कृपाकरे सोहू मोको न भयो ओर श्रीयमुनाजीको दर्शन नांहीहे सो श्रीयमुनाजी

केसे हे जो दुष्ट प्राणी अनजाने एकवारहू जलपान करे तो उह जीवकों यमयातना न होय एसो प्रतापहे. जा जीव श्रीयमुनाजीको आश्रय करे तिनकों श्रीयमुनाजी श्रीठाकुरजीकी लीलाको अनुभव करावे सर्व कार्य सिद्ध करि अलौकिक देह सिद्ध करे ऐसे श्रीयमुनाजीको दर्शनहू नांहीहे ओर श्रीगिरिराजहू मोतें दूरिहे सो श्रीगिरिराज केसेहे जो इनके संगतें भीलनीकोंहू भक्ति भई एसें श्रीगिरिराजहू मोतें दूरिहे और श्रीगोवर्द्धननाथजीको दर्शनहू मोकों दुर्लभ भयोहे या भांति में परदेशमें हों अव में कहा करूं तहां कोई कहे जो मनमें भाव करि जा वस्तुको स्मरण करे सो पासही हे तातें मनसों भाव करि ब्रज, श्रीयमुनाजी, श्रीगिरिराज, श्रीगोवर्द्धननाथजी, इन सवनके दर्शन करि लेउ इतनो खेद क्यों पावतहो ? याभांति कोई कहे तहां कहतहे ॥ ६ ॥

मूलं-विषयाक्रांतितो दूरे भगवद्भावसंततिः ।

देशांतरस्थितस्याद्य दूरे संगः सतामपि ॥७॥

शब्दार्थः—विषयाक्रांतिसों भगवद्भावको विस्तार दूर रह्यो ओर अव देशांतरमें रह्यो एसो जो में ताकों सत्पुरुषको संगहू दूर रह्यो ॥ ७ ॥ टीका—विषयाक्रांतिसों देह भरि रह्यो होय तिनकों भगवद्भाव बोहोत दूरिहे जिनको हृदय शुद्ध होय अष्टप्रहर लौकिक नांही स्फूरे मनमें भगवत्स्मरण रहे तिनकों भावनासों सगरी वस्तु सिद्ध हे ओर मोकों विषयावेश करि भगवद्भाव दूरिहे अनेकदेशांतरमें स्थितहों तासों अनेकप्रकारके लौकिक प्रवाही सृष्टिको संगहे भगवदीयनको संग मोतें दूरिहे भगवदीय मिले तब उनसों मिलिकें भगवद्भाव विचारे सो मोतें दूरिहे तातें मनमें खेद बोहोत होतहे ॥ ७ ॥

मूलं-तदभावात् कथा दूरे ततो विमुखता हृदः ।

एवंविधस्य सततं श्रीकृष्णः शरणं मम ॥ ८ ॥

शब्दार्थः—सत्संगके अभावसों भगवत्कथा दूरिहे तासों हृदयकी विमुखता (वहिर्मुखता) होयहे ऐसे प्रकारको जो में ताकों निरंतर श्रीकृष्ण आश्रय हो ॥ ८ ॥ टीका—जो भगवदीय होय तो श्रीसुबोधिनीजी आदि भावात्मक कथा कहे सो सुनिकें हृदयमें भाव उत्पन्न होय सो भगवदीय मोतें दूरिहे तातें भावात्मक कथाहू मोतें दूरि हे तातें हृदयमें विमुखता छायरहीहे सो याभांति सर्वसाधनकरि रहितहों यह देशांतरमें स्थितहों एसो जो में ताकों श्रीकृष्णही शरण होउ जब ओर कछु न बने तब शरणकी भावना करतहों ओर में कहा करूं सो श्रीआचार्यजीमहाप्रभु श्रीकृष्णाश्रयमें कहेहैं “ विवेकधैर्यभक्त्या-दिरहितस्य विशेषतः । पापासक्तस्य दीनस्य कृष्ण एव गतिर्मम ” (विवेक, धैर्य, भक्ति आदिसों रहित, विशेषकरिकें पापमें आसक्त ओर दीन एसो जो में तिनकों गति (आश्रयस्थान) श्रीकृष्णही हे) विवेक, धैर्य, भक्ति आदि सर्व धर्म करि रहित होय, पापासक्त होय, अति दीन होय सोउ श्रीकृष्णकूं शरण करे तातें में सर्वसाधन करि रहितहों तासों निरंतर श्रीकृष्णही शरण किये हे ॥ ८ ॥

मूलं—को वेद कृष्णः किं कर्त्ता न जानेऽहं कृपानिधिः ।

तथापि श्रीमदाचार्यशरणं करवै मनः ॥ ९ ॥

शब्दार्थः—कोन जानें कृपाके निधि श्रीकृष्ण कहा करेंगे सो में नांही जानतहों तोहु मनको श्रीमदाचार्यजीरूप एकशरण करूं ॥ ९ ॥ टीका—सो यह में नांही जानत जो श्रीकृष्ण कहा करिवेवारेहे मेरी कहा गति करेंगे सो जानी नांही जात हे परंतु इतनो श्रीआचार्यजी-महाप्रभुजीकी कृपातें जानतहों जो श्रीकृष्ण दयानिधि हैं अपने निजभक्तनपर निश्चय कृपा करतहैं तातें में एक श्रीआचार्यजीके चरणकमलकी शरण अपने मनतें करि रह्योहूं ताकरि श्री-

कृष्णहू कृपा करेंगे और सगरो कार्यहू सिद्ध होयगो यह कहिकें, यह जताये जो श्रीआचार्यजीकी शरण जीव आयोहे तिनके सगरे कार्य सिद्ध होयंगे ब्रज, श्रीयमुनाजी, श्रीगिरिराजजी, श्रीजीकी सगरी लीला इनके अनुभव होयगो ओर जो श्रीआचार्यजीकी शरण नांही आयो तिनकों कछु फलसिद्धि नांही हे तातें में श्रीवल्लभाचार्यजीकी शरण मन कियोहे या आश्रयकरि अपने मनकों समुजाय राखेहे ! ॥ ९ ॥

मूलं-विशेषः प्रेमजित्पत्राद्बोद्धव्यः सर्ववृत्तयुक् ।

अनेन केवलेनैव किञ्चित्स्वस्थं मनो मम ॥ १० ॥

शब्दार्थः—सर्ववृत्तांतसहित विशेष (समाचार) प्रेमजीनामके पत्रसों जाननो यह केवल बोधकरिकेही मेरो मन कछु स्वस्थ हे ॥ १० ॥ टीका—अब श्रीहरिरायजी लिखतहे जो विशेष समाचार प्रेमजीके पत्रतें जानोगे श्रीमहाप्रभुजीकी शरण करिकें किञ्चित् मनमें स्वास्थ्य हे जो महाप्रभुजी कृपा करि अपनी ओर देखेंगे ॥ १० ॥

इति श्रीहरिरायजीकृतमेकोनविंशतितमं

शिक्षापत्रं श्रीगोपेश्वरजीकृतब्रजभाषा-

टीकासमेतं समाप्तम् ॥ १९ ॥

शिक्षापत्र २०

विंशतितमशिक्षापत्रमें शरणागतिसों प्रथम भये दोषकी चिंता न करनी, ओर शरणागति पीछें तो सावधानतासों रहेनों, निवेदनको अनुसंधान करनो, भगवत्सेवा गुणगानादिक करने, थोरे जानिवेवारेके वचनतें पुष्टिमार्गतें बुद्धि चलित न करनी, सर्वदा सत्संगसों रहेनों, अपने

. १ यद्यपि बोहोत पढ़े भये होय परंतु पुष्टिमार्गाय ग्रंथ जानते न होय अरु जानते होय तो वामें श्रद्धा न होय सो धीरे जानिवेवारे समजने.

श्रीआचार्यजीकेही वाक्यमें निष्ठा राखनी, पुष्टिमार्गीय भगवदीयसों मिलिकें रहेनो यहमार्गतें विरुद्ध होय तिनके संगरहित होयकें रहेनो यह निरूपण हे.

मूलं-समाचारावगत्यैव संतोषो जनितो महान् ।

सदोषेऽपि हरिर्जीवेऽनुग्रहं कुरुते स्वतः ॥ १ ॥

शब्दार्थः-समाचारकों जानिकेंही बड़ो संतोष भयो काहेतें जो दोषसहित जीव उपरहू हरि भगवान् आपतेंही अनुग्रह करतहे ॥१॥ टीका-अब श्रीहरिरायजी कहतहे जो तुम्हारो पत्र आयो सो वांचिकें मनमें संतोष भयो काहेतें जो यद्यपि गृहभंगको बड़ो दुःख हतो सो तुम्हारो दुःख निवृत्त भयो तुम्हारे हृदयमें संतोष भयो ताकरि हमहू मनमें संतोष पायेआगें जो शिक्षा हे सो मनमें धारण करियो. हरि जो भगवान् सो केसेंहे यद्यपि जीवके दोषकों जानतहे तोहू अपनी ओरतें जीवपर अनुग्रह करतहे जीवकी ओर नांही देखतहे. शिशुपाल श्रीकृष्णकी निंदाही करतो एसो दुष्ट हतो ताहूकों गति दीनी, इंद्रने जलवृष्टि करि द्वेप कियो तोहू बापें प्रसन्न भये, एसे श्रीकृष्ण हे सदा कृपाही करत हे अपने प्रमेयवलतें यह जीवपर अनुग्रह करत हे तातें श्रीकृष्णहीको भजन, स्मरण, आश्रय सदा कर्तव्य हे ॥ १ ॥

मूलं-प्रमेयवलमासाद्य किमसाध्यं तदा भवेत् ।

अतः प्रथमदोषाणां चिंता नैव विधीयताम् ॥२॥

१ मूलश्लोकमें गृहभंगकी बात नांहीहे ओर टीकामें गोपेश्वरजीनें लिखिहे तासों यह अनुमान होयहे जो छठे शिक्षापत्रके प्रथमश्लोकके टिप्पणमें लिख्यो हे ता प्रमाण नवमशिक्षापत्रमें प्रेम, आसक्ति, ओर न्यसनको निरूपण वांचिके तथा दशमपत्रमें आत्तिके कागण वांचिके चित्तको समाधान भयो ताके समाचार उन्नीसमे पत्रके ज्ञानमें लिखे सो वांचिके श्रीहरिरायजीनें यह श्लोक लिख्यो ताको अभिप्राय श्रीमोपेश्वरजी जानिके टीकामें यह वृत्तांत लिख्यो हे.

शब्दार्थः—प्रमेयबलकों प्राप्त होय तब असार्थ कहा होयहे तासों प्रथमके दोषनकी चिंता नांही कर्त्तव्यहे ॥ २ ॥ टीका—यह पुष्टिमार्गमें तो प्रमेयबलहीतें सर्वकार्य सिद्ध होयहे जीवके साधनतें कछु कार्य सिद्ध होत नांही ओर जीव कहांताई साधन करेगो याके साधनतें दोष दूरिहू नांही होय सकत तातें वृथा चिंता क्यों करनी सो श्री-महाप्रभुजी कहेहैं " जीवाः स्वभावतो दुष्टाः " (जीव स्वभावसों दुष्टहे) जीव तो स्वभावतें दुष्टहे परंतु अपने अज्ञान करि उत्तम मानतहे तासों जीवके साधनतें कछु नांही सिद्ध होय प्रभु प्रमेयबलतें सिद्ध करेगे एसे विचारि चिंता नांही करनी ॥ २ ॥

मूलं—संजातभगवद्भावमपथ्यमिव सदगुणम् ।

लोकनिंदाभवं दुःखं न धर्त्तव्यं हि मानसे ॥ ३ ॥

शब्दार्थः—आछे गुणवारे औपधकों अपथ्य जेसें तेसें भगवद्भाव उत्पन्नभयो तामें लोककी निंदासों दुःख होय सो मनमें नांही धरनों ॥३॥ टीका—लौकिकचिंतातें भगवद्भावको नाश होय ताको दृष्टांत कहतहैं जेसें सुंदर ओपद खाय ताके उपर अपथ्य करे (खारो खाटो खाय) तो बिनापथ्य ओपदको गुण जाय ओर रोग बढे तेसें मनमें भगवद्भाव होय स्मरण भजन करे सो सुंदर ओपदकीनाईहे सो लौकिक चिंतादि कुपथ्य करे तो भगवद्भाव उलटो जाय ताहीतें श्रीआचार्यजी-महाप्रभु नवरत्न ग्रंथमें चिंतानिवृत्तिकरिवेकें लिये कहेहैं " चिंता कापि न कार्या निवेदितात्मभिः कदापि " (निवेदन कियेहैं आत्मसंवंधी जिननें एसे वैष्णव कछु चिंता कोयदिनहू नांही करे) जाजीवने निवेदन कियोहे तिनकों तो निश्चयही चिंता नांही कर्त्तव्यहे ओर जो लौकिकवारे निंदा करतहैं सोहू महादुःखरूपहे सो अपने मनमें नांही धरनी काहेतें जो लौकिकमें अनेक भांतिके जीवहे तिनको कह्यो न

करियें तो निंदा करे ताको सहनही उचितहे जेसैं श्रीभागवतमें निरूपणहे जो गोपीजननें लोकवेद छोडिकें प्रभुको भजन कियोहे तब गोपनें ओर मातापितानें निंदा करि सो धारण न करी तब श्रीकृष्ण प्रसन्न होयकें रासलीलामें फलदान कियो तातें भगवदीयकों लौकिक निंदा सहन करनी ॥ ३ ॥

मूलं-अग्रे तु सावधानत्वं विधेयं सर्वथा पुनः ।

दुःसंगादिमहादोषा नाशयंत्येव तत्क्षणात् ॥४॥

शब्दार्थः-आगें निश्चय फेरि सावधानपनो करनो काहेतें जो दुःसंगादि बड़े दोषहे सो जवमिले ताही क्षण भगवद्भावको नाश करे । टीका-आगें सर्वथा सावधान रहियो काहेतें जो दुःसंग दोष महाबाधकहे सो जन्मजन्मतें भगवद्भाव जोरिकें एकठोर कियो होय सो एक क्षणमेंही तत्काल दुःसंगतें सगरे भावको नाश होय. श्रीभागवतादिपुराणमें कहेहे जो बड़े बड़े भगवदीय दुःसंगतें गिरेहें तातें तुम दुःसंगतें निश्चय क्षणक्षणमें सावधान रहियो ॥ ४ ॥

मूलं-असज्जनकृता निंदा तुष्टयै सत्त्वविनिश्चयात् ।

यतस्तेषां न रोचन्ते संत एव हि सर्वथा ॥ ५ ॥

शब्दार्थः-असत् पुरुषने करी एसी जो निंदा सो धैर्यके विशेष निश्चयके कारणसों संतोषार्थ हे काहेतें जो जासों असत् पुरुषनकों निश्चय सत्पुरुष प्रिय नांही लागत हे तथा सत्पुरुष असत्पुरुषकी वाणीमें प्रीति नांही राखत हे ॥ ५ ॥ टीका-असज्जन (अवैष्णव तथा अन्यमार्गीय तथा बहिर्मुख निंदा करे सो सुनिकें मनमें दुःख मति पाईयो मनमें प्रसन्न (संतुष्ट) रहियो जो यह सत्य ही कहतहे में तो निश्चय ही दोषवान् ही हों या भांति. मनमें ज्ञान, करि

विचारि निंदाकों सहन करनी सो यातें जो संत जनहे उन दुष्टनकी वाणीमें सर्वथा रुचि राखत नांही जेसैं प्रह्लादजीकों हिरण्यकशिपुनें केसो दुःखदियो ओर निंदा करि सो प्रह्लादजीनें सहीलियो तामें प्रह्लादजीको कछु विगयो नांही हिरण्यकशिपुको प्रभुनें मायों तातें जो संतहे सो दुष्टनकी वाणीमें मन सर्वथा राखत नांही ॥ ५ ॥

मूलं-मार्गविश्वासरहिताः पूर्वदोषैकदृष्टयः ।

यतो नामैव हि हरेः सर्वदोषनिवर्त्तकम् ॥ ६ ॥

शब्दार्थः—जासों [असज्जन] पुष्टिमार्गमें विश्वासरहितहे ओर, पूर्वतेंही दोषदृष्टिवारे हे तासों इनकी वाणीमें रुचि न राखे तथा इनकों सत्पुरुष न रुचे ओर हरिको नामहे सोही सर्वदोषकी निवृत्ति करिवे-वारोहे ॥ ६ ॥ टीका—वह दुष्ट केसेहैं जो यह पुष्टिमार्गमें विश्वास रहितहे सो काहेतें जो पूर्वजन्मतें दोषही देखतहे पुष्टिमार्गको प्रकार समरे जगतमें प्रसिद्धहे सो देखियत नांही तासों मार्गमें शरण आये हैं तोहू प्रथमकी दुष्टताहे तातें दोषही देखतहैं अपनी कुटिलता नांही छोडतहैं काहेतें जो वह असुरहैं तातें मार्गमें विश्वास नांहीहे सदा दुष्टहैं तातें दुष्टता प्रकट करतहैं ऐसे जाननो ओर भगवानको नाम साधारणमें हूं एसोहे जाको नाम लेतमात्र सर्व दोष दूरि होतहैं सो पष्ठस्कंधश्रीभागवतमें कहेहैं “अज्ञानादथवा ज्ञानादुत्तम-श्लोकनाम यत् । संकीर्तितमघं पुंसां दहेदेधो यथानलः ॥१॥ सांकेत्यं पारिहास्यं वा स्तोमं हेलनमेव वा । वैकुण्ठनामग्रहणमशेषाघहरं विदुः ॥२॥ नामोच्चारणमाहात्म्यं हरेः पश्यत पुत्रकाः । अजामिलोऽपि ये-नैव मृत्युपाशादमुच्यत ॥३॥” (अज्ञानसों अथवा ज्ञानसों उत्तमश्लोक (भगवान्) के नामको कीर्तन अथि काष्टको जेसैं जारें तेसैं पुरुषके पापकों जारेहे ॥१॥ संकेतमें लियो, परिहासमें लियो, गीतालापपूरणार्थ और

अवज्ञासूं लियो एसो जो भगवन्नामको ग्रहण सो समग्र पापकों हरे हे
 ऐसे ऋषिलोक जानेहैं ॥२॥ हे पुत्र [दूत] ! हरिके नामको माहात्म्य
 देखो जाकरिकेही अजामिलहू मृत्युके पाशसों छुटि गयो ॥ ३ ॥)
 और अष्टमस्कंधमें वाक्यहे “मंत्रतस्तंत्रतश्छिद्रं देशकालार्हवस्तुतः । सर्वं
 करोति निश्छिद्रं नामसंकीर्तनं तव” [शुक्राचार्य श्रीवामनजीकों कहेहैं-
 मंत्रसों, तंत्रसों, देशकालयोग्यवस्तुसों जो न्यून होय सो सर्व आपके
 नामकीर्तनहि पूर्ण करतहे] ओर “ते सुभाग्या मनुष्येषु कृतार्था
 नृप निश्चितम् । स्मरन्ति स्मारयन्तीह हरेर्नाम कलौ युगे” (जो यह
 कलियुगमें हरिके नामकों स्मरण करेहैं तथा स्मरण करावेहे सो हे राजन् !
 मनुष्यनमें भाग्यसहितहैं तथा कृतार्थहैं यह निश्चयहे) द्वादशस्कंधमें
 शुक्रदेवजीको वाक्यहे “कलेदोपनिधे राजन्नस्ति ह्येको महान् गुणः ।
 कीर्तनादेव कृष्णस्य मुक्तबंधः परं व्रजेत्” (दोपके निधिरूप कलियुग-
 को एक बड़ो गुणहे जो श्रीकृष्णके कीर्तनसोंही मुक्त होयगयेहे बंध
 जिनके ऐसे मनुष्य परकों प्राप्त होय) पष्ठस्कंधमें विष्णुदूतको वाक्यहे
 “ब्रह्महा पितृहा गोघ्नो मातृहाचार्यहाधवान् । श्वादः पुलकसको वापि
 शुद्धचेरन् यस्य कीर्तनात्” (ब्रह्महत्या करिवेवारो, पितृहत्या करिवे-
 वारो, गोहत्या करिवेवारो, मातृहत्या करिवेवारो, आचार्य (वेदोक्तयज्ञ
 करिवेवारो) अथवा आर्य (अपनेसैं बड़े)की हत्या करिवेवारो, पापी
 होय, चंडाल होय, नीचजातिमें उत्पन्न भयो होय सोहू जिनके कीर्तनसों
 शुद्ध होय) इत्यादिक ठोर ठोर नामको माहात्म्य हे तातैं सहजहूमें
 मुखमें भगवन्नाम अनजाने निकसिजाय तोहू वह नाम सर्वदोष दूरि-
 करत हे ॥ ६ ॥

मूलं-तदपि श्रीमदाचार्यवदनावुजनिःसृतम् ।

तत्प्रकाशितमार्गस्य सर्वसंपादनक्षमम् ॥ ७ ॥

शब्दार्थः—सो भगवन्नामहू श्रीमदाचार्यजीके मुखारविंदसों निकस्यो [अष्टाक्षरमंत्र हे सो] श्रीआचार्यजीने प्रकाश कियो एसो जो भक्तिमार्ग हे तिनकों सर्व संपादन करिवेमें योग्यता वारो हे ॥ ७ ॥ टीका—यद्यपि सर्व भगवन्नाम सर्वगुणदाताहे संसारदुःखतें छुडावेहे तोहू तामें यह अष्टाक्षरमंत्र [श्रीकृष्णः शरणं मम] रूप नाम श्रीआचार्यजीमहाप्रभुजीके वदनकमलतें निकस्योहे सो पुष्टिमार्गमें स्थिति करावतहे काहेतें जो यह पुष्टिमार्गहू श्रीआचार्यजीमहाप्रभुजीने प्रकट कियो हे तासों जा जीवकों श्रीआचार्यजीद्वारा नाम प्राप्त भयोहे तिनकों सर्व सिद्धि होयगी सो श्रीगुसांईजी विज्ञप्तिमें कहेहैं “ यदुक्तं तातचरणैः ‘ श्रीकृष्णः शरणं मम ’ । तत एवास्ति नैश्चित्यमैहिके पारलौकिके ” [जो तातचरण श्रीमहाप्रभुजीने “ श्रीकृष्णः शरणं मम ” यह अष्टाक्षरमंत्र कहाहे तासोंही यहलोक ओर परलोकसंबंधि सर्वमें निश्चितता हे] इत्यादि वचनके भावसों अष्टाक्षरमंत्रको जप वैष्णव करे यह सर्व सिद्ध करिवेमें समर्थ हे ॥ ७ ॥

मूलं-ततोऽपि ब्रह्मसंबंधः सर्वदोषनिवर्तकः ।

निर्दोषानंदसेवापि दोषाभावप्रसाधिका ॥८॥

शब्दार्थः—तासोंही [भगवन्नामसोही] ब्रह्मसंबंधहे सो सर्वदोषकों निवृत्त करिवेवारोहे ओर निर्दोष आनंदरूप भगवानकी सेवाहू निर्दोष आनंदरूपहे ओर दोषके अभावकों साधिवेवारीहे ॥८॥ टीका-उपर कहे जो नामतें सर्वदोषको नाश होतहे तो जा जीवकों ब्रह्मसंबंध होय तिनके सर्वदोषको नाश होय यह तो उचितहीहे काहेतें जो सर्व दोष निवृत्तकरणार्थ तो प्रभुने ब्रह्मसंबंधकी आज्ञा दिनीहे सो सिद्धांतरहस्यमें श्रीआचार्यजीमहाप्रभु कहेहैं “ ब्रह्मसंबंधकरणात् सर्वेषां देहजीवयोः । सर्वदोषनिवृत्तिर्हि दोषाः पंचविधाः स्मृताः ” (ब्रह्मसंबंधकि-

यैतें सर्वके देहजीवके सर्वदोषकी निवृत्ति निश्चय होतहे सो दोष पांच प्रकारके हे) इत्यादि वचनसों जाननो जो श्रीआचार्यजीद्वारा जा जीवकों ब्रह्मसंबंध भयो तिनके सकल दोष दूरि भये काहेतें जो भगवान् निदोषहे सो जीवहू निदोष होय सेवा करे तो अंगीकार होय तातें श्रीमहाप्रभुजी अपने जीवनकों ब्रह्मसंबंध कराय निदोष करिकें पाछें सेवामें लगाये सो भगवत्सेवा केसीहे जामें दोषही नांही निदोष आनंदरूपहे सगरे दोष (प्रतिबंध) कों नाश करिवेवारीहे, तहां कोई शंकाकरे जो ब्रह्मसंबंधतेंही सर्व दोषको नाश भयो तब फेरि सेवातें कोनसे दोषको नाश होय ? ताको समाधान यहहे जो देहजीवके सगरे दोष तो ब्रह्मसंबंधतें निवृत्तभये फेरि प्रभुकी लीलाप्राप्तिमें प्रतिबंधरूप जो दोषहे सो सेवातें दूरि होय तब स्वरूपानंदको अनुभव होय यह भाव विचारि ब्रह्मसंबंध ओर भगवत्सेवा करे ॥ ८ ॥

मूलं-गुणगानं तु सर्वेषां दोषाणां विनिवारकम् ।

गुणगाने ज्ञानमार्गादुत्कर्षः प्रभुणोदितः ॥ ९ ॥

शब्दार्थः—गुणगान तो सर्वदोषनकों निवृत्त करिवेवारो हे तासों ज्ञानमार्गसों गुणगानमें उत्कर्ष प्रभुने कह्योहे ॥ ९ ॥ टीका—जो भगवद्गुणगान सगरे दोषको निवारक हे सो गुणगान दोय प्रकारको हे एक पुष्टिमार्गीय तथा एक मर्यादामार्गीय सो दोयके भेद कहत हे. पुष्टिमार्गीय गुणगान जेसें ब्रजभक्त गुणगान करत हे श्रीठाकुरजी के संयोगमें सेवा दर्शन करत हे ओर श्रीठाकुरजी गोचारणकों पधारत हैं तब विरहकरिकें वेणुगीत युगलगीत गाय गाय संध्यापर्यंत काल बितावत हे तेसेंही श्रीआचार्यजीमहाप्रभुजीके पुष्टिमार्गमें विरहकरि गुणगान विप्रयोगकी भावना हे संयोग विप्रयोग दोउ रसको अनुभव हे ओर मर्यादामार्ग (ज्ञानमार्ग) में केवल गुणगानही करत हे ॥ ९ ॥

मूल-ज्ञानं सकलदोषाणां दाहकं परिकीर्तितम् ।

तथापि न प्रभोः प्रादुर्भावे यत्प्रतिबंधकम् ॥१०॥

तन्निवर्त्तयितुं शक्तमतो न्यूनं निरूपितम् ।

ततःस्वाचार्यसान्निध्यं क्षणाद्भावप्रदायकम् ॥११॥

शब्दार्थः—ज्ञानकों सकलदोषनकों भस्म करिवेवारो कह्योहे तोहू प्रभुके प्रादुर्भावमें जो प्रतिबंधकहे तिनकों निवृत्त करिवेमें समर्थ नांहीहे तासों न्यून कह्योहे तातें अपने श्रीआचार्यजीको सांनिध्यही क्षणमें भावकों देतहे ॥ १० ॥ ११ ॥ टीका—ज्ञानमार्गको गुणगान केसोहे जो ताकरिकें संसारके सकल दोष भस्म होय जातहे पाछे सदा निर्विघ्न होय तो मोक्षकी प्राप्ति होय परंतु प्रभु प्रकट होयकें दर्शन न देहि तातें ज्ञानमार्गको गुणगानहे सो भक्तिमार्गमें प्रतिबंधरूपहे सो काहेतें जो प्रभुको दर्शन नांही, लीलाको अनुभव नांही, स्वरूपानंदको अनुभव नांहीहे तातें ज्ञानहे सो भक्तिमार्गमें प्रतिबंधकही जाननों

ताभांति सेवा करियो तवही श्रीआचार्यजीमहाप्रभु भावदान करेंगे यह निश्चय सर्वोंपरि सिद्धांत है ॥ ११ ॥

मूलं-तद्विद्वक्षाऽऽर्त्तितापानां क्रमादेवेह संभवात् ।

तत उत्तरभावस्य भावनं वह्निरूपतः ॥ १२ ॥

शब्दार्थः—श्रीकृष्णके दर्शनकी इच्छा, आर्त्ति ओर तापको क्रमसों-ही यह पुष्टिमार्गमें संभव (उत्पत्ति) है तासों विरहात्मकको भावन [भावना] विप्रयोगाग्निसों होय ॥ १२ ॥ टीका—पुष्टिमार्गमें ज्यों ज्यों मन लगायके भगवत्सेवा करे त्यों त्यों श्रीकृष्णके दर्शनको ताप क्रमक्रमतें बड़े या भांति जब अधिक ताप होय ता करिकें सगरो दोष दूर होय जाय तब दैन्य सिद्ध होय तापाछें जब 'उत्तरभाव' हृदयमें सिद्ध होय तब ब्रजभक्तनके भावकी भावना करे जाको मानसी सेवा कहत हैं सो सर्वोंपरि है ब्रजभक्तनको भाव अग्निरूप है सो भाव हृदयमें होय तब जानियें जो श्रीआचार्यजीमहाप्रभु हृदयमें पधारे भावाग्निरूप श्रीआचार्यजीमहाप्रभु है ॥ १२ ॥

मूलं-क्षणेन दोषसंघस्य नाशकं सर्वथा मतम् ।

एवंभूते स्थिते मार्गे नूनं येषामभाग्यतः ॥ १३ ॥

अविश्वासस्ततस्तेषां न गतिः काऽपि विद्यते ।

अतः स्वयं श्रुतं यद्वा भाग्याद्बुद्धिः समागतम् १४

तदेव हि दृढं स्थाप्यं सर्वथा जीवनावधि ।

नाल्पज्ञवचनाच्चाल्या बुद्धिरापातमुंदरात् ॥ १५ ॥

शब्दार्थः—उपर श्लोकमें कह्यो एसो विप्रयोगाग्निको भावन दोषनके समूहको निश्चय नाश करिवेवारो है एसो यह पुष्टिमार्ग है तामें जिनको

१. संयोगात्मक भाव पूर्वदलहे ओर विप्रयोगात्मक भाव उचरदल है.

अभाग्यहे तिनकों अविश्वास होय तासों तिनकों काहू गति नांही हे तासों अपने सुन्यो अथवा भाग्यसों हृदयमें आयो एसो जो विप्र-योगात्मिको भावन सोही जीवनपर्यंत दृढ स्थापनों थोरे जानिवेवारेके वचन, उपरतें सुंदर दिखतें होय तासों बुद्धि चलित नांही करनी॥ ॥ १३ ॥ १४ ॥ १५ ॥ टीका—रंचकहू भावरूप अग्नि हृदयमें होय तो एकक्षणमें सगरे दोषकों सर्वथा नाश करे याभांति पुष्टिमार्ग सर्वोपरिहे एसो ब्रजभक्तनके भावात्मक यह पुष्टिमार्ग हे भाग्यहीननकों विश्वास न होय तातें अविश्वाससूंहि पुष्टिमार्गीय फलसिद्धि नांही होय ॥ १३ ॥ जा जीवकों यह पुष्टिमार्गमें अविश्वासहे ताकों कहूं गति नांहीहे कोउ जीव होय अविश्वास सबकों बाधक हे सो अविश्वास केसो होय एक-तो अपने मनमें स्वकल्पित विचार उठे जो यहपुष्टिमार्गमें कछु मोकों सिद्धि नांही दिसत, दूसरो कोउ ज्ञानमार्गीय, कर्ममार्गीय, भावविरुद्ध कहे सो 'सुने अन्यमार्गीय यह पुष्टिमार्गकों देखि नांही सकत हे तातें उनको संगहू बाधकहे उनके मुखतें मार्गकी निंदा सुनिकें अविश्वास होय, तीसरो पुष्टिमार्गको फल सर्वोपरिहे सो भाग्यमें न होय जीवही भीतर प्रवाही होय, मर्यादामार्गीय होय, पुष्टि न होय तो यह फल कहांतें पावे ? बाकों अविश्वास होय, चौथो हृदयमें अनेकभांतिके लौकिक वैदिकके विषयके तरंग उठे तो विश्वास छूटिजायवेसूं ओरही क्रिया करनलागे, पांचमो काहू बहिर्मुखके समागमतें दुःसंगतें अविश्वास होय । ऐसे पांच प्रकारके कारणतें अविश्वास होय ताकों पुष्टिमार्गीय फल सर्वथा न होय ॥ १४ ॥ उपर कहे इत्यादि दोषतें अविश्वास हृदयमें दृढ होयजाय सो अविश्वास सर्वथा जीवकों बाधकहीहे जेसैं जल अग्निको नाशकरे तेसैं दुःसंगदोष भावको नाश करे अल्पज्ञानवारे जीवके वचनचातुर्यतें बुद्धि चलायमान न करनी

अल्पज्ञजीव अज्ञानकरि निंदा दुर्वचन (मर्यादा छोड़िकें) बोले तातें अज्ञानीके संग वाद सर्वथा नांही कर्त्तव्यहे ॥ १५ ॥

मूलं-सत्त्वनिश्चयतः संगः साधको नहि संशयात् ।

यत्र वै विपरीतैव कृतिस्तत्र भ्रमः कथम् ॥ १६ ॥

शब्दार्थः—विवेकधैर्यादिकके निश्चयसों संगहे सो सर्व सिद्धकरिवे-
चारो हे संशयसों नांहीहे ओर जहां विपरीतही कृति हे तहां भ्रम कैसें
होय ? ॥ १६ ॥ टीका—तातें यहनिश्चय मनमें जाननो जो या जीवकों
सत्संगही भगवद्धर्मको साधकहे संशय नांही सो श्रीभागवतप्रथम-
स्कंधमें शौनकको वाक्यहे “तुल्याम लवेनापि न स्वर्गं नापुनर्भवम् ।
भगवत्संगिसंगस्य मर्त्यानां किमुताशिषः” (भगवद्भक्तके संगके क्षण-
चरोवर स्वर्ग ओर मोक्ष तुलेनांहीहैं तहां मनुष्यकी दीनी आशिषको तो
कहा कहेनों) ओर एकादशस्कंधमें भगवद्वाक्यहे “न रोधयति मां योगो
न सांख्यं धर्म उद्धव ! । न स्वाध्यायस्तपस्त्यागो नेष्टापूर्त्तं न दक्षिणा ॥
॥ १ ॥ व्रतानि यज्ञाश्छंदांसि तीर्थानि नियमा यमाः । यथावरुंधे
सत्संगः सर्व संगापहो हि माम् ॥ २ ॥ ” (हे उद्धव ! मोकों योग वश
नांही करें हे, नांही सांख्य, धर्म; नांही स्वाध्याय, तप, त्याग; नांही
इष्टापूर्त्त (कूप, आराम, मठादिक); नांही दक्षिणा, व्रत, यज्ञ, वेद,
तीर्थ, नियम, यम (कोउ वश नांही करें हे). जैसें सर्व संगकों
मिटायवेवारो सत्संग मोकों वश करें हे) इत्यादिक वचनतें जाननो
जो जीवकों सत्संगही बडो साधकहे तातें यह पुष्टिमार्गीय वैष्णव
निश्चयही सत्संग करे ओर पुष्टिमार्गतें जिनकी विपरीत कृति होय

१ यह तीन श्लोकको अर्थ टीकामें लेखकदोषसों उलटो लिख्योहे परंतु पांच दश
पुस्तकमें एसेही दीखवेमें आयो तामूं तेसेही कछु मुधारिके लिख्योहे या रीतसों अर्थ
सबेथा नांही होयेंसके किन्तु ग्रन्थम श्रन्दार्थ लिख्योहे तेसें होयहें.

तामें वैष्णवकों भ्रम काहेतें होय तातें पुष्टिमार्गमें विपरीत कृतिवा-
रेको संग सर्वथा न करे ॥ १६ ॥

मूलं-तत्र भ्रांताः परं मूढास्तत्संगः खलु बाधकः ।

अतः सत्संगसहितस्तिष्ठेत्सर्वत्र सर्वदा ॥ १७ ॥

शब्दार्थः—तामें जो भ्रांतहे सो अत्यंत मूढहे इनको संग निश्चय
बाधकहे तासों सत्संगसहित सर्वजगगे सदा रहे ॥ १७ ॥ टीका—
जो जीव भ्रांतहे या पुष्टिमार्गमें विश्वासकरि रहितहे सो महामूढ अज्ञा-
नीहे तासों खल(दुष्ट)को संग महाबाधकहे तातें पुष्टिमार्गीय
वैष्णव जहां जाय तहां सबठोर सदा पुष्टिमार्गीय भगवदीयके संगही
स्थित रहे तवहीं दुःसंगमें वचे तातें सर्वथा सत्संगमें रहे सो नव-
रत्नग्रंथमें श्रीआचार्यजीमहाप्रभुजी कहेहैं “ निवेदनं तु स्मर्त्तव्यं सर्वथा
तादृशैर्जनैः ” (निश्चय तादृशीय वैष्णवजननके संग निवेदनको
स्मरण करनों) यह निवेदनको स्मरण सदा सर्वदा तादृशीयसों
मिलिकें करे तातें सत्संगहे सो भाववृद्धिकर्त्ता होयवेसूं पुष्टिमार्गीय
भगवदीयकूं नित्य कर्त्तव्यहीहे ॥ १७ ॥

मूलं-सेवां कुर्वन् सदाचारो धर्ममार्गस्थितोऽपि च ।

अविरुद्धवचोवक्ता ह्यविरुद्धकृतिप्रियः ॥ १८ ॥

शब्दार्थः—सेवाकरिवेवारो, सदाचारवारो, ओर धर्ममार्गमें रह्यो
होय तोहू अविरुद्धवचन कहिवेवारो तथा अविरुद्ध कृतिकों प्रिय करिकें
रहिवेवारो होय ॥ १८ ॥ टीका—पुष्टिमार्गीय वैष्णव श्रीआचार्यजी-
द्वारा निवेदन पायकें पुष्टिमार्गकी रीतिसों आचारसहित भगवत्सेवा
करे आचारहे सो वैष्णवको प्रथम धर्महे तातें आचार विचार पूर्वक
स्वासा, सेवकी, लुयो, सखडी, अनसखडी, प्रसादी, जूठन, प्रभृतिको

ज्ञान राखे, धर्ममें तत्पर रहे, अपने पुष्टिमार्गीय धर्ममें रहे ओर पापा-
चरण न करे पुष्टिमार्गमें अविरुद्ध वचन कहे ओर जो कोई पुष्टिमा-
र्गसों अविरुद्ध सुंदर शिक्षा देय ताकों मानिलेय अविरुद्ध (क्रिया)
मार्गकी रीतिकी सेवाकुंही मनमें प्रियजानें ॥ १८ ॥

मूलं-स्वाचार्यमात्रवाक्यैकनिष्ठः सततभावुकः ।

तदीयजनसंसृष्टः सर्वसंगविवर्जितः ॥ १९ ॥

शब्दार्थः-अपने श्रीआचार्यजीके वचन-निबंध, श्रीसुबोधिनीजी,
ओर पोडशग्रंथादिकनमें निष्ठावारे, निरंतर भाववारे, भगवदीयसों
मिलिवेवारे, ओर दूसरे सर्वसंगमें वर्जित होय ॥ १९ ॥ टीका-
एक अपने श्रीवल्लभाचार्यजीके वचनमें निष्ठा राखे इनमें किये
श्रीसुबोधिनीजी-निबंधादिक-एतन्मार्गीयग्रंथको कहे सुने तामें जो
क्रिया भाव कहेहैं ताहीमें मन लगायकें ताहीभांति रहेनो ओर जो
भगवदीय श्रीआचार्यजीके वचन अनुसार चलतहे श्रीआचार्यजी-
महाप्रभुजीके वचनमें जिनकी पूर्ण निष्ठाहे, एसेनको संग करे ओर
सर्वको त्याग करे. जो एसे भगवदीय मिले तो संग करे नांही
तो सर्वसंग छोडिकें भगवत्सेवा स्मरण मार्गरीतिप्रमाण करे परंतु
अन्यको संग सर्वया न करे या भांति वैष्णव रहे तो श्रीआचार्यजी-
महाप्रभुजीकी कृपातें पुष्टिमार्गको फल पावे ॥ १९ ॥

इति श्रीहरिरायजीकृतं विंशतितमं शिक्षापत्रं श्री
गोपेश्वरजीकृतव्रजभाषाटीकासमेतं समाप्तम् ॥ २० ॥

शिक्षापत्र २१.

अब एकविंशतितमशिक्षापत्रमें लौकिकव्यावृत्तिकों छोड़िकेही सेवा करनी सो बुद्धि दृढ होय तब होय, भगवदीयके संग निरंतर निवेदनके चिंतनतेही बुद्धि दृढ होय, विपरीतवार्त्ताके श्रवणसों चित्त खेदयुक्त होय ताकी प्रभु उपेक्षा करेहें, यह कालहे सो सत्पुरुषनकी बुद्धिकों हरेहे तासों पुष्टिमार्गीय-भगवदीयनके संग रहेनो यह निरूपणहे उपर कहे ताप्रकार वैष्णव रहे तो फल सिद्ध होय सो कलिकालदोषतें भक्तिमार्गको भाव ओर सत्संग तिरोभूतहे याकों केसैं फल होय सो कहतहैं.

मूलं-भक्तिमार्गस्तिरोभूतस्तथा संगः सतामपि ।

ततो भावस्य शैथिल्यं तदभावेऽखिलं वृथा ॥१॥

शब्दार्थः-भक्तिमार्ग तिरोभूत होय गयो हे तेसेही सत्पुरुषनको संगहू तिरोभूत होय गयोहे ताकरिकें भावकी शिथिलता भईहे ओर भावको अभाव भयो तब सकल वृथाहे ॥ १ ॥ टीका-यह महाकठिन कालतें भक्तिमार्ग तिरोभूत भयोहे ओर पुष्टिमार्गीय भगवदीयको संगहू तिरोभूत भयो हे ताकरिकें पुष्टिमार्गको भावहू शिथिल भयोहे सो भावविना सर्व वृथाहे काहेतें जो यहपुष्टिमार्गमें सगरो भावहीहे भावात्मक मार्गहे जितनी क्रिया दीसतहे सो सर्व भावात्मकहीहे ताभावकों तो पुष्टिमार्गमें स्थित होय भगवदीयको संग होय तबही जाने नांही तो केसैं जाने? भक्तिमार्गमें अष्टप्रहर केवल प्रभुकोही सुख विचारे अपनो देहसंवंधी सुख रंचकहू न विचारे याभांति सेवा करे सो दुर्लभहे ताकरिकें भाव शिथिल होयरहोहे तातें भावविना सर्व वृथाहे ॥ १ ॥

मूलं-भक्तिमार्गीयताभावे क्रियामात्रं हि कर्मवत् ।

तत्रापि न मनःस्थैर्यं विक्षेपाद्व्यवहारतः ॥ २ ॥

शब्दार्थः-भक्तिमार्गीयपनेको अभाव होय तव कर्मकीनाई (यह-सेवाहू) क्रियामात्रहे तामेंहू व्यवहारसों विक्षेपतें मनकी स्थिरता नांहीहे ॥ २ ॥ टीका-भक्तिमार्गकी रीति यहहे जो अष्टप्रहर भावमें रहे सो तो कहाहे ? परंतु कर्मवत् क्रियाहे जेसैं कर्ममार्गीय कर्म करे तहांताई प्रयोजन पाछें कछु नांही तेसेंही सेवासमय न संयोगको सुख भयो के न अनोसरमें विप्रयोग भयो तातें कर्ममार्गवत् क्रिया मात्र-हीहे सो कर्मवत्हू मनलगायकें नांहीहे तहां सेवामेंहू मन एकाग्र नांही अनेक भांतिके विक्षेप मनमें होतहे नानाभांतिके व्यवहारके तरंग मनमें उठतहे ताकरि मन स्थिर नांही किन्तु विक्षेप पावतहे सो कर्मवत् क्रियामात्रहू भगवत्सेवा नांही वनतहे ॥ २ ॥

मूलं-व्यवहारोऽप्यसिद्धश्चेद्विशेषक्षोभको मतः ।

तदभावे तु गार्हस्थ्यप्रकारैः सेवनं कुतः ॥ ३ ॥

शब्दार्थः-व्यवहारहू सिद्ध न भयो तव विशेषक्षोभ करिवेवारी होयहे काहेतें जो व्यवहारको अभाव होय तव गृहस्थाश्रमके प्रकारसों सेवन कैसें होय ? ॥ ३ ॥ टीका-भगवत्सेवामें व्यवहारके तरंग उठ-तहे सो व्यवहारहू सिद्ध न होय तव मनमें ओर अधिकक्षोभ होतहे धीरज छूटिजातहे तव गृहस्थकों भाव कैसें रहे ? ओर भगवत्सेवाहू कैसें करे ? तातें यह पुष्टिमार्गी तो भावात्मक सबोंपरिहे ओर जीव तुच्छहे यह काल महाकठिनहे सेवाकरतमें व्यवहारको स्मरण स्वतः कालदोषतें होयहे सो व्यवहार खाली परे सिद्ध न होय तव धीरज कैसें रहे ? मनमें अतिहीं दुःख पावे तव लौकिकचिंतातें मनमें भग-वद्भाव कैसें रहे ? ओर गृहस्थाश्रममें सबहीं (लौकिक, वैदिक, कुटुंबको

भरणपोषण, इत्यादिक सब) मायेहे सो करनो ओर भगवत्सेवा कैसें करे ? मनतो चिंताने आय ग्रस्योहे तहां कोई कहे जो व्यवहार मति करो प्रभु तो सर्वसामर्थ्यवान् हे लौकिक वैदिक सर्वकार्य सिद्ध करेंगे तुम भगवत्सेवा मनलगायके करो याभांति कोई कहे तहां आगे कहतहे ॥३॥

मूलं-व्यावृत्त्यभावपक्षस्तु बुद्धयदाढ्यात्सुदुर्लभः ।

बुद्धिदाढ्यं तु सततं निवेदनविचिंतनैः ॥ ४ ॥

शब्दार्थः—व्यावृत्तिके अभावको पक्ष (लौकिकवैदिक छोडिवेको पक्ष) बुद्धिकी दृढता नांही हे तासों अत्यंत दुर्लभहे ओर बुद्धिकी दृढता तो निरंतर निवेदनके विशेष चिंतनकरिके होय ॥४॥ टीका—व्यावृत्तिको अभाव कैसें करे ? यद्यपि अव्यावृत्त होय भगवत्सेवा करे सो तो सर्वोपरि हे परंतु एसी बुद्धि उत्कृष्ट नांहीहे याभांति याकालमें प्रभुको पूर्ण विश्वास तो दुर्लभहे तातें पूर्ण विश्वास विना अव्यावृत्त होय तो बहुतही दुःख पावे श्रीठाकुरजीमें दोषबुद्धि होयजाय में इनके आश्रय सेवा करतहों ओर मेरो लौकिकहू नांही सिद्ध करतहें याभांति होय तो अनर्थ होय दासभाव जात रहे तातें अव्यावृत्त कैसें होय ? एसी तीव्र उत्तम बुद्धि नांहीहे पूर्ण विश्वास तो दुर्लभहे, तहां कोई कहे जो बुद्धि उत्तम होय पूर्णविश्वास जाभांति होय सोहि कार्य करो तहां कहे जो बुद्धि उत्तम ओर पूर्णविश्वास तो तब होय जब अष्टप्रहर निवेदनको चिंतन करे अष्टाक्षर और शरणकी भावना करे गद्यमें कहा निवेदन कियोहे ? अब केली क्रिया करतहों ? कितने दिनको भृत्योहों ? सो अब श्रीआचार्यजीमहाप्रभुजीद्वारा संबंध भयोहे प्रभु केसेहें ? जीव केसोहे ? जीवको कोनप्रकार दासत्व करनोहे ? याभांति, पंचाक्षरमें प्रभुही गतिहे याभांति निवेदनको चिंतन होय बुद्धि प्रबल उत्तमहोय तब विश्वास संपूर्ण होय । अब निवेदनको चिंतन करिवेको प्रकार कहत हे ॥ ४ ॥

मूलं-तत्रापि सहभावस्तु सतामेव निरूपितः ।

ते दुर्लभा दूरगाश्च ततो बुद्धिर्न तादृशी ॥ ५ ॥

शब्दार्थः—तामें (निवेदनके चिंतनमें) हू सत्पुरुष (भगवदीय)-कोही संग तो निरूपण कियो हे सो भगवदीय दुर्लभ ओर दूर रहत हे तासों एसी उत्तम बुद्धि नांही हे ॥ ५ ॥ टीका—निवेदनको चिंतन अपनी बुद्धितें नांही होयसकतहे सो नवरत्न-ग्रंथमें श्रीआचार्यजीमहाप्रभुजी निरूपण कियेहे “ निवेदनं तु स्मर्त्तव्यं सर्वथा तादृशैर्जनैः ” (निवेदन तो निश्चय तादृशीयजनके संग स्मरण करिवेयोग्य हे) तातें निवेदनको चिंतन भावसहित तादृशीय पुष्टिमार्गीय भगवदीयसों मिलिकें करे तब भाव सिद्ध होय, तहां कोई कहे जो भगवदीयसों मिलिकें निवेदनको चिंतन करिलेउ तहां कहतहे पुष्टिमार्गीय भगवदीय मिलने वोहोतही दुर्लभ हे कइहे सो दूरहे तिनको संग कोन भांतिसों होय ? उन भगवदीयन-के संग विना एसी बुद्धि कैसे होय ? ॥ ५ ॥

मूलं-स्थिताऽपि शीर्यते नित्यं पोषकाभावतो मम ।

खिन्नं च जायते चित्तं वार्त्ताश्रवणतोऽन्यथा ॥ ६ ॥

शब्दार्थः—मेरी बुद्धि स्थित हे [अथवा ‘ स्थितोपि ’ एसो पाठ होय तो भाव स्थितहे] तोहू पोषणकरिवेवारेके अभावसों शिथिल होय-जायहे ओर अन्यथावार्त्ता सुनिके चित्त खेदयुक्त होय हे ॥ ६ ॥ टीका—ओर भाव बड़े सो तो परम दुर्लभ हे परंतु कछुक भाव आगेतें हृदयमें स्थित हे सोहू क्षीण होतहे दिनदिन घटत जातहे काहेतें जो पोषकको अभाव हे भगवदीयको मिलाप होय तो भावको पोषण होय भाव बड़े सो सत्संग विना भाव शिथिल होतहे ओर लौकिक मनुष्य-

नको संग आयवन्योहे सो अनेकप्रकारकी लौकिक वार्त्ता कहनी परतहे ओर अन्यथा-लौकिकवार्त्ताश्रवणतें चित्तकों महा खेद होयर-होहे अहर्निश अन्यवार्त्ता अन्यश्रवण मेरे कर्णमें होतहे सो में कि-नसों कहूं एसो मनमें खेद होतहे ॥ ६ ॥

मूलं-श्रुतोत्तमप्रकाराश्च भगवन्मानसा अपि ।

अस्मदीया लौकिकेषु प्रतिष्ठामात्रसाधकाः॥७॥

चित्तव्ययं प्रकुर्वति वृथा देहं च तद्गतम् ।

भगवन्मार्गनिष्ठा तु लोकनिष्ठाविरोधिनी ॥ ८ ॥

शब्दार्थः-भगवानमें मनवारे ऐसे हमारे जो उत्तम प्रकार सुनिनेवारे हे सोहू लौकिकमें प्रतिष्ठामात्र सिद्ध करिवेवारेहे ॥ ७ ॥ चित्तकों ओरजगे लेजातहे ओर देहकों तामें प्राप्त करे हे काहेतें जो भगवन्मार्गकी निष्ठाहे सो लौकिककी निष्ठासों विरुद्धहे ॥ ८ ॥ टीका-याभांति में मनमें दुःखीहों भगवद्भाव दिनदिन शिथिल होतहे ओर में अपने श्रवणतें उत्तमप्रकार (अपनी बडाई) सुनतहों कोई कहतहे जो अष्टप्रहर ईनको मन भगवानमें लग्यो रहतहे इत्यादि अनेक बडाई में अपनी श्रुतितें सुनतहों ताकरिकें कहा सिद्धिहे लौकिकमें प्रतिष्ठा भई सो प्रतिष्ठामात्रकी साधक भई लौकिकमें यह फल भयो ओरकछु दीसत नांही तव यह प्रतिष्ठार्तें मेरो कार्य कहा सिद्ध होतहे? यह प्रतिष्ठा भगवद्भावमें बाधकहे ॥ ७ ॥ सो आगे निरूपण करतहें जो यह चित्त भगवानके चरणारविंदमें न लगे ओर यह मनुष्यदेह इंद्रिय भगवानमें विनियुक्त न भई सो वृथाजातहे सो एकादशस्कंधमें राजा जनक कहेहें “दुर्लभो मानुषो देहो देहिनां क्षणभंगुरः” (देही (जीव)को यह मनुष्यदेह दुर्लभ ओर क्षणमें नाशहोय एसोहे) सो वृथा जातहे ओर सप्तमस्कंधमें प्रह्लादजी कहतहे “कौमारआचरेत्प्राज्ञो धर्मान्

भागवतानिह । दुर्लभं मानुषं जन्म तदप्यधुवमर्थदम् (बुद्धिमान् कुमार अवस्थामें यह संसारमें भगवद्धर्मको आचरण करे काहेतें जो मनुष्यजन्म महादुर्लभहे सोहू निश्चल नांहीहे ओर पुरुषार्थकों देवे-वारोहे) इत्यादि वचनसों जान्योजातहे जो मनुष्यदेह महादुर्लभहे क्षणमें याको नाशहे तातें भगवानको दर्शन सेवा परमदुर्लभहे सो वने तो आछो यह कौमारअवस्था भगवद्धर्मकरणयोग्यहे तातें भगवद्वि-योगविना देह यौवन सर्व वृथाहे ओर भगवन्मार्गकी निष्ठाहे सो लोक-निष्ठाविरोधिनीहे काहेतें जो अपनी बडाई सुनिके आनंद मानी बडो जाने सो भगवानकों बुरी लगे मद होय तो भगवान् हृदयमेंतें जातरहे तातें यहलोगनकी बडाई हे सो भगवद्धर्मकी निश्चय विरोधिनीहे ॥८॥

मूल-संसारवैरी कृष्णोऽपि मूढानेतानुपेक्षते ।

कालः सतामपि हरत्यसौ संप्रति सन्मतिम् ॥९॥

शब्दार्थः-संसार [अहंताममतात्मक] के वैरी श्रीकृष्णहू ऐसे मूढ संसारासक्तनकी उपेक्षा करेहें ओर यहकाल यासमयमें सत्पुरुषकीहू सुंदरमतिकों हरतहे ॥ ९ ॥ टीका-संसारवैरी यह श्रीकृष्णको नामहे जहां श्रीकृष्ण हृदयमें आवे तहां संसार नाश करे निश्चय वासों लौकिक देहसंबंधी न वने सो यह जीव अज्ञानीहे श्रीकृष्णकों चाहतहे ओर संसारहूकी अपेक्षा करतहे संसार होयगो तहांताई श्रीकृष्ण कहां ? जब श्रीकृष्ण कृपाकरेंगे तब [अहंताममतात्मक] संसार कहां ? सो यह कालदोपतें प्रभुको ज्ञान नांही होतहे एसो काल कठिन आयोहे जो सत्प्राणीहूकी मति जो बुद्धि ताहूको हरिलेतहे तातें बारंवार संसार-की अपेक्षा राखतहे यद्यपि संसारकों तुच्छ जानतहे ओर भगवानको गुणहू संसारनाशकहे यहही जानतहे तोहू यह कालकरि सत्पुरुषनकी बुद्धि हीन होय जायहे ॥ ९ ॥

मूलं-कालदोषनिराकर्ता न संगोऽस्ति सतामपि ।

अतः स्थेयं सावधानैः समस्तैर्मार्गवर्त्तिभिः ॥ १० ॥

शब्दार्थः--कालदोषको मिटायवेवारो सत्पुरुषनको संग नांही हे तासों समस्त पुष्टिमार्गीय वैष्णव सावधान रहियो ॥ १० ॥ टीका--अव श्रीहरिरायजी सगरे पुष्टिमार्गीय वैष्णवनको शिक्षा देत हैं जो सावधान रहियो कालदोष हे सो महादुष्ट हे सर्व धर्ममें प्रतिबंधक हे सो मेंहू यह कालदोषको नाश नांही करिसकतहों काहेतें जो सत्संग नांही मिलतहे जो भगवदीयको संग मिले तो कालदोष बाधा न करे सो सत्संग दुर्लभहे तातें हे वैष्णव ! तुम समस्त क्षणक्षणमें सावधान रहियो यह पुष्टिमार्ग सर्वोपरिहे तामार्गमें तुम स्थितहो सो दुःसंगतें वचे रहियो भगवदीयको संग करियो ओर श्रीआचार्यजीमहाप्रभुजीके चरणकमलको अपने चित्तमें धरियो ॥ १० ॥

इति श्रीहरिरायजीकृतमेकविंशतितमं
शिक्षापत्रं श्रीगोपेश्वरजीकृतब्रजभाषा-
टीकासमेतं समाप्तम् ॥ २१ ॥

शिक्षापत्र २२.

अब द्वाविंशशिक्षापत्रमें यह पुष्टिमार्गमें अपना भावहे सो साधनहे ओर भावात्मा भगवान्हे सो प्रमेय ओर फलरूपहे तामों निधिरूप भावकी रक्षा करनी ओर इनमें विरुद्ध होय ताको त्याग करना हरि-कृष्णनामके वैष्णवको चित्त अतिशुद्धहे तातें इनकी उपर कृपारासिके-

इनको संग करनो यह निरूपणहे। उपर कहे जो, सत्संगविना यह जीव कालदोष दूरि नांही करिसकतहे तातें समस्त वैष्णव सावधान रहियो काहेतें जो यह भावात्मक मार्गहे ताको प्रकार आगे कहतहे-

**मूलं-भावोऽत्र साधनं मार्गं प्रमेयं भगवान् हि सः ।
प्रमाणं कृष्णसेवादौ (सेवादिः) स एव च फलं पुनः ॥१॥**

शब्दार्थः—यह पुष्टिमार्गमें भावहे सो साधनहे प्रमेय सोही भगवान् हे प्रथम श्रीकृष्णकी सेवा प्रमाणरूपहे ओर फेरि सोहि फलरूपहे अथवा श्रीकृष्णकी सेवा आदि जो कार्यहे सो प्रमाणहे ओर फेरि सोहि फलरूपहे ॥ १ ॥ टीका—यह पुष्टिमार्गमें भाव सोई सर्वोपरि साधनहे भगवानको प्रमेयवल फल हे श्रीठाकुरजीहू फलात्मक भावरूप प्रमेयरूपहे यह पुष्टिमार्गमें यह प्रमाण नांही जो इतनी सेवातें फल होय जब प्रमेय वल विचारे ताहीक्षण फलदानहोय तातें श्रीकृष्णकी सेवाहे सोई प्रमाण ओर सोई फलरूपहे ज्ञानमार्ग तथा कर्ममार्गमें साधन तथा फल न्यारो न्यारो हे फल पाये पीछे साधन न करे सो यह पुष्टिमार्गमें नांही हे साधनहूमें श्रीकृष्णकी सेवा ओर फलहूमें श्रीकृष्णकी सेवा हे तातें फलरूप जानि सेवा कर्तव्य हे श्रीकृष्णकी सेवा उपरांत ओर फल कहा हे ? सो नवमस्कंधमें श्रीभगवान् कहेहें “ मत्सेवया प्रतीतं च सालोक्यादिचतुष्टयम् । नेच्छंति सेवया पूर्णाः कुतोऽन्यत्कालविप्लुतम् ” (मेरी सेवातें प्रतीयमान सालोक्यादि चतुर्विधमोक्षकों मेरी सेवातें पूर्ण मेरे भक्त नांही इच्छतहें सो कालमें हूवे ऐसे राज्यादिककों कहातें चाहें ?) ऐसे भक्त मेरी सेवामें विश्वास किये हे जो चारों प्रकारकी मुक्तिकोंहू नांही चाहतहें सेवाहीकरि पूर्णहे सो मुक्तिकोंहू बाधकरूप जानि नांही चाहतहें तिनकों ओर कहा नांही बाधकहे तातें प्रमाणहू कृष्णसेवा ओर फलहू कृष्णसेवाहे ॥ १ ॥

**मूलं-तस्मात् स एव संरक्ष्यो निधिरूपस्तु सर्वथा ।
यत्तद्विरुद्धं तत्सर्वं ज्ञात्वा ज्ञात्वा निवर्त्तयेत् ॥ २ ॥**

शब्दार्थः-तासों यह निधिरूप भावही सर्वथा सम्यक्प्रकारसों रक्षा करिवेयोग्यहे ओर जो तासों विरुद्धहे सो सर्व जानि जानिकें निवृत्त करे ॥ २ ॥ टीका-तातें निधिरूप श्रीकृष्णहे तेसैंही निधिरूप भगवद्भावकों जानि लौकिक दुःसंगतें निश्चय रक्षा कर्त्तव्यहे यह पुष्टि-मार्गकं जो अनुकूल होय ताको संग्रह ओर प्रतिकूल होय ताको त्याग-करनों येही श्रीआचार्यजीकी आज्ञाहे ॥ २ ॥

**मूलं-हरिकृष्णे यथापूर्वं स्नेहः स्थाप्यो विशेषतः ।
गोष्ठी च तादृशैः [तादृशी] कार्या ध्रुवमस्मत्प्रयत्नतः ३**

शब्दार्थः-हरिकृष्णनामके वैष्णवपें प्रथमकीनाई विशेषसों स्नेह स्थापन करनो ओर गोष्ठी (स्नेहसहित-वार्त्ता) तेसैंके संग अथवा तेसी अपने प्रयत्नसों निश्चय करनी ॥ ३ ॥ टीका-हरिकृष्णमें प्रथम-कीनाई स्नेह स्थापन करनो पुष्टिमार्गीय तादृशीय वैष्णव होय तिन-हीसों गोष्ठी प्रयत्नकरिकें करे उनसों मिलिकें पुष्टिमार्गको भाव विचारे तो हृदयमें भगवद्भाव अचल होय तातें अवश्य भगवदीयको संग कर्त्तव्यहे ॥ ३ ॥

**मूलं-एतस्यांतःस्थितिः प्रायः समीचीनाऽवलोक्यते ।
नान्यच्च लौकिकं चित्ते विचार्यमिह सर्वथा ॥ ४ ॥**

शब्दार्थः-इनकी (हरिकृष्णकी) वोहोतकरिकें अंतःस्थिति (अंतर्मुखता) दीखवेमें आवतहे तासों इनको संग करनो ओर चित्तमें इहां अन्य लौकिक सर्वथा नाहीं विचारनो ॥ ४ ॥ टीका-भगवदीयके संग नित्य गोष्ठी करतकरतं अंतःकरणमें भावकी सिद्धि

होय तब हृदयमें सदा भगवान् स्थितहे तिनको दर्शन होय तब यह जीवको चित्त लौकिकमें सर्वथा न लगे नानाप्रकारके लौकिक विचार, मिथ्याध्यान, मिथ्याक्रिया, मिथ्यावाणी सब निश्चय छूटिजाय ॥ ४ ॥

मूलं—विशेषस्तु समग्रेऽपि भांडागारिकपत्रतः ।

विज्ञेयः सर्वथा शीघ्रं लिख्यतां च तदुत्तरम् ॥ ५ ॥

शब्दार्थः—विशेष तो सर्वसमाचारहू भंडारिकें पत्रसों जानने ओर इनको उत्तर शीघ्र निश्चय लिखनो ॥ ५ ॥ टीका—विशेषसमाचार भंडारिके पत्रतें जानोगे पत्रवांचिकें सर्वथा वेगही प्रति उत्तर लिखोगे ॥ ५ ॥

इति श्रीहरिरायजीकृतं द्वाविंशतितमं

शिक्षापत्रं श्रीगोपेश्वरजीकृतव्रजभाषा-

टीकासमेतं समाप्तम् ॥ २२ ॥

शिक्षापत्र २३.

अब त्रयोविंशशिक्षापत्रमें लौकिकदुःख हृदयमें न धरनो, अलौकिकमें चिंता न करनी, बहिर्मुखता न राखनी, बहिर्मुखतानिवृत्तिके प्रकार, (श्रीभागवतको पाठ तथा अर्थश्रवण, वैष्णवके संग निवेदनको स्मरण, सदा भगवन्नामग्रहण, सदाशरणभावना,) अष्टाक्षरको उच्चारण राखनो, पंचाक्षरमंत्रकरिकें तदीयत्वभावना करनी, वैराग्य ओर संतोष

१ विश्वमपत्रके प्रथमश्लोकके टीप्पणमुजब श्रीगोपेश्वरजीके पत्र आयवेतगे वर श्रीहरिरायजीने लिखि जो उचर बेगि लिखोगे उबताई पत्र नाही आवते उबताई उचर लिखिवेकी नाही लिखते.

राखनो, यह निरूपणहे ! उपर कहे भगवदीयसंग गोष्ठी कियेतें हृदयमें भाव सिद्ध होय तब हृदयमें प्रभुकों देखें तब लौकिक विचारमें चित्त न जाय परंतु हृदयमेंतें चिंता न छूटे तहांताई भाव कैसे आवे ? सो सर्व प्रकार आगे निरूपण करतहैं—

मूलं-भवंतः श्रुतसिद्धांताः कथं मुह्यन्ति लौकिके ।

अलौकिके तु चिंता या विषयाभावतो न सा ॥ १ ॥

शब्दार्थः—श्रीहरिरायजी लिखतहे जो सुन्योहे सिद्धांत जिनने ऐसे तुमहो सो लौकिकमें क्यों मोह पावतहो ? ओर अलौकिकमें जो चिंताहे सो तो विषयके अभावसों नांहीहे ॥ १ ॥ टीका—अब श्रीहरिरायजी लिखतहे जो तुम श्रुति, स्मृति, वेद, पुराण, श्रीभागवत, सर्वके सिद्धांतकों जानतहो सो यह लौकिकमें मोह काहेकों पावतहो यह तुमकों उचित नांही हे अब में तुमकों सिद्धांत कहतहों सो चित्त लगायके सुनियो. जहांताई लौकिकविषय हृदयमेंतें नांही जात हे तहांताई अलौकिक भाव हृदयमें नांही रहत हे तातें क्षणक्षणमें चिंता होत हे, जब हृदयमें विषयको अभाव होय तब वह चिंता नांही होत-हे सो अपने पुष्टिमार्गमें लौकिक अलौकिक दोउ चिंता नांही कर्तव्य हे ॥ १ ॥

मूलं-यतः सर्वसमर्थोऽस्मत्प्रभुः सर्वं करोति हि ।

पितेव (पतिवत्) निजदासानामैहिकं पारलौकिकम् २

शब्दार्थः—जासों अपने प्रभु सर्व समर्थहे सो पिताकीनाई अथवा पतिकीनाई अपने दासनकों लौकिक और पारलौकिक दोउ सिद्ध करेंगे ॥ २ ॥ टीका—श्रीकृष्ण अपने प्रभु सर्वसामर्थ्ययुक्तहे सो श्रीगुसाईजी विज्ञप्तिमें कहेहैं “कर्तुं पुनर्याकर्तुमन्यथाकर्तुमीश्वरे । सामर्थ्यं यन्मया दृष्टं त्वय्येवातो न संशयः ” (ईश्वर ऐसे जो तुम तिनमेंही करवेको,

न करवेको ओर विपरीत करिवेको सामर्थ्य जो देख्यो तातें मोकों संशय नाहीं) श्रीकृष्ण कर्तुं, अकर्तुं, अन्यथाकर्तुं, सर्वसामर्थ्ययुक्तहे सो प्रभु लौकिक, अलौकिक सर्व सिद्ध करे तातें भगवदीयकों चिंता नाहीं कर्त्तव्यहे सो दृष्टांत कहत हे जेसैं लौकिकमें अपने पिता पुत्रकी रक्षा करे तेसैं प्रभु अपने निजदासनको लौकिक, अलौकिक, सर्व सिद्ध करेंगे यह निश्चय जाननो ॥ २ ॥

मूलं-अत एवास्मदाचार्यवचनं वै विराजते ।

‘भगवानपि पुष्टिस्थो न करिष्यति लौकिकीं च गतिम्’

शब्दार्थः-तासोंही ‘भगवान् हू पुष्टिमार्गमें विराजमानहे सो लौकिकगति नाहीं करेंगे ” यह श्रीमदाचार्यजीको वचन निश्चय विराजित हे ॥ ३ ॥ टीका-पुष्टिमार्गीय वैष्णवकों चिंता नाहीं कर्त्तव्यहे ऐसे अपने श्रीआचार्यजीके वचनामृत विराजत हे जो उत्तरार्द्धहे आर्यावृत्तसों लिख्योहे सो नवरत्नग्रंथके प्रथमश्लोकको उत्तरार्द्धहे सो वचनतें यह पुष्टिमार्गमें भगवान् साक्षात् विराजमान हे सो अपने निवेदनीय जीवकी लौकिकगति कबहू न करेंगे यह विचार वैष्णव निश्चय मनमें राखे तातें यह पुष्टिमार्गसमान ओर दूसरो कोउ मार्ग नाहीं हे जामें शरण आये पाछें लौकिकगति कबहू न होय तहां कोउ कहे जो वैराग्यकरि लौकिक गति न होय परंतु लौकिकमें रहे, सगरो लौकिक कार्य करे तिनकों लौकिक गति केसैं न होय ? तहां कहतहे ॥ ३ ॥

मूलं-मर्यादामार्गवैराग्याद्यभावेऽपि गतिः सताम् ।

चिंतासंतानहंतारोऽप्याचार्यपदरेणवः ॥ ४ ॥

शब्दार्थः-पुष्टिमार्गीय वैष्णवकों मर्यादामार्गके वैराग्यादिक साधनको अभाव होय तोहू सत्पुरुषकी गति होय ओर चिंताके

विस्तारकों मिटायवेवारी श्रीआचार्यजीके चरणारविंदकी रजहू (अपनेपे विराजमान) हे ॥ ४ ॥ टीका—मर्यादामार्गकी यह रीतिहे जो ज्ञान-वैराग्यकरिकें गति होय. जितनो साधन जीव करे तितनी उत्तमगति वाकों मिले ज्ञानमार्ग करि सत्य लोक (ब्रह्माके लोक) में जात हे यह मर्यादामार्ग (प्रमाणमार्ग) की रीति हे ओर यह पुष्टिमार्गमें प्रमेयतें फल हे साधनतें फल नांही होतहे सो श्रीभागवतएकादश-स्कंधमें भगवान् कहेहैं “ केवलनैव भावेन गोप्यो गावो मृगाः खगाः । येऽन्ये मूढधियो नागाः सिद्धा मामीयुरंजसा ” [केवल भावकरिकेही गोपीजन, गायें, मृग, पक्षी, ओर जो अन्य मूढबुद्धिवारे नाग सो सिद्ध होय विनाश्रम मोकों प्राप्त भये] ब्रजमें श्रीकृष्णभगवान् निःसाधनहे तासों प्रभु अपने प्रमेयवलतें फलदान कियेहैं तेसेही यह पुष्टिमार्गमें श्रीकृष्ण विराजतहे सो साधनकी अपेक्षा नांही राखतहैं स्वतः प्रमेय-वलतें निश्चय फलदान करेंगे तातें पुष्टिमार्गीय वैष्णवकों लौकिक अलौकिक चिंता कबहू नांही कर्त्तव्यहे सो नवरत्नग्रंथमें श्रीआचार्यजी-महाप्रभुजी कहेहैं “ चिंता कापि न कार्या निवेदितात्मभिः कदापि ” (निवेदन कियो हे आत्मा जिनने एसे वैष्णवनकों कबहू कछुहू चिंता नांही कर्त्तव्य हे) निवेदन कियो ताजीवकों चिंता नांही कर्त्तव्य हे ओर श्रीगुसांईजीने नवरत्नकी टीकामें मंगलाचरण कियो हे “ चिंता-संतानहंतारो यत्पादांबुजरेणवः । स्वीयानां तान्निजाचार्यान् प्रणमामि मुहुर्मुहुः ” [अपने भक्तनके चिंताके विस्तारकों मिटायवेवारी जिनके चरणारविंदकी रेणुहैं इन अपने श्रीआचार्यजीकों वारंवार प्रणाम करूंहूं] श्रीआचार्यजीके चरणकमलकी रेणुके प्रसादतें सगरीं चिंताको आपुतें नाश होतहे एसे श्रीआचार्यजीके चरणकमलकों में वारंवार नमस्कार करतहों ॥ ४ ॥

मूलं-अतस्तदीयाः किं भ्रान्ताश्चिन्ता विदधते जनाः।
 ज्ञानिनोऽपि न वै दुःखं चित्ते दधति लौकिकम्॥५॥
 सेवारसादिरहिताश्चित्रं भक्ताः कथं तथा ।
 यैः स्वरूपस्य सेवायां दर्शनस्पर्शनादिकम् ॥६॥
 अनुभूतं सदा तेषां चित्तं दुःखयुतं कथम् ।
 परमानन्दसंबन्धे दुःखं तिष्ठति नैव हि ॥ ७ ॥

शब्दार्थः-तासों श्रीआचार्यजीके शरण आये ऐसे भगवदीयजन क्यों भ्रांत भयेहैं जो चिन्ता करतहैं सेवासुखके अनुभवकरिकें रहित ऐसे ज्ञानिजनहू चित्तमें लौकिकदुःखको नांही धरेहैं तब सेवासुखसहित भक्त चित्तमें लौकिकदुःख क्यों धरतहैं? यह आश्चर्यहै जिननें स्वरूपकी सेवामें दर्शन चरणस्पर्शादिकको सदा अनुभव कियो हे तिनको चित्त दुःखयुक्त कैसे होय? काहेतें जो परमानंदरूप श्रीकृष्णके संबंधमें निश्चय दुःख नांही रहतहे ॥ ५ ॥ ६ ॥ ७ ॥ टीका-एसे पुष्टिमार्गीय वैष्णव श्रीआचार्यजीके सेवक तदीय भ्रांत होय चिन्तामें क्यों परेहैं? काहेतें जो ज्ञानमार्गमें जीवहे सोहू लौकिकदुःख मनमें नांही धरतहैं उनहूके चित्तको लौकिकदुःखाग्नि नांही दहतहैं तब यह तो पुष्टिमार्गहे जहां श्रीआचार्यजीद्वारा भगवानसों संबंध भयोहे सो अज्ञानकरिकें चिन्तामें जरतहैं सो चिन्ता न करनी प्रभु सर्व सामर्थ्ययुक्तहैं ॥ ५ ॥ ऐसे पुष्टिमार्गीय वैष्णव श्रीकृष्णकी सेवारसविना क्यों रहतहैं? ज्ञानीकों सेवारसको ज्ञान नांही सोहू चिन्ता नांही करतहे तो यह तो साक्षात् श्रीकृष्णके स्वरूपकी सेवा करत हे दर्शन करत हे चरणस्पर्श करत हे तोहू चित्तमें भगवद्रसके अनुभव करि रहित क्यों रहत हे? तानें यह जान्यों जात हे जो चिन्ता चित्तमें भरी हे तातें रसको अनुभव नांही होत हे ॥ ६ ॥

एसो पुष्टिमार्ग हे जामें भावात्मक सर्व पदार्थको अनुभव हे तिनकों चित्तमें दुःख क्यों होतहे ? सो लौकिक चिंताहितें अज्ञान करि दुःखीहे भावात्मक रसको अनुभव नांही होत हे ओर श्रीकृष्ण परमानंदरूप फलात्मकको संबंध श्रीआचार्यजीद्वारा भयो हे ऐसे निवेदनीय वैष्णवके हृदयमें दुःख कैसें ठहरत हे ? सो अज्ञान करि लौकिक चिंतातें दुःखी होत हे ॥ ७ ॥

मूलं-पित्रादयस्तुसर्वेऽपि संवंधाद्दुःखहेतवः (संवंधाय स्वहेतवः) । वहिर्मुखजनस्येव बाहिर्मुख्यं ततस्त्यजेत् ८

शब्दार्थः—पिता, स्त्री, पुत्रादिक सर्वहू वहिर्मुखजनकोंही संवंध सो दुःखके कारणरूपहे (अथवा संवंधके लिये वहिर्मुखकों अपने कारणरूप हे) तासों वहिर्मुखताको त्याग करे ॥ ८ ॥ टीका—लौकिकमें पिता हे सो अपने पुत्रकों सर्वस्व देतहे तासों प्रिय लागत हे तेसैं स्त्रीपुत्रादिकहू अपने लिये प्रिय लागतहे परंतु यह पुष्टिमार्गमें श्रीकृष्णसों साक्षात् संबंध भयो हे तहां सर्व वस्तु सिद्ध हे तोहू अज्ञानकरिके चिंताकरि पित्रादिकसों लौकिकके अर्थ स्नेहकरि वहिर्मुखता करतहैं अपनो (श्रीकृष्णसों भयो एसो)संवंध विचारे तो वहिर्मुखताको त्याग होय॥८॥

मूलं—वहिर्मुखस्य बाधंते दोषा दैहिकमानसाः ।

क्षीणधातोरिवार्तस्य रोगा वातिकपैत्तिकाः ॥९॥

शब्दार्थः—जेसैं क्षीणधातु रोगी होय तिनकों वायुके तथा पित्तके रोग बाधा करे तेसैं वहिर्मुखको देहसंवंधी ओर मनसंवंधी दोष बाधा करतहे ॥ ९ ॥ टीका—वैष्णवकों वहिर्मुखको संग बाधकहे संगतें दैहिकदोष मानसदोष निश्चयही आयलागे सां दृष्टांत कहतहे जो

रोगी होय ताकी धातु क्षीण होय तिनकों वायु पित्त सर्व आयग्रसें
या भांति बहिर्मुखको संग होय तिनकों सब दोष आय लगे ॥ ९ ॥

मूलं-तन्निवृत्तिस्तु संपाद्या सतां संगेन सेवया ।

श्रीभागवतपाठेन तदर्थश्रवणादपि ॥ १० ॥

शब्दार्थः-इनकी निवृत्ति तो सत्पुरुषनके संगतें तथा सेवातें
संपादन करनी ओर श्रीभागवतके पाठसों तथा इनके अर्थश्रवणसोंहू
बहिर्मुखताकी निवृत्ति करनी ॥ १० ॥ टीका-जैसे रोगी सुंदर औषध
खाय तो वाको रोग जाय तेसेही तादृशीय भगवदीयको वैष्णव संग
करे, उनकी सेवा करे तो बहिर्मुखता जाय. भगवदीयके संगतें
दैहिक, मानमिक सर्व दोष दूर होय, तहां कोई संदेह करे जो
तादृशीय वैष्णव मिलने दुर्लभ हे सो न मिले तो कहा करे ? तहां
कहतहैं जो श्रीभागवतको पाठ करे काहेतें जो श्रीभागवत श्रीकृष्ण-
हीको स्वरूप हे ओर श्रीभागवतके पाठको अभ्यास न होय तो पुष्टि-
मार्गीय भगवदीयके मुखतें श्रवण करे तो सर्व दोष जाय ॥ १० ॥

मूलं-निवेदनस्मरणतः सद्भिः सह कथादिभिः ।

सदा नामग्रहणतः सदा शरणभावनात् ॥ ११ ॥

शब्दार्थः-निवेदनके स्मरणसों, सत्पुरुषनके संग कथादिकरिकें,
सदा भगवन्नामग्रहणसों, सदा शरणकी भावनासों, चिंता निवृत्त
होतहे ऐसे चतुर्दश श्लोकमें संबंध हे ॥ ११ ॥ टीका-जो श्रीभागवत
श्रवणकरिवेको संयोग न बनी आवे तो अहर्निश निवेदनको स्मरण
कियोकरे तथा सदा भगवदीयके मुखतें श्रीआचार्यजीमहाप्रभुजी,
श्रीगुसांईजीके ग्रंथनकी कथा सुने, येहू न बने तो सदा श्रीकृष्णके
नामको स्मरण करे परंतु नामहूको स्मरण यह जीवकों दुर्लभ हे सो
श्रीगुसांईजी विज्ञप्तिमें कहेहैं “ त्वन्नामोच्चारणेऽप्यस्ति न जीवेष्वा-

धिकारिता । अलौकिकत्वात्त्वन्नामस्तद्वाचो लौकिकत्वतः " (श्रीगु-
साईजी, श्रीगोवर्द्धननाथजीसों कहतहैं जो तुम्हारे नामकोहू उच्चारण
करिवेकी योग्यता जीवमें नांहीहे काहेतैं जो तुम्हारो नाम तो महा
अलौकिकहे सो जीवकी लौकिकवाणीतैं केसैं लियो जाय ?) तासूं
नामहू न बनिआवे तो शरणकी भावना करे सो विवेकधैर्याश्रयमें
श्रीआचार्यजीमहाप्रभुजी कहेहैं " ऐहिके पारलोके च सर्वथा शरणं
हरिः । दुःखहानौ तथा पापे भये कामाद्यपूरणे ॥ भक्तद्रोहे भक्त्यभावे
भक्तैश्चातिक्रमे कृते । अशक्ये वा सुशक्ये वा सर्वार्थे शरणं हरिः "
(यहलोकमें तथा परलोकमें निश्चय हरि शरणहैं, दुःखकी हानिमें, तथा
पापमें, भयमें, कामादिक अपूर्ण होय तहां, भक्तकृतद्रोहमें अथवा
भक्तको द्रोह होयजाय तहां, भक्तिके अभावमें, ओर भक्त अतिक्रम
करे तहां, अशक्यमें तथा सुशक्यमें, सर्व अर्थमें हरि शरणहैं) इत्यादि
वचनके अनुसार शरणकी भावना करे ॥ ११ ॥

मूलं-अष्टाक्षरमहामंत्रकीर्त्तनेन विशेषतः ।

पंचाक्षरेण मंत्रेण तदीयत्वविभावनात् ॥ १२ ॥

शब्दार्थः-अष्टाक्षर महामंत्रके कीर्त्तनकरिकें, विशेषसों पंचाक्षरमं-
त्रकरिकें तदीयपनेके विशेषभावनसों चिंता निवृत्त होतहे ॥ १२ ॥
टीका-अष्टाक्षर महामंत्रहे " श्रीकृष्णः शरणं मम " येही मंत्रको
अष्टप्रहर पुकारिकें कीर्त्तन करे तो सर्व सिद्ध होय सो द्वादशस्कं-
धमें श्रीशुकदेवजी कहेहैं " कलेदोपनिधे राजन्नस्ति ह्येको महान् गुणः ।
कीर्त्तनादेव कृष्णस्य मुक्तबंधः परं व्रजेत् " (यद्यपि कलियुग दोपनिधिहे
परंतु तामें एक बड़ो गुणहे जो श्रीकृष्णके नामको कीर्त्तन जो करतहे
सो यहकालबंधनतैं छूटिजातहे) तातैं अष्टाक्षरमंत्रको कीर्त्तन करे तथा
पंचाक्षरमंत्रकी भावना तदीयहोयकें तदीयके संग मिलिकें करे.

श्रीआचार्यजीमहाप्रभु नवरत्नमें कहेहैं “ निवेदनं तु स्मर्तव्यं सर्वथा तादृशैर्जनैः ” [सर्वथा तादृशीय वैष्णवजनके संग निवेदन तो स्मरण करिवेयोग्यहे] भगवदीयके संगविना पंचाक्षरभाव प्रकट न होय तातें निवेदनके स्मरणमें भगवदीयकी अपेक्षाहे ॥ १२ ॥

मूलं—वैराग्यपरितोषाभ्यां कृष्णसन्निहितस्थितेः ।

लौकिकक्लेशजौदास्यात् पुत्राद्यननुरागतः॥१३॥

शब्दार्थः—वैराग्य तथा संतोषकरिकें, श्रीकृष्ण (भगवत्स्वरूप)के सन्निधानमें स्थितिसों, लौकिकक्लेशमें भयो जा औदासीन्य तासों, ओर पुत्रादिकनमें अप्रीतिसों चिंता निवृत्त होतहे॥ १३॥ टीका—संसार (यहदेहसंबंधी लौकिकपदार्थ)में वैराग्य राखनो संसारमें वैराग्य होय तो यह लौकिक दुःख सुख चित्तकों बाधा न करे तातें वैराग्य राखे ओर यथालाभ संतोष होय (जो सहजमें आय प्राप्त होय ताहीमें संतोष होय) तो मनमें विक्षेप न होय ओर श्रीकृष्ण जहां विराजत होय पुष्टिमार्गकी रीतिसों सेवा होय तिनके पास स्थिति होय तो दर्शन सेवा वनिआवे सो भक्तिवर्द्धिनीमें श्रीआचार्यजी महाप्रभु कहेहैं “ अदूरे विप्रकर्षे वा यथा चित्तं न दुष्यति ” (समीपमें अथवा दूरमें जेसैं चित्त दोषयुक्त न होय तेसैं रहे) निकटरहिकें सेवा करे तो चित्तके सगरे दोषको नाश होय परंतु वोहोत निकटमें चित्तमें दोष आवे तो नेक दूर रहे परि नित्य सेवा दर्शन वने सो करे लौकिकक्लेशतें अपनो मन उदास राखे अपने चित्तमें लौकिकक्लेश न करे ओर देहसंबंधी पुत्र, स्त्री, वंधु, काहूमें अनुराग न राखे ॥ १३ ॥

मूलं—गृहवित्ताद्यनासक्त्या तदीयेष्वतिरागतः ।

नवरत्नस्य पाठेन सर्वचिंता निवर्तते ॥ १४ ॥

शब्दार्थः—गृह और धनआदिमें अनासक्तिकरिक्के, तदीय वैष्णव-जनमें अतिस्नेहसों, ओर नवरत्नग्रंथके पाठकरिक्के लौकिक अलौकि-कसंबंधी सगरी चिंता निवृत्त होतहे ॥१४॥ टीका—गृह, धन इत्या-दिकमें आसक्ति न राखे ये सगरे चिंताके मूलहे तातें इनमें प्रीति न करे पुष्टिमार्गीय भगवदीयमें अनुराग राखे तथा नवरत्नग्रंथको पाठ नित्य नियमसों बने तितनो करे तो मनमेंतें सगरी चिंता निवृत्त होय चिंतानाशके अर्थ गोविंददुवे वैष्णवके मिय एतन्मार्गीय सवनके लिये श्रीआचार्यजीमहाप्रभुजी नवरत्नग्रंथ प्रकट कियेहे तातें नवर-त्नके पाठतें सर्वचिंता निश्चय दूर होय ॥ १४ ॥

मूलं—एवं निवृत्तवैमुख्यं जनं दुःखं न बाधते ।

अतस्तन्मात्रयत्नैस्तु भवितव्यं भवादृशैः॥१५॥

शब्दार्थः—उपर कहे ताप्रकार निवृत्त होय गईहे बहिर्मुखता जिनकों ऐसे वैष्णवजनकों दुःख बाधा नांही करतहे तासों बहिर्मुखता निवृत्तिमा-त्रमेंहे यत्न जिनकों ऐसे तुहारे सारिखेकों रहेनो ॥ १५ ॥ टीका—उपर सगरे भगवद्धर्म कहेहे तिनसों बहिर्मुखता निवृत्त करीहे तिनको सगरो दुःख दूर होयगो उह मनमें परम सुख पावेगो याभांति दुःख निवृत्तिके अनेक यत्न कर्त्तव्यहे यह यत्न भावके वर्द्धकहे जाके भाग्यमें वेगि फलदानहे तिनसों भावके वर्द्धक यत्न बनिआवेंगे ॥ १५ ॥

मूलं—दुःखेन न वृथा नेयः कालः परमदुर्लभः ।

कृष्णसेवानुकूलस्तु निजाचार्याश्रयाश्रितैः॥१६॥

दुतं हेया वृथा चिंता प्राप्ताऽपि निजदोषतः ।

चित्तोद्वेगं विधायापीत्येतद्वचनचितनात् ॥ १७ ॥

शब्दार्थः—अपने श्रीआचार्यजीके आश्रयके आश्रित अथवा अपने श्रीआचार्यजीके दृढ आश्रयवारे भगवदीयके आश्रित ऐसे वैष्णवकों दुःखकरिकें भगवत्सेवामें अनुकूल यह परम दुर्लभ काल नांही बीतावनो ॥ १६ ॥ और अपने दोषतें प्राप्त भई एसीहू वृथा चिंता (चित्तको उद्वेग करिकेंहू भगवान् जो जो करेंगे सो इनकी लीला हे) नवरत्नके वचनके चिंतनसों शीघ्र छोडनी ॥ १७ ॥ टीका—यह काल परम दुर्लभ हे फेरि एसो समय न वनेगो यह मनुष्यदेह श्रीकृष्णकी सेवाके अनुकूलहे सो यह लौकिक चिंताकरिकें वृथा न खोवे काहेतें जो येही देहतें श्रीकृष्णकी सेवा बनतहे ओरयुगमें यह पुष्टिमार्गीय सेवा नांही तासों यह समय ब्रह्मादिकनकों दुर्लभ हे श्रीआचार्यजीद्वारा ब्रह्मसंबंध ओर युगमें कहां हे ? श्रीआचार्यजी-महाप्रभुजीको आश्रय फेरि कहां ? तथा श्रीआचार्यजीमहाप्रभु-जीके आश्रयवारे तादृशीय निजसेवकको आश्रय फेरि कहां हे ? या भांति मनमें विचारिकें यह काल परम दुर्लभ जानि दुःख क्लेश लौकिकमें मन लगाय नांही खोवनो भगवदीयको आश्रय तथा अपने श्रीवल्लभाचार्यजीको आश्रय करि श्रीकृष्णकी सेवा अवश्यही कर्तव्यहे सो यह देह तथा काल सेवानुकूलहे यह जानि एकक्षणहू सेवाविना न रहे ॥ १६ ॥ शीघ्रही चिंताको त्याग करे एकचिंतातें अनेक दोष प्राप्त होतहे तातें नवरत्नको वचन चिंतन करि निश्चयही चिंताको त्याग करे सो नवरत्नमें श्रीआचार्यजीमहाप्रभु कहेहैं—
“चित्तोद्वेगं विधायापि हरिर्यद्यत्करिष्यति । तथैव तस्य लीलेति मत्वा चिंतां द्रुतं त्यजेत्” (चित्तोद्वेग करिकेंहू हरि भगवान् जो जो करेंगे तेसैंही इनकी लीलाहे ऐसैं मानिकें शीघ्र चिंताको तजे) यह वचनतें शीघ्रही चिंताको त्याग करि उपर भगवद्धर्म कहे तामें प्रवृत्त होय भगवत्सेवा, स्मरण, तादृशीयको संग, मन लगायकें करे यह

नवरत्नग्रंथको नित्य चिंतन करे पाठ करे भाव विचारे तो चिंता दूर होय ॥ १७ ॥

इति श्रीहरिरायजीकृतं त्रयोविंशतितमं
शिक्षापत्रं श्रीगोपेश्वरजीकृतव्रजभाषा-
टीकासमेतं समाप्तम् ॥ २३ ॥

शिक्षापत्र २४

अब चतुर्विंशशिक्षापत्रमें भगवत्कृपाही कारण हे तासों अपने आचार्यको दृढ आश्रय राखनो अवतारदशामें जेसैं श्रीयमुनाजीआदि भगवत्संबंध करायवेवारेहैं तेसैं अनवतारदशामें श्रीमदाचार्यवर्य भगवत्संबंध साधकहैं जेसैं सवनकों मारिवेवारोहू सर्प अमृतपानकरिवेवारोकों सुंधिवेमेंहू समर्थ नाहींहे तेसैं सवनकी बुद्धिको नाश करिवेवारोहू यह करालकाल श्रीमदाचार्यजीके आश्रय करिवेवारोकों कछु करिवेकों समर्थ नाहींहे तासों अपनकों तो संपत्तिमें तथा विपत्तिमेंहू श्रीआचार्यचरणोदित अष्टाक्षर महामंत्रही साधन ओर साध्य हे यह निरूपण हे। उपरकहे जो चिंता तजे भगवत्सेवादि भगवद्धर्म करे सो जीवमें कहा सामर्थ्य हे? कालदोषतैं ग्रसितहे तातैं श्रीआचार्यजी महाप्रभुजीको दृढ आश्रय होय तो प्रभु कृपाकरे सो आश्रय कोन भांतिकरे सो आगे कहतहे-
मूलं-भक्तिमार्गं कृपामात्रं कारणं परमुच्यते।

तेनैव मार्गे सकलं सिद्धिमेति न संशयः॥ १ ॥

शब्दार्थः-भक्तिमार्गमें कृपामात्र उत्तम कारण हे या कारणतैंही सकलसिद्धिकों पावेंगे संशय नाहीं ॥ १ ॥ टीका-यह श्रीआचार्यजी-

१ यह शिक्षापत्रमें आगे दोषक जगे श्लोकांकमें कछु गदगद दिखेहे पंतु ता प्रमाण राखिवेम् अर्थसंदर्भ ठीक दिखेहे ताम् पूर्ववत् श्लोकांक रखेहे.

महाप्रभुजीको पुष्टिभक्तिमार्ग हे तामें एक कृपाही फलको कारण हे साधनतें फल नांही हे कृपाहीतें फलसिद्धि हे तातें श्रीकृष्णकी कृपा परमकारणहे ताहीतें यहपुष्टिमार्गमें स्थित जो वैष्णवहे तिनकों सकल-फल सिद्धहीहे यद्यपि इनजीवनतें साधन नांही वनत तोहू कहा भयो? पुष्टिमार्गमें स्थिति तो भई निवेदन तो कियो तातें प्रमेयबलतें विनाही साधन इनकों श्रीकृष्ण सर्वथा सर्वसिद्ध करेंगे यामें संशय नांही ॥१॥

मूलं—सा तु स्वाचार्यशरणागतौ तैर्ज्ञापितः प्रभुः ।

यदैव कुरुते कृष्णस्तदा भवति सर्वथा ॥२॥

शब्दार्थः—यह कृपा तो अपने श्रीआचार्यजीके शरण जाय तब इनमें जताये ऐसे प्रभु श्रीकृष्ण जबही कृपा करेंगे तब निश्चय होयगी ॥ २ ॥ टीका—पुष्टिमार्गमें आय अपने श्रीवल्लभाचार्यजीके शरणागत होयरहे तब श्रीआचार्यजी जीवकों श्रीकृष्णकों जतावेंगे तब सर्वथा उह जीवपर श्रीकृष्ण कृपा करेंगे ॥ २ ॥

मूलं—अतस्तदाश्रयो जीवैर्दृढ एव विधीयताम् ।

यथावतारलीलायां तासां श्रीयमुना मता ॥३॥

यथा वा हरिदासो हि पुलिंदीनां गिरिर्मतः ।

यथा वाग्निकुमाराणां व्रते कात्यायनी मता ॥४॥

प्रादुर्भूतः स्वयं कृष्णो यथा स्वप्रापणे मतः ।

यथा वा दैन्यभावात्मा प्रादुर्भवे स्वयं मतः ॥५॥

तथा परोक्षे जीवानां पुष्टिसंबंधसिद्धये ।

श्रीमदाचार्यसंबंधो नान्यदस्ति हि साधने ॥ ६ ॥

शब्दार्थः—तासों जीव श्रीमदाचार्यजीको दृढ आश्रय करे काहेतें जो जेसैं अवतारलीलामें कुमारिकानकों श्रीयमुनाजीहे ॥ ३ ॥ अथवा

जैसे पुलिंदीकों भगवद्भक्त गिरिराजहे अथवा जैसे अमिकुमार-
नकों व्रतमें कात्यायनीहे यह सर्व भगवत्संबंध करायवेवारेहे ॥ ४ ॥
जैसे श्रीकृष्णकी प्राप्तिमें आपही श्रीकृष्ण प्रादुर्भूत भयेहैं ओर जैसे
रासपंचाध्यायीमें प्रादुर्भावमें दैन्यभावात्मक आपहीहैं ॥ ५ ॥ तैसें
जीवनकों परोक्षमें पुष्टिसंबंधकी सिद्धिके अर्थ श्रीमदाचार्यजीद्वारा
संबंधही साधन हे अन्यसाधन नांहीहे ॥ ६ ॥ टीका-तातें यह
पुष्टिमार्गीय जीव श्रीवल्लभाचार्यजीके चरणकमलको दृढ आश्रय
निश्चयही करे तब फल प्राप्त होय जैसे अवतारदशामें श्रीयमुनाजी-
द्वारा कुमारिकानकों प्रभु प्राप्त भये तेसेही अब श्रीआचार्यजीद्वारा
जीवनकों प्रभुको संबंध भयो तातें मुख्य श्रीआचार्यजीको आश्रयहे
॥ ३ ॥ या समयमें तो एक श्रीआचार्यजी द्वार हे जैसे अवतारलीलामें
हरिदास (श्रीगिरिराज) परमभक्तहे तिनके संगतें पुलिंदीकों
भक्ति सिद्ध भई लीलाकी प्राप्ति भई ओर अमिकुमारीकानकों
कात्यायनीमिसतें श्रीयमुनाजीद्वारा सिद्धि भई पुलिंदीकी सेवा श्री-
गिरिराजद्वारा प्रभु अंगीकार करी कुमारिकानकी सेवा श्रीयमुनाजी-
द्वारा अंगीकार करी तेसेही अब श्रीआचार्यजीद्वारा वैष्णवकी सेवा
प्रभु इहां अंगीकार करतहैं ॥ ४ ॥ ओर श्रीकृष्ण प्राकट्यदशामें स्वयं
प्रभु आपकी प्राप्ति करावतहैं फलप्रकरणरासपंचाध्यायीमें अतिदैन्यकी
भावनातें आपही प्रभु प्रकटे सो “ इति गोप्यः प्रगायंत्यः प्रलपंत्यश्च
चित्रधा । रुद्रुः सुस्वरं राजन् कृष्णदर्शनलालसाः ॥ तासामाविर-
भूच्छौरिः स्मयमानमुखांबुजः ॥ पीतांबरधरः सखी साक्षान्मन्मथ-
मन्मथः ” (ऐसें गोपिकागीतसों) उत्कृष्टगान करते, ओर विचित्रप्रकार
विलाप करते, श्रीकृष्णके दर्शनमें लालसावारे, गोपीजन हेपरिक्षित् !
विप्रयोगद्योतकस्वरसों रुदन करत भये ॥ इनके मध्यमेंतें हास्ययुक्तहे
मुखारविंद जिनको, ऐसे पीतांबर धारणकरिवेवारे, वनमालायुक्त, ओर

साक्षात् कामदेवके कामदेवरूप प्रभु प्रकट भये) याभांति दैन्यतें प्रकटे ॥ ५ ॥ प्राकट्यदशामें जेसैं श्रीयमुनाजी, श्रीगिरिरांज, प्रभु आप ओर दैन्य उनतें सब सिद्ध हे तेसैंही अव परोक्षदशामें पुष्टिसंबंध भयोहे काहेतें जो यह कलियुगमें ओर साधन नांही हे तातें श्रीआचार्यजीमहाप्रभुके संबंधतें निवेदन होय सोही साधन हे ओर दूसरो साधन नांही एक श्रीआचार्यजीके संबंधतेंही प्रभु फलदान करतहैं ॥ ६ ॥

मूलं-अत एवोक्तमाचार्यैः स्तोत्रे कृष्णाश्रयाभिधे ।

“शरणस्थसमुद्धारं कृष्णं विज्ञापयाम्यहम्” ॥७॥

शब्दार्थः—तासोंही श्रीमदाचार्यजी श्रीकृष्णाश्रयस्तोत्रमें “शरणमें रहे ऐसे जीवनके उद्धारनिमित्त श्रीकृष्णकों में विज्ञप्ति करूहुं ” ऐसे कहेहैं ॥ ७ ॥ टीका—हमारे श्रीवल्लभाचार्यजी श्रीकृष्णाश्रयग्रंथमें श्रीकृष्णसों जीवके लिये विज्ञप्ति किये हे जो, जीव शरण आये तिनको उद्धार करो ओर प्रतिज्ञा करि जीवनकों विश्वास कराय धीरज दिये जो उद्धार होयगो चिंता मति करो सो अव कहतहैं ॥ ७ ॥

मूलं-विश्वासार्यं वरमदादिति श्रीवल्लभोऽब्रवीत् ।

अतो नान्यप्रकारेण फलं स्वहृदि चिंत्यताम् ॥८॥

शब्दार्थः—वैष्णवकों विश्वासके अर्थ श्रीकृष्णाश्रयग्रंथमें [श्रीकृष्णके समीप श्रीकृष्णाश्रयको जो पाठ करे तिनकों श्रीकृष्ण आश्रय होय] ऐसे श्रीवल्लभाचार्यजी कहतहैं यह प्रतिज्ञा करिहे तासों अन्य प्रकारकरिकें अपने हृदयमें फलको विचार नांही करनो ॥ ८ ॥ टीका—श्रीआचार्यजीमहाप्रभुजी प्रथम श्रीकृष्णसों [उपरके श्लोकमें लिखे ताप्रकार] विज्ञप्ति करिकें अव अपने पुष्टिमार्गीय वैष्णवनसों कहतहैं “कृष्णाश्रयमिदं स्तोत्रं यः पठेत्कृष्णसन्निधौ । तस्याश्रयो भवेत्कृष्ण

इति श्रीवल्लभोऽब्रवीत् ” यह कृष्णाश्रयग्रंथको पाठ श्रीकृष्णके सन्मुख करियें ताकरिकें श्रीकृष्ण अपने आश्रय निश्चय सिद्ध करेंगे यह मेरी प्रतिज्ञा हे या प्रकार श्रीमहाप्रभुजी प्रतिज्ञा किये जेसैं चीरहरणमें श्रीठाकुरजी भक्तनसों कहे जो शरदृक्तुमें रास करि तुझारे मनोरथ पूर्ण करेंगे यह कहे तब भक्तनको विश्वास भयो नांही तो शरदृक्तु-पर्यंत विश्वास न रहेतो तेसैंही श्रीआचार्यजीमहाप्रभु प्रतिज्ञा करि अपने निजसेवकनकों विश्वास दिये तातें एक श्रीआचार्यजीमहाप्रभु-द्वारा फलसिद्धि हे ओर प्रकार फलको चिंतन न करनो ॥ ८ ॥

मूलं—विश्वासेन यथाप्नोति चातकः स्वातिजं जलम् ॥

तथा चेत्कृष्णजलदः स्वानंदं वर्षयिष्यति ॥ ९ ॥

शब्दार्थः—विश्वासकरिके जेसैं चातक पक्षी स्वातिके जलको पावेहे तेसैंही श्रीकृष्ण घनश्यामहे सो अपने आनंदकों वरखेंगे ॥ ९ ॥ टीका—विश्वासकरि चातक जेसैं स्वातिके जलकी अपेक्षा राखतहे ओर पृथ्वी-पर कूवा, तलाव, नदी, समुद्र पर्यंत भयोंहे तामें आशा नांही करतहे यह विश्वास देखि घनहू चातकको मनोरथ पूर्ण करतहे तेसैंही जा वैष्णवनें एक श्रीकृष्णहीको दृढ आश्रय मनमें कियोहे ओर अवतार तथा ओर देवतासों फलकी अपेक्षा नांही राखतहे तिनकों जलद (मेघ) रूप श्रीकृष्ण अपनो आनंद वरखेंगे निश्चय आनंददान करेंगे ॥ ९ ॥

मूलं—एवं विश्वाससद्भावे सर्वमेव भविष्यति ।

यतः परिवृढोऽस्माकं सर्वं कर्तुं क्षमो मतः ॥ १० ॥

शब्दार्थः—एसैं विश्वास होय तो सर्वही सिद्ध होयंगे काहेतें जो अपने स्वामी प्रभु सर्व करिवेमें समर्थहे ॥ १० ॥ टीका—या भांति पुष्टिमार्गीय वैष्णव शुद्धभावसों विश्वास करे तिनकों सर्व सिद्ध होय

सो श्रीहरिरायजी कहतहे जो एसे हमारे प्रभु सर्वकरणमें सामर्थ्य-युक्तहे तातें कृपा करेहीगे ॥ १० ॥

मूलं—स हि स्वतः समर्थत्वान्न साधनमपेक्षते ।

कालकार्यं विलोक्यात्र तदीयानां विशेषतः ॥

निःसाधनत्वसंस्फूर्त्या दृढः स्यात्तत्पदाश्रयः ॥११॥

शब्दार्थः—अपने स्वामीप्रभु आपतेंही समर्थहे तासों साधनकी अपेक्षा नांही राखतहें तासों कालके कार्यको देखीकें तदीय वैष्णवनों विशेषकरिकें निःसाधनपनेकी बरोबर स्फूर्ति होय ताकरिकें इनके चरणारविंदको दृढ आश्रय होय ॥ ११ ॥ टीका—श्रीकृष्ण आपुही स्वतः सामर्थ्ययुक्तहे कर्तुं, अकर्तुं, अन्यथाकर्तुं समर्थहे सो अपने भक्तनके साधनकी अपेक्षा नांही राखतहें जो यह इतनो साधन करे तो यह फल होय यह तो अन्य देवतामेंहे जो जितनो साधन करे तितनो लौकिक फल देय सो श्रीकृष्णमें नांहीहे यह कालकी कृति महा कठिन विपरीतधर्मयुक्त देखिकें अपने तदीयपर विनसाधनही विशेष कृपा करतहे जेसैं ब्रजभक्त रासपंचाध्यायीमें अंतर्धानसमय अनेक साधन किये लीला किये, पाछे निःसाधन होय गुणगान किये तब प्रभु अपनोही आश्रय जानिके प्रकटे तेसैंही जब वैष्णव मनतें निःसाधन होय दैन्य करि दृढ आश्रय करे तब प्रभु कृपा करे ॥ ११ ॥

मूलं—असुराणामविश्वासस्तथा तत्संगिनामपि ।

मतिमोहो महादोषनिधानं संभविष्यति ॥१२॥

शब्दार्थः—असुरजीवकोही प्रभुनमें अविश्वास हे तेसैं इनके संगी-कोंहू अविश्वासहे तातें इनमेंसूं काहूको संग होय तो मतिमोहरूप महादोषके निधानको अवश्य संभव हे ॥ १२ ॥ टीका—जिनके

मनमें, अविश्वास है सो केवल असुरहीहे तिनको जो कोय संग करे तिनकोहू आसुरावेशरूप अविश्वास होय तातें उनको संग न करनो याजीवकों मतिको मोह भयोहे तातें दोषरूप होयरह्योहे तातें निःसाधनता नांही आवतहे अहंतादोषसहितहे अपनकों यह जानतहे जो मेंही करतहों यह अज्ञानदोष, कबहू न दूर होय ॥ १२ ॥

मूलं—यथा पूर्वकथां श्रुत्वा भगवत्पादसेविनाम् ।

स्वस्मिन् दैन्यसमुत्पत्तिस्तथा साधननाशनम् ॥ १३ ॥

शब्दार्थः—भगवानके चरणारविंदकों सेवन करिवेवारेनकी पेहेलेंकी (प्रह्लादादिककी) कथासुनिकें जेसैं अपनेमें दैन्यकी वरोवर उत्पत्ति होतहे तेसैं साधनको नाश होतहे ॥ १३ ॥ टीका—जब पूर्वजो प्रथमके भक्त प्रह्लादजी तथा ब्रजभक्तादिक श्रीभागवतमें कहेहैं तथा पुष्टिमार्गीय श्रीआचार्यजीमहाप्रभुके सेवक चोराशीवैष्णवकी वार्त्ता प्रभृति कथा सुने प्रथम याभांति सेवा करीहे में कहा करतहों याभांति दैन्य होय भगवत्सेवा करे तब निःसाधन होय सर्वदोष दूर होय तातें श्रवण मुख्य सेवाको पोषकहे तातें श्रीआचार्यजीमहाप्रभु भक्तिवर्द्धिनीमें कहेहैं “ सेवायां वा कथायां वा ” दोय कर्त्तव्यहे सो भगवत्सेवा प्रीतिसों करे भगवदीयके मुखतें कथा सुनिवेतें दैन्य होय ताकरिकें अहंतारूप [में साधन करतहों यह] दोषको नाश होय ॥ १३ ॥

मूलं—तदीयानां सर्वमस्ति सदा तद्भावभाविनाम् ।

इतरेषां कालिकानां कालेन निखिलं गतम् ॥ १४ ॥

शब्दार्थः—निरंतर इनके भावकरिकें भावित जो तदीयहे इनकों सर्व सिद्धहे ओर जो कालके वश्यहे तिनको सर्व काललरिकें गयो हे ॥ १४ ॥ टीका—तदीय जो हे तिनके भावकरिकें भावित होय वे जो भावतें करतहे ता भावमें येहू लगे तब फलसिद्धि होय तातें श्रवणहू

आवश्यकहे सो गोपिकागीतमें कहेहैं “ तव कथामृतं तप्तजीवनं कवि-
भिरीडितं कल्मषापहम् । श्रवणमंगलं श्रीमदाततं भुवि गृणंति ते भूरि-
दा जनाः ” (संसारतें तप्त अथवा विप्रयोगाग्नितें तप्तकों जीवनरूप,
कविजननें प्रशंसा कियो, पाप (मद)कों मिटायवेवारे, श्रवणतें मंगलरूप,
लक्ष्मीयुक्त, ओर सर्वत्र व्याप्त, ऐसे आपकी कथारूप अमृतके कहिवे-
वारे जो हे सो बोहोत अर्थ देवेवारे अजन (भगवद्रूप) अथवा
जन्मादिदोषरहितहे) तातें श्रवणतें सर्व दोष दूर होय ओर भगवद्भाव
बड़े तातें यह भावरहित जो हे तिनको सगरो साधन यह कराल
काल खातहे काहेतें जो काल सगरेको संहारकर्त्ताहे सो अखिल
जगतकों खातहे ॥ १४ ॥

मूलं—यतः कालस्तद्विभूतिः “कालः कलयतामहम्” ।
मुख्याधिकार्यपि हरेरिच्छाशक्तिस्वरूपवान् ॥ १५ ॥
तदंतरंगदासेषु न तत्सामर्थ्यमिष्यते ॥ १६ ॥

शब्दार्थः—जासों कालहे सो भगवानकी विभूतिहे काहेतें जो गीता-
जीमें विभूतिके अध्यायमें श्रीभगवाननें कह्योहे जो संख्या करिवे-
वारेनमें कालहे सो मेंहूं तासों यह काल मुख्य अधिकारी इच्छाश-
क्तिरूपहे तोहू श्रीभगवानके अंतरंग दासनकी उपर ईनको सामर्थ्य
नाहीहे ॥ १५ ॥ १६ ॥ टीका—काल भगवानकी विभूतिहे सो
यह कलिदोषतें महामलिन सृष्टि यहकालमें लीन होतहे सो काल

१ वैराग्यसाधक, २ ज्ञानसाधक, ३ ऐश्वर्य अथवा धर्मसाधक, ४ आनंदसाधक,
५ लक्ष्मीयुक्त, ६ वीर्य अथवा ऐश्वर्ययुक्त एसें पदगुणयुक्त आपकी कथा आप जेसीदे
एसी श्रीसुयोधिनीजीमें निरूपणहे, ७ जेसें लौकिकमें राजाको मुख्य दीवान होय सोह
एसें राजाके इजुरीकी उपर हुकम नाहीं करि सकतहे किंतु इनसों दरपतहे तेसेही
काल मरुनको कड़ु नाहीं करि सकतहे.

भगवानको मुख्य अधिकारीहे इच्छाशक्तिको स्वरूपहे तातें ब्रह्मादि-
कनकों नांही छोडतहे एसे कालकोहू सामर्थ्य श्रीकृष्णके अंतरंग
दासनकी उपर नांहीहे भगवदीयकों वाधा नांही करिसकतहे ॥ १६ ॥

मूलं—स हि सर्पो यथाऽन्येषां मारकोऽपि न हि क्षमः ।

पीतामृतं जनं जातु स्पृष्टुमाघ्रातुमेव च ॥ १७ ॥

तथा कालेऽपि मनुजं महापुरुषसंस्थितम् ।

भक्तिपीयूषपातारं न किञ्चित्कर्तुमीश्वरः ॥ १८ ॥

शब्दार्थः—जेसे यह सर्प अन्यकों मारिवेवारोहे सोहू अमृतपान
करिवेवारेकों कदाचित् स्पर्श करिवेमें ओर सुंघिवेमेंही समर्थ नांहीहे
॥ १७ ॥ तेसे कालहू महापुरुष (श्रीआचार्यजीमहाप्रभुजी) को
आश्रय कविवेवारे, भक्तिरूप अमृतपान करिवेवारे मनुष्यकों कछु
करिवेमें समर्थ नांहीहे ॥ १८ ॥ टीका—यह कालरूप सर्पहे सो सगरे
जगतकों खातहे परंतु श्रीकृष्णके चरणामृत तथा अधरामृत जिननें
पान कियेहें एसे भक्तको स्पर्श नांही करतहे ओर सुंघतहू नांहीहे सो
श्रीगुसाईजी सप्तश्लोकीमें कहेहें “अघौघतमसावृतं कलिभुजंगमासादितं
जगद्विषयसागरे पतितमस्वधमें रतम् । यदीक्षणसुधानिधिः समुदितोऽ-
नुकंपामृतादमृत्युमकरोत् क्षणादरणमस्तु मे तत्पदम् ” (पापके
समूहरूप अंधकारकरिकें आवृत, कालरूप सर्पने ग्रसित, जगतके
विषयरूप समुद्रमें गिन्यो, ओर अपने धर्मते विमुख, एसे जीवकों
जीनके [श्रीआचार्यजीके] कृपाकटाक्षरूपचंद्र उदित होय दयारूप
अमृतसों एकक्षणते अमर करिदियो इनके चरण मेरो शरण होउ)
यामांति श्रीआचार्यजीमहाप्रभुजीके चरणामृतको पान जो कोउ
जीव कियोहे तिनकों कालरूप सर्प नांही स्पर्श करतहे ओर सुंघतहू
नांही ॥ १७ ॥ महापुरुषसर्वमें उत्तम श्रीआचार्यजीमहाप्रभु तथा

पुष्टिमार्गीय भगवदीयके आश्रित जो मनुष्य होयरहेहें पुष्टिभक्ति अमृतरसको पान करतहें तिनकों रंचकहू कालदोष बाधक नांहीहे काल जेसैं ईश्वरकी आज्ञामें रहतहे तेसैंही भगवदीयसों डरपतहे ईश्वरहू भगवदीयकों बाधा नांही करत तहां काल कहाहे ? सो वार्त्तामें प्रसिद्धहे जो प्रभुदासनें दहीकेपलटे मुक्ति दीनी जो भक्ति मांगते तो भक्ति देते इनकों काल कहा करि सके ? ॥ १८ ॥

मूलं-तदीयैः सर्वकार्येषु न कालश्चित्यतां हृदि ।

“ तथैव तस्य लीलेति ” वचनात् सर्व चिंत्यताम् ॥ १९ ॥

शब्दार्थः-जो तदीयहे तिनकों सर्वकार्यमें हृदयमें कालको चिंतन नांही करना काहेतें जो नवरत्नग्रंथमें श्रीमहाप्रभुजी कहेहें “ जो जो भगवान् करेंगे सो तेसैंही इनकी लीला जानिकें चिंताकों छोडनी ” यह वचनतें प्रभुकी लीलाकोही चिंतन करना ॥ १९ ॥ टीका-जो तदीयहे सर्वकाल भगवद्धर्ममें निपुणहे तिनकों अपने कालकी चिंता नांही करनी कोईकालमें चिंता नांही कर्त्तव्यहे सो नवरत्नग्रंथमें श्री-आचार्यजीमहाप्रभुजी कहेहें “ तथैव तस्य लीलेति मत्वा चिंता द्रुतं त्यजेत् ” (तेसैंही इनकी लीलाहे एसें मानिकें शीघ्र चिंताकों तजे) यह वचनको चिंतन हृदयमें करिकें चिंता नांही कर्त्तव्यहे सगरी श्रीकृष्णकी लीलाही जाननी ॥ १९ ॥

मूलं-सर्गादिलीलाकर्तृत्वात् किं चित्रं तादृशि प्रभो ।

विवेकोऽप्ययमेवात्र स हितं वै विधास्यति ॥ २० ॥

स्वकीयानां निजेच्छातस्ततश्चिंताऽत्र का भवेत् ॥ २१ ॥

शब्दार्थः-श्रीभागवतमें कहा एसी सर्गादिलीला करिवेपनो जामें हे एसे प्रभुमें आश्रय कहाहे ? प्रभु निजेच्छात अपने भक्तनको हितही करेंगे यहहू इहां विवेकहे तासों इहां चिंता कहा होय ? ॥ २० ॥ २१ ॥

टीका—श्रीभागवतमें सर्गविसर्गादि दशविधलीला कहिहे ऐसे प्रभुकी सगरे जगतमें लीला जाने एसो जाके मनमें होय सोई विवेकी कहिये सो श्रीआचार्यजीमहाप्रभु विवेकधैर्याश्रयमें कहेहैं “विवेकस्तु हरिः सर्वं निजेच्छातः करिष्यति” (हरि अपनी तथा अपने भक्तनकी इच्छातें सर्व करेंगे यह विवेक जाननो) येही विवेक जो सर्व कार्यमें निजेच्छा माने या भांति भगवानके स्वकीय निजभक्तहे सो सर्व कार्यमें भगवदिच्छा जानतहैं ॥ २० ॥ २१ ॥

मूलं-भवंतः श्रुतसद्वात्ताः सत्संगकृतयोऽपि हि ।

प्रभुपादैकगतयस्तेषां का परिदेवना ॥ २२ ॥

शब्दार्थः—तुम सुनीहे सद्वात्ता (भगवदीयनकी वात्ता) जिनने ऐसे, ओर सत्संग करिवेवारे, तथा प्रभुके चरणारविंदमेंही एक आसक्ति-वारेहो इनकों कहा चिंताहे? ॥ २२ ॥ टीका—ओर तुम तो भगवानके संबंधीहो भगवद्भाव सुनोहो भगवद्वात्ता सुनोहो ओर सत्संगहू वोहोत करोहो तातें तुमकों कोईप्रकारकी चिंता नांही कर्त्तव्यहे प्रभु जो श्रीकृष्ण तथा श्रीआचार्यजीमहाप्रभु तिनके पदकमलमें तुह्यारी प्रीतिहे ऐसे तुमहो तासों परिवेदना (चिंता) नांही कर्त्तव्यहे ॥ २२ ॥

मूलं-धर्मसंस्थापनार्थाय यस्य प्राकट्यमुच्यते ।

स हि धर्मव्यतिकरं स्वकृतं सहते कथम् ॥ २३ ॥

शब्दार्थः—धर्मके सुंदर स्थापनके अर्थ जिनको प्राकट्य सर्वत्र कह्योहे सो स्वकृतिसों धर्मको व्यतिक्रम (नाश) करे सो कैसे सहन करे? ॥ २३ ॥ टीका—धर्मके स्थापनके लिये श्रीमहाप्रभुजीको तथा श्रीगुसांईजीको प्राकट्यहे सो उचितहे प्रभु सदा धर्मकी रक्षा करीहे सो भगवदीय गायहे “चहुजुग विदेवचन प्रतिपायों । धर्मग्लानि भई जवहीं जव तव तव तुम वपु धायों ॥ १ ॥ सत्ययुग धेतव-

राहरूप धरि हिरण्याक्ष रिपु मायों । त्रेता रामरूप दशरथगृह रावण-
कुल संहार्यों ॥ २ ॥ द्वापर ब्रज ह्वततें राख्यो सुरपति पावन
पायों । कंसादिक दानव सब मारे वसुधाभार उतार्यों ॥ ३ ॥ कलि-
युग श्रीवल्लभगृह प्रकटे मायावाद निवार्यों । मानिकचंद प्रभु श्री-
विठ्ठल पुरुषोत्तमरूप निहार्यों ॥४॥” याभांति श्रीविठ्ठल पुरुषोत्तमरूपहे
धर्मस्थापनार्थ प्राकट्यहे तासों जेकोई वेदधर्मको अतिक्रम करे अपने
मनमानि क्रिया करे उन्मत्त होय सो प्रभुकों न सुहाय ॥ २३ ॥

मूलं-ब्रह्मण्यो धेनुविप्रेक्षो वेदधर्मैकपालकः ।

स कथं सहते कृष्णस्तद्विरोधं जनैः कृतम् ॥२४॥

शब्दार्थः—श्रीकृष्ण ब्राह्मणकी रक्षा करिवेवारेहें, धेनु ओर ब्राह्मण-
के ईशहें, वेदधर्मके मुख्य पालकहें सो श्रीकृष्ण ब्राह्मण, गाय, ओर वेद-
धर्म, इनको विरोध जनने कियोहे सो कैसें सहेंगे ? ॥२४॥ टीका—प्रभु
ब्रह्मण्यहें, धेनु, विप्र, वेदधर्मके प्रतिपालकहें ऐसें भगवानसों बहिर्मुख
जीव [उनसों विरोधकर्ता मनुष्य] की विरुद्धकृति श्रीकृष्ण कैसें
सहे ? ॥ २४ ॥

मूलं-परमानंदसंदेहो दयालुः सुतरामपि ।

स कथं सहते कृष्णो दयाभावं जनेष्वपि ।

अतोऽत्र यदिदं जातं तत्स्वदोषेण सर्वथा ॥२५॥

शब्दार्थः—श्रीकृष्ण परमानंदके समूहहें ओर निरंतर अत्यंतही
दयावारेहें सो मनुष्यनमें दयाके अभावकों कैसें सहन करे ? तासों इहां
यह जो भयो सो अपने दोषकरिकें निश्चय भयोहे ॥ २५ ॥ टीका—श्री-
कृष्ण परमानंदरूपहे, परमदयालुहे, काहूको दुःख नांही देखि सकतहे,
प्राणिमात्रके आनंददाताहे, सो अपने स्वकीय निजभक्तनके दुःख
कैसें सहेंगे सर्वथा न सहेंगे तातें वेष्णव भगवदीयको यह लक्षणहे जो

लौकिक वैदिक कुछ कार्य सिद्ध न होय काहू वस्तुकी हानि होय तहां अपनोही दोष विचारनो देहसंवंधी अनेके दुःखमें अपनोही दोष विचारनो ॥ २५ ॥

मूलं-निर्दोषपूर्णगुणता हरौ नित्यं विराजते ।

कदाचित् स्वप्रभोर्दोषो नानेयः सर्वथा हृदि ॥ २६ ॥

शब्दार्थः—हरिमें निर्दोषपूर्ण गुणपनो विराजितहे तासों काहू समय प्रभुके दोष सर्वथा अपने हृदयमें नांही लावने ॥ २६ ॥ टीका—प्रभुविपे रंचकहू दोष न विचारनो प्रभु तो भलीहीं करतहें मेरो दोषहे तातें यह क्लेश भयो हे यह निश्चय मनमें जानियें जो श्रीकृष्ण निर्दोष सदाहैं सकलगुणकरिकें पूर्णहैं ऐसे श्रीकृष्ण सर्वदुःखके हर्ताहैं तामें निर्दोष-पूर्णगुण सदा विराजमानहे तातें कदापि कोई प्रकारसों प्रभुको दोष हृदयमें सदा नांही लावनो ॥ २६ ॥

मूलं-के वा वयं वराका यदुद्धवाद्या अपि प्रभोः ।

श्रुतवंतो विसदृशीं लीलां पश्चात्स्थिता अपि ॥ २७ ॥

शब्दार्थः—जासों उद्धवादिक भक्तहू प्रभुकी विपरीत (प्रभासमें आसुरव्यामोहकी) लीला सुनकेहू पाछें पृथ्वीपर रहे तहां तुच्छ अपन कौनमात्र ? ॥ २७ ॥ टीका—श्रीहरिरायजी कहतहें जो में अपनकों कहा-कहूं महातुच्छहू उद्धवादिक बड़े भगवद्भक्तकीहू यह गतिहे जिनकी लीला सुनि देखि अनुभव करि सो उद्धव अपने प्रभुके अंतर्धानसमय सुनिके फिर प्रभुविना स्थित रहे तो में कहा कहूं ? ॥ २७ ॥

मूलं-कुंतीवदीदृशं भाग्यं कस्य भाग्यवतो भवेत् ।

सद्यः प्राणविमोकोऽत्र श्रीकृष्णविरहेण हि ॥ २८ ॥

शब्दार्थः—श्रीकृष्णके विरह करिकें शीघ्र इहां प्राणको त्याग होय एसे कुंतीजीके वरोवर कोन भाग्यवारेको भाग्य होय ? ॥ २८ ॥

टीका-कुंती बड़ी भक्त परम भाग्यवती जो श्रीकृष्णके अंतर्धान सुनतही विरहकरिके अपने प्राण तत्काल छोड़ि दिये ताते कुंती महाभाग्यवती भक्त हती ॥ २८ ॥

मूल-अस्माकं तु प्रभुर्नित्यमक्षताव्याहतोऽधुना ।

विराजते ततो दुःखं न विधेयं मनस्यपि ॥ २९ ॥

शब्दार्थ:-अपने प्रभु तो अखंडित सदा अव नित्य विराजतहे तासों मनमेंहू दुःख न करनो ॥ २९ ॥ टीका-हमारे प्रभु तो नित्यही प्रत्यक्ष विराजमानहे श्रीआचार्यजीद्वारा जिनको संबंध भयो हे सो प्रभु सदा घरमें विराजमानहैं ताते मनमें दुःख धारण सर्वथा नाहीं कर्तव्यहे ॥ २९ ॥

मूल-भवद्भिर्मिलितैः सर्वैरियं शिक्षा विचार्यताम् ।

ततः संदेहजातं यद्बुद्धिस्थं तद्व्यपोह्यताम् ॥ ३० ॥

शब्दार्थ:-श्रीहरिरायजी लिखतहैं जो तुम सगरे भगवदीयनसों मिलिके यह शिक्षा विचारोंगे तासों जो बुद्धिमें रह्यो संदेहसमूह सो दूर होयगो ॥ ३० ॥ टीका-अब श्रीहरिरायजी कहतहैं जो यह शिक्षा में तुमकों लिखि पठाई हे ताको सगरे पुष्टिमार्गीय भगवदीय भक्तसों मिलिके विचार करियो ताते मनको चिंतारूप सकल संदेह दूर होय जायगो सुंदर बुद्धिकी पोषक होयगी ॥ ३० ॥

मूल-अस्माकं साधनं साध्यं 'श्रीकृष्णः शरणं मम' ।

संपत्स्वापत्स्वपि सदा स्वाचार्यचरणोदितम् ॥ ३१ ॥

शब्दार्थ:-हमारे संपत्तिमें तथा आपत्तिमेंहू सदा अपने श्रीआचार्यजीमहाप्रभुजीने कह्यो जो "श्रीकृष्णः शरणं मम" यह अष्टाक्षर मंत्र सो साधन तथा फलरूप हे ॥ ३१ ॥ टीका-हमारे तो साधन ओर

सिद्धिहू एक ' श्रीकृष्णः शरणं मम ' यह हे सो यह श्रीवल्लभाचार्यजी अष्टाक्षर महामंत्र प्रकट करि श्रीकृष्णहीके शरणसिद्धि कियेहे ताते हम तो एक श्रीकृष्णहीको आश्रय हृदयमें करिके श्रीकृष्णहीको शरण मन वचन कर्म करिके सर्वभांति येही साधन तथा साध्यजानेहे ताते संपत्ति अनेक सुखहूमें श्रीकृष्णकी शरणहे ओर आपत्ति (दुःख) हूमें एक श्रीकृष्णहीको शरण कियेहे काहेते जो हमारे आचार्यचरणनने यह मंत्र प्रकट कियोहे सो श्रीगुसांईजी विज्ञप्तिमें कहेहें " यदुक्तं तातचरणैः ' श्रीकृष्णः शरणं मम ' । तत एवास्ति नैश्चित्यमैहिके पारलौकिके " (जो पितृचरण श्रीमहाप्रभुजी कहेहें जो ' श्रीकृष्णः शरणं मम ' तासोही यहलोक तथा परलोक संबंधी सगरेमें निश्चितताहे) इत्यादिवचनानुसार अष्टाक्षरमंत्रही हमारे साधन तथा साध्य हे ॥ ३१ ॥

इति श्रीहरिरायजीकृतं चतुर्विंशतितमं
शिक्षापत्रं श्रीगोपेश्वरजीकृतव्रजभाषा-
टीकासमेतं समाप्तम् ॥ २४ ॥

शिक्षापत्र २५.

अब पंचविंशशिक्षापत्रमें फलात्मक श्रीमदाचार्यचरणद्वय सदाही हृदयमें धारण करने तामें फलको संशय नांही राखनो ओर यामें जो संशय राखे सो आसुरी जानने सुबोधिण्यादिग्रंथ विद्यमान सते मनुष्य भक्तिमार्गमें प्रवृत्त नांही होत हे तासो भगवानकी कृपाही साधन हे एसे जानिवेमें आवतहे जेसे इंद्रियनकी वृत्ति प्राण विना नांही चलेहे तेसे प्रभुकी कृपा विना साधनको उपयोग

नांही होय हे यह निरूपण हे. उपर कहे जो चिंता नांही कर्त्तव्य हे अष्टाक्षरही परमगति हे सो कोटानकोटि साधन करे सगरे धर्म होय ओर श्रीआचार्यजीके चरणकमलको आश्रय सिद्ध न होय तो कछु सिद्ध न होय तातें जा भांति श्रीआचार्यजीमहाप्रभुके चरणकमलको सदा आश्रय होय तिनको फलदान होय सो आगे शिक्षापत्रमें निरूपण करतहें

मूलं—श्रीवल्लभपदांभोजभजनादरणादपि ।

दयापरः कदाचित्तं न जहाति जनं हरिः ॥ १ ॥

शब्दार्थः—श्रीवल्लभाचार्यजीके चरणकमलके भजनमें आदरसोंहू दयालु हरि कोयदिन वह जनकों नांही छोडत हैं ॥ १ ॥ टीका—जो वैष्णव श्रीवल्लभाचार्यजीके चरणारविंदको भजन आदरपूर्वक करतहे एक वाहीमें अनन्य भाव हे जेसैं सूरदासजीने गायो “ भरोंसो दृढ इन चरननकेरो । श्रीवल्लभ नगचंद्रछटाविन सव जगमेंही अंधेरो ” श्रीआचार्यजीमहाप्रभुके चरणकमलकी सेवामें सदा जो वैष्णव आदर करेहे तिनके उपर हरि जो श्रीकृष्ण सो सदा दया करत हे प्रसन्न होयके कृपाहू करतहें अपने स्वरूपानंदको दान सदा करत हे ॥ १ ॥

मूलं—कृपाकटाक्षसंपातपक्षपातपरो हरिः ।

क्षमते तत्कृतं दोषलक्षमप्यक्षमं स्वतः ॥ २ ॥

शब्दार्थः—श्रीमदाचार्यजीके कृपाकटाक्षको सुंदरपात जिनपें तिनके पक्षपात करिवेवारे हरि ता जीवनें किये लक्षदोष जो आपतें सहन नहोय एसेकोंहू सहन करतहें । २ । टीका—जिन वैष्णवनके उपर आप श्रीआचार्यजीमहाप्रभुजी कृपाकटाक्ष करतहें तिनको पक्षपात श्रीठाकुरजी करतहे पद्मनाभदास छोला धरते सो श्रीठाकुरजी श्रीआचार्यजीमहाप्रभुकी

कृपा तें प्रीतिसों आरोगते या भांति जापर श्रीआचार्यजी कृपाकटाक्ष करिकें भक्तिरसदान करतहें तिनकों श्रीकृष्ण आप सदा पक्षपात करतहें सो उन वैष्णवनतें लक्षावधि अपराध परतहें तोहू श्रीकृष्णचंद्र सर्व अपराध क्षमा करिकें आप कृपाही करतहें ॥ २ ॥

मूलं—यदीयहृदये श्रीमदाचार्यचरणद्वयम् ।

त एव शरणं दोषशतावृत्तिमतो मम ॥ ३ ॥

शब्दार्थः—जिनके हृदयमें श्रीमदाचार्यजीके चरणद्वयहे वहही शतदोषकी आवृत्तिवारो मेंहूं तिनकों शरणहे ॥ ३ ॥ टीका—जो पुष्टिमार्गीय भगवदीयके हृदयमें श्रीआचार्यजीमहाप्रभुजीके दोउ चरणकमल विराजतहें ताके शतादिक अपराध होय तिनहूको नाश करि प्रतिबंध दूर करतहें ॥ ३ ॥

मूलं—यदंगुलिनखानंदचंद्रशैत्यं सदा हृदि ।

तापं हरति भक्तानां तदानंदपदांबुजम् ॥ ४ ॥

शब्दार्थः—जिनके अंगुलियनके नखरूपचंद्रकी शीतलता हे सो आनंदरूप चरणारविंद भक्तनके हृदयमें सदा तापकों हरत हे ॥ ४ ॥ टीका—श्रीआचार्यजी महाप्रभुके चरणकमलकी दशअंगुलि परमसुंदरहे. तिनमें नखचंद्र १० हे सो एक नखचंद्रकी छटा आगे कोटिचंद्रमाकी कला लजा पावतहे ऐसे नखचंद्र जिन वैष्णवननें हृदयमें धारणकियेहें तिन भक्तनके हृदयके त्रिविध ताप (आध्यात्मिक, अधिभौतिक ओर आधिदैविक, तथा कायिक, वाचनिक ओर मानसिक) अनेक जन्मके दोषरूप तथा श्रीकृष्णके मिलनमें प्रतिबंधरूप सगरे पाप दूर होतहें ऐसैं श्रीआचार्यजीमहाप्रभुजीके चरणकमलहे सो सेवकनकों सदा आनंददान करतहें ॥ ४ ॥

मूलं-अस्तु वस्तुशतं लोके वेदे च परिकीर्तितम् ।

फलत्वेन निजाचार्यचरणाब्जद्वयं मम ॥ ५ ॥

शब्दार्थः—लोकमें तथा वेदमें कहे ऐसे शतवस्तु होउ परि मोकों फलत्वकरिकें अपने श्रीआचार्यजीके दोउ चरणकमलहें ॥ ५ ॥ टीका—लोकमें ओर वेदमें कीर्तित एसो वस्तरूप पदार्थ बोहोतहे सत्य लोक (ब्रह्मलोक) सगरे ज्ञानमार्गीय मर्यादामार्गीयकों सर्वोंपरि फलरूपहे सो हमारे पुष्टिमार्गमें ब्रह्मलोक कहा ? मोक्षचतुष्टयताईं सब तुच्छहे ऐसे यह पुष्टिमार्गहे जामें श्रीकृष्णाधरसुधापानही परमफलहे सो साधन करिकें सिद्ध नांही होतहे एक श्रीवल्लभाचार्यजीके चरणाब्जद्वयही फलरूपहे इनही करि श्रीकृष्णाधरामृतसिद्धिहे ॥ ५ ॥

मूलं-न कर्म वेदविहितं फलं जनयति ध्रुवम् ।

यतो बहिर्मुखं चित्तं जायतेऽन्यश्रुतेर्हरेः ॥ ६ ॥

शब्दार्थः—वेदोक्त कर्म निश्चय फलकों नांही उत्पन्न करतहें काहेतें जो भगवानसों भिन्नश्रवणतें चित्त बहिर्मुख होतहे ॥ ६ ॥ टीका—वेदविहित अनेक प्रकारके कर्महे ज्ञानमार्ग, योगमार्ग, कर्ममार्ग, उपासनामार्ग, अनेकव्रत, संयम, नियम, इत्यादि अनेक साधनहे तासों यह पुष्टिमार्गको फल निश्चय जान्यो नांही जातहे काहेतें जो पुष्टिमार्ग केवल ब्रजभक्तनके भावात्मक सर्वोंपरि हे सो श्रीमहाप्रभुजीकी कृपातें साध्यहे साधनतें सिद्धि नांहीहे जासों बहिर्मुखजीवके चित्तमें तथा श्रवणमें श्रीहरिकी क्यारूप अमृत ओर भगवद्धर्म न सुहाय ॥ ६ ॥

मूलं-ज्ञानं तु (मुक्ति) भक्तिहेतुत्वात्सानैव फलरूपिणी ।

यतो जीवस्य दासत्वहेतुभेदनिवर्त्तिका ॥ ७ ॥

शब्दार्थः—ज्ञान तो मर्यादाभक्तिकों उत्पन्न करिवेवारो होयवेसं कदाचित् फलरूपहे परंतु मर्यादाभक्ति फलरूप नांहीहे काहेतें जो

सो मर्यादाभक्ति जीवकों दासत्वके कारणरूप भेदकों मिटायवेवारीहे अथवा ज्ञान तो मुक्तिकों उत्पन्न करिवेवारो हे वा मुक्ति फलरूप नांही हे काहेतें जो मुक्ति जीवके दासत्वके कारणरूप भेदकों मिटायवेवारी हे (मुक्तिमें प्रभु ओर जीवको भेद नांही रहे) ॥ ७ ॥ टीका—शास्त्रमें एसे कहेहें जो ज्ञान हे सो भक्तिको हेतु हे तातें भक्तिको ज्ञान भयो हे ताकरि भक्ति होय सो यह मर्यादामार्गीयभक्तिहे जामें धर्म, अर्थ, काम, मोक्ष फलहे तामें प्रथम ज्ञानही मुख्य हे तापाछें मर्यादाभक्ति होय सो ज्ञान ओर मर्यादामार्गीयभक्ति दोउ पुष्टिमार्गके फलके विरोधी हे काहेतें जो वामें दासत्व नांही रहत हे ओर पुष्टिमार्गमें तो जीवकों दासत्व मुख्य हे जीव सेवक हे प्रभु स्वामी हे या भांति श्रीभगवत्सेवा हे ता भावकों निवर्त्तक ज्ञान हे तहां स्वामी-सेवकभाव नांही हे ॥ ७ ॥

मूलं—मर्यादाभक्तिरप्येषा तावदेव फलात्मिका ।

यावन्न जायते (ज्ञायते) पुष्टिभक्तिः सकलमूर्द्धगा ॥ ८ ॥

शब्दार्थः—यह मर्यादाभक्तिहू जवताई सकलके मस्तकपर रहेवेवारी पुष्टिभक्ति उत्पन्न भयी न होय अथवा जानिवेमें आवे नांही तवताई फलात्मक हे ॥ ८ ॥ टीका—उह मर्यादाभक्तिके ज्ञानमें अहंब्रह्म मानत हे जो मेंही ब्रह्महों ताकरिकें प्रभुसों सेवकभाव छटिजात हे तातें यह पुष्टिमार्ग सर्वोपरि (शिरोमणि) हे ज्ञान तथा मर्यादामार्गकी भक्तिके मायेपर विराजत हे ॥ ८ ॥

मूलं—पुष्टिभक्तिर्हरिरास्यं तत्त्वस्मत्प्रभवः स्वयम् ।

त एव संश्रिताः संतः फलरूपा भवन्ति हि ॥ ९ ॥

शब्दार्थः—हरि भगवानको मुखारविंद हे सो पुष्टिभक्ति हे सो मुखारविंद तो अपने श्रीआचार्यजी महाप्रभुजी आपहे इनको श्रद्धा-

पूर्वक आश्रय करे तो यहही निश्चय फलरूप होय ॥ ९ ॥ टीका—यह पुष्टिभक्ति हे सो श्रीठाकुरजी रासादिलीलाकरि भक्तनको सुधादान दिये सो श्रीकृष्णके मुखारविंदरूप श्रीवल्लभाचार्यजी (यह कलियुगमें पुष्टिभक्तिके लिये) प्रकटे हे सो श्रीआचार्यजीमहाप्रभु स्वयंभगवान् श्रीकृष्णचंद्रके मुखारविंदरूप प्रकटेहैं तातें श्रीआचार्यजीके चरणकमलके दृढ आश्रितहैं तिनहीभगवदीयनको फलसिद्धिहे ॥ ९ ॥

मूलं—तदुत्तरं न कर्त्तव्यमनुभूतेः परं किमु ।

यथा लोके फले प्राप्ते न भोगादधिका कृतिः॥१०॥

शब्दार्थः—ताको उत्तर (सामनो तर्क) नांही करनो काहेतें जो अनुभवसों अधिक ओर कहाहे जेसैं लोकमें फलप्राप्त होय तब भोगसों अधिक कृति नांहीहे ॥१०॥ टीका—तातें उत्तर जो पुष्टिमार्गतें प्रति-कूल विचार (ज्ञान, कर्म, वेद, मर्यादाभक्ति, इत्यादिक विरुद्ध धर्मके अनुसार विचार) नांही कर्त्तव्य हे जेसैं लौकिक फल प्राप्त भयो तब वाको भोग करनो येही कर्त्तव्य हे ओर क्रिया अधिक नांही तेसैं पुष्टिमार्गको अनुभव भयो तापाछें ओरको अधिक नांही जाननों ॥१०॥

मूलं—तस्मात् फलं निजाचार्यपदांभोजद्वयंसदा ।

हृदि धार्य नैव कार्य संशयायितमानसम्॥११॥

शब्दार्थः—तासों फलरूप अपने श्रीआचार्यजीके चरणारविंद दोउ सदा हृदयमें धारण करने (तामें) संशययुक्त मन नांही करनो ॥११॥ टीका—यह पुष्टिमार्गीय भगवद्धर्म सेवादि करि अपने श्रीआचार्यजीमहाप्रभुजीके दोउ चरणकमलको अपने हृदयमें धारण करने मनमें संशय (अविश्वास) न राखनो सो गीताजीमें कहेहैं “, संशयात्मा विनश्यति ” (संशयरूप अंतःकरण होय सो नाशको पावत हे) संशयतें फलको नाश होय तातें संशय न करे ॥ ११ ॥

मूलं-अत्र संशयमापन्नाः सर्वथा ह्यासुरा मताः ।

दैवा अपि पुरा तेऽपि हरिणा पातिताः करात् ॥ १२ ॥

शब्दार्थः—यामें संशयको प्राप्त भये यह निश्चय आसुर जीव जाननें पहेले दैवीमृष्टिमें उत्पन्न भये होय सोहू हरिने अपने श्रीहस्तसों [संसारमें] डारेहें ॥ १२ ॥ टीका—श्रीवल्लभाचार्यजीके स्वरूपमें संशय होय तथा यह पुष्टिमार्गमें संशय होय ताकों सर्वथा आसुरही जानियें दैवी जीव होय अथवा आसुर कोई होय जाकों अविश्वास होय ताकों श्री-ठाकुरजी अपने हाथ संसारमें डारि देय ताको अंगीकार कवहू न करे तातें विवेकधैर्याश्रयग्रंथमें श्रीआचार्यजीमहाप्रभु कहेहें “ अविश्वासो न कर्त्तव्यः सर्वथा बाधकस्तु सः ” [अविश्वास नांही करनो काहेतें जो वह सर्वथा बाधकहे] तातें अविश्वास महाबाधक हे ॥ १२ ॥

मूलं-अहो महच्चित्रमिदमवतीर्णं हरौ भुवि ।

विद्यमाने भागवते विवृतावपि सर्वथा ॥ १३ ॥

सत्यां भुवि सुबोधिण्यां सत्सु सत्सु कचित्कचित् ।

ग्रंथेषु विद्यमानेषु सर्वार्थज्ञापकेष्वपि ॥ १४ ॥

तथापि न प्रवर्तते जना भक्तिपथे पुनः ।

प्रायः कृपैव हरिणा कारणत्वेन रक्षिता ॥ १५ ॥

शब्दार्थः—यह बडो आश्चर्यहे जो पृथ्वीपर हरि प्रकट भयेहे, श्रीभागवत विद्यमानहे, विवरणहू सर्वथा विद्यमानहे, ॥ १३ ॥ श्रीसुबोधिनीजी पृथ्वीउपर विद्यमानहे कहूं कहूं सत्पुरुष (भगवदीय) विद्यमानहे, ओर सर्व अर्थकों जतायवेवारे सगरे ग्रंथहू विद्यमानहे ॥ १४ ॥ तोहू मनुष्य फिर भक्तिमार्गमें प्रवृत्त नांही होतहे तासों यह जान्योजातहे जो हरिने अपनी कृपाही कारणरूप राखीहे ॥ १५ ॥ टीका—मेरेमनमें बडो आश्चर्य होतहे जो भूमिविषे श्रीकृष्णके मुखारविंदरूप श्रीवल्लभाचार्यजी

प्रकटेहे तिनको कुल निष्कलंक भूमिपर विराजमानहे ओर श्रीभागवत हू विद्यमानहे श्रीभागवतकी टीकाहू विराजमानहे तोहू जीव सर्वथा मार्गमें नाहीं प्रवृत्तहोतहे यह मोकों बडो आश्चर्यहे ॥ १३ ॥ श्रीसुबोधिनीजी निबंधादि भूमिपर विराजमानहे कहूं कहूं श्रीसुबोधिनीजी निबंधादिकके वक्ता सत्पुरुषहू विराजितहे ओर छोटेबड़े श्रीगुसाईंजी श्रीमहाप्रभुजीके ग्रंथहू विद्यमान हे सो ग्रंथ केसेहे जो सर्व पुष्टि-मार्गके भावके ज्ञापकहे इनग्रंथद्वारा पुष्टिमार्गीय सगरी रीति जानि जातहे या भांति सगरी वस्तु विद्यमानहे ॥ १४ ॥ उपर कहे सो सगरे पदार्थ भूमिपर विराजमानहे तोहू जीव यह पुष्टिमार्गमें नाहीं प्रवृत्त होतहे सो काहेतें जो एक श्रीहरिकी कृपाही कारणहे सगरे पदार्थ होय परि श्रीहरिकी कृपा होय तवही जान्यो जाय श्रीहरिकी कृपा विना जीव भक्तिमार्गमें नाहीं प्रवृत्त होतहे तातें यह पुष्टिमार्ग तो केवल प्रमेयमार्गहे सो श्रीहरिकी कृपा प्रमेयवल विना तामें कैसें आवे ? ॥ १५ ॥

मूलं—मूर्च्छितेन्द्रियवृत्तीनामुद्भवो नासुमंतरा ।

तथा कृपां विना सर्वसाधनानां न चोद्भवः ॥ १६ ॥

शब्दार्थः—मूर्च्छित इंद्रियनकी वृत्तिहे तिनकी उत्पत्ति प्राणविना नाहीं होतहे तेसें कृपाविना सर्व साधनकी उत्पत्ति नाहीं होतहे ॥ १६ ॥ टीका—श्रीमहाप्रभुजीकी कृपाविना कछु सिद्ध न होय सगरी इंद्रिय मूर्च्छित होय तिनतें प्राणविना कछु कार्य न होय जब प्राण आवे तब सगरी इंद्रियनमें चैतन्य आवे अपने कार्यमें तत्पर होय तेसेंही जहांताई श्रीकृष्णकी कृपा (प्राणस्थानीय) नाहींहे तहांताई सगरे साधन (इंद्रियस्थानीय) तें कछु न होय जब श्रीकृष्ण कृपा करे तवही यह पुष्टिमार्गमें आय सेवादि करे भाव सिद्ध होय यह निश्चयहे ॥ १६ ॥

इति श्रीहरिरायजीकृतं पंचविंशतितमं शिक्षापत्रं श्रीगोपेश्वरजीकृतव्रजभापाटीकासमेतं समाप्तम् ॥ २५ ॥

शिक्षापत्र २६.

पड़िंश शिक्षापत्रमें जेसैं माता बालककी रक्षाके लिये डाकिनी आदि ग्रहसों डरपेहे तेसैं भावकी रक्षाके लिये दुःसंगसों डरपनों, जेसैं व्यभिचारिणी स्त्री परपुरुषविषे अपनो स्नेहहे ताको अपने समस्त संबंधीसों गुप्त राखेहे तेसैं भगवत्सेवामें प्रतिबंधक जो अपने संबंधीहोय तिनके आगे भाव गुप्त राखनों, जेसैं दूतीके वचन ओर संग व्यभिचारिणी स्त्रीको प्रीति करेहे तेसैं भक्तनके वचन ओर संग भावको वृद्धि करतहे, ओर जेसैं व्यभिचारिणी स्त्रीको चित्त सदाही गृहादिकमें उदासीन रहेहे तेसैंही चित्तको गृहादिकमें उदासीन राखनों, यह निरूपणहे । उपर कहे जो पुष्टिमार्गीय सगरो पदार्थ प्रकटहे परंतु श्रीकृष्णकी कृपाविना जीव नांही प्रवृत्त होतहे तहां कोई कहे जो श्रीकृष्ण कृपा नांही करत होयंगे जीव कहा करे ? तहां कहतहें—

मूलं—स्वकीयानामैहिकं यदथवा पारलौकिकम् ।

अकरोत् कुरुते कर्ता प्रभुरेव न संशयः ॥ १ ॥

शब्दार्थः—स्वकीय भक्तनके जो लौकिक अथवा पारलौकिकहे सो प्रभुनेही कियोहे, प्रभुही करतहें ओर प्रभुही करेंगे संशय नांहीहे ॥ १ ॥ टीका—श्रीकृष्ण परम कृपालुहे अपने स्वकीय निजभक्तनको यहलोक परलोक दोउ सिद्ध करतहें यहलोक सिद्ध करतहे सो विषयादिक सिद्ध करतहें एस मति जानियो यह लोकमें स्त्री, पुत्र, धन, सब दैवी करतहें जो भगवत्सेवादिकमें विरोध न करे या भांति लौकिक सिद्ध करतहें ओर अलौकिकमें लीलाको अनुभव स्वरूपानंदको दान यह सिद्ध करतहें सो त्रिविधनामावलिमें श्रीआचार्यजी महाप्रभु कहेहें “ भक्तसर्वदुःखनिवारकाय नमः ” भक्तके लौकिक अलौकिक सर्व

दुःख दूर करिकें सर्वथा सर्वकार्य सिद्ध करतहें यामें संशय नांही ॥१॥

मूलं—तथापि कुरुते जीवः प्रयत्नं निजदोषतः ।

अज्ञानात् करुणावार्द्धिः क्षमते तादृशं स्वतः ॥२॥

शब्दार्थः—तोहू जीव अपने दोषतें अज्ञानसों प्रयत्न करतहे ऐसे जीवकों कृपाके समुद्र प्रभु आपतें क्षमा करतहें ॥२॥ टीका—या भांति श्रीकृष्ण लौकिक अलौकिक सर्वकार्य सिद्ध करतहें तोहू जीव अपने मनमें अनेक प्रकारके साधन करत हे जीव बुद्धिके अज्ञानतें अनेक यत्न करतहे ऐसे अज्ञानी जीवनपर श्रीकृष्ण कृपानिधिहे सो सगरो अपराध अपनी ओरतें क्षमाकरतहे सो अंतःकरणप्रबोधमें श्रीआचार्यजी महाप्रभुजी कहेहें “ सत्यसंकल्पतो विष्णुर्नान्यथा तु करिष्यति ” (प्रभु सत्यसंकल्पहे तासों अन्यथा नांही करेंगे) श्रीकृष्ण सत्यसंकल्पहे श्रीआचार्यजीद्वारा अंगीकार कियेहे सो दृढहे जीव अज्ञानकरि भूलत हे परंतु प्रभु कैसें भूलेंगे ? ॥ २ ॥

मूलं—अविरुद्धं प्रकुरुते विरुद्धं वारयत्यपि ।

दासेषु कृष्णो बालेषु पितेव कुरुते हितम् ॥ ३ ॥

शब्दार्थः—श्रीकृष्ण अपने दासनमें अविरुद्ध करतहें ओर विरुद्ध कोहू वारण करतहें जेसैं बालकनकी उपर पिता हित करतहे तेसैं भक्तनकी उपर श्रीकृष्ण हित करतहें ॥३॥ टीका—यह पुष्टिमार्गमें अविरुद्ध भगवत्सेवादिक सो करावतहें ओर अनेक साधन प्रयत्न जो पुष्टिमार्गमें विरुद्धहे तासों निवृत्त करतहें ऐसे श्रीकृष्ण श्रीआचार्यजीकी कानितें रक्षा करतहे जेसैं पिता बालकको हित करे बालक अज्ञानतें दोष करे परंतु पिता दोषकों नांही विचारत हितही करतहे सो संन्यासनिर्णयमें श्रीआचार्यजीमहाप्रभु कहेहें “हरिरत्र न शक्नोति कर्तुं बाधां कुतोऽपरे अन्यथा मातरो बालान्न स्तन्यैः पुपुषुः कचित्” (यह भक्तिमार्गमें)

हरि भगवान् वाधा करिवेमें समर्थ नांहीहे तहां ओर कहांतें समर्थ होय ओर एसें न होय तो माता बालकों स्तन्यपान करायके पोषण कहुं न करते जेसें माता पुत्रकों बारंवार अपने स्तन्यसों पोषण करतहे तेसेंही जो जीव श्रीआचार्यजीद्वारा शरण आयेहें तिनकों प्रभु वाधा नांही करतहें जाप्रकार भक्ति बड़े दासको कल्याण होय सोई प्रभु करतहें एसें कृपालुहें ॥ ३ ॥

मूलं—न जानाति निजाज्ञानात्तत्कृतिं स कृतघ्नतः ।

क दोषराशिर्जीवोऽयं क हरिगुणवारिधिः ॥ ४ ॥

शब्दार्थः—जीव अपने अज्ञानसों कृतघ्नहे तासों भगवानकी कृतिकों नांही जानत हे काहेतें जो दोषके समूहरूप यह जीव कहां ? ओर गुणके समुद्र हरि कहां ? ॥ ४ ॥ टीका—याभांति प्रभु करत हें ओर जीव अपने अज्ञानतें नांही जानत हे सो जीव कृतघ्न हे उपकारकों नांही जानत हे एसो दोषको भयों जीव हे ओर हरि [श्रीकृष्ण] गुणनिधि हे जीव दोषनिधि हे ॥ ४ ॥

मूलं—कथमन्योन्यसंबंधः स्यात्तमस्तेजसोरिव ।

तथापि दोषराशीनां दाहनेन निवेदनात् ॥ ५ ॥

स्वाचार्यद्वारकात्तु स्याद्योग्यता हरियोजने ।

अतः स्वाचार्यचरणौ स्थाप्यौ हृदि निरंतरम् ॥ ६ ॥

शब्दार्थः—[भगवान् गुणनिधिहे ओर जीव दोषनिधि हे तिनकों] अंधकार ओर तेजकीसीनाई अन्योन्य (परस्पर) संबंध केसें होय ? तोहू अपने श्रीआचार्यजीद्वारा निवेदन भयो हे तासों दोषके समूहको दाह भयो ताकरिकें हरिभगवानके संबंधमें योग्यता होयहे तासों अपने श्रीआचार्यजीके दोउ चरणारविंद हृदयमें स्थापन करने ॥ ५ ॥

॥६॥ टीका—उपर कहे ऐसे श्रीकृष्णसों जीवको परस्पर संबंध कैसे होय जेसे अंधियारेको संबंध सूर्यसों कैसे होय ? जहां तेज होय तहां तम कैसे आवे तेसेही यह जीव कोनप्रकार श्रीकृष्णसों मिले सो कहतहें जो ओर तो कोउ उपाय नाहीं हे जीव सर्व भगवानमें निवेदन करे तबही सर्व दोष दूर होयें सो चोराशी वैष्णवकी वार्त्तामें प्रसिद्धहे जो श्रीआचार्यजीकों चिंता भई तब श्रीकृष्णनें येही आज्ञा करी जो समर्पण करावो निवेदनतें जीवके सगरे दोष दूर होयेंगे तातें जीवके दोष निवेदनतें निश्चय दूर होतहे ॥५॥ ऐसे दोषरूप जीवकों जब अपने श्रीआचार्यजीद्वारा निवेदन होय तब सगरे दोषको नाश होय तब श्रीकृष्णकी सेवामें योग्य होय ओर कोउ उपाय नाहीं, ऐसे श्रीवल्लभाचार्यजीके चरणकमल अपने हृदयमें स्थापन करनें येही योग्य हे तातें पुष्टिमार्गीय वैष्णवको परम धर्म येही हे जो श्रीआचार्यजीके चरण हृदयमें अहर्निश धारण करे याहीतें सर्वफल सिद्ध होय ॥६॥

मूलं—यथा बालकरक्षायै डाकिनीतो विभेति हि ।

माता तथैव भेत्तव्यं दुःसंगाद्भावरक्षकैः ॥ ७ ॥

शब्दार्थः—माता जेसे बालककी रक्षाके लिये डाकिनीसों डरपतहे तेसेही भावकी रक्षा करिवेवारेनको दुःसंगसों डरपनों ॥ ७ ॥ टीका—जेसे बालककी रक्षा माता करे डाकिनी बालकको घात करत हे सो बालककी रक्षार्थ डाकिनीतें माता भयभीत हे तासों बालककों छिपाय राखेहे तेसेही पुष्टिमार्गीय भगवदीय दुःसंगरूप डाकिनीतें डरपे अपने भगवद्भावरूप बालककी रक्षार्थ डाकिनीरूप दुःसंग त्याग करे तातें वैष्णवकों दुःसंग वोहोतही बाधकहे तासों सर्व भाव जाय यह जानिके दुःसंगतें अहर्निश डरपत रहे तो भावकी वृद्धि होय ॥ ७ ॥

मूलं—समस्तेभ्यो निजस्नेहं गोपायति यथा (ऽ) सती ।

तथैव भगवद्भावगोपनं क्रियतां जनैः ॥ ८ ॥

खेंचके प्रभुमें चित्त स्थापन करनो ॥ १० ॥ टीका—जेसें व्यभिचारिणी स्त्री (असती) को चित्त अपने गृहमें सर्वथा न लगे सदा गृहमेतें मन उजा-टितही रहे परपुरुषमें लग्यो रहे तेसेंही भगवदीयको चित्त श्रीठाकुर-जीके स्वरूपमें लगावनो एक श्रीकृष्णके चरणारविंदमें आश्रित भगव-दीय अपनो मन गृहदेहसंबंधी लौकिक वैदिक कार्यमें न लगावे एक प्रभुकी वार्त्ता ओर भगवत्सेवामें लगावे ॥ १० ॥

इति श्रीहरिरायजीकृतं पड्विंशतितमं शिक्षापत्रं श्री-
गोपेश्वरजीकृतव्रजभाषाटीकासमेतं समाप्तम् ॥ २६ ॥

शिक्षापत्र २७.

सप्तविंश शिक्षापत्रमें श्रीभगवानकों विस्मरण करे ऐसे दोषको निरूपण हे अब सवनकी बुद्धिको नाश करिवेवारो काल आयो हे, साधनहू सिद्ध नांही होयहे जो सेवामें तीन प्रतिबंधहे सो सिद्धहे तोहू श्रीमदाचार्यजीके चरणारविंदके आश्रयतें फललाभ होयगो तासों फलमें निराशता नांही राखनी यह निरूपणहे । उपर कहे जो भक्त प्रभुके आश्रित हे तिनको चित्त लौकिकमें नांही लगतहे तहां फलमें अनेक बाधकहे तिनकों तजियें तब फल सिद्ध होय सो कहा बाधक-हे ? कैसें तजियें ? सो आगे निरूपण करतहें—

मूलं—निजाचार्यपदांभोजयुगलाश्रयणं सदा ।

विधेयं तेन निखिलं फलं भावि विना श्रमम् ॥ १ ॥

शब्दार्थः—अपने आचार्यजीके दोउ चरणारविंदको आश्रय सदा करनो ताकरिके श्रम विना सर्व फल होयगो ॥ १ ॥ टीका—पुष्टिमार्गीय

शब्दार्थः—लौकिकमें वोहोत प्रीति, (भक्तितें) विरुद्ध विषयकी इच्छा, (लौकिकतें) अविरुद्धमें आसक्ति, विषयहेतु सुंदर भोजन, ॥ ३ ॥ टीका—लौकिक जो देहसंबंधी स्त्रीपुत्रादिकमें परम प्रीति सो भक्तिमें बाधकहे । ७ । भक्तिमें विरुद्ध जो लौकिक विषय ताकी इच्छा सो फलमें बाधकहे । ८ । लौकिकतें अविरुद्ध विषयमें आसक्ति सोउ बाधकहे । ९ । विषयभोगार्थ आछो आछो खानो भगवत्सेवार्थ वैष्णव महाप्रसाद लेतहे सो भाव नांही विषयार्थ आछो भोजन घृतादिकको करनां सोउ बाधकहे । १० ॥ ३ ॥

मूलं—देहाभिमानः कुलजो विद्यादिविहितोऽपि च ।

भगवत्सेवनाऽभावसहितं देहपोषणम् ॥ ४ ॥

शब्दार्थः—देहको अभिमान, कुलको अभिमान, विद्यादिकसों भयो एसो अभिमान, भगवानकी सेवाके अभावसहित देहको पोषण, ॥ ४ ॥ टीका—देहाभिमान जो मदतें काहू न गिने देह संहारे रहे, चोटी नित्य संहारे, अपनो देह देखिकें मनमें फूले यह बाधकहे । ११ । कुलको मद जो में बड़े कुलमें हों ओर सब मोतें नीचेहें मोसमान कोउ नांही यह भक्तिमें बाधकहे । १२ । विद्यामद जो में वोहोत पढ्योहों मोकों पदशास्त्रको ज्ञानहे ओर तो सब मूर्ख हे यह विद्यामद बाधकहे या मदतें दैन्यसिद्धि नांही होत । १३ । भगवत्सेवा नांही करत लौकिक वैदिक अनेक कार्यमें दिन बितावतहे भगवत्सेवामें मन नांहीहे यह भक्तिमें बाधकहे जेसैं ब्राह्मण गायत्री न जपे तो ब्राह्मणपनों जाय तेसैंही वैष्णव होयकें भगवत्सेवा न करे तो वैष्णवपनों जाय यह बाधकहे । १४ । देहको पोषण करे रंचकहू शीत उष्ण सही न सके अनेक औषधतें खानपानतें देहकी रक्षा करे देहकी रक्षा तो भगवत्सेवार्थ करनी सो भाव नांही हे केवल लौकिकार्थ देहको पोषण करे सो बाधकहे । १५ ॥ ४ ॥

मूलं—असत्संगैः सदा दुष्टः कृष्णानुच्छिष्टभक्षणम् ।

निवेदनानुसंधानत्यागः शरणविस्मृतिः ॥ ५ ॥

शब्दार्थः—असत्पुरुषके संग करिकें सदा दुष्ट रहे, श्रीकृष्णको भोग धरे विना अन्नको भक्षण, निवेदन मंत्रके अनुसंधानको त्याग, शरणकी विस्मृति, ॥ ५ ॥ टीका—असत्संग महादुष्ट बहिर्मुखको संग ताके संग एक क्षणहू बैठे तो भगवद्भावको नाश होय तिनहूको संग सदा करे तातें बहिर्मुखता (दुष्टता) होय सो बाधकहे । १६। ओर श्रीकृष्णको उच्छिष्ट महाप्रसाद छोडिकें असमर्पित खाय यह महा बाधकहे सो पद्मपुराणमें कहेहे “अनिवेद्य तु यो भुंक्ते हरये परमात्मने । पतंति पितरस्तस्य नरके शाश्वतीः समाः ॥ अवैष्णवानामन्नं च पतितानां तथैव च अनर्पितं तथा विष्णौ श्वमांससदृशं भवेत्” (हरि परमात्माको अर्पण कियेविना जो खायहे ताके पितृपितामहादिक बोहोत वर्षपर्यंत नरकमें गिरतहें ॥ अवैष्णवनको अन्न पतितनको तथा विष्णु-निमित्त अर्पण नांही कियो एसो अन्न श्वानके मांस बराबर होय) कूर्मपुराणमें कह्योहे “अनर्पयित्वा गोविंदे यो भुंक्ते धर्मवर्जितः । श्वविष्टासदृशं चान्नं नीरं तत्सुरया समम्” (गोविंदनिमित्त अर्पण किये विना धर्मरहित जो खायहे सो अन्न श्वानके विष्टासमानहे ओर जल मदिरासमानहे) यह वाक्यतें असमर्पिततें बुद्धि भ्रष्ट होय तातें महा बाधकहे । १७। निवेदन कियोहे ताको अनुसंधान नांही करतहे, जो में समर्पण कियोहे पंचाक्षरको कहा अभिप्रायहे या भांति निवेदनको अनुसंधान नांही करत हे यह बाधकहे । १८। श्रीकृष्णके शरणकी विस्मृति जो अष्टाक्षर महामंत्र “श्रीकृष्णः शरणं मम” यह हे ताकी विस्मृति बाधकहे । १९ ॥ ५ ॥

मूलं—देवांतराश्रयस्तेभ्यः प्रार्थनाऽपि फलार्थितः ।

भगवच्चित्तरहिता व्यावृत्तिरपि लौकिकी ॥६॥

शब्दार्थः—ओरदेवनको आश्रय, फलकी इच्छासों इनकी पास प्रार्थना करनी, भगवानमें चित्तरहित (एसी) लौकिक व्यावृत्ति, ॥ ६ ॥ टीका—ओरदेवको आश्रय महा बाधकहे साक्षात् पूर्णपुरुषोत्तम श्रीकृष्णको आश्रय छोड़िकें अन्यदेवको आश्रय करे ताकों यह पुष्टिमार्गको फल नाहि सिद्धहे. हारितस्मृतिमें कहेहैं “नान्यं देवं नमस्क्रुर्यान्नान्यं देवं निरीक्षयेत् । नान्यप्रसादमद्याच्च नान्यदायतनं व्रजेत्” (अन्यदेवकों नमस्कार न करे, अन्यदेवके दर्शन न करे, अन्यदेवको प्रसाद न खाय ओर अन्यदेवके मंदिरमें न जाय) या भांति अनन्य रहे तो फल सिद्ध होय सो श्रीगुसाईजी कहेहैं “भगवत्पदपद्मपरागजुषो नहि युक्तितरं मरणेऽपि तराम् । इतराश्रयणं गजराजधृतो नहि रासभमय्युररीकुरुते ॥ अन्यसंबंधगंधोऽपि कंधरामेव बाधते” (भगवानके चरणारविंदके रजकों सेविवेवारेकों मरणपर्यंत संकट आयजाय तोहू अन्यको आश्रय करिवो उचित नाहीहे जेसैं हाथीकी स्वारी करिवेवारो रासभ (गर्दभ) कों कबूल नाही करतहे ॥ अन्यसंबंधको गंधहू कंधरा (ग्रीवा) कों बाध करतहे) याभांति अन्यदेवादिकको आश्रय बाधकहे । २० । अन्यदेव इंद्रादिक, शिवादिक, ब्रह्मादि, गणेश, सूर्य, यह देवनसों फलकी आशा सो बाधकहे, श्रीकृष्ण सर्वसामर्थ्ययुक्त हे तिनकों छोड़िकें अन्यदेव सदा परार्थीनहे तिनसों फलाकांक्षा सो यह पुष्टिमार्गमें बाधकहे । २१ । भगवानके चरणारविंदपे वैराग्य, लौकिक वैदिक कार्य, मनमें असंभावना विपरीतभावना, मिथ्याच्यान, यह पुष्टिमार्गके फलमें बाधकहे । २२ । अष्टप्रहर लौकिक व्यावृत्ति करि लौकिकावेश होय तातें अष्टप्रहर यह लौकिक कार्य बाधकहे । २३ ॥ ६ ॥

मूलं—गुरुद्रोहस्तदीयेभ्यः स्वस्याधिक्यविभावनम् ।

अत्यंतदेहसामर्थ्यमिंद्रियाणां च पोषणम् ॥ ७ ॥

शब्दार्थः—गुरुको द्रोह, पुष्टिमार्गीय भगवदीयनसों अपनी अधिकताकी भावना, वोहोत देहको सामर्थ्य, इंद्रियनको पोषण, ॥७॥ टीका—गुरुद्रोह करे तो गुरु अप्रसन्न होय सो बाधकहे प्रभु अप्रसन्न होय तो गुरु रक्षा करे परंतु गुरु अप्रसन्न होय तो रक्षा करिवेमें कोउ समर्थ नाहीं । २४ । पुष्टिमार्गीय भगवदीयकों अपनेतें न्यून जाने अपनकों अधिक जाने सो बाधक हे । २५ । देहमें अत्यंत सामर्थ्य होय सो काहूकों गिने नाहीं अहंकार होय तथा बड़ो विषयी होय यहहू बाधकहे । २६ । अपनी इंद्रियनके पोषणमें तत्पर रहे सो इंद्रियनकों विषयभोगही प्रिय हे तातें इंद्रियनके पोषणतें विषयावेशही बड़े । २७ ॥७॥

मूलं—गृहेष्वभिरतिर्भार्यापुत्रादिषु मनोगतिः ।

कृष्णानुभावरहितदेशे सततसंस्थितिः ॥ ८ ॥

शब्दार्थः—गृहादिकमें प्रीति, स्त्रीपुत्रादिकनमें मन लग्यो रहे ओर श्रीकृष्णकी कथा-सेवा-कीर्तनादिरहितदेशमें निरंतर स्थिति, ॥ ८ ॥ टीका—गृहादि लौकिक कार्यमें अष्टप्रहर प्रीति । २८ । स्त्रीपुत्रमें मनकरिकें प्रीति जो देहसंबंधी स्त्रीपुत्रादिक हे तामें मन रहे इनके दुःखतें दुःखी होय इनके सुखतें सुखी होय यह पुष्टिफलमें बाधकहे । २९ । श्रीकृष्णके अनुभव विनाके देशमें रहेनो श्रीगोवर्धननाथजी तथा सातोस्वरूपके मंदिर तथा श्रीवल्लभकुलके मंदिर तथा पुष्टिमार्गीय तादृशीयके इहां राजसेवा तथा ब्रज इतनीठोर वैष्णवकों अनुभवहे उत्सव भगवद्धार्ता विना जीवकों अनुभव कछु न होय । ३० ॥ ८ ॥

मूलं—हर्षशोकौ लोकलाभतदभावकृतौ तथा ।

स्वातन्त्र्यभावनं स्वस्य जीवस्वाभाविको हठः ॥ ९ ॥

शब्दाथः—लोकमें लाभ और हानिकरी कृतिमें हर्षशोक होय, तथा अपनकों स्वतंत्रताकी भावना और जीवको स्वामाविक हठ, ॥ ९ ॥ टीका—यह लौकिकमें हर्ष शोक होय देहसंवाधि, कुटुंब, द्रव्य, अनेक कार्य, आछो होय तो सुख पावे हर्ष होय बूरो होय तथा हानि होय तो दुःख पावे, शोक होय सो यह संसाररूपीवृक्षमें दिय फलहे कबहु सुख होय कबहु दुःख होय याहीमें मग्न रहे सो फलमें बाधकहे । ३१। द्रव्यादिक लाभमें लोभ होय जो इतनो तो द्रव्य भयो अब और होयगो तो आछो, कुटुंब बढे तो आछो इत्यादिक लोभ पुष्टिमार्गमें बाधकहे । ३२। आपनकों स्वतंत्रकी भावना मनमें राखे दासपनो भूले यहहु बाधकहे । ३३। जीवको स्वभाव दुष्टताहीहे ताकरिकें सबको बूरोही चाहे यह बाधकहे । ३४॥ ९॥

मूलं—अधिकारः पापरतिः पक्षपातो दुरात्मनाम् ।

हृदयक्रूरता दीनजनोपेक्षाऽक्षमा पुनः ॥ १० ॥

शब्दार्थः—अधिकार, पापमें प्रीति, दुरात्मा (दुष्टपुरुष) को पक्षपात, हृदयमें क्रूरता, दीनजनकी उपेक्षा, फिर अक्षमा, ॥ १० ॥ टीका—काहूको अधिकार लेई तातें अनेक जीवको भलो बुरो करना पडे सो बाधकहे सो श्रीआचार्यजीमहाप्रभुजी श्रीसुबोधिनीजी ओर निबंधमें कहेहैं जो नारायणने ब्रह्मासों श्रीभागवत कहे सो ब्रह्मा सृष्टिकरिवेके अधिकारीहे तासों ब्रह्माको अनुभव नभयो फिर ब्रह्माने नारदजीसों कह्यो सो नारदजीकों सगरे फिरनोहे एकाग्र मन नांही तातें इनकूं ह अनुभव न भयो फिर नारदने वेदव्याससों कह्यो सो व्यासजी वेद-पुराणके अधिकारीहे तातें इनहूको अनुभव न भयो फिर व्यासजीने श्रीशुकदेवजीसों कह्यो सो शुकदेवजी काहूवातके अधिकारी नांही तातें अनुभव भयो तामूं अधिकारहे सो फलमें बाधकहे । ३५। जो जीव पापमें प्रीतिवारोहे ताकों इष्ट अनिष्टकी परीक्षा नांही सो फलमें बाधकहे । ३६।

खोटे मनुष्य चौरादिक दुष्टक्रिया करिवेवारे इनको पक्षपात करे साचेकों जूठो करे जुठेकों साचो करे ताकों फलमें बाधक हे । ३७ । हृदयतें क्रूर होय काहूको भलो न विचारे महा कपट छल राखे सो बाधकहे । ३८ । दीनजन कोई होय सो आयके शरण होय तिनकी उपेक्षा करे वाको त्याग करे यह पुष्टिभक्तिमें बाधक हे । ३९ । ओर क्षमा न होय विनाकारण क्रोध होय भ्रुकुटी चडी रहे सहन न होय यह पुष्टिमार्गमें बाधक हे । ४० ॥ १० ॥

मूलं—एते चान्ये च बोद्धव्या दोषा विस्मारका हरेः ।
सावधानीभूय दासैः कृष्णस्य स्थेयमादरात् ॥ ११ ॥

शब्दार्थः—यह उपर कहे ओर या सिवाय ओर दोषहे सो सब हरिकों विस्मरण कराइवेवारे हे तासों श्रीकृष्णके दासनकों आदरसों सावधान होयके रहेनो ॥ ११ ॥ टीका—यह चालीस दोष कहे ओर अनेक दोष हे तिनमें यह चालीश मुख्य हे यह दोष हरिके विस्मारकहे यह दोष जिनमें होय तिनकों हरि न जाने जाय तातें श्रीहरिरायजी कहत हे जो उपर कहे समस्त दोषतें सगरे वैष्णव सावधान रहियो (यह दोषतें डरपत रहियो) इन दोषनकी निवृत्तिके नवगुण कहतहे—श्रीकृष्णके चरणारविंदमें अत्यंत आदर राखनो । १ । येही सर्वस्व जानने ॥ ११ ॥

मूलं—भगवन्मार्गमात्रस्थैस्तन्मार्गफलकांक्षिभिः ।

विरक्तैरन्यतः कृष्णगुणासक्तांतरात्मभिः ॥ १२ ॥

स्वाचार्यशरणं यातैस्तद्विश्वाससमन्वितैः ।

परित्यक्ताखिलैः स्थेयं सदा तद्दर्शनोत्सुकैः ॥ १३ ॥

शब्दार्थः—भक्तिमार्गमें रहिवेवारे, यह मार्गके फलकी इच्छावारे, अन्यसों विरक्त, ओर श्रीकृष्णके गुणमें आसक्तियुक्त हे मन जिनको

एसे, ॥ १२ ॥ अपने आचार्यजीके शरण गये, इनमें विश्वासयुक्त, समग्र त्याग करिवेवारे ओर सदा इनके दर्शनमें उत्साहवारे, (वैष्णवनों) एसे होय रहेनो ॥ १३ ॥ टीका-भगवन्मार्ग (भगवानही अपने मुखारविंदरूप श्रीआचार्यजी प्रकट भये हे तिननें प्रकट कियो पुष्टिमार्ग सो भगवन्मार्ग) में स्थित होय रहे । २ । एतन्मार्गीय (यह पुष्टिमार्गके) फलकी आकांक्षा होय मर्यादामार्गके फलकी इच्छा न होय काहेतें जो पुष्टिमार्गको फल श्रीकृष्णकी सेवा, स्वरूपानंदको अनुभव, यह हे ओर अन्यमार्गमें स्वर्गादिक, ब्रह्मलोक, चतुर्विध मुक्ति, यह फल हे सो पुष्टिमार्गते विरुद्ध हे तातें वा फलकी चाहना न करे पुष्टिमार्गके फलकी चाहना करे । ३ । यह लौकिक अन्यकार्यते विरक्त रहे श्रीकृष्णकी सेवा स्मरण विना सर्वठोरते मन विरक्त राखे । ४ । श्रीकृष्णके गुणमें आसक्त रहे आत्मामन करिकें ध्यान करिकें श्रीकृष्णहीकी सेवा करे वचनकरिकें गुणगान श्रीकृष्णहीको करे क्रियाकरि श्रीकृष्णहीकी सेवा करे याभांति श्रीकृष्णहीमें सर्वात्मभाव रहे तथा एसे भगवदीय होय इनको संग करे । ५ । ॥ १२ ॥ अपने आचार्यजीके चरणकमलके शरण रहे । ६ । मनमें दृढ विश्वास राखे यह जाने जो श्रीआचार्यजीके चरणकमलकी कृपाते सकल कार्य निश्चय सिद्ध होयंगे यह विश्वास राखे । ७ । लौकिक वैदिक (पुष्टिमार्गते विरुद्ध होय) ताको त्याग करे । ८ । ओर श्रीआचार्यजीके दर्शनमें तथा श्रीकृष्णके दर्शनमें उत्साह राखे यह दर्शनकी क्षणक्षणमें अपेक्षा राखे । ९ । यह नव भांतिके गुण हृदयमें होय तो सर्व रोग दूर होय एसे गुणसहित भगवदीय होय तिनहीको संग करे तब समस्त दोष दूर होय प्रभु कृपा करे ॥ १३ ॥

मूल—इदानीमागतः कालः सर्वबुद्धिविनाशकः ।

करे पतति दुःसंगो मीलिताक्षस्य चापि हि ॥ १४ ॥

शब्दार्थः—अब सचनकी बुद्धिकों विशेष नाश करिवेवारो काल आयोहे ओर नेत्र मुंदिकें रहिवेवारेकोहू निश्चय दुःसंग हस्तमें आय जातहे ॥ १४ ॥ टीका—उपर दोष चालीस कहे ताके दूरिकरणार्थ गुण ९ नव कहे परंतु यह काल सर्वबुद्धिको नाशक आयोहे सत्प्राणिकोहू बुद्धिको नाश भयोहे तो अज्ञानीकी बुद्धिको नाश होय या में कहा कहेनो ? एक तो काल बाधक हे दूसरो दुःसंग विनाचाहे स्वतःसिद्ध (आपुतें) आयमिलतहे मानो कर्ममें धरयोहे ताकरिकें धर्मको लेश हे सोहू चल्थो जातहे तहां भगवद्धर्म बाढिवेकी कहा जातहे ? दिनदिन घटत जातहे तातें कालदोष ओर दुःसंग बोहोत बाधकहे ॥ १४ ॥

मूलं—किं कार्यं किमकार्यं वा यतः स्फुरति नैव हि ।

प्रभुणा स्वबलं तावदुपसंहृतमेव हि ॥ १५ ॥

शब्दार्थः—कहा करनो अथवा कहा करिवेयोग्य हे कहा नाहीहे यह स्फुरायमान नाही होत हे काहेतें जो प्रथमतें प्रभुनेही आपनो बल समेल्यो हे ॥ १५ ॥ टीका—यह कालदोष कछु कार्य करियें सो भगवत्संबंधी होय तामें उलटीही स्फुरणा होतहे एकक्षणमें कछु विचारे तो दूसरे क्षणमें कछु स्फुरे याभांति भले कार्यमें अनेक प्रतिबंध पडतहे केवल प्रभुको प्रतापबल मनमें आवत हे जो श्रीकृष्ण सर्वोपर सर्वकार्य सिद्धकर्त्ता हे इनको प्रताप दशोदिशामें प्रकट हे वेद, पुराण, श्रीभागवत, गीता, इत्यादिक सर्वशास्त्रमें प्रसिद्ध हे ऐसे श्रीकृष्ण हमारे प्रसिद्ध पति हे सो हमकों कहा डर हे ? याभांति प्रभुको प्रतापबलहू हृदयमें आवत हे परंतु प्रभुने एसो अपनो बल हे तिनको उपसंहार कियो हे तासों विश्वास छुटि जात हे लौकिक सुख दुःखकों पावतहे ॥ १५ ॥

मूलं—साधनानि न सिद्धयन्ति कालदोषादुरात्मनः ।

प्रतिबंधश्च कालादिकृतः प्रत्यहमेधते ॥ १६ ॥

शब्दार्थः—कालदोषों दुष्ट हे आत्मा जिनको एसेको साधन सिद्ध नांही होतहे ओर कालादिकृत प्रतिबंध प्रतिदिन बढतहे ॥ १६ ॥ टीका—जा साधनतें मनमें दुर्वासना न उठे भगवत्कार्य होय सो साधन करो या भांति कोई कहे तहां कहतहें जो साधन सिद्ध नांही होत हे तो फल तो महादुर्लभ हे काहेतें जो कालादि प्रतिबंध दिनदिन प्रति बढत जातहे ॥ १६ ॥

मूलं—उद्वेगः प्रतिबंधो वा भोगश्चापि प्रजायते ।

प्रतिबंधसेवनं तैः प्रत्याशा का फलस्य हि ॥१७॥

शब्दार्थः—उद्वेग अथवा प्रतिबंध ओर [शरीरादिकनको] भोग उत्पन्न होतहे यह तीन (सेवामें) प्रतिबंधकहे ताके सेवन करिकें फलकी आशा कहाहे ? अथवा यह तीन प्रतिबंधकके सेवनतें कुत्सित फलकीही आशा हे ॥ १७ ॥ टीका—श्रीआचार्यजीमहाप्रभु सेवाफलमें निरूपण कियेहे “उद्वेगः प्रतिबंधो वा भोगो वा स्यात्तु बाधकः” (उद्वेग, प्रतिबंध, ओर भोग यह बाधकहे) याभांति कहेहें तामें प्रथम मनको उद्वेग होय तत्र मन सेवामें न लगे पाछें प्रतिबंध होय तो पाछें शरीरादिकके भोगको मन होय भोगतें विषयावेश होयजाय तब प्रभु अप्रसन्न होय याभांति प्रतिबंधतें जब भगवत्सेवा न होय तब पुष्टिमार्गीय फलकी आशा काहेकों करिये ? यामार्गमें तो भगवत्सेवाही फलहे सोई न भई तो आगे कहा फल होयगो ? ॥ १७ ॥

मूलं—तथापि श्रीमदाचार्यचरणाश्रयणान्मम ।

निवर्तते निराशं सन्न मनः फललब्धितः ॥१८॥

शब्दार्थः—तोहू श्रीमदाचार्यजीके चरणारविंदके आश्रयसों मेरो मन फलकी प्राप्तिमें निराश सते निवृत्त नांही होतहे ॥ १८ ॥ टीका—या मार्गमें सेवाही फलहे सो यह महा कालदोषहे तातें निश्चय में सेवा

बिना फलमें निराश हो तोहू एक भरोसो मेरे मनमें हे जो मेनें श्रीवलभाचार्यजीके चरणकमलको आश्रय अपने मनमें कियोहे तासों [भगवत्सेवाकरि रहितहों तोहू] श्रीमहाप्रभुजीके चरणकमलके आश्रयतें सर्वोपरि यह पुष्टिमार्गीय फल निश्चयही सिद्ध होयगो यह विश्वासहे ॥ १८ ॥

इति श्रीहरिरायजीकृतं सप्तविंशतितमं शिक्षापत्रं श्रीगो-
पेश्वरजीकृतव्रजभाषाटीकासमेतं समाप्तम् ॥ २७ ॥

शिक्षापत्र २८.

अब अष्टाविंशतितम शिक्षापत्रमें अपनी दीनताके आविर्भावपूर्वक श्रीभगवानकी प्रार्थनाको प्रकार निरूपण करतहैं । उपर कहे जो सर्व साधनकरि रहित तथा सेवाकरि रहितहों तोहू श्रीआचार्यजीमहाप्रभु-जीके चरणाश्रयतें फल होयगो सो फल कौन भांति होयगो सो आगे कहतहैं जो आश्रयतें दैन्य स्फुरे सो फलरूप हे सो दीनता आगे वर्णन करतहैं—

मूलं—कदा नंदात्मजः स्वेषु कृपादृष्टिं करिष्यति ।

प्रतीक्षयैवास्मदादिमनः श्रान्तं सहेंद्रियैः ॥ १ ॥

शब्दार्थः—श्रीनंदरायजीके पुत्र अपने भक्तनकी उपर कव कृपादृष्टि करेंगे ? यह प्रतीक्षा [राह देखनी ता] करिकेही अस्मदादिकनको मन, इन्द्रियनसहित श्रान्त [शिथिल] होयगयोहे ॥ १ ॥ टीका—अब श्रीह-रिरायजी विज्ञप्ति करतहैं जो नंदात्मज श्रीकृष्णहे यह कहिके श्रीनंद-रायजीके पुत्र कहे वसुदेवजीके नांही काहेतें जो यह पुष्टिमार्गमें

नंदकुमारही सेव्यहे श्रीशुकदेवजी नंदमहोत्सवके अध्यायमें कहेहैं
 “नंदस्त्वात्मज उत्पन्ने जाताह्लादो महामनाः” (श्री नंदरायजी
 आत्मातें उत्पन्न ऐसे पुत्र भये तब भयोहे आनंद जिनको
 ओर बड़े मनवारे जातकर्म करावनलगे) यह वाक्यतें नंदरायकी
 आत्मातें प्रकटे ऐसे श्रीकृष्ण भावात्मक पुष्टिपुरुषोत्तम मोकों अपने
 स्वकीय निजभक्त जानि अपनी कृपादृष्टि कब करेंगे? यह प्रतीक्षा
 करत करत अस्मदादिकनको मन इन्द्रियनसहित शिथिल होयगयो
 सो श्रीगुसांईजी विज्ञप्तिमें कहेहैं “यादृशी तादृशी नाथ ! त्वत्पदा-
 व्जैककिंकरी । त्वद्वक्त्रं कथमप्याशु कुरु दृग्गोचरं मम” (हे नाथ !
 मैं जेसी हों तेसी एक आपके चरणारविंदकीही दासी हों तासों केसेहू
 आपको मुखारविंद शीघ्र मेरे दृष्टिगोचर करो) ॥ १ ॥

मूलं—करुणावारिधिः स्वीयनिधिः सर्वाधिकः प्रभुः ।

उपेक्षते कुतः स्वीयानिति चिंतातुरं मनः ॥ २ ॥

शब्दार्थः—दयाके समुद्र, अपने निधिरूप, सर्वतें अधिक, प्रभु
 अपने निजभक्तनकी क्यों उपेक्षा करतहैं? एमें चिंतातुर मनहे ॥ २॥
 टीका—हे श्रीकृष्ण ! तुम केसेहो करुणाके निधिहो और सगरे प्राणि-
 मात्रके सर्व जगतके प्रभुहो ताहूमें स्वीय जो तुम्हारे भक्तहे तिनके तो
 सर्वस्व निधिहो ऐसे प्रभु स्वीय अपने भक्तनकी उपेक्षा क्यों करतहो ?
 यह चिंताकरिकें मनतें आतुर भयोहूं सो श्रीगुसांईजी विज्ञप्तिमें कहेहैं
 “हा नाथ ! जीविताधीश ! राजीवदललोचन ! । यथोचितं विधेहीति
 प्रार्थनं तावकस्य मे” (हा नाथ ! जीवितके अधीश ! कमलदललोचन !
 जेसे योग्य होय तेसे करो यह तुम्हारो जो हूं इनकी प्रार्थनाहे) हे नाथ
 कमललोचन ! मैं तुमसों प्रार्थना कहा करूं? तुम्हारी कृपातें जीवतहो

सो यह विप्रयोग उचित है तातें में प्रार्थना कहा करूं ? तुम सर्वज्ञ हो सब जानतहो ॥ २ ॥

मूलं—निजानंदनिमग्नस्य भवेद्यद्यपि विस्मृतिः ।

भक्तार्थमवतीर्णस्य कृपालोरुचिता न सा ॥ ३ ॥

शब्दार्थः—अपने आनंदमें मग्न ऐसेकों यद्यपि विस्मृति होय तथापि भक्तके अर्थ प्रकट भये ऐसे दयालुकों यह विस्मृति उचित नांहीहै ॥ ३ ॥ टीका—हे श्रीकृष्ण ! तुम अपने आनंदमें रात्रिदिन मग्न रहतहो तासों यद्यपि संसारादिक भावकी विस्मृतिहै तोहू अपने भक्तनके अर्थ तुम अवतार लियेहो तातें ओर तुम परमकृपालहो तातें तुम्हारे भक्त जो संसारमेंहै तिनकी विस्मृति नांही करोगे कृपा करि अंगीकारही करोगे सो । श्रीगुसाईजी विज्ञप्तिमें कहेहैं “ त्वदंगीकृतयो जीवेष्वधिकारा यतः प्रभो ! । अतस्ते न विचारार्हाः कृपां कुरु कृपा-निधे ! ” (जीवनमें जासों तुम्हारी अंगीकृतिरूप अधिकारहै तासों हे प्रभो ! हे दयाके निधि ! यह जीव विचार करिवेयोग्य नांहीहै तासों कृपा करो) हे नाथ ! तुम्हारो अंगीकृत जीवहै तुम्हारे अधिकारयोग्यहै सो इहां लौकिकसंबंधतें तुमकों भूलेहैं अधिकारयोग्य नांही है तोहू तुम कृपासमुद्रहो तासों हमपर कृपाही करो ॥ ३ ॥

मूलं—कं प्रार्थयेयुस्ते दीना विहाय निजनायकम् ।

तदेकशरणा नित्यं विमुक्ताः सर्वसाधनैः ॥ ४ ॥

शब्दार्थः—सर्वसाधनकरि रहित, नित्य येही एकहे शरण जिनकों ऐसे, दीन भक्त अपने पतिकों छोड़िकें कोनकी प्रार्थना करे ? ॥ ४ ॥

१ अपने आनंदआत्मक धाममें विराजत होय वा समय तो जीव स्मरणमें न आवे परंतु भक्तके अर्थ प्रकट भये तब तो भक्तको स्मरण रखनो चाहियें सो स्मरण न रहे यह योग्य नांही.

टीका—हे नाथ ! हम तुममें कहा प्रार्थना करे ? हम दीनहैं तुमको हम अपने नायक (पति) जानतहैं तुम विना ओर कोईको हम नाहीं जानतहे ओर हम सर्वसाधनकरि रहितहैं तातें नित्य तुम्हारे शरणहैं येही भरोसोहे । साधन होतो तो कछु प्रार्थना करते सो नाहीं हे तातें तुम्हारो आश्रयकरि तुम्हारे शरणहे । सो श्रीआचार्यजीमहाप्रभुजी विवेकधैर्याश्रयग्रंथमें कहेहैं “अशक्ये वा सुशक्ये वा सर्वथा शरणं हरिः” [अशक्य अथवा सुशक्यमें सर्वथा हरि शरणहे] यह वाक्यको विचारी ओर उपाय हमको नाहीं सूझतहे तातें तुम्हारे शरणहे ॥ ४ ॥

मूलं—मन्नाथ ! नाथये नूनं भवामि विरहाकुलः ।

दर्शनं स्पर्शनं वापि देहि वेणुस्वरश्रुतिम् ॥ ५ ॥

शब्दार्थः—हे मेरे नाथ ! मैं आपके विरहकरिकें आकुल भयोहूँ तासों निश्चय मैं प्रार्थना करूँहूँ जो [सेवामें] दर्शन, स्पर्शन ओर वेणुस्वरकी श्रुतिकोंहूँ देहो ॥ ५ ॥ टीका—हे श्रीकृष्ण ! तुम मेरे नाथहो ओर मैं महाविरहकरिकें आकुल भयोहूँ यह संसारके कार्यमें तत्परहों ओर तुम्हारि सेवा भगवद्धर्मकरि रहितहों तासों संसारामिपीडितहों सो श्रीगुसाईजी विज्ञप्तिमें कहेहैं—“त्वद्दर्शनविहीनस्य त्वदीयस्य तु जीवितम् । व्यर्थमेव यथा नाथ ! दुर्भगाया नवं वयः” [तुम्हारे दर्शनकरि रहित तुम्हारे भक्तनको जीवित, हे नाथ ! विधवाकी नवीन अवस्थाकीनाई व्यर्थ हे] तुम्हारे दर्शन विना त्वदीय तुम्हारे भक्त जीवेंहैं सो व्यर्थ हे जैसे दुर्भगा (खोटे भाग्यवारी विधवा) को जोवन व्यर्थ हे तातें श्रीहरिरायजी कहतहैं जो हमको दर्शन देहो ओर श्रीअंगको स्पर्श करावो [अर्थात् सेवा करावो तामें दर्शन ओर चरणस्पर्श होय] ओर वेणुनादकरि वेणुद्वारा हमारे हृदयमें सुधा धरो

१ विधवाको जोवन होय सो ओरको तथा अपनकोहूँ दुःखरूप होय तें भगवानके दर्शन विना भक्तको जीवित अपनेको तथा ओरको दुःखरूप होयहै.

तव हमकों सुख होय विरहाग्निकरि व्याकुल हे तातें केवल दर्शनहीतें दुःख दूर न होयगो दर्शन, स्पर्श ओर वेणुनादके सूरतें हृदयमेंतें दुःख दूर होयगो तासों या भांति सुख देहो ॥ ५ ॥

मूलं—निजाचार्याश्रितानस्मान्यदि कृष्ण प्रहास्यसि ।
गमिष्यति हरे ! नाथ ! प्रतिज्ञैव तदा तव ॥ ६ ॥

शब्दार्थः—अपने आचार्यजीके आश्रित ऐसे हमकों जो हे श्रीकृष्ण ! तुम त्याग करोगे तो हे नाथ ! हे हरे ! तुझारीही प्रतिज्ञा जायगी ॥ ६ ॥ टीका—अपने श्रीवल्लभाचार्यजीके आश्रित पुष्टिमार्गीय तदीयनकों हे नाथ ! खोटे जानि दोष देखिके छोडोगे तो तुझारी निश्चय प्रतिज्ञा भंग होयगी तातें कृपाकरो काहेतें जो तुम श्रीआचार्यजीमहाप्रभुजीतें प्रतिज्ञा करीहे जो जिनकों ब्रह्मसंबंध कराओगे तिनके सकल दोष दूर होयंगे तिनकों में अंगीकार करतहों । सो सिद्धान्तरहस्यमें कह्योहे “ ब्रह्मसंबन्धकरणा-त्सर्वेषां देहजीवयोः । सर्वदोषनिवृत्तिर्हि दोषाः पंचविधाः स्मृताः ” ॥ (ब्रह्मसंबंध कियेतें सवनके देह जीवके सर्वदोषकी निश्चय निवृत्ति होतहें सो दोष पांच प्रकारके हे) इत्यादि वचनतें तुम हमारे दोष देखोगे तो तुझारी प्रतिज्ञा जायगी तातें अपनी प्रतिज्ञाके लिये श्रीआचार्यजी महाप्रभुजीके आश्रित जानि हमपर कृपा करो ॥ ६ ॥
मूलं—वयं तु सर्वथा दुष्टाः स्वधर्मविमुखा अपि ।

त्वमस्मदीयान् मा धर्मान् गृहाण गुणपूरितः ॥ ७ ॥

शब्दार्थः—हम तो सर्वथा दुष्टहें ओर स्वधर्मतें विमुखहें तोहू तुम गुण करि पूरितहो सो हमारे धर्मकों मति ग्रहण करो ॥ ७ ॥ टीका—हम सर्वथा दुष्टहें वालापनतें दुष्टही आचरण कियेहें अपने पुष्टिमार्गतें विमुखहे कवहू पुष्टिमार्गीरितितें भावसहित सेवा नांही करीहे तातें अपने स्वधर्मतें विमुखहें ओर हे नाथ ! तुम केसेहो सर्वगुणकरिके पूर्णहो

सो अस्मदीय (अपने दासजन) के धर्मकी चाहना नांही करोगे? कृपा करो अवगुणी हमसारिखेपर निश्चय प्रमेयवलतें कृपा करोगे सो विज्ञप्तिमें श्रीगुसांईजी कहेहैं “वलिष्ठा अपि महोपास्त्वत्कृपाग्रेऽतिदुर्वलाः । तस्या ईश्वरधर्मत्वात् दोषाणां जीवधर्मतः” (यद्यपि हमारे दोष वोहोत वलिष्ठहे तोहू तुह्यारी कृपाके आगें दुर्वलहैं काहेतें जो तुह्यारी कृपाहे सो ईश्वरधर्महे ओर दोष हे सो जीवधर्महे) सो ईश्वरधर्मके आगें जीवधर्म तुच्छ हे तातें कृपा करो ॥ ७ ॥

मूलं-कृपालो ! पालनीयानां गुणदोषविचारणा ।

न कार्या स्वीयशरणविहितं वरणं यदि ॥ ८ ॥

शब्दार्थ:-हे कृपायुक्त ! आपके शरणसों भयो एसो जो वरणहे तो आपको पालन करिवेयोग्य जो जीवहे इनके गुणदोषकी विचारणा नांही कर्त्तव्य हे ॥ ८ ॥ टीका-हे नाथ ! तुम कृपालुहो सो पालन करो हमारे गुणदोषको विचार तुम मति करो, काहेतें जो हम तुह्यारेहैं श्रीआचार्यजीद्वारा हमारो धर्म तुमतें भयोहे तातें हमारो वरण भयोहे सो अपने कार्यके लिये सेवा, टहल, जो धर्म हे सो कार्य मोसों न वनिआयो ओर उलटो अपराध अनेक दोष वन्यो सो तुम मेरी ओर मति देखो आपुन वरण जानि कृपा करो सो श्रीगुसांईजी विज्ञप्तिमें कहेहैं “त्वदंगीकृतयो जीवेष्वधिकारा यतः प्रभो । अतस्ते न विचारार्हाः कृपां कुरु कृपानिधे !” (हे प्रभो ! जीवमें तुह्यारी अंगीकृतिरूप अधिकारहे तासों (वे योग्य होय अथवा दोषकरि अयोग्य होय तोहू) वे विचार करिवेयोग्य नांहीहे ताते उनके दोष मति विचारो आप कृपाके निधि हो सो कृपा करो) ॥ ८ ॥

मूलं-अश्रान्तोऽपि हरे ! दोषगणनायां मम प्रभो ! ।

श्रममेष्यसि गोपीश ! ततो विस्मर सर्वथा ॥ ९ ॥

शब्दार्थः—हे हरे ! आप श्रमरहित हो तोहू हे प्रभो ! मेरे दोषनकी गणनामें श्रम पावेंगे । तासों हे गोपीजनके ईश ! सर्वथा वह दोषनकों विसरिजाओ ॥ ९॥ टीका—हे नाथ ! तुम कोयवातमें हारो नांही तुमकों कवहू कोई कार्यमें श्रम न होय एक क्षणमें चाहो सो करो ऐसे सामर्थ्ययुक्त यद्यपि हो तोहू मेरे दोषकी गणना तुम करोगे तो तुमकों श्रमही होयगो । मेरे अपार दोषहैं तातें हे गोपीश ! (यह संबोधन कहि यह जताये जो तुम गोपीके ईशहो विनासाधन गोपीजनपें कृपा करि तेसैं हमारी उपर कृपा करो) सर्वथा हमारे दोषकों विसरि-जाओ सो श्रीगुसाईजी विज्ञप्तिमें कहेहैं “अपराधेऽपि गणना नैव कार्या ब्रजाधिप ! । सहजैश्वर्यभावेन स्वस्य क्षुद्रतया च नः” (हे ब्रजके अधिप ! निःसाधनके फलात्मक ! हमारे अपराधकी गणना करनी तुहें उचित नांहीहे काहेतैं जो तुम्हारो सहजैश्वर्यहे ताके आगें हमारे दोष क्षुद्रहे सो कहाँ) तातें कृपा करो ॥ ९ ॥

मूलं—दीनेषु गुणलीनेषु (हीनेषु) तावकीनेषु मत्प्रभो ।

पराधीनेषु करुणा करणीयैव सर्वथा ॥ १० ॥

शब्दार्थः—दीन, संसारके गुणमें लीन, (अथवा गुणरहित) ओर पराधीन, ऐसे जो तुम्हारो भक्तहे तिनकी उपर सर्वथा कृपाही करनी योग्य हे ॥ १० ॥ टीका—हे नाथ ! मैं अत्यंत दीन हों, दुःखी हों, काहेतैं जो मायाके गुणकरि संसारादिकमें लीनहों ओर पराधीन हों ऐसे दोषकरि दीनहों तोहू तुम्हारो हों तातें मेरे उपर सर्वथाही करुणा करियें । सो विज्ञप्तिमें श्रीगुसाईजी कहेहैं “कालकर्माधीनतां यत्करोपि मयि सुंदर ! । तदप्यनुचितं यस्मात्त्वदीयोऽस्म्युररीकृतः” (हे सुंदर ! मोपें काल-कर्मके आधीनपनो जो आप करतहो सोहू योग्य नांहीहे, काहेतैं जो

में आपको हों ऐसे अंगीकार कियोहे) हे सुंदर श्रीकृष्ण ! मैं काल-
कर्मके आधीन हों तोहू तुम्हारे हों ताते अपनो जानि कृपा करो ॥ १० ॥

मूलं-निःसाधना गतधना मनोदीनाः सुदुःखिताः ।

निजाचार्याश्रिताः शोकलोभमोहभयाकुलाः ॥ ११ ॥

भवन्ति ते कृपापात्रं महोदार ! दयानिधे ! ।

प्रयच्छ करुणां तेभ्यो दत्तं पात्रेऽक्षयं भवेत् ॥ १२ ॥

शब्दार्थः-निःसाधन, गयोहे धन जिनको ऐसे, ताकरि मनमें दीन,
अत्यंत-दुःखी, अपने श्रीआचार्यजीके आश्रित, शोक, लोभ, मोह, भय
करिकें व्याकुल, ॥ ११ ॥ ऐसे जो हैं सो आपकी कृपाके पात्र हैं तासों
हे बड़े उदार ! दयाके निधिरूप ! इनकों करुणा देहो काहेतें जो पात्रमें
दियो सो अक्षय होय ॥ १२ ॥ टीका-मैं निःसाधन हों मेरेमें कोई
साधन नाहीहे भावरूपी धनहू गयोहे ताकरि अति दीन हों बोहोत
दुःखी हों ओर अपने श्रीआचार्यजीके आश्रित हों ओर शोक, लोभ,
मोह, भय, यह मायाके गुण करिकें व्याकुल हों ॥ ११ ॥ उपर कहे
ऐसे होय तो प्रभुके कृपापात्र होय ताते श्रीहरिरायजी कहत हैं जो
मैंहू एसोहू तुम्हारे कृपापात्र हों तुम महोदारहो दयाके निधिहो ताते
दया करो पात्रमें दान दियो सो अक्षय होतहे सो मैं दयाको, पात्र हों
ताते दया करो ॥ १२ ॥

मूलं-संसारदावदग्धानां जीमूतजलकांक्षिणाम् ।

न नीलजलदानंतजलदानं विना सुखम् ॥ १३ ॥

शब्दार्थः-संसाररूपी दावानलतें दग्ध ऐसे ओर मेघके जलकी
इच्छावारेनकों श्याममेघके अनंत जलके दान विना सुख न होय
॥ १३ ॥ टीका-अब लौकिक दृष्टांत कहत हैं । वनमें दावानलतें वनके
सगरे जीव आदि जंरतें होय तिनकों शीतल करिवेको एक मेघजल

वरखे येही उपायहे ओर कोई उपाय नांहीहे । यद्यपि जलतें समुद्र, नदी, अनेक भरेहें परंतु वनमें दावानलकों मेघ जलदान करि निवृत्त करे तब होय, तैसेही यह मायासंबंधी देहसंबंधी अहंताममता-रूप यह दावानलमें जरतहें तिनको नीलमेघरूप श्रीगोवर्धननाथजी अपने आनंदरूप अनंत जलको दान करे (बड़ीकृपाकरे) तबही यह पुष्टिमार्गीयवैष्णवकों सुख होय ओर कोउ उपाय नांही ॥ १३ ॥

मूलं-ये मयांगीकृताः सर्वे त्वत्सेवायै गृहस्थिताः ।

त एव भावनाशाय भवन्ति करवै किमु ॥ १४ ॥

शब्दार्थः-आपकी सेवाके लिये गृहमें रहे ऐसे जो मेने अंगीकृत कियेहे यहही भावको नाश करिवेकों तत्पर होतहे सो अब मैं कहा करूं ? ॥ १४ ॥ टीका-जो हमने सेवक कियेहें तिनकी प्रार्थना प्रभुसों करि अंगीकार कराये ऐसे अंगीकृत सेवक वोहोत कियेहे । सो काहेतें जो मोसों गृहस्थाश्रममें भलीभांति सेवा नांही बनि आवतहे तासों अपने गृहमें स्थितहे तिन सवनकों सेवक करि सेवारीति बताई हे सो मेरे सेवक तुहारी भली सेवा करेंगे तो मोकों सुख होयगो यह जानि अपनी सहायके लिये अपने गृहस्थित अंगीकृत किये हैं सो वे गृहस्थ भगवानकी सेवामें भावनाश होय एसो उलटो कृत्य करतहें सो मैं कहा करूं ? ॥ १४ ॥

मूलं-वहिर्मुखाः प्रकुर्वन्ति स्वसंबंधं वहिर्मुखम् ।

सहायताभ्रमादेव न हातुमहमुत्सहे ॥ १५ ॥

शब्दार्थः-वहिर्मुखहे अपने संबंधतें मोकों वहिर्मुख करतहें अथवा वहिर्मुख अपने संबंधकों वहिर्मुख करतहें परंतु यह सहायता करेंगे ऐसं, भ्रमसोंही में इनकों छोडिवेकों उत्साह नांही करतहों ॥ १५ ॥ टीका-जो जीव स्वभावतें वहिर्मु-

खहे सो अपने संबंधतें सगरे जीवको, बहिर्मुख करतहे सो में
भ्रमसों, अपनी सहायता करेंगे ऐसें जान्यो तासो अंगीकृत किये सो
वे उलटे चलतहे भगवत्सेवा नाहीं करतहे तोहूं उनको छोड़िवेको
उत्साह नाहीं करतहों ॥ १५ ॥

मूलं—सहायभ्रममुत्पाद्य वंचयंति यथा जनम् ।

मार्गस्थितं तथा नाथ ! वंचितोऽहं गृहस्थितैः ॥ १६ ॥

शब्दार्थः—जेसें ठगपुरुष मार्गमें रहे मनुष्यको सहायको भ्रम
उत्पन्न करिकें ठगतहे तेसें हे नाथ ! में गृहस्थित जनसों ठगायो हों
॥ १६ ॥ टीका—मेनें भ्रमकरिकें अपनी सहायताके अर्थ सेवक किये
तामें उलटो ठग्यो गयोहूं हे नाथ ! मार्गस्थित जनको जेसें कोई ठगे
तेसें गृहस्थ वैष्णवनें मोकों ठग्यो ॥ १६ ॥

मूलं—यथांधकूपपतितं मंडुका दुःस्वरैर्जनम् ।

व्यथयंति तथा मह्यं दुर्वचोभिर्गृहस्थिताः ॥ १७ ॥

शब्दार्थः—जेसें अंधकूपमें गिरे जनको मंडुक दुष्टस्वरसों व्यथा
करतहें तेसें मोकों गृहस्थित दुर्वचनसों व्यथा करतहें ॥ १७ ॥ टीका—
लौकिक दृष्टांत कहतहे—जेसें अंधकूपमें परचो होय ताको मंडुक दुष्ट-
स्वरतें बोले सो भय उपजावे तेसें गृहस्थित अनेकलोकके दुर्वचन
सुनिकें मोकों महाभय होतहे गृहमें स्थित ऐसे मनुष्यके अनेक
भांतिके वचन सुनिके मेरे मनमें व्यथा होतहे ॥ १७ ॥

मूलं—कियत्पर्यंतमेवं हि मदुपेक्षां करिष्यसि ।

त्यक्तो वा दोषसाहित्याद्विमुखोऽहं दयालुना ॥ १८ ॥

शब्दार्थः—कितनेक दिनपर्यंत एसेही मेरी उपेक्षा करोगे ? किंवा
दोषसहित में हों तासों विमुखहों सो दयालुनें त्याग कियो ? ॥ १८ ॥

टीका-तातें हे नाथ ! एसो दुःखी में हों सो मेरी उपेक्षा करोगे के मोकों दोषसहित जानिकें त्याग करोगे ? परंतु में यह मनमें जानतहों जो तुम दयाल हो तातें त्याग तो कबहू न करोगे सो श्रीगुसांईजी विज्ञप्तिमें कहेहें “ चित्तेन दुष्टो वचसापि दुष्टः कायेन दुष्टः क्रियया च दुष्टः । ज्ञानेन दुष्टो भजनेन दुष्टो ममापराधः कतिधा विचार्यः ” (चित्तहू दुष्टहे तुझारेमें नांही लागत, वाणी हू मिथ्याभाषणतें दुष्टहे, कायाहू तुझारि सेवा नांही करत तातें दुष्टहे, क्रियाहू लौकिक करियतहे, ज्ञानहू दुष्टहे, भजनहू निष्कपटतासों नांही होतहे तातें हे नाथ ! हमारो दोष (अपराध) कहांतोई विचारोगे ? तातें कृपा करो ॥ १८ ॥

मूलं-त्यक्तः कुत्र गमिष्यामि न मेऽस्ति शरणं क्वचित् ।

नावमारोप्य दीनं स्वं मध्येधारं न मज्जयं ॥ १९ ॥

शब्दार्थः-आप त्याग करो तो में कहां जाऊंगो ? मोकों काहू जगे शरण नांहीहे । दीन अपने जनकों नावपर वेठायके धाराके मध्यमें मति डुवावो ॥ १९ ॥ टीका-हे नाथ ! तुम ईश्वरहो कर्तुं अकर्तुं अन्यथाकर्तुं सर्वसामर्थ्ययुक्तहो सो यह जानो मेरे शरणलायक यह नांहीहे यह विचारिकें कदाचित् त्याग करो तो हम कहां जाय ? हमारे तुमविना ओर कहूं ठिकानो नांहीहे तुझारी शरणविना रंचकहू काहूकों नांही जानत । तातें तुम त्याग करोगे तब मेरी कहा दशा होयगी ? जेसैं नावमें वेठाय मध्य-धाराके बीचमें नाव छोडदेई तो उह कहा करे ? तहां खेवटही सहाय होय तो पार लगे ओर उपाय नांहीहे तेसैंही हम तुझारे पुष्टिमार्गरूपी नावमें वेठेहे अब तुझारे मनमें आवे तेसी करो ॥ १९ ॥

मूलं-निजाचार्यकुले जन्म किमर्थं विहितं मम ।

विहितं चेन्मयि सदा दोषपीने कृपां कुरु ॥ २० ॥

शब्दार्थः—अपने आचार्यकुलमें मेरो जन्म काहेको कियो ? जब कियो तब सदा दोपसों पुष्ट एसो जो में ताकी उपर कृपा करो ॥२०॥ टीका—भलें तुम मेरो त्याग करोगे तो तुमसों हमारी कहा कछु चलतहे ? परंतु यह में कहतहों जो निज (हमारे) श्रीआचार्यजी श्रीवल्लभाचार्य-जीके कुलमें हमारो जन्म क्यों दियो ? तुम प्रथम नांही जानत हते ? अब छोडतहो में तो सदा दोपकरिकें भयों हों तातें कृपाही करो ॥२०॥, मूलं—असंगः सर्वथा दूयेऽसत्संगसहितोऽप्यहम् ।

यथाऽरण्ये परित्यक्तः कादिशीको मृगादनैः ॥२१॥

शब्दार्थः—में असत्पुरुषनके संगसहितहों सो इनसों सर्वथा असंग [संगदोष न लगे तेसैं दूरि] रहतहों तोहू खेद पावतहों जेसैं वनमें परित्यक्त ओर दिङ्मूढ (माथो फिरगयो तासों दिशा भूल गयो) पुरुष मृगादन जो सिंहादिक ताकरि भय पावे तेसैं में असत्संगसों भय पावतहों ॥ २१ ॥ टीका—हे नाथ ! असत्संग मोकों दशोदिशातें घेरेहे यह मोकों बडो दुःखहे । रंचकहू कुसंगतें बुद्धि विगेरे तो सर्व ओरतें मोकों दुःसंग वेष्टितहे तातें सुंदरबुद्धिको नाश भयोहे ओर सत्संगतें सर्वधर्मको तोष होय सो सत्संग मोतें बोहोत दूरिहे तातें में अकेलोहू दुःसंगके मध्य वेष्टितहों तिनसों डरपतहों सो मेरी कहा दशाहे जेसैं अरण्य वनमें अकेलो छोडि देई सो सिंहकी गरज दशोदिशा सुनि कोन दिशाकों जाय तेसैंहि मोकों भईहे सो कोन दिशाकों जाऊं सो उपाय दीसत नांही ॥ २१ ॥

मूलं—जातपक्षाः खगाः स्वीयजननीं त्यजन्ति हि ।

यथा तथा करालेऽस्मिन् कालेऽहं भगवज्जनैः ॥२२॥

१ जातपक्षान् खगान् स्वीयजननीं त्यजन्ति ध्रुवम् । एसो कहूं पाठहे ताके अनुसार अर्थ जेसैं पांख उत्पन्न भई एसे पक्षीको माता निश्चय छोडतहे तेसैं मोकों थोरो भाव भयो ओर यह करालकालमें भगवदीय जननैं छोडदियो ।

शब्दार्थ:-जैसे पांख उत्पन्न भये ऐसे पक्षी अपनी माताको छोड़ि देतहे (फिर माताकरि रहित होतहे) तैसे मैं भगवानके जन जो भक्त ताकरि रहित होय गयोहूं ॥ २२ ॥ टीका-मेरी कहा अवस्थाहे जैसे खग जो पक्षीहे ताके बच्चाको जब पांख होय तब उह बच्चा अपनी जननी जो माता ताको तजिके अनेक वनमें उड़िजातहें, तैसेहि हमारे पास भगवदीय कथा वार्ता करते सो यह करालकालमें मोको छोड़िगये सो मैं कहा करूं ? ॥ २२ ॥

मूलं-चिंतापारावारे पतितस्यात्रैव मग्नस्य ।

एतज्जलवडवाग्निः शरणं श्रीवल्लभाचार्याः ॥ २३ ॥

शब्दार्थ:-चिंतारूप समुद्रमें गियों ओर यामेही द्वयो एसो जो मैं ताको वहजलके शोषणमें बडवानलरूप श्रीवल्लभाचार्यजी शरणहैं ॥ २३ ॥ टीका-भगवदीयके संगविना मेरे हृदयमें एसी चिंताहे जाको पार नांही। चिंतारूपसमुद्रमें मग्नहों तहां दृष्टांत कहतहें जैसे कोउ महागंभीर पानीके समुद्रमें मग्न भयो होय ताको एक बडवा-मिही सहायभूतहे एकक्षणमें सगरो पानी शोष लेय ओर कोउ नांही तैसेही मे यह संसाररूप भवसागरके चिंतारूपजलमें मग्न पयाँहों नामें एक श्रीवल्लभाचार्यजीही शरणहे यह उपायहे श्रीमहाप्रभुजी अलौकिक. अग्निरूपहे सो एकक्षणमें सगरी चिंता संसारदुःख सब शोषलेयंगे यह उपायहे ॥ २३ ॥

मूलं-हा कृष्ण ! हा नंदसूनो ! हा यशोदाप्रियार्भक ! ।

हा गोपिकाहृदाधार ! धारयस्व करेण माम् ॥ २४ ॥

शब्दार्थ:-हा श्रीकृष्ण ! हा श्रीनंदरायजीके पुत्र ! हा श्रीयशोदाजीके प्रियपुत्र ! हा श्रीगोपीजनके हृदयके आधार ! श्रीहस्त करि [उपर श्लोकमें कहे ऐसे समुद्रमें मग्नहों ताते] मोको पकरि लेउ ॥ २४ ॥ टीका-उपर कहे याप्रकार श्रीहरिरायजी दीनता करत हते सो दीनता

करत करत विप्रयोगात्मक अग्नि हृदयमें प्रकट भयो सो अत्यंतविरहसो देहानुसंधान भूलिकें बोले हा कृष्ण ! यह फलात्मक नाम श्रुतिरूपके भावतेहैं १. हा नंदसुनु ! श्रीनंदरायजीके पुत्र जेसैं श्रीनंदरायजीने हम पाले तेसैं तुमहू पालो यह दूसरो नाम कुमारिकाके भावतेहैं २. हा श्रीयशोदाजीके प्राणप्रिय पुत्र ! यह श्रीयमुनाजीके भावतेहैं ३. पाछें कहे हा गोपीजनके प्राणआधार ! यह मुख्य श्रीस्वामिनीजीके भावतेहैं ४. यह चारो नाम लेय कहे जो एसे प्रभु विप्रयोगसमुद्रमें हम परेहैं तिनको अपने करतें उद्धार करो ॥ २४ ॥

इति श्रीहरिरायजीकृतमष्टाविंशतितमं शिक्षापत्रं
श्रीगोपेश्वरजीकृतव्रजभाषाटीकासमेतं समाप्तम् ॥ २८ ॥

शिक्षापत्र २९.

अब एकोनत्रिंश शिक्षापत्रमें बुद्धिको नाश करिबेवारो यह काल आयोहे तासों सत्संग, श्रीकृष्णस्मरण ओर शरणागतिरूप साधनकरि बुद्धि स्थिर राखनी. एसैं न करे तो सर्वकृति व्यर्थहे, तासोंही श्रीआचार्यजी [बुद्धिप्रेरक श्रीकृष्णके चरणकमल प्रसन्न होउ] एसैं प्रार्थना करि गायत्रीको अर्थ बतायोहे। सो श्रीकृष्णस्मरण ओर शरणागतिसों प्रभुही बुद्धि स्थिर राखेंगे यह निरूपणहे। उपर कहे ताप्रकार दैन्यतें विप्रयोग प्रकट होय तब भगवद्धर्म सिद्ध होय सो बुद्धि कोनप्रकार स्थिर रहे सो आगे कहतहैं—

मूलं—बुद्धिनाशककालोऽयं सर्वेषां समुपागतः ।

अतो हि सर्वथा गोप्यं बुद्धिरत्नं सुबुद्धिभिः॥१॥

शब्दार्थः—सवनकी बुद्धिको नाश करिवेवारो काल यह आयोहे तासों बुद्धिवारेनकों अपने बुद्धिरूप रत्न सर्वथा छुपाय राखनों ॥ १ ॥ टीका—यह वर्तमान कलिकालमें सबकी बुद्धिको नाश भयोहे काहेतें जो यह कलियुगमें अनेक धर्म भये हे तासों विचारे जो यह धर्म न भयो तो कहा विगतरहे ओर धर्म लेउंगो एसें बुद्धि धर्मतें भ्रष्ट होय-गई तातें जा बुद्धितें सुधर्म होतहे वा तो कालने हरि लीनीहे ताकरि सुंदर धर्मको (स्वरूप नांही समुझिसके तासों) नाश भयो, कुबुद्धितें विपरीत आचरण करन लागे तातें कहतहे जो तुम सावधान रहियो यह काल सर्वबुद्धि हरनकों आयो हे तातें सुबुद्धि जो वैष्णव हे सो अपनी बुद्धिरूप रत्नकों वंटीमें धरि यत्नसों राखियो काहूसों न जताईयो काहेतें जो रत्न यत्नविना रहे तो चोर लेजाय तेसें बुद्धिरूप रत्न यत्नकरि राखेंगे तिनहीको रहेगो ॥ १ ॥

मूलं—सत्संगकृष्णस्मरणशरणागतिसाधनैः ।

तदभावे कृतिः सर्वा यतो वैयर्थ्यमेति हि ॥ २ ॥

शब्दार्थः—सत्संग, श्रीकृष्णको स्मरण, ओर शरणागतिरूप साधन करि बुद्धिकी रक्षा करनी जो ऐसें रक्षा न करे तो सर्व कृति व्यर्थ होयजायगी ॥ २ ॥ टीका—अब श्रीहरिरायजी बुद्धिरक्षणको उपाय कहतहैं। सदा पुष्टिमार्गीय वैष्णवके सत्संगमें रहे ओर अपने मनमें ध्यान करि श्रीकृष्णके स्वरूपको स्मरण करे ओर श्रीकृष्णके शरणकी भावना सदा मनमें राखे। श्रीकृष्णाश्रयमें अष्टाक्षर कहेहैं सो शरणकी भावना करे काहेतें जो भावविना क्रिया करे सो सब व्यर्थ हे जैसें राखमें होमे ताको कहा फल ? तेसेंही भाव विना जो करे सो सब व्यर्थ हे ॥ २ ॥

मूलं—अत एवोक्तमाचार्यैः स्वकीयकरुणात्मभिः ।

बुद्धिप्रेरककृष्णस्य पादपद्मं प्रसीदतु ॥ ३ ॥

शब्दार्थः—तासोंही स्वकीयजनकी उपर दयालु श्रीआचार्यजी-महाप्रभुजी कहेहें जो बुद्धिके प्रेरक श्रीकृष्णके चरणकमल प्रसन्न होउ ॥ ३ ॥ टीका—तहां कोई कहे जो यह बुद्धिरत्नके जतनको प्रकार तुमही कहतहों के कहुं सुनेहे? तहां कहतहे जो श्रीआचार्यजीमहाप्रभुजी श्रीमुखतें कहतहें जो “बुद्धिप्रेरककृष्णस्य पादपद्मं प्रसीदतु” बुद्धिके प्रेरक श्रीकृष्णके चरणारविंदकी प्रसन्नतातें सुंदर बुद्धि होतहे तातें मन, वचन, कर्म, करि श्रीकृष्णके शरण जो कोई रहेगो तिनकी सुंदर बुद्धि होयगी ओरकी नांही ॥ ३ ॥

मूलं—उपकारोऽपि गायत्र्या ध्यानहेतुरयं मतः ।

गीतायां हरिणाऽप्युक्तमर्जुनं प्रति मोदतः ॥ ४ ॥

‘ददामि बुद्धियोगं तं येन मामुपयांति ते’ ।

बुद्धिस्थैर्यं हृदिस्थैर्यं हरेरिति न संशयः ॥ ५ ॥

शब्दार्थः—बुद्धिप्रेरक श्रीकृष्णके पादपद्मकी प्रसन्नताकी प्रार्थनारूप यह उपकारहु गायत्रीके ध्यानको कारणरूपहे गीताजीमें श्रीकृष्णनें अर्जुनप्रति आनंदसों कह्योहे ॥ ४ ॥ जो यह बुद्धियोग में देतहों जाकरि यह मोकों प्राप्त होयहे बुद्धिकी स्थिरता होय तब हृदयमें हरिकी स्थिरता होय यामें संशय नांही ॥ ५ ॥ टीका—गायत्री ब्राह्मणके वालककों देतहें ताके तृतीयपादमें बुद्धिके प्रेरणरूप अर्थ हे सो भगवान् सुंदरबुद्धि करे यह इनको उपकारहे। काहेतें जो गायत्रीके उपदेशतें वेदके कर्मकी योग्यता होय तेसोंही बुद्धिप्रेरक श्रीकृष्णकी

१ उपक्रमोऽपि गायत्र्या एसो पाठ काहु पुस्तकमेंहे ताके अनुसार अर्थ—बुद्धि-प्रेरक श्रीकृष्णके पादपद्मकी प्रसन्नताकी प्रार्थनाको प्रारंभहे सोहु गायत्रीके ध्यानको कारणहे.

कृपातें वैष्णवकी बुद्धि निर्मल होय सोहू प्रभुको उपकार हे । काहेतें जो बुद्धि निर्मल होय तो श्रीठाकुरजीको ध्यान होय सो गीताजीमें श्रीभगवान् अर्जुन प्रति कहेहैं ॥ ४ ॥ जो दूसरे अध्यायमें बुद्धि-स्थिरको प्रकार कहेहैं ताप्रकार बुद्धि स्थिर होय तो भगवान् हृदयमें स्थिर होय ओर बुद्धिकी स्थिरता जाय तो हरि हृदयतें जात रहे निश्चय यामें संशय नाहीं । तातें गीताजीमें एक सगरो अध्याय बुद्धियोगको भगवान् कहेहैं काहेतें जो सुंदर बुद्धि होय तवही सगरे धर्म, जप, तप, दान, व्रत, मर्यादामार्गके साधन, कर्ममार्गके साधन, ज्ञानमार्गके साधन, योगमार्गके साधन, पुष्टिमार्गके साधन, सब बने सुंदर बुद्धि विना कछु कार्य सिद्ध न होय ॥ ५ ॥

मूलं-तन्नाश एव गीतायां सर्वनाशो निरूपितः ।

अतो बुद्धिः सुसंरक्ष्या भावभावनकारणम् ॥६॥

शब्दार्थः—बुद्धिको नाश होय तो सवनको नाश गीताजीमें निरूपण कियोहे, तासों सर्वभावकी उत्पत्तिके कारणरूप बुद्धिकी आछी रीतिसों रक्षा करनी ॥६॥ टीका—बुद्धि जाभांति नाश होय ओर बुद्धिनाशतें आत्माको नाश होय सो भगवान् गीताजीमें द्वितीय अध्यायमें कहेहैं “ ध्यायतो विषयान् पुंसः संगस्तेषूपजायते । संगान् संजायते कामः कामात् क्रोधोऽभिजायते ॥१॥ क्रोधाद्भवति संमोहः संमोहात् स्मृति-विभ्रमः ॥ स्मृतिभ्रंशाद्बुद्धिनाशो बुद्धिनाशात् प्रणश्यति ॥ २ ॥ या वचनतें भगवान् कहतहैं हे अर्जुन ! जीव विषयमें प्रवृत्त होतहे सो विषयके ध्यानतें दुःसंग (संसारीको संग) होतहे तब अनेक भांतिके विषयकी कामना प्रकट होय तामें कछु विगरे अथवा विघ्न आवे तब क्रोध होय क्रोधतें मोह होय मोहकरि स्मृतिविभ्रम होय जब अज्ञान होय अज्ञानतें लौकिक संसारिकों अपने जाने तिनके पालनार्थ

खोटी क्रिया करे याभांति स्मृतिके भ्रमते बुद्धिकों नाश होय, बुद्धिके नाशते आत्माको नाश होय, बुद्धि हे सो भगवद्भावके भावनमें कारण हे ताते बुद्धिकी रक्षा करे सो प्रकार आगे श्लोकमें कहतहैं ॥ ६ ॥
मूलं—प्रसादभक्षणैर्नित्यं सेवनाकरणैरपि ।

सत्संगेन सदा कृष्णकथाश्रवणकीर्तनैः ॥ ७ ॥

शब्दार्थः—महाप्रसादके भक्षणकरि, नित्यभगवत्सेवा करि, सत्संग ओर सदा श्रीकृष्णकी कथाके श्रवण कीर्तन करि बुद्धिकी रक्षा करनी ॥७॥ टीका—उपर कहे जो बुद्धिकी रक्षाकरे तो सर्वकार्य सिद्ध होय सो बुद्धिकी रक्षा कोन भांति करनी सो कहतहैं असमर्पित वस्तुमें अपनो मन चलायमान न करे सदा महाप्रसाद भक्षण करे ओर श्रीकृष्णकी सेवा नित्यकरे ओर भगवदीयको सत्संग करे दुःसंगको त्याग करे ओर श्रीकृष्णकी कथाको श्रवण करे श्रीकृष्णकी लीला तथा नामको कीर्तन करे तो बुद्धि निर्मल रहे तब प्रभु हृदयमें पधारे ॥७॥

इति श्रीहरिरायजीकृतमेकोनविंशत्तमं शिक्षापत्रं श्रीगोपेश्वरजीकृतव्रजभाषाटीकासमेतं समाप्तम् ॥ २९ ॥

शिक्षापत्र ३०.

अब त्रिंशत्तम शिक्षापत्रमें जेसैं कर्मफलसिद्धिमें देशादि पद साधनहे तेसैं पुष्टिमार्गीय फलसिद्धिमेंहू देशादि पद साधनहे ओर तिनको साधन सत्संगहे यह निरूपणहे । उपर बुद्धिकी रक्षाको प्रकार कहे परंतु काल-दोषहू बडोहे सो न लागे तब बुद्धि सुंदर रहे सो प्रकार कहतहैं—
मूलं—स्मर्त्तव्यः सर्वदा कृष्णो विस्मर्त्तव्यं जगत् पुनः ।
प्रपंचस्मरणे कृष्णस्मृतिर्नैव भवेदिति ॥ १ ॥

प्रयतेत ततो जीवस्तदभावाय सर्वथा

कृष्णार्थताभावेन गृहादेर्विस्मृतिर्भवेत् ॥ २ ॥

शब्दार्थः—सर्वदा श्रीकृष्ण स्मरण करिवेयोग्यहे ओर जगत् विस्मरण करिवेयोग्यहे प्रपंचको स्मरण होय तहांताँई श्रीकृष्णकी स्मृति नांही होय तासों ॥ १ ॥ प्रपंचकी विस्मृतिके अर्थ जीव सर्वथा यत्न करे तातें श्रीकृष्णके अर्थ सर्व क्रियाकी भावना करिकें गृहादिककी विस्मृति होय ॥ २ ॥ टीका—सदासर्वदा श्रीकृष्णहीको स्मरण कर्तव्य हे सो अष्टमस्कंधमें शुकदेवजी कहेहैं “ ते सभाग्या मनुष्येपु कृतार्था नृप निश्चितम् । स्मरंति स्मारयंति ये हरेर्नाम कलौ युगे ” (जो कलियुगमें हरिको नाम स्मरण करेहैं ओर स्मरण करावेंहैं सो हे राजन् ! मनुष्यनमें भाग्यसहित ओर कृतार्थ निश्चयहैं) यह वचनतें या कालमें श्रीकृष्णको स्मरण करे सो बड़भागीहे ओर यह जगतमें संसारकी विस्मृति कर्तव्य हे काहेतें जो जहांताँई जगतमें देहसंबंधी अनेक पदार्थ कुटुंब, घर इत्यादिकमें मन लागीरह्योहे तहांताँई श्रीकृष्णके चरणमें न लगे तातें जगतकी विस्मृति राखे ओर प्रपंचको यह जाने जो सर्वके श्रीकृष्णही कारणहे तातें प्रपंच देखि श्रीकृष्णको माहात्म्य विचारे जो प्रपंचके कर्ता ओर संहारकर्ता प्रभुहीहे याभांति प्रपंचके कारण श्रीकृष्णहीको स्मरण कर्तव्य हे ॥ १ ॥ श्रीकृष्णमें भाव होय यह प्रयत्न सर्वथा करे ओर श्रीकृष्णके चरणारविंदमें भावनाके अर्थ गृहादिककी अहंता ममताकी विस्मृति करे एसो यत्न करे श्रीकृष्णमें भाववृद्धि करे ताको ग्रहणकरे ओर या भावमें बाधक होय ताको त्याग करे सगरी क्रिया श्रीकृष्णहीके अर्थ करे ताकरि गृहादिककी विस्मृति होय ॥ २ ॥

मूलं—अथवा बाधकत्वेन त्यागभावनया पुनः ।

अखण्डाद्वैतभावेन कामाद्यावेशतो हरौ ॥ ३ ॥

प्रापंचिकपदार्थेषु लीलासृष्टित्वभावनात् ।

शब्दार्थः—अथवा (गृहादिकनमें) बाधकपनेतें त्यागकी भावना करि फिर अखंड (शुद्ध) 'अद्वैतकी भावना करिके, हरिमें 'कामादिकके आवेशतें, ॥ ३ ॥ ओर प्रपंचके सगरे पदार्थनमें लीला सृष्टिपनेकी भावनातें गृहादिककी विस्मृति होय ॥ टीका ॥ श्रीकृष्णकी सेवामें स्त्रीपुत्रादिक तथा देश बाधक होय तो ताको त्याग करिवेकी मनमें भावना करे ओर श्रीकृष्णको अखंड अद्वैत [सबठोर सबोंपर श्रीकृष्णही विराजतहैं याभांति] जानि सबठोर श्रीकृष्णहीकी भावना करे ओर कामादिकको आवेश प्रभुमें करे जेसैं लौकिक संसारी कामादिकको आवेश गृह कुटुंबादिकनमें करि तामें अष्टप्रहर मचत रहेहैं तेसैंहि वैष्णव श्रीठाकुरजीकी सेवामें मच्यो रहे, जो अब यह बागा चाहियें, यह सामग्री यह उत्सव आवतहे यामें यह चाहियें, याभांति मन श्रीकृष्णहीमें लगावे ॥ ३ ॥ यह प्रपंचके पदार्थमें लीलासृष्टिकी भावना करे तामें मुख्य विचार यहहे जो श्रीकृष्णकी सेवामें जो पदार्थ विनियोग होय सो स्वरूपात्मक जाने जो श्रीकृष्णही लीलासंबंधीहे ओर जो पदार्थ सेवामें उपयुक्त न होय सो मायासंबंधी आसुरीहे याभांति विचार मनमें राखे ॥

मूलं—कृष्णसन्निहितो देशः कालः सत्संगहेतुकः ॥ ४ ॥

द्रव्यं सर्वस्वमेवात्र कर्ताऽभिमतिवर्जितः ।

मंत्राः श्रीकृष्णनामानि गुणलीलासमन्विताः ॥ ५ ॥

१ यह सर्व जगत् भगवद्रूपहे एसो भाव होय सो शुद्धाद्वैत भाव जाननो.

२ श्रीभागवतमें कहाहे जो काम, क्रोध, मय, स्नेह, ऐक्य ओर सख्य सदा प्रभुमें राखत हे सो तन्मयताको प्राप्त होत हे.

३ यह जगत् प्रभुको श्रीठाकुराई हे तासों सगरे पदार्थ लीला संबंधीहे.

मूलं-कर्माणि कृष्णसेवैव सर्वसाधनसंग्रहः ।

एतच्छृङ्गस्य भक्तौ हि सत्संगः साधनं मतम् ॥६॥

शब्दार्थः—जहां श्रीकृष्ण विराजत होय सो देश १, सत्संगको कारणरूप सो काल २, ॥ ४ ॥ अपनो सर्वस्व सोही द्रव्य ३, जहां कर्त्ता अभिमानरहित ४, श्रीकृष्णके नाम सो गुणलीलायुक्त मंत्र ५, ॥ ५ ॥ सर्वसाधनके संग्रहरूप श्रीकृष्णकी सेवा सोही कर्म ६, भक्तिमार्गमें (देश, काल, द्रव्य, कर्त्ता, मंत्र और कर्म) यह पदपदार्थके साधन-रूप सत्संगहे ॥ ६ ॥ टीका—जहां श्रीकृष्ण विराजतहे सो उत्तमते उत्तम देश जाननो, ओर भगवदीयको संग होय सोहि काल परम उत्तम जाननो । सो प्रथमस्कंधमें शौनक कहेहैं “ तुलयाम लवेनापि न स्वर्गं नापुनर्भवम् । भगवत्संगिसंगस्य मर्त्यानां किमुताशिपः ” (भगवानके संगिभक्तके संगके एक लव वरावरि न स्वर्गकों के नही मोक्षकों तुलना करतहैं तहां मनुष्यनकी आशिप जो राज्यादिक सो कहातैं इनकी वरावरिमें होय ?) यावाक्यतें स्वर्ग तथा मोक्षपर्यंत सुखहू सत्संगके समान नाहीहे । तातें सत्संग होय सो काल उत्तम जाननो ॥ ४ ॥ ओर द्रव्यादिकमें सगरो पदार्थ घर आदि सब आयगयो सो सर्वस्व जाननो ओर मेंही सर्व वस्तुको कर्त्ताहूं यह अभिमानकरि रहित होय द्रव्यमें ममत्व ओर सबकार्यमें अपनेकों कर्त्ता जाने यह दोउ बाधकहे तातें ममत्व अहंकार छोडे ओर सगरे मंत्रमें श्रीकृष्णको नामहे सोहि सर्वोपरि महामंत्र जाने (जेसैं “ श्रीकृष्णः शरणं मम ” ओर प्रभुके अनेक गुणहे अनेक लीलाहे ओरनके गुणगानतें श्रीकृष्णहीको गुणगान मुख्यहे तिनकी भावना करे सो महामंत्रहे । सो अष्टमस्कंधमें शुक्राचार्य कहेहे “ मंत्रतस्तत्रत-शिद्धं देशकालार्हवस्तुतः । सर्वं करोति निश्छिद्रं नामसंकीर्तनं तव ”

(मंत्रसों, तंत्रसों, देश, काल और द्रव्यसों जो अपूर्ण रह्यो होय सो सर्व तुम्हारे नामको कीर्तन पूर्ण करतहे) याभांति श्रीकृष्णको नाम लियो सो सर्वमंत्र करिचूक्यो सो श्रीगुसांईजी कहेहैं “ हरे त्वन्नामनिर्व्यक्तिं याह श्रुतिरहं सदा । गृणामि यद्यदा नाथ ! तत्तथैवास्तु नान्यथा ” (हे हरे ! आपके नामको अर्थ जो वेद कहतहे इनको ही मैं जासों सदा उचारुं तासों हे नाथ ! सो तेसेही होउ अन्यथा मतिहोउ, श्रीकृष्णको नाम सर्ववेदश्रुतिको सारहे सो श्रीकृष्णकी कृपाहीतें लियो जाय अन्यथा नांही, तातें मंत्रही श्रीकृष्णको नामहे ॥ ५ ॥ श्रीकृष्णकी सेवाहे सोहि उत्तमोत्तम कर्महे जहां श्रीकृष्णकी सेवा करि तहां सर्व साधन करिचूक्यो सो अष्टमस्कंधमें ब्रह्मा कहेहे “ यथाहि स्कंध-शाखानां तरोर्मूलावसेचनम् । एवमाराधनं विष्णोः सर्वेपामात्मनश्च हि (जेसैं वृक्षकी जड़में जल सींचे तो सब डार पात हरे होय तेसेही श्रीकृष्णकी सेवातें सर्वलोक संतुष्ट होय) तातें सगरे कर्ममें मुख्य सर्व साधनके संग्रहरूप श्रीकृष्णकी सेवाहीहे यह पद पदार्थ हृदयमें धरे तो सप्तम धर्मी श्रीकृष्ण सदा हृदयमें रहे कबहू बाहिर न जाय श्रीकृष्ण, श्रीजी, सातो स्वरूप, बलभकुल जहां विराजे सो सर्वोपरि उत्तम-देश जाने १, जा घडि सत्संग होय सोहि सुंदरकाल जाने २, द्रव्यादिक प्रभुमें विनियोग होय सोहि उत्तम जाने ३, कर्त्ताको अभिमान त्याग करे ४, श्रीकृष्णको नाम सर्वोपरि जाने श्रीकृष्णकी लीला सोई सर्वोपरि जाने श्रीकृष्णकी लीला सोहि सर्वोपरि गुणजाने

१ हरिको अर्थ सर्वदुःखहर्चाहे सो श्रुति कहेहे तासों में नाम लियोकरुं तेसोहि नामको अर्थ होउ अर्थात् सर्व दुःख दूर करो. २ वृक्षके मूलमें जल नांही सींचे ओर डारपातमें नोहोत जल सींचे तो व्यर्थ श्रम होय । काहेतें जो डारपातको प्राप्त न होय उलटो बिगार होय तेसैं प्रभुको छोडि ओरनको आराधन करे सो कुछ फलरूप न होय औरहु फल न मिले.

५, समस्तकर्ममें श्रीकृष्णकी सेवा सोई सर्वोपरि कर्म जाने ६, यह पद पदार्थ सर्वोपरिहे सो जवामिले तव पुष्टिमार्गीय भगवदीयको संग होय येहि साधनहे ओर दूसरो साधन नांही तातें सत्संग भयो तव सर्व साधन करिचूक्यो ॥ ६ ॥

मूलं—कृष्णसान्निध्यदेशे तु यतस्तिष्ठन्ति साधवः ।

कालः प्रसंगहेतुस्तु मिलितैस्तैरुदेति हि ॥ ७ ॥

शब्दार्थः—जासों श्रीकृष्णकी सान्निधिके देशमें साधु पुरुष रहतहे तासों सत्पुरुषनके मिलिवेतें सत्संगके कारणरूप काल उदितहोतहे ॥ ७ ॥ टीका—पुष्टिमार्गीय भगवदीय श्रीकृष्णके सान्निध्यदेशमें रहतहें जहां श्रीकृष्ण विराजतहें तहां भगवदीयहू दर्शनसेवार्थ रहतहे तहां कालको सामर्थ्य नांही चलतहे तातें जहां श्रीगोवर्द्धननाथजी, सातो स्वरूप, श्रीवल्लभकुलको मंदिर होय तहां भगवदीय मिले तव सर्वकार्य सिद्ध होय उपर देशकी तथा कालकी उत्तमता कही सोय होय ॥ ७ ॥

मूलं—सर्वस्वस्योपयोगोऽपि सिद्ध्येत्सद्बुद्धिदातृभिः ।

अभिमाननिवृत्तिस्तु तदाश्रयवतामिह ॥ ८ ॥

शब्दार्थः—सुंदर बुद्धिके देवेवारे भगवदीयनतें सर्वस्वको उपयोगहू सिद्ध होय तातें द्रव्यकी उत्तमता भई ओर इनके आश्रयवारेनकों अभिमानकी निवृत्ति ईहां होय सो कर्त्ताकी उत्तमता भई ॥ ८ ॥ टीका—एसे प्रभु ओर भगवदीय जहां विराजतहे तहां सर्व पदार्थको उपयोग सिद्ध होतहे सर्व तादृशीयनके संगतें सुंदर बुद्धि होतहे प्रभुको आश्रय सिद्ध होय तव अज्ञानकरि अभिमान भयो हे सो निवृत्त होतहे तथा भगवदीयको आश्रय करे तो सब सिद्ध होय ॥ ८ ॥

मूलं—कृष्णनामस्वरूपादिज्ञानं तु तत एव हि ।

भगवत्सेवनं वापि पुरुषार्थस्तदैव हि ॥ ९ ॥

शब्दार्थः—श्रीकृष्णके नाम तथा स्वरूपादिकको ज्ञानहू तासोंही होय यह मंत्र सिद्ध भयो ओर पुरुषार्थरूप श्रीकृष्णकी सेवाहू तवही होय यह उत्तम कर्म सिद्ध भयो एसें भक्तिमार्गमें देश, काल, द्रव्य, कर्ता, मंत्र, कर्म, यह पदपदार्थकी सिद्धिके उपाय तीन श्लोकसों कहे ॥ ९ ॥ टीका—श्रीकृष्णके नामको ओर श्रीकृष्णके स्वरूपको ज्ञान होय तब श्रीकृष्णकी सेवाको परमपुरुषार्थरूप फलरूप सर्वोपरि जाने सो जब प्रभु कृपा करे तबही जान्यो जाय ताहींतें सिद्धांतमुक्तावलीमें कहतहें “कृष्णसेवा सदा कार्या मानसी सा परा मता” श्रीकृष्णकी सेवा सदा करे फलरूप जानि मन लगायकें करे तब श्रीकृष्ण प्रसन्न होय अपने स्वरूपानंदको अनुभव करावे तब मानसी सिद्ध होय तातें परम पुरुषार्थरूप जानि भगवत्सेवा करनी ॥ ९ ॥

मूलं—यदा तथाविधाः संतो दृश्यन्ते सेवनोद्यताः ।

अतः सत्संग एवास्मिन् मार्गे सर्वस्य साधनम् ॥ १० ॥

शब्दार्थः—जब तेसैं सत्पुरुष सेवनमें तत्पर देखिवेमें आवे तब उपर लिखे पदपदार्थ सिद्ध होय तासों यह पुष्टिमार्गमें तो सत्संगही सर्वको साधनहे ॥ १० ॥ टीका—उपर कहे सो सब श्रीकृष्णकी सेवामें उद्यत (तत्पर) एसें भगवदीय मिले तब सर्व सिद्ध होय प्रभु कृपाकरे अब श्रीहरिरायजी कहतहें जो हमारे यह पुष्टिमार्गमें तो सत्संगही सर्वोपरि निश्चय साधन हे ताहींतें नवरत्न ग्रंथमें श्रीआचार्यजीमहाप्रभुजी कहेहें, “निवेदनं तु स्मर्त्तव्यं सर्वथा तादृशैर्जनैः” (सर्वथा निवेदन तो तादृशीय जनसों मिलिकें स्मर्त्तव्य हे) तातें भगवदीयको संग करनी ॥ १० ॥

मूलं-तदभावे सर्वथैव न किञ्चिदिह सिद्ध्यति ।

तस्मात्प्रयत्नः कर्त्तव्यः सत्संगात् सुबुद्धिभिः॥११॥

शब्दार्थः-सत्संगको अभाव होय तो सर्वथा यहमार्गमें कुछ सिद्ध न होय तासों सुंदरबुद्धिवारेनकू सत्संगके अर्थ प्रयत्न कर्त्तव्यहे ॥११॥ टीका-उपर कहे ऐसे भगवदीयको भावसहित संग भयेंतें सर्व सिद्ध होय ऐसे तदीयके संगविना किञ्चित्दू सिद्ध नांही होय तातें सर्वथा प्रयत्नकरिकें भगवदीयको सत्संग कर्त्तव्यहे। सत्संग करे सोहि वैष्णव सुबुद्धिहे सो एकादशस्कंधमें भगवान् कहेहैं “न रोधयति मां योगो न सांख्यं धर्म उद्धव !। न स्वाध्यायस्तपस्त्यागो नेष्टापूर्त्त न दक्षिणा ॥१॥ व्रतानि यज्ञाश्छंदांसि तीर्थानि नियमा यमाः । यथावरुंधे सत्संगः सर्वसंगापहो हि माम्” (मोकों योग वशनांही करतहे न सांख्य धर्म, हे उद्धव ! न स्वाध्याय, तप, दान, न कृपारामादिक, न दक्षिणा, ॥ १ ॥ व्रत, यज्ञ, वेद, तीर्थ, नियम, यम, यह कोउ वश्य नांही करतहे जेसो. सर्वसंगकी निवृत्ति करिवेवारो सत्संग मोकों वश्य करतहे) या-भांति अनेक साधनकरि भगवान् नांही वश्य होतहैं जेसैं सत्संगकरि वश्यहे तातें सत्संगको यत्न सर्वथा पुष्टिमार्गीयको कर्त्तव्यहे ॥ ११ ॥

मूलं-अत एवोक्तमाचार्यैर्हरिस्थाने तदीयकैः ।

“अदूरे विप्रकर्षे वा यथा चित्तं न दुष्यति”॥१२॥

शब्दार्थः-तासोंही श्रीआचार्यजीमहाप्रभुजी भक्तिवर्द्धिनीग्रंथमें कहेहैं हरिके स्थानमें भगवदीयनके संग समीपमें अथवा दूरमें जेसैं चित्त दोषयुक्त न होय तेसैं रहेनो ॥ १२ ॥ टीका-हमारे श्रीआचार्य-जीमहाप्रभु भक्तिवर्द्धिनीमें कहेहैं “अतः स्येयं हरिस्थाने तदीयैः सह तत्परैः । अदूरे विप्रकर्षे वा यथा चित्तं न दुष्यति” तासों हरिस्थानमें भगवद्धर्मपर तंदीयनकी साथ समीपमें अथवा दूरमें चित्त दोषयुक्त न

होय तेसैं रहेनो यहवाक्यसों हरिस्थान जहां श्रीठाकुरजी विराजत होय तहां तदीय भगवदीयसों मिलिकें सेवा करे जामें चित्तमें कोई दोष न होय याभांति रहे, वोहोत निकटमें चित्तको दोष होय तो नेक दूरि रहे जामें दर्शन सेवा नित्य वने चित्तमें दोष न होय याभांति भगवदीयसों मिलिके हरिस्थानमें रहे ॥ १२ ॥

मूलं—चित्तदोषे कथं सेवा चेतस्तत्प्रवणं भवेत् ।

अतो विचारः कर्त्तव्यः सर्वथैकत्र वासकृत् ॥१३॥

शब्दार्थः—चित्तमें दोष होय तब तत्प्रवणचित्तरूप सेवा कैसे होय तासों सर्वथा एकस्थलमें (हरिस्थानमें भगवदीय होय तहां) वास होय एसो विचार कर्त्तव्यहे ॥ १३ ॥ टीका—जब चित्तमें अनेक भांतिके दोष उत्पन्न होय तब सेवा काहेकी सो श्रीआचार्यजीमहाप्रभुजी सिद्धांतमुक्तावलिमें कहेहैं “चेतस्तत्प्रवणं सेवा तत्सिद्धयै तनुवित्तजा” (प्रभुमें एकाग्र चित्त होय सो सेवा मानसी ताकी सिद्धिके अर्थ तनुजा तथा वित्तजा सेवाहे) तनुजा वित्तजा सेवा मनलगायकें करे तब मानसी सिद्ध होय, जेसैं नदीको प्रवाह रात्रिदिन धारा अहर्निश एकरस चलतहे तेसैंही वैष्णवको चित्त अहर्निश एकरस भगवत्सेवामें लाग्यो रहे तब मानसी सेवा सिद्ध होय तनुजा वित्तजा करतमें जब चित्त दुष्ट होय तब आगें मानसी फलरूप कहांतें सिद्ध होयगी तातें श्रीआचार्यजीके वचनामृतको विचार करे ॥ १३ ॥

मूलं—बुद्ध्या विचार्य मत्प्रोक्तं निधाय हृदि सर्वथा ।

स्वार्थसंपत्तये कार्यो वास एकत्र तत्परैः ॥ १४ ॥

शब्दार्थः—मेनें कल्यो सो बुद्धितें विचारिकें सर्वथा हृदयमें स्थापन करि स्वार्थकी प्राप्तिके अर्थमें तत्पर (भगवदीय) के संग एकत्र वास

करनो ॥१४॥ टीका-एकांतमें बैठिकें अपनी बुद्धितें विचारकरे तामें विचार न होय तो भगवदीयके संग विचार करे सो श्रीआचार्यजी-महाप्रभुजी भक्तिवर्द्धिनीमें कहेहैं “बाधसंभावनायां तु नैकांते वास इष्यते । हरिस्तु सर्वतो रक्षां करिष्यति न संशयः” (बाधकी संभावना होय तो एकांतमें वास नांहीं करनो हरि तो सबनतें रक्षा करेंगे संशय नांहीं) यह वाक्यसों श्रीमहाप्रभुजीके वचनामृतकों विचार हृदयमें सर्वथाही कर्तव्यहे । तहां कोई कहे जो अनेक सुखदुःख आवे तहां कोन प्रकार करे तहां श्रीमहाप्रभुजी कहेहैं जो हरि भगवान् सर्वथा अपने भक्तनकी रक्षा करेंगे तातें यह चिंता सर्वथा न करे एकांतमें बैठिकें अपनी सुंदरबुद्धितें अपने चित्तमें विचार नित्य करे सेवादर्शनके समय सेवादर्शन करे ओर अनोसरमें एकांतमें भगवदीयसों मिलिकें विप्रयोगसो लीलासंवंधी विचार करे या भांति वैष्णव रहे तो सगरे कार्य सिद्ध होय ॥ १४ ॥

इति श्रीहरिरायजीकृतं त्रिंशत्तमं शिक्षापत्रं
श्रीगोपेश्वरजीकृतव्रजभाषाटीका-
समेतं समाप्तम् ॥ ३० ॥

शिक्षापत्र ३१.

अब एकत्रिंशत् शिक्षापत्रमें साक्षात् तथा परंपरासों वरण दोय-प्रकारकोहे तामें लीलास्थभक्तनमें साक्षात् ओर आधुनिक भक्तनमें (श्रीआचार्यजीद्वारा) परंपरा वरणहे । लीलास्थभक्तनमें ह्नु श्रुतिरूपामें साक्षात् ओर अभिकुमार (ऋषिरूपा)में परंपरा [श्रीमर्यादापुरुषोत्तम-

द्वारा] वरणहे सो आत्मीयपनेसों ओर दासपनेसों दोयप्रकारकोहे तामें अवतारदशामें आत्मीयपनेसों ओर अनवतारदशामें दासपनेसों वरणहे दासपनेमें मर्यादा ओर पुष्टि दोय भेदहे तामें मर्यादारीतिसों वरणमें साधननिष्ठातें फलहे ओर पुष्टिमें अनुग्रहतें फल हे. पुष्टिमें मर्यादापुष्टि ओर पुष्टिपुष्टि यह दोय भेद हे । अपने तो श्रीआचार्यजीके अनुग्रहतें मर्यादासहित पुष्टिमें अंगीकृत भयेहें तासों श्रीआचार्यजीमहाप्रभुजीकी आज्ञारूप मर्यादाहे सो अपनकों हितकारिणीहे अपने प्रभु पुष्टिपुरुषोत्तमहे सो यहलोक ओर परलोक संबंधी सगरी (भक्तनकी) चिंता करतहें तासों निश्चित रहेनो यह मार्गमें श्रीभगवानकी आर्ति करि सेवा, गुणगान, कथाश्रवणादिक कियेतें मुख्यफल प्राप्त होय ओर आर्तिविना न्यूनफल होय तासों आर्ति सदा राखनी सो आर्ति कैसे सिद्ध होय ? ताके लिये साधन बतायेहे यह निरूपणहे । उपर कहे जो हरिस्थानमें भगवदीयके संग स्थित होय सेवा करे ओर एकांतमें बैठिके चित्तमें विचार करे तहां अपने मनमें साधनकी भावना न करे यह मार्ग निःसाधन फलात्मकहे सो आगे कहतहें—

मूलं—निःसाधनफले मार्गे बलं नैवोपयुज्यते ।

साधनानामतो नायमात्मेत्येषोदिता श्रुतिः ॥१॥

शब्दार्थः—निःसाधनके फलरूप यहमार्गमें साधनको बल उपयोगि नांहीहे तासों श्रुतिमें कछो हे जो यह आत्मा प्रवचन आदितें प्राप्त नांही होत हे, जिनको प्रभु वरण करतहें तिनतें लभ्य हे ॥ १ ॥ टीका—यहपुष्टिमार्ग साधनसाध्य नांही हे कृपा साध्यहे अपनो बलकरि कोटानकोटि साधन करे ताकरि सिद्धि नांहीहे तासों श्रुतिमें साधनको निषेध कहेहें “नायमात्मा प्रवचनेन लभ्य इ०” यह परमात्मा प्रवचनसों, बुद्धिसों, ओर बहुत सुनेतें प्राप्त नहीं होयहे, किंतु परमात्मा जाको

वरण करेहे सो प्राप्त करसकेहे यातें प्रभुके वरण विना ओर साधनके बलतें प्रभुप्राप्ति यहमार्गमें नाहींहे ॥ १ ॥

मूलं—किंतु सर्वस्य मूलं हिं हरेर्वरणमुच्यते ।

यथैव वृणुते कृष्णस्तथा तिष्ठति वै जनः ॥ २ ॥

शब्दार्थः—किंतु हरिको वरणहे सो सर्वको मूल कह्योहे श्रीकृष्ण जेसो वरण करतहें तेसो जन रहतहे ॥ २ ॥ टीका—पुष्टिमार्गमें यह मिद्धांतहे जो सर्वको मूलःपुष्टिमार्गको फल सो हरिके वरणतें होतहे जीवके साधनसाध्य नाहीं हे जेसो जा जीवको भगवान् वरण करे तेसो वह जीव पुष्टिमार्गमें स्थित होतहे तातें जीवके साधनसाध्य नाहीं हे तामें भगवान् दोय प्रकारको वरण करतहें सो आगे कहतहें ॥ २ ॥

मूलं—वरणं तु द्विधा साक्षात्पारंपर्याविभेदतः ।

लीलास्थितेषु वै साक्षादन्येष्वस्ति परंपरा ॥ ३ ॥

शब्दार्थः—साक्षात् ओर परंपरा यह भेदसों दोय प्रकारको वरण हे । लीलास्थितभक्तनमें साक्षात् वरण हे ओर अन्यमें परंपराहे ॥ ३ ॥ टीका—वरण दोय प्रकारकोहे एक साक्षात् एक परंपरा यह दोय भांतिके भेदहे श्रीकृष्णकी लीलास्थितमृष्टिमें साक्षात्हे अन्यमें परंपराहे ॥ ३ ॥

मूलं—आचार्यद्वारकं तत्र वरणं न हरेः स्वतः ।

लीलास्थेष्वपि भक्तेषु वृतेर्द्वौविध्यमीक्ष्यते ॥ ४ ॥

साक्षाच्छ्रुतिषु हरिणा वरणं वह्निसूनुषु ।

परंपराप्रकारेण मर्यादापुरुषोत्तमात् ॥ ५ ॥

शब्दार्थः—श्रीआचार्यजीद्वारा हरिको वरण हे सो स्वतः नाहींहे परंपरासोंहे लीलास्थित भक्तनमेंहू वरणके दोयप्रकार देखिवेमें आवतहे

॥४॥ श्रुतिरूपामें हरिनें साक्षात् वरण कियोहे ओर अग्रिकुमार [ऋषि-
रूपा] में परंपराकरि मर्यादापुरुषोत्तम (श्रीरामचंद्रजी) द्वारा वरण हे
॥ ५ ॥ टीका—श्रीआचार्यजीद्वारा जाजीवको वरणहे सो स्वतः नांहीहे
श्रीकृष्णकी लीलामृष्टिके भक्तनको वरणहू दोयप्रकारकोहे साक्षात्हू हे
ओर परंपराहू हे ॥ ४ ॥ श्रीकृष्णावतारमें श्रुतिरूपाको वरणहे सो
साक्षात् भगवान् आपुने कियोहे ओर अग्निसूनु जो सोरह हजार
अग्रिकुमार तिनको वरण परंपरा मर्यादापुरुषोत्तम श्रीरामचंद्रजीद्वाराहे
याभांति लीलामृष्टिमेंहू साक्षात् ओर परंपरा वरण हे ॥ ५ ॥

मूलं—अन्यथाप्यत्र भेदोऽस्ति दासतात्मीयतादिभिः ।

आत्मीयत्वेनावतारे दासत्वेनान्यदा वृत्तिः ॥ ६ ॥

शब्दार्थः—दूसरी रीतिसोंही वरणमें दासता ओर आत्मीयतासों
भेदहे । अवतारदशामें आत्मीयतासों वरणहे ओर अनवतारदशामें
दासतासों वरणहे ॥ ६ ॥ टीका—साक्षात् ओर परंपरा यह दोय भेद
विना वरणके दूसरे दोय भेदहे एक आत्मीय ओर एक दासभाव.
अवतारदशामें भगवानको संबंधी होय तब वरण होय सो आत्मीय
ओर अवतारदशामें दासभाव होय ॥ ६ ॥

मूलं—दासत्वेऽप्यस्ति भेदो हि मर्यादापुष्टिभेदतः ।

अतो न जीवस्वातंत्र्यं दासत्वाद्धि निसर्गतः ॥ ७ ॥

शब्दार्थः—दासपनेमेंहू मर्यादा तथा पुष्टि यह भेदसों दोय भेदहे
तासों स्वभावतेंही जीवको दासत्वहे तातें स्वतंत्रता नांहीहे ॥७॥ टीका—
दासभावमें दोय रीतिहे एक मर्यादा ओर एक पुष्टि यह दोय भेदहे
दासत्वधर्म जीवमें स्वभावतेंहैं तातें जीव स्वतंत्र नांहीहे दासत्वधर्मतें

१ श्रुतिनको साक्षात् श्रीकृष्णसो वर प्राप्त भयोहे सो कथा बृहद्भामनपुराणमें प्रसिद्धहे.

२ अग्रिकुमारनको श्रीरामचंद्रजीसों वर प्राप्त भयोहे सो कथा रामायणमें प्रसिद्ध हे.

मांगे सर्व सिद्ध करेंगे आर्तके बंधु (दीनबंधु) श्रीगोकुलेश्वर (श्रीकृष्ण) अपने जनकी उपेक्षा न करेंगे तहां कोईकहे जो प्रभु स्वतंत्रहैं कर्तुं अकर्तुं अन्यथाकर्तुं समर्थ हैं सो जब इनकी विपरीत इच्छा होय तब प्रार्थना करे के न करे तहां कहतहैं ॥ १२ ॥

**मूलं-हरीच्छा विपरीताऽपि दासदुःखावलोकनात् ।
अनुकंपानिधानत्वाद्धरेर्विपरिवर्तते ॥ १३ ॥**

शब्दार्थः-हरिकी इच्छा विपरीत होय तोहू दासके दुःखको देखिवेतें तथा हरि कृपानिधानहे तातें विपरीत होतहे अर्थात् विपरीत इच्छा होय सो अनुकूल होतहे ॥ १३ ॥ टीका-हरिकी इच्छा विपरीत देखिवेमें आवे सो अज्ञानकरि विपरीत देखतहे जेसैं नारदजीकों व्याहकी इच्छा भई तब भगवान् न करनदिये तब नारदजी वोहोत दुःख पाये तब भगवान् न कृपाकरि समझाय दुःख दूरिकियो तेसैं जीव लौकिक चाहना राखे सो भगवान् न करनदे तब अज्ञान करि दुःख माने अथवा प्रभुकी विपरीत (दुःख देवेकी) इच्छा होय तोहू दुःख सहन करे जेसैं प्रह्लादकों हिरण्यकशिपुने वोहोत दुःख दीयो सो प्रह्लाद प्रभुकी इच्छामानि सहे पाछें प्रभु दैत्यकों मारि दुःख दूरि कियो तेसैंही प्रभु विपरीत ईच्छा परीक्षार्थ करे तो सहन करे तब प्रभु सर्वके आत्माहे सो बिनाकहे आपुहीतें जानतहैं सो दासको दुःख देखिकें आप हृदयमें दयायुक्तहैं सो जाभांति दासको मनोरथहे ताभांति प्रभु आपु प्रवृत्त होतहैं जाभांति दासको सुख होयगो सोई आप करेंगे ॥ १३ ॥

**मूलं-आर्त्तिमात्रमतः स्थाप्यं प्रार्थना न विधीयताम् ।
कृपालुरेव भविता निजार्त्तजनशर्मदः ॥ १४ ॥**

साधनको बल न ल्यावे निःसाधन होय यह जाने जो प्रभु कृपा करेंगे तबही मेरो कार्य होयगो या भांति सवठोर सर्वकार्यमें प्रभुको अनुग्रहही देखे अपने तो अनुग्रहरूप श्रीआचार्यजीने पुष्टिमें मर्यादासहित अंगीकृत कियेहे सो आगे कहतहैं ॥ ९ ॥ श्रीगुसांईजी सर्वोत्तममें श्रीआचार्यजीमहाप्रभुजीके नाम कहेहैं “ अंगीकृतौ समर्यादः (अंगीकारमें मर्यादासहित) यह वाक्यतें पुष्टिमार्गीय समस्त जीव-नको अंगीकार आपने स्वतः मर्यादासों कियोहे तातें श्रीआचार्यजी महाप्रभुजीकी जो उक्तिहे ता प्रमाण स्थिति करे तामें हितहे ॥ १० ॥

मूलं—पुष्टिप्रभुत्वादस्माकं लौकिकी पारलौकिकी ।

सर्वा चिंता हररेव निश्चिन्तत्वं विभाव्यताम् ॥ ११ ॥

शब्दार्थः—अपनी यहलोकसंबंधी तथा परलोकसंबंधी सगरी चिंता पुष्टिप्रभुपनेतें हरिकोंही हे तासों निश्चितपनो विचारनो ॥ ११ ॥ टीका—हमारे प्रभु पुष्टहे तातें पुष्टिमार्गीय वैष्णवनकी लौकिक वैदिक चिंता हरेंगे यह मनमें निश्चय जानि निश्चितताकी भावना राखे चिंता भगवद्भावमें बाधकहे ॥ ११ ॥

मूलं—अत एवोक्तमाचार्यैर्निजेच्छातः करिष्यति ।

नोपेक्षते निजानार्त्तबंधुः श्रीगोकुलेश्वरः ॥ १२ ॥

शब्दार्थः—तासोंही श्रीआचार्यमहाप्रभुजीने नवरत्नग्रंथमें कह्योहे जो अपनी तथा अपने भक्तनकी इच्छातें प्रभु करेंगे तासों दिनबंधु श्रीगोकुलेश्वर अपने भक्तनकी उपेक्षा नांही करतहैं ॥ १२ ॥ टीका—उपर कहे ताभांति निश्चित होय प्रभुकी इच्छा जानें सो नवरत्नग्रंथमें श्रीआचार्यजीमहाप्रभु कहेहैं “ सर्वेश्वरश्च सर्वात्मा निजेच्छातः करिष्यति ” प्रभु श्रीकृष्ण केसेहैं सर्वके आत्माहैं ओर सर्वके ईश्वर सर्वोपरिहे सर्वके अंतःकरणकी जानतहैं अपनी निज इच्छातें विना-

स्थित रहे ताकों यह पुष्टिमार्गको फल निश्चय होय तहां कोई कहे जो वेदशास्त्रमें अनेक साधन कहेहैं ताकरि फल कहेहैं ओर तुम साधनतें फल नांही कहे प्रभुकी कृपातें कहे सो कहा? तहां कहतहे ॥ १५ ॥ यह पुष्टिमार्गकी क्रियाको भाव न जानि केवल साधनजानि सेवा करे तो श्रीकृष्णकी सायुज्यरूप मुक्ति होय अनेक साधन कियेतें फल मुक्ति होय तातें यह पुष्टिमार्गको मुख्य फलसंबंध कबहू न होय यह निश्चय जाननो ॥ १६ ॥

मूलं-तदार्तिप्राप्तिरेतेषां तद्रूपाचार्यसेवनात् ।

तत्कृपातस्तदुदितंवचोवृंदविचारणात् ॥ १७ ॥

निवेदनानुसंधानात् सदा सत्संगसंभवात् ।

अन्यथा न भवेदेवं स्वकृतानंतसाधनैः ॥ १८ ॥

शब्दार्थः—उपर कही आर्त्तिकी प्राप्ति विप्रयोग अग्निरूप श्री-आचार्यजीके सेवनतें, इनकी कृपातें, इनके वचनामृतके समूहके विचारतें, ॥ १७ ॥ निवेदनके अनुसंधानतें, ओर सदा सत्संग होय तब होय अन्यथा अपने किये अनंत साधन करि नांही होय ॥ १८ ॥ टीका—विप्रयोगात्मक यह पुष्टिमार्गीय आर्त्तिकी प्राप्तिके अर्थ विप्र-योगाग्निरूप श्रीवल्लभाचार्यजीके चरणकमलकी (अत्यंत प्रीतिसों) सेवा करियें जब श्रीआचार्यजीमहाप्रभुजीके वचनामृत सुबोधिनीजी निबंध आदि छोटे बड़े ग्रंथको विचार अहर्निश करियें तब श्रीआचार्य-जीकी कृपातें आर्त्ति होय ॥ १७ ॥ निवेदनको अनुसंधान अष्टप्रहर राखे सदा पुष्टिमार्गीय भगवदीयके संग नित्य नियमपूर्वक निवेदनको विचार करे तब आर्त्ति होय ताहीतें नवरत्नमें श्रीआचार्यजी कहेहैं “ निवेदनं, तु स्मर्त्तव्यं सर्वथा तादृशोर्जनेः ” (तादृशीय वैष्णवनके संग सर्वथा निवेदनको स्मरण कर्त्तव्य हे,) ताकरि आर्त्ति

शब्दार्थः—तासों आर्तिमात्र राखनी प्रार्थना नांही करनी अपने आर्तजनकों सुख देवेवारे प्रभु कृपालुही होयंगे ॥ १४ ॥ टीका—यह पुष्टिमार्गमें आर्तिमात्र कर्त्तव्य हे जो मोसों प्रभुकी सेवा टहल नांही वनत मनुष्यजन्म सगरो योंही वीति गयो या भांति आर्ति करे ओर लौकिक अलौकिक कछुफलकी प्रार्थना न करे काहेतें जो श्रीकृष्ण तो परम कृपालु हैं तातें अपने जनकी आर्ति देखिकें कृपा करेहें सो निरोधलक्षणमें श्रीआचार्यजी महाप्रभु कहेहें “ क्लिश्यमानान् जनान् दृष्ट्वा कृपायुक्तो यदा भवेत् । तदा सर्वं सदानंदं हृदिस्थं निर्गतं वहिः” यहवचनतें विरह आर्तिरूप क्लेशसंयुक्त अपने जनकों देखिकें प्रभु कृपायुक्त होतहें सो सर्वप्राणिमात्रके हृदयमें सदा आनंदरूप भगवान् हैं सो प्रकट होय अपने दासकों सुख देतहें तातें आर्ति यह पुष्टिमार्गमें मुख्यहे सो आर्ति कोनप्रकार करे सो आगे कहतहें ॥ १४ ॥

मूलं—आत्यैव क्रियते यत्तु सेवागुणकथादिकम् ।

तदैवास्मत्प्रभूक्तेऽस्मिन् मार्गे प्रविशति ध्रुवम् ॥ १५ ॥

अन्यथा क्रियमाणं तु कृष्णसायुज्यसाधकम् ।

न मुख्यफलसंबन्धस्ततो भवति निश्चितम् ॥ १६ ॥

शब्दार्थः—आर्तितेही जो सेवागुणकथादिक होतहे सोही अपने प्रभुने कहाो यह पुष्टिमार्गमें निश्चय प्रविष्ट होतहे ॥ १५ ॥ अन्यथा कियो सोतो श्रीकृष्णके सायुज्य साधिवेवारोहे तासों मुख्यफलको संबन्ध नांही होतहे यह निश्चयहे ॥ १६ ॥ टीका—आर्तिकरि भगवत्सेवा करे, वाणीतें गुणगान करे, संयोगमें संयोगके पद, अनोसरमें त्रिप्रयोगके पद गान करे, श्रवणतें श्रीमुखोधिनी आदि कथा सुने, मनंकरिकें श्रीकृष्णकी लीलाको स्मरण करे, याभांति पुष्टिमार्गमें वैष्णव

मूलं—म्लेच्छानामिव गायत्री ततःश्रवणतः किमु ।

तत्सधर्मास्तत्रवर्णा अनुभावतिरोहिताः ॥ २१ ॥

शब्दार्थः—जैसे म्लेच्छके मुखमें गायत्री होय इनके श्रवणतें कहा फल होय काहेतें जो इनके मुखकी गायत्रीमें अनुभाव (दैवीप्रभाव) रहित उन म्लेच्छकेवरोवर अक्षर होतजातहैं ॥ २१ ॥ टीका—जैसे म्लेच्छके मुखतें गायत्री सुनेतें कछु फल नांही होतहे उलटो वाधकहे काहेतें जो उह आसुरको दुष्ट धर्महे वा दुष्टके संगतें गायत्रीके वर्ण जो अक्षरहे तामें आध्यात्मिक और आधिदैविक दोउको तिरोधान हो-यजाय केवल आधिभौतिक रहे तेसेहि अवैष्णवके मुखतें सुनिकें कथा वार्त्ता फलरूप न होय उलटो वाधक होय जैसे गंगाजल सुंदरहे परंतु नीचज्ञाति (चमार चांडालादिक)के पात्रमें होय तो उह जलके संगतें प्रायश्चित्त करना पड़े जो छुवे तो न्हानो पड़े याभांति पात्रभेदहे ॥ २१ ॥

मूलं—अतः फलं न श्रवणादोषः प्रत्युत जायते ।

सावधानतमैः स्थैर्यमीदृक्श्रवणकीर्तनात् ॥ २२ ॥

शब्दार्थः—तासों (अवैष्णवके मुखतें) कथावार्त्तादिक श्रवणतें फल नांहीहे उलटो दोष होतहे तातें एसके मुखतें श्रवण ओर कीर्त्तनतें वोहोत सावधान होयके रहनो ॥ २२ ॥ टीका—एसो दुष्ट बहिर्मुख अन्यमार्गीय होय ताके मुखतें भगवद्धर्म सुनेतें कछु फल न होय प्रत्युत दोष होयवेसुं प्रायश्चित्त करना पड़े तातें पुष्टिमार्गीय वैष्णव सब तुम सावधान रहियो जों पुष्टिमार्गमें स्थित होय मार्गके अनुसार क्रिया करत होय याभांति सुंदर पात्र देखिकें ताके मुखतें श्रवण कीर्त्तन करे तो भक्तिमार्गमें प्रवेश होय यह पुष्टिमार्ग महादुर्लभ हे अब पुष्टिमार्गीय भगवदीयके लक्षण कहतहैं ॥ २२ ॥

होय ओर प्रकार कोटानकोटि साधन करे परंतु आर्त्ति सिद्ध न होय जब आर्त्ति न भई तब फलकी आशा काहेकों करे ॥ १८ ॥

मूलं—ये भावं वर्द्धयंत्येव दृढं वचनवर्षणैः ।

संगोऽपि तेषां कर्त्तव्यो नान्येषामिति निश्चयः॥१९॥

शब्दार्थः—जो भगवदीय वचनकी वृष्टि करिकें दृढ भावकी वृद्धि करे इनको संगहू करनो ओरनको संग न करनो यह निश्चयहे ॥ १९ ॥ टीका—उपर कहे ताप्रकार भावकी वृद्धि करे श्रीआचार्यजीके श्रीसुबोधिनीजी निबंधादिक छोटेबड़े ग्रंथहे तिनहीकों मन लगायकें सुनावे वचनकी वर्षा करे तिनको संग करे लौकिक वैदिकमें मन न लगावे आपुही ग्रंथको पाठ करे तो आर्त्ति सिद्ध होय यह निश्चयहे ॥ १९ ॥

मूलं—तद्दुर्लभत्वे बाधिर्यं मूकत्वं वा वरं मतम् ।

वाचःप्रभूणां वदने दुर्जनानां भवंति न ॥ २० ॥

शब्दार्थः—एसे भगवदीय दुर्लभ होय तब बाधिरपनो ओर मूकपनो उत्तमहे काहेतें जो दुर्जनके मुखमें प्रभुके गुणगानकी वाणी नांही होय ॥ २० ॥ टीका—उपर कहे एसे भगवदीयनको संग होनो तो या कालमें वोहोत दुर्लभहे तातें ओर साधन न बने तो मूक होय रहे तथा वहेरो होय रहे लौकिकमें न काहूकी सुने न काहूकों कुछ कहे यह या कालमें श्रेष्ठ मतहे अपने प्रभुके मुखतें निकसे एसे वचनामृत दुर्जनके मुखमें होय नांही तातें वाके मुखकी वाणी सुनिवेमें फल नांही तातें दुष्टजनको संगहू न करे उनकी वाणीहू न सुने दुर्जन (वहिर्मुख) भगवद्वाक्ता भगवत्कथा करे सो भगवदीय अन्यमार्गीयके मुखतें सर्वथा न सुने उह कोन भांति बाधक हे सो कहतहें ॥ २० ॥

कियो ताकरि यहलोक ओर परलोकके सर्वकार्यमें हम निश्चितहैं
इत्यादि वचनों विचारि श्रीमहाप्रभुजीके शरण होय अष्टाक्षरकी
भावना करे तो निश्चय सगरे कार्य होय ॥ २४ ॥

मूलं-तथा विधेयं कृपया यथा गोवर्द्धनेश्वरः ।

दर्शयत्यचिरादेव निजं रूपं तदाश्रितैः ॥ २५ ॥

शब्दार्थः-इनके आश्रित भक्तनकों तेसैं कर्तव्यहे जेसैं श्रीगोवर्द्धन-
नाथजी कृपाकरिकें शीघ्रहीं दर्शन देय ॥ २५ ॥ टीका-यह सगरो
भगवद्धर्म उपर कहे सो कब होय ? जब श्रीगोवर्द्धननाथजी कृपा करे
तब होय अपने आश्रित जानि अपने निजपर प्रसन्न होयकें स्वरूपको
दान करे तबही सर्वकार्य सिद्ध होय सो यहमार्ग साधनसाध्य नांहीहे
कृपासाध्य हे जेसैं गिरिराजके संबधतें पुलिंदीपर कृपा करि तेसैं
श्रीआचार्यजी-महाप्रभुजीके संबधतें श्रीजी कृपा करे तब सर्व सिद्ध
होय ॥ २५ ॥

इति श्रीहरिरायजीकृतमेकत्रिंशत्तमं शिक्षा-

पत्रं श्रीगोपेश्वरजीकृतव्रजभाषा-

टीकासमेतं समाप्तम् ॥ ३१ ॥

शिक्षापत्र ३२.

अब द्वात्रिंशशिक्षापत्रमें कामादिदोषविशिष्टके हृदयमें भगवान्
कबहू प्रवेश नांही करतहैं ओर दीनतादियुक्तके हृदयमें क्षणमात्रमें प्रभु
प्रवेश करतहैं सो निरूपणहे । उपर कहे जो श्रीजीकी कृपा होय तब

मूलं-निरपेक्षाः कृष्णजना निजाचार्यपदाश्रिताः ।

श्रीभागवततत्त्वज्ञा दुर्लभा एव भूतले ॥ २३ ॥

अतः शरणमात्रं हि कर्त्तव्यमखिलं ततः ।

यदुक्तं तातचरणैरिति वाक्याद्भविष्यति ॥ २४ ॥

शब्दार्थः—निरपेक्ष, अपने श्रीआचार्यजीके चरणारविंदके आश्रय-
वारे, ओर श्रीभागवतके तत्त्वकों जानिवेवारे ऐसे जन भूतलमें दुर्लभ
हीहे ॥ २३ ॥ तासों शरणमात्रही कर्त्तव्यहे तातें (श्रीगुसाईजी विज्ञ-
प्तिमें कहेहैं जो तातचरण श्रीमहाप्रभुजीने कह्योहे जो श्रीकृष्ण मेरे
आश्रयस्थानहैं ताकरि हम निश्चितहैं) यह वाक्यसों सर्व होयगो ॥ २४ ॥
टीका—पुष्टिमार्गीय भगवदीय केसो होय जाकों कछु अपेक्षा नांही
होय हृदयमें पूर्णकाम होय लौकिक वैदिक कछुहू चाहना नहोय
चतुष्टय मुक्तिपर्यंत चाहना न होय एसो निरपेक्ष होय ओर एक श्री-
कृष्णको दास होय अन्यदेव तथा प्रभुके अन्यअवतार तिनसवनमेंतें
एक श्रीकृष्णमें अनन्य भाव होय ओर अपने श्रीआचार्यजीमहाप्रभु-
जीके चरणकमलको आश्रय मनमें दृढ होय ओर श्रीभागवतको तत्त्व
जो श्रीसुबोधिनीजी निबंधको ज्ञान होय ऐसे भगवदीय मिले तिन-
हीको संग कर्त्तव्यहे याकालमें ऐसे भगवदीय मिलने परम दुर्लभ हैं
तातें ऐसे भगवदीय न मिले तो अन्यको संग मति करियो ॥ २३ ॥ जो ऐसे
भगवदीय न मिले तो शरणमंत्र अष्टाक्षर महामंत्र (श्रीकृष्णः शरणं
मम) याको जप करे शरणकी भावना करे ताहीकरि सकल कार्य
सिद्ध होयगो सो शरणमंत्रहू श्रीआचार्यजीद्वारा शरण आवे तब सिद्ध
होय सो श्रीगुसाईजी विज्ञप्तिमें कहेहैं “यदुक्तं तातचरणैः श्रीकृष्णः
शरणं मम । तत एवास्ति नैश्चित्यमैहिके पारलौकिके” श्रीगुसाईजी कह-
तहैं जो हमारे तातचरण श्रीआचार्यजीमहाप्रभुजीने उक्तनाममंत्र प्रकट

न रहें, ओर धनके उपायमें परायणहे अपनो धर्म (वैष्णवता) धनके लिये जतावतहे धनके लिये अनेक वार्त्ता करे अष्टप्रहर धनहीमें मन राखे तिनके हृदयमें भगवान् न रहे ॥ १ ॥

मूलं-दयाविरहिते रूक्षे नित्यं संतोषवर्जिते ।

शोकाकुले भयक्रांते विषयध्यानतत्परे ॥ २ ॥

शब्दार्थः—दयाकरिकें रहित, स्नेहरहित, नित्य संतोष जामें नांहीहे शोककरि आकुल, भयकरि आक्रांत ओर विषयके ध्यानमें तत्पर ऐसे हृदयमें प्रभु न पधारें ॥ २ ॥ टीका—दयाकरि रहितहे अनेक जीवनके हिंसकहे काहूकों दुःख देखिकें प्रसन्न रहतहे रंचक दया मनमें नांही हे तिनके हृदयमें प्रभु न रहें, स्नेहकरि जे रहितहे भगवदीय वैष्णवमें जिनको रंचकहू स्नेह नांहीहे कितनी भगवद्भार्त्ता सुने परंतु रंचकहू भगवद्रस हृदयमें द्रवीभूत न होय ऐसे रूखेके हृदयमें भगवान् न रहें, नित्य संतोषकरिकें रहितहे अष्टप्रहर, हाय हाय यह कार्य न भयो आजु तो कछु न कमायो अब केसें काम चलेगो या भांति सदा संतोषकरि रहितहे तिनके हृदयमें भगवान् स्थित न होय, सदा शोककरि व्याकुल रहे स्त्री पुत्रादिकके शोक अथवा गृहादिकमें शोक जो केसें निर्वाह होयगो याभांति बालपनेतें वृद्धपर्यंत शोकहीं करि व्याकुल रहे, सदा भयकरि हृदयमें कंपायमान रहे जो राजडर, कालडर, चोरादिकको डर, ज्ञातिसंवंधी देहसंवंधीको डर, इत्यादिक लौकिक भयको हृदयमें आवेश रहे ताके हृदयमें भगवान् कबहू न रहें, विषयादिकके साधनमें तत्पर रहे देहसों विषय नांही सिद्ध होय तब मनमें अनेक विचार करे कोउ मोकों वैष्णव जाने तो आछो खानपान होय, आछो कपडा पहरिवेको मिले एसो विचार करे परस्त्रीके मिलवेको विचार करे वह प्राप्त न होय तो दुःख पावे एसें

सर्वकार्य सिद्ध होय सो पंचपर्वी अविद्याको नाश होय विद्या सिद्ध होय तब श्रीकृष्ण भगवान् हृदयमें विराजे सो अविद्या पंचश्लोककरि कहतहैं ओर विद्याहू पंचश्लोककरि कहतहैं एसे यहशिक्षापत्रमें दश-श्लोक हे अब प्रथम अविद्याको प्रकार कहतहैं काहेतैं जो अविद्या जाय तब विद्या हृदयमें आवे जेसे श्रीकृष्णावतारमें श्रीकृष्णने भक्तनकी अविद्या दूरिकरि तब हृदयमें निःप्रपंच विद्या स्थित भई सो श्रीसुबोधिनीजीमें वर्णनहे ताके अनुसार श्रीहरिरायजी वर्णन करतहैं-

मूल-कामाविष्टे क्रोधयुते संसारासक्तिसंयुते ।

लोभाभिभूते सततं धनार्जनपरायणे ॥ १ ॥

शब्दार्थ:-कामकरि आविष्ट, क्रोधयुक्त, संसारमें आसक्तिसंयुक्त लोभकरि व्याप्त, निरंतर धन संचयकरिवेमें तत्पर, ऐसे हृदयमें कबहू हरि प्रवेश नाहीं करतहैं एसे पंचश्लोकमें अन्वयहे ॥१॥ टीका-अविद्याके इतने दोष जाके हृदयमें होय ताके हृदयमें भगवान् कबहू स्थित न होय कामादिक विषयमें आवेश होय सो श्रीआचार्यजीमहाप्रभुजी संन्यासनिर्णयमें कहेहैं “ विषयाक्रांतदेहानां नावेशः सर्वथा हरेः ” (विषयकरि व्याप्त देहवारेनके हृदयमें सर्वथा हरिको आवेश नाहींहोयहे) इत्यादि वचनतैं कामकूंदुष्ट जाननों कामावेश न होय और हृदयमें क्रोध भरयो रहे सो तो चांडालको स्वरूपहे जहां चांडालरूप क्रोध हृदयमें होय तहां भगवान् केसे हृदयमें आवे तातैं क्रोध बाधकहे यह लौकिक-संसारमें देहसंवंधि कुटुंब, घर इनहींके भरणपोषणमें अष्टप्रहर आसक्त हे तिनके हृदयमें भगवान् नाहीं आवे और लोभकरि भरे हे द्रव्यादिककेलिये विश्वासघात चोरिकरतहे द्रव्यहीकों सर्वस्वपदार्थ जान्योहे अष्टप्रहर कोडि जोरिवेमें मनहे देहसंवंधीमें लोभहे एसेंके हृदयमें भगवान्

सीनाई आसक्त होय ताके हृदयमें भगवान् न रहें ॥ ४ ॥ टीका-
लौकिककार्यमें सन्मुख रहे अष्टप्रहर मिथ्याक्रिया, मिथ्याध्यान, मिथ्या-
भाषण, ऐसे लौकिकमें मग्न रहे ताके हृदयमें भगवान् न रहे, श्री-
कृष्णके जन भगवदीयते विमुख रहे भगवदीयकी निंदा करे भग-
वदीयकों दुःख देय ऐसेके हृदयमें भगवान् न रहें, श्रीकृष्णकी लीला
आनंदमय निदोषहे जेसे भगवान् श्रीकृष्ण आप निदोष आनंदमयहैं
तेसी लीलाहे तामें दोषदृष्टि जो प्रभु कामादिदोषकरि परस्त्रीके वश्यहैं
याभांति दोषदृष्टिवारेके हृदयमें भगवान् न रहे, ओर कर्मजड जो
कर्ममार्गमें तत्पर प्रभुकी सेवा छोडि कर्महीकों मुख्य जानि श्राद्धा-
दिक संध्यादिकमें तत्पर रहे भगवद्धर्ममें प्रीति नाहीं ऐसेके हृदयमें
भगवान् न रहे. ॥ ४ ॥

मूलं-आचार्यविमुखे नित्यमसदादविभूपिते ।

एतादृशे तु हृदये हरिर्नाविशते क्वचित् ॥ ५ ॥

शब्दार्थः-श्रीआचार्यजीतें विमुख ओर नित्य खोटे वादकरि भूपित
एसे हृदयमें कबहू हरि नाहीं प्रवेश करतहैं ॥ ५ ॥ टीका-पुष्टिमार्गके
सर्वोपरि श्रीआचार्यजी श्रीवल्लभाचार्यजीहैं तिनके चरणकमलतें
विमुख ऐसेके हृदयमें श्रीकृष्ण न रहे, सुंदर भगवत्कथा भगवद्भार्ता
इत्यादिकके विदूषकहे खोटे वाद करे लौकिकवार्तामें प्रसन्न होय
एसेके हृदयमें भगवान् न रहें, यहउपर द्वाविंश अविद्याके दोषवरणे
हैं सो जाके हृदयमें रहे ताके हृदयमें श्रीकृष्ण कबहू न आवे
भगवदावेश कबहू न होय तातें वैष्णवकों यह द्वाविंशदोषतें रहित
रहेनो यहदोषतें डरपत रहेनो अव जागुणतें वैष्णवके हृदयमें श्रीकृष्ण
विराजे सो कहतहैं ॥ ५ ॥

विषयके ध्यानमें तत्पर रहे ताके हृदयमें भगवान् न रहें ॥ २ ॥

मूलं—अहंकारयुते क्रूरे दुष्टपक्षैकपोषके ।

ज्ञानमार्गस्थिते सर्वसाम्यचितनभाविते ॥ ३ ॥

शब्दार्थः—अहंकारयुक्त, क्रूर, दुष्टके पक्षकोंही मुख्य पोषण करे, ज्ञानमार्गमें रहे, ओर सर्वदेवसमान प्रभुकों जानि एसो चितन करे तिनके हृदयमें भगवान् न पधारें ॥ ३ ॥ टीका—अहंकारयुक्त रहे जो मो समान दूसरो कोउ नांहीहे में बहुत समुझतहों मेरेमें बड़ी वैष्णवताहे में सेवास्मरण बहुत करतहों में अनेक मनोरथ करतहों में सगरे कुटुंबको पालन करतहों मेरे सगरे आज्ञाकारीहे इत्यादि मनमें अहंकार राखे ताके हृदयमें भगवान् न रहे, क्रूर हृदय होय परायो बुरोहि विचारे मनमें येही विचार रहे जो मेरो दाव परेगो तो दुःख देंहंगो याभांति क्रूर दृष्टि रहे टेडो रहे वांकोही बोल्योकरे एसे क्रूरके हृदयमें भगवान् न रहे, कोई दुष्ट कार्य (चोरी, अन्याय, काहूको बुरो) करे ताको पक्षपात करे ताके हृदयमें भगवान् न रहें, ज्ञानमार्गमें स्थित होय तामें स्वामिसेवकभाव नांहीहे सर्वगुण युक्त भगवानके स्वरूपको ज्ञान नांहीहे भगवानकों निराकार जानतहे ताके हृदयमें, भगवान् न रहे भगवानकों ब्रह्मा, महादेव, गणेश, इंद्र, इत्यादिक देवतासमान चिंतन करे तासों सवनको समान आश्रय करे सवनसों फलकी चाहना करे याभांति अन्याश्रय करे ताके हृदयमें भगवान् न रहे ॥ ३ ॥

मूलं—लौकिके सन्मुखे कृष्णजनवैमुख्यसंयुते ।

कृष्णलीलादोषदृष्टौ तथा कर्म जडेऽपि च ॥४॥

शब्दार्थः—लौकिकमें सन्मुख, श्रीकृष्णके जन (वैष्णव) सों विमुखतायुक्त, श्रीकृष्णकी लीलामें दोषदृष्टि होय तथा कर्ममें जडकी-

मूलं-ब्रजस्त्रीचरणांभोजरेणुप्राप्त्यभिलाषुके ।

गुणगानपरे कृष्णनामार्थपरिभावुके ॥ ७ ॥

शब्दार्थः—अपने ब्रजभक्तनके चरणारविंदके रजकी प्राप्तिमें इच्छायुक्त, गुणगानमें तत्पर, (श्रीकृष्ण) यहनामको अर्थ (फलात्मक) हे ताके यथार्थ भावयुक्त ऐसे हृदयमें प्रभु क्षणमें पधारें ॥ ७ ॥ टीका— ब्रजभक्तनके चरणकमलकी रेणुकी प्राप्तिमें निशदिन अभिलाषा रहे जो मोकों ब्रजभक्तनके चरणकमलकी रज कब प्राप्त होयगी येही मनोरथ मनमें रहे जैसे उद्धवजी भ्रमरगीतके अध्यायमें कहेहैं “आसामहो चरणरेणुजुषामहं स्यां वृंदावने किमपि गुल्मलतापधीनाम् । यादुस्त्यजं स्वजनमार्थपथं च हित्वा भेजुर्मुकुंदपदवीं श्रुतिभिर्विमृग्याम् ॥ वंदे नंदब्रजस्त्रीणां पादरेणुमभीक्ष्णशः । यासां हरिकथोद्गीतं पुनाति भुवनत्रयम् ” (यह ब्रजभक्तनके चरणारविंदकी रजको सेवन करिवेवारे जो श्रीवृंदावनमें गुल्म, लता ओर औषधि (तामस, राजस, ओर सात्त्विक) हे तामें मैं कुछ होऊं, जो ब्रजभक्त काहूतें त्याग न होय ऐसे अपने जन [संबंधीवर्ग] ओर वेदमार्गकों छोड़िकें श्रुतिनकें खोजिवे- योग्य श्रीकृष्णकी पदवीकों भजत भये (सो आप श्रुतिरूपाहे तासोंही भजतहे) ॥ श्रीनंदरायजीके ब्रजकी स्त्रीयनके चरणारविंदकी रजकों में बारंवार वंदन करतहों जिनको भगवत्कथाको उद्गीत (परचक्ष्यतासों भयो एसो गान) तीनलोककों पवित्र करतहें) इत्यादिक वचनके भाव विचारे ताके हृदयमें श्रीकृष्ण विराजे, श्रीकृष्णकी लीलासंबंधी गुणगान करे सो द्वादशस्कंधमें शुकदेवजी कहेहैं “कलेदौपनिधे राजन्नस्ति त्वको महान्गुणः । कीर्तनादेव कृष्णस्य मुक्तबंधः परं ब्रजेत् ” [हे राजन्

१ ब्रजभक्तनके चरणकमलकी रजकी अभिलाषा लिखि सो सन्यासनिर्णयमें एष्टिमार्गके गुरु कौंडिण्यकृपि ओर ब्रजभक्तहैं, एतें लिख्योहे याही अभिप्रायसों हे.

मूल-दीने शुद्धे निःप्रपंचे लीलाचिंतनतत्परे ।

स्वाचार्यशरणे नित्यं सर्वकामविवर्जिते ॥ ६ ॥

शब्दार्थः-दीन, शुद्ध, प्रपंचरहित, श्रीकृष्णकी लीलाके चिंतनमें तत्पर, स्वाचार्यके दृढ आश्रययुक्त, ओर नित्य सर्वकामकरि वर्जित ऐसे हृदयमें भगवान् तत्क्षण प्रवेश करतहैं ॥ ६ ॥ टीका-दीन होय कोउ कछु कहे निंदाकरे तोह सहिलेय सो श्रीगुसांईजी विज्ञप्तिमें कहेहैं “आचार्यचरणैरुक्तं दैन्यं त्वत्तोषसाधनम्” (श्रीआचार्यजी महाप्रभुजी श्रीसुबोधिनीजीमें कहेहैं जो प्रभु प्रसन्न करिवेको साधन एक दैन्य-हीहे) तातें दीन होय ताके हृदयमें भगवान् विराजें, ओर शुद्ध-हृदय होय मनमें कपट छल न होय शुद्धभावतें प्रभुको भजन स्मरण करे ताके हृदयमें भगवान् विराजे, लौकिक प्रपंचादिकतें रहित होय काहू देहसंबंधीमें मन न लगावे एक प्रभुमें मन लगावे कछु प्रपंचमें आसक्ति न करे ताके हृदयमें प्रभु विराजे, श्रीकृष्णकी लीला आनंद-रूप वाललीला, दानलीला, रासलीला, इत्यादि अनेक लीलाहे तिनके चिंतनमें तत्पर रहे सो निरोधलक्षणमें श्रीआचार्यजीमहाप्रभुजी कहेहैं “गुणेष्वविष्टचित्तानां सर्वदा मुरवैरिणः” भगवानके गुण चित्तमें प्रविष्ट होय तब हृदयमें अनेक दोष मुर दैत्यरूपहे तिनसब अपने वैरीको नाम सुनि निवृत्त होय तातें लीलामें जिनको चित्त तत्पर रहे तिनके हृदयमें प्रभु विराजतहैं, अपने पुष्टिमार्गके आचार्य श्रीबल्लभाचार्य-जीके चरणको आश्रय अहर्निश चित्तमें रहेसो श्रीसर्वोत्तमजीमें नामहैं “अशेषभक्तसंप्रार्थ्यचरणाब्जरजोधनः” याभांति श्रीआचार्यके चरण-कमलकी रज अपनो सर्वस्व धन जिनने जान्योहे तिनको श्रीकृष्णाध-रामृतास्वादसिद्धिहे तिनके हृदयमें श्रीकृष्ण विराजें, ओर लौकिक वैदिक देहसंबंधी सर्वकामकरि वर्जितहे प्रभुविना कहुं मनकी आसक्ति नाहीहे ऐसे अनन्य वैष्णवके हृदयमें प्रभु विराजतहे ॥ ६ ॥

स्मरण, श्रीकृष्णहीकी कथाको श्रवण, श्रीकृष्णकोही गुणगान, मन वचन कर्मकरि पुष्टिमार्गके धर्ममें अनन्य होय सो हारितस्मृतिमें कहेहे “अनन्यशरणा ये तु तथैवानन्यसाधनाः । अनन्यभोगभोगा ये ते तु सर्वेऽधिकारिणः ॥ नान्यं देवं नमस्कुर्यान्नान्यं देवं निरीक्षयेत् । नान्यप्रसादमद्याच्च नान्यदायतनं व्रजेत्” (अनन्य आश्रयवारे, तेसेही अनन्य साधन करिवेवारे ओर अन्यदेवको प्रसाद नांही लेयवेवारे एसे भक्त [भक्तिमार्गमें] अधिकारीहे ॥ अन्यदेवकों नमस्कार न करे, अन्यदेवको नांही देखे, अन्यको प्रसाद नांही ले. अन्य-देवके स्थानमें नांही जाय) एसे अनन्य होय ताके हृदयमें श्रीकृष्ण विराजें, तथा अनन्य पुष्टिमार्गीय जे वैष्णवहे तिनमें पूर्ण निष्ठाकरि उनभगवदीयनको संग करे उनकी सेवा करे सो भगवदीय गायेहैं “एक भरोसो ब्रजभक्तनको दूजो नंदकिशोरको ” ओर भक्तिवर्द्धिनीमें श्रीआचार्यजीमहाप्रभुजी कहेहैं “अतः स्येयं हरिस्थाने तदीयैः सह तत्परैः” (तासों भगवत्परायण भगवदीयनके संग हरिस्थानमें (भगवन्मंदिरमें अथवा मंदिरकी पास, रहेनो) प्रभुके स्थानमें तदीयके संग तत्पर रहे ताके हृदयमें प्रभु विराजें, ओर भगवद्धर्ममें रति होय यहपुष्टिमार्गके धर्ममें प्रीति होय ओर साधनादिमें मन न लगावे सो नवरत्नग्रंथमें श्रीआचार्यजीमहाप्रभुजी कहेहैं “पुष्टिमार्गस्थितो यस्मात्साक्षिणो भवताखिलाः । सेवाकृतिगुरोराज्ञा बाधनं वा हरीच्छया” याभांति गुरुकी आज्ञाप्रमाण पुष्टिमार्गमें स्थितहोय सेवा करे ओर प्रभुकी ईच्छातें गुरुकी आज्ञाको बाध होय तामें तथा संसारादिकमें साक्षिवत् रहे जैसे जलमें कमल रहे याभांति भगवद्धर्ममें रति होय ताके हृदयमें प्रभु विराजें, ओर लौकिकतें विरक्त होय सर्व प्रभुको समर्पण करिदेय सो श्रीआचार्यजीमहाप्रभुजी

दोषके निधिरूप कलियुगको एक बड़ो गुणहे जो श्रीकृष्णके कीर्तन-
 सोंही मुक्त बंध होयके परपुरुष (श्रीकृष्ण) को प्राप्त होय] इत्यादि
 वचनते गुणगान करें ताके हृदयमें प्रभु विराजे, कीर्तन न आवे तो
 श्रीकृष्ण यह नामको अर्थ विचारिके अनुभव करे सो पष्ठस्कंध श्रीभा-
 गवतमें कहेहैं “ अज्ञानादथवा ज्ञानादुत्तमश्लोकनाम यत् । संकीर्तितमघं
 पुंसां दहेदेधो यथानलः ॥ नामोच्चारणमाहात्म्यं हरेः पश्यत पुत्रकाः ।
 अजामिलोऽपि येनैव मृत्युपाशादमुच्यत ” (विष्णुदूत यमदूतको कहतहैं
 जो अज्ञानते अथवा ज्ञानते उत्तम श्लोक [भगवान्] को नाम आछी
 रीतिसों [आर्तियुक्त होयके] जो लियो सो अमिकाष्ठको दहे तैसें
 पुरुषके पापको दहतहे । यमराजा अपने दूतनको कहतहे जो हे पुत्र !
 हरिके नामके उच्चारको माहात्म्य देखो जाकरिकेही अजामिलद्व
 मृत्युके पाशते मुक्तभयो) ओर अष्टमस्कंधमें कहेहैं “ ते सद्भाग्या
 मनुष्येषु कृतार्था नृप ! निश्चितम् । स्मरन्ति स्मारयन्तीह हरेर्नाम कलौ
 युगे ” (हे राजन् जो यह कलियुगमें हरिके नामको आप स्मरण
 करतहे ओर दूसरेको स्मरण करावतहे सो मनुष्यनमें सुंदर भाग्यवारे
 ओर कृतार्थ (पूर्ण) निश्चयहे इत्यादि वचनते श्रीकृष्णके नामके
 अनुभवते ही भगवान् हृदयमें विराजतहैं ॥ ७ ॥

मूल—अनन्येऽनन्यसेवैकनिष्ठातत्परतां गते ।

भगवद्धर्मनिरते विरक्ते गुणसंगिनि ॥ ८ ॥

शब्दार्थः—अनन्य भावयुक्त, अनन्य भक्तकी सेवाकी मुख्य
 निष्ठामें तत्परताको प्राप्त भये, भगवद्धर्ममें प्रीतियुक्त, विरक्त ओर
 भगवद्गुणके संगयुक्त (ऐसे हृदयमें प्रभु पधारें) ॥ ८ ॥ टीका—एक
 श्रीकृष्णहीमें. अनन्य भाव होय श्रीकृष्णहीकी सेवा करे, श्रीकृष्णको

विषयादिकके संगतें, बुद्धि चलायमान न होय ऐसे पुष्टिमार्गमें दृढ होय ताकें हृदयमें प्रभु पधारें, ओर श्रीकृष्णकी नानाप्रकारकी लीलारसमें अति चंचल (क्षणक्षणमें लीलारसमें मग्न) होय सो सिद्धांतमुक्तावलिमें श्रीआचार्यजीमहाप्रभुजी कहेहैं “चेतस्तत्प्रवणं सेवा” यह मानसीसेवा जो चित्त एकाग्र [नदीके प्रवाहकी नाई] अहर्निश प्रभुकी लीलामें रहे याभांति जाको चित्त प्रभुकी लीलामें चंचल होय ताके हृदयमें प्रभु पधारे, ओर श्रीकृष्णके दर्शनकेलिये मन बारंवार व्याकुल होय सो श्रीभागवतएकादशस्कंधमें जनकराजा कहेहैं “दुर्लभो मानुषो देहो देहिनां क्षणभंगुरः । तत्रापि दुर्लभं मन्ये वैकुण्ठप्रियदर्शनम्” (जीवकों क्षणभंगुर मनुष्यदेह दुर्लभहे तामेंहूं भगवानके प्रिय [भक्त] को दर्शन दुर्लभ जानूहूं) ऐसैं मनुष्यके देहकों दुर्लभ ओर क्षणभंगुर जानि तामेंहूं भगवद्भक्तको दर्शन दुर्लभ जानि भगवानके दर्शनमें व्याकुल होय सो भाव कुंभनदासजीकोहे जो एक दर्शनके अंतरायमें गाये “किते दिन बहेजु गये विनुदेखे” ऐसी आर्ति दर्शनमें होय ताके हृदयमें प्रभु पधारे ॥ ९ ॥

मूल—मनोरथशताक्रांते सर्वोदासीन्यसंयुते ।

एतादृशे तु हृदये हरिराविशते क्षणात् ॥ १० ॥

शब्दार्थः—श्रीकृष्णकी सेवामें अनेक मनोरथयुक्त ओर लौकिक-वैदिकमें औदासीन्ययुक्त (लौकिकवैदिकमें आसक्तिरहित) ऐसे हृदयमें तो क्षणमें प्रभु पधारें ॥ १० ॥ टीका—जेसैं ब्रजभक्त श्रीठाकुरजीको सुखदानार्थ नानाप्रकारके मनोरथ करते वागा, वस्त्र, आभूषण, सामग्री [तन-मन-धनसों] प्रभुकों समर्पते सर्वात्मभाव प्रभुमें हतो तेसैंहि पुष्टिमार्गमें श्रीवल्लभकुल श्रीकृष्णको सर्वस्व विनियोग करावतहैं तातें

सिद्धांतरहस्यमें कहेहैं “ तस्मादादौ सर्वकार्ये सर्ववस्तुसमर्पणम् ”
 याभांति जो वैष्णव पहिलेही सर्वकार्यमें भगवानको सर्ववस्तु
 समर्पि विरक्त होयरहे ताके हृदयमें प्रभु विराजें, ओर भगवानके
 गुणको संग करे, इनके गुणको गान करे, इनको स्मरण करे तिनके
 हृदयमें प्रभु विराजें ॥ ८ ॥

मूलं—कृष्णार्तिभावसंयुक्ते सरसेऽन्यरसातिगे ।

अचंचले कृष्णलीलाचंचले दर्शनाकुले ॥ ९ ॥

शब्दार्थः—श्रीकृष्णकी आर्ति तथा भाव करिकें युक्त, भक्तिके रस
 सहित, अन्यधर्मके रसकों उलंघित, भगवद्धर्ममें स्थिर, श्रीकृष्णकी
 लीलाकरि चंचल (विकल जेसो) ओर श्रीकृष्णके दर्शनमें आकुल
 ऐसे हृदयमें प्रभु क्षणमें पधारें ॥ ९ ॥ टीका—श्रीकृष्णमें आर्तिभयेतें
 प्रभु कृपा करे सो निरोधलक्षणमें श्रीआचार्यजीमहाप्रभु कहेहैं “ क्लिश्य-
 मानान् जनान् दृष्ट्वा कृपायुक्तो यदा भवेत् । तदा सर्वं सदानंदं हृदिस्थं
 निर्गतं बहिः ” यह बचनतें भगवान् भक्तनको आर्तिक्लेशयुक्त देखिकें
 कृपायुक्त होय सर्वके आनंददाता हृदयतें बाहिर प्रकट होय दर्शन देय
 अपनो अनुभव करावें तातें आर्तितो यह पुष्टिमार्गको फलहे जहां आर्ति
 तहां प्रभु पधारें, श्रीकृष्णमें भाव निवेदनतें होय जेसैं लौकिकमें स्त्रीको
 व्याह होय तव पतिमें भाव होय जो यह मेरो पति हे तेसेही श्रीआचार्य-
 जीद्वारा निवेदन भयो तव श्रीकृष्णमें भाव होय श्रीकृष्णहीको सर्वस्व
 जाने यह भाव होय तव भगवान् हृदयमें पधारें, भगवत्स्वरूपरसमें सरस
 होय ओर अन्यमार्गीय रस तथा विषयादिक रसकरि रहित होय एक
 पुष्टिमार्गमें श्रीकृष्णाधरामृताम्बादरसकों चाहे ऐसे वैष्णवके हृदयमें प्रभु
 पधारें, अंचल [गंभीरबुद्धि] होय, अन्य मार्गीयके संगतें, दुष्टके संगतें,

ओर इनके निबंध, श्रीसुबोधिनी, ओर पोटशग्रंथको अवलोकन करनो तथा दुःसंगतें दूर रहेनो ताकरिकें सगरे दोष निवृत्त होय यह निरूपणहे। ऊपर विद्या अविद्याके प्रकार कहे सो ब्रजभक्तनको हू प्रभुनेही अविद्याकी निवृत्ति करि विद्या सिद्धकिये तब भये, भक्तनको सामर्थ्य नांहीहे प्रभुहीं सामर्थ्य दियो तब रासपंचाध्यायीमें सगरे प्रतिबंधकों तोडिकें प्रभुपास आये अनुभव भयो तेसेही इहां पुष्टिमार्गमें जब प्रभु कृपा करे तबही फल होय सो आगे कहतहे—

**मूलं—अस्मिन् मार्गे प्रभोरिच्छामात्रं सर्वत्र कारणम्।
सैव चावरणं यावत् प्रतिकूल फले निजे ॥१॥**

शब्दार्थः—यह पुष्टिमार्गमें सर्वकार्यमें मात्र प्रभुकी इच्छा कारणहे सोही जबताँई अपने फलमें प्रतिकूल होय सो आवरणहे ॥१॥ टीका—हमारे श्रीबलभाचार्यजीके पुष्टिमार्गमें श्रीकृष्णकी इच्छाही सर्वकार्यमें कारणहे सो इच्छा जबताँई प्रतिकूलहे अपनो फल देयवेमें विलंबकी इच्छाहे तबताँई आवरणहे तातें ब्राह्मण, क्षत्रिय, वैश्य, शूद्र, कोउ वर्ण होय तथा हीनजाति म्लेच्छ, चांडाल, मलाह, इत्यादिक होय सर्व धर्मकरि रहित होय तिनको फल देवेकी इच्छा होय तो एसेहू यह पुष्टिमार्गमें शरण आवे ओर फलको निश्चय पावे ओर जाको फलदेवेमें प्रतिकूल इच्छाहे सो यह पुष्टिमार्गके धर्मकरि रहित होय तिनको फल नांही होय तातें प्रभुकी इच्छाही मुख्यहे सो वार्त्तामें प्रसिद्धहे जो अलीखां ओर अलीखांकी बेटी भगवानकी इच्छातें चाचाहरिवंशजी द्वारा श्रीगुसांईजीकी शरण आये तातें या मार्गमें श्रीकृष्णकी इच्छा परमकारणहे ॥ ३ ॥

मूलं—तदावरणनाशस्तु दैन्यादेव हरौ कृतात्।

स दीनेषु निजामिच्छामनुकूलां करोति हि ॥२॥

वैष्णवकों तन, मन, धन, करि प्रभुहींकी सेवामें अनेक मनोरथ होय जो द्रव्यादिक न होय तो मनहींते (मानसी सेवामें) नानाप्रकारके मनोरथ करे ताके हृदयमें प्रभु विराजे, ओर लौकिक वैदिक देहसंवंधी कार्यमें सवठोर अपने मनकों उदास राखे लौकिकमें साक्षिवत् रहें, संसारके सुखदुःखते मन उदासीन रहे तो प्रभु हृदयमें रहें, अब श्रीहरिरायजी कहतहैं जो यह द्वाविंशगुण विद्यारूप जावैष्णवके हृदयमें आवे ताके हृदयमें श्रीकृष्ण पधारें स्वरूपानंदको अनुभव करावें जेसें ब्रजभक्तनकी पंचपर्वा अविद्या दूरिभई विद्या सिद्ध भई तब श्रीकृष्ण हृदयमें विराजें तेसें वैष्णव द्वाविंशदोष छोडि द्वाविंशगुणकों धारण करे तो श्रीकृष्ण निश्चय ताहीक्षण हृदयमें पधारें ॥ १० ॥

इति श्रीहरिरायजीकृतं द्वात्रिंशत्तमं शिक्षापत्रं श्री-
गोपेश्वरजीकृतब्रजभापाटीकासमेतं समाप्तम् ॥ ३२ ॥



शिक्षापत्र ३३.



अब त्रयस्त्रिंशत्तमशिक्षापत्रमें यहमार्गमें सर्वको कारण भगवदिच्छाहीहे सोही प्रतिकूल होय ताको नाश हरिमें दैन्यते होय काहेतें जो दीनजन उपर हरि अपनी इच्छा अनुकूल करतहे जब इच्छा अनुकूल भई तब दासकों कहा दुर्लभहे ? ताते लोकमेंहू दीनके उपर सवनकों दया होतहे यह जानिके दैन्य राखनों सोही साधन हे अभिमान ओर मद दैन्यके विरोधी हे ताको त्याग करनों यह न बने तो अपने श्रीआचार्यजीमहाप्रभुजीको दृढ आश्रय राखनों

अन्य कोन रक्षा करिवेमें समर्थहे) ओर पुरुरवाने कह्योहे “ पुंश्चल्या-
पहतं चित्तं कोऽन्यो मोचयितुं क्षमः । आत्मारामेश्वरमृते भगवंतमधो-
क्षजम्” (पुंश्चली [व्यभिचारिणी] स्त्रीने हरिलिये एसे चित्तको
आत्माराम [योगी] के ईश्वर अधोक्षज भगवान् विना ओर अन्य
कोन छुडायवेमें समर्थहे) ओर व्यासजी कहेहें “ घोर कलियुगे प्राप्ते
सर्वधर्मविवर्जिते । वासुदेवपरा मर्त्यास्ते कृतार्थो न संशयः” (सर्वधर्म-
करिरहित घोर कलियुग प्राप्त भयो तामें भगवत्परायण मनुष्य कृतार्थहे
संशय नांही) याभांति पिंगला पुरुरवादि ओर द्रौपदी, गजेंद्र, जो
आर्तिकरी शरण आये तिन सबनको उद्धार प्रभु किये तातें एक
प्रभुके आश्रयतें ओर दैन्यतेंही प्रभुकी कृपा होतहे ॥ ३ ॥

मूलं-अतो दैन्यं हि मार्गेऽस्मिन् परमं साधनं मतम् ।
अभिमानो मदश्चापि सततं तद्विरोधिनौ ॥ ४ ॥
तौ विज्ञाय प्रयत्नेन परित्याज्यौ फलार्थिभिः ।
दौष्ट्यं समस्तेंद्रियाणां साधनैरेव नाशयेत् ॥ ५ ॥

शब्दार्थः-तासों यह पुष्टिमार्गमें दैन्यही परमसाधन मान्योहे
अभिमान ओर मद यह दोनोहू निरंतर दैन्यके विरोधिहे ॥ ४ ॥ इनकूं
जानिकें पुष्टिमार्गीय फलके अर्थवारेकें यत्नकरिकें त्याग करिवेयोग्यहे
ओर समग्र इंद्रियनकी दुष्टताको साधनकरिकेंही नाश करे ॥ ५ ॥
टीका-पुष्टिमार्गमें परम साधन एक दैन्यहे दैन्यभावनाकरणार्थ सर्व
समर्पणहे तातें जाको दीनता सिद्ध भई तिनको यह पुष्टिमार्गको फल
सिद्धही भयो तातें विज्ञप्तिमें श्रीगुसाईजी कहेहें “ यादृशी तादृशी
नाथ ! त्वत्पादाब्जैककिंकरी । त्वद्वक्त्रं कथमप्याशु कुरु दृग्गोचरं मम”
(जेसी तेसी तुम्हारे चरणकमलकी किंकरी (दासी) हों तातें अपनी
जानि कृपा करि मेरे नेत्रको आपके मुखको वेगिही दर्शन करावो) ओर

शब्दार्थः—यह आवरणको नाश हरिमें दैन्य कियेतेंही होय काहेतें जो वह भगवान् दीनमें अपनी इच्छा (प्रतिकूल होय तोहू फिर) अनुकूल करतहैं ॥ २ ॥ टीका—हरिसों जब दीनता होय तब आवरणको नाश होय भगवानको संबंधी भयो तासों भगवत्सेवामें अंगीकार भयो दीन-ताकरि दासभावहू भयो तब प्रभुकी इच्छा आपुहीतें अनुकूल होय जो अब तो यह जीव मेरोही भयो तासों छोड्यो न जाय जब प्रभु अनु-कूल भये तब सब सिद्ध होय सो आगे कहतहैं ॥ २ ॥

मूलं—तदानुकूलये दासानां किं फलं दुर्लभं मतम् ।

कृपा च जायते दीने लोकसिद्धनिदर्शनात् ॥३॥

शब्दार्थः—भगवानकी इच्छा अनुकूल भई तब दासनको कहा फल दुर्लभहे (कछुहू नाही) काहेतें जो दीनपें कृपा होयहे ऐसे लोकमें दिखेहे (तासों दीनहोय तो प्रभुकी कृपा होय) ॥३॥ टीका—जब प्रभुकी इच्छा अनुकूल भई तब सगरो फल सिद्ध भयो यामें संदेह नाहीहे तातें श्रीकृष्णकी कृपाको कारण एक दैन्यहे सो लौकिकमें कहुं प्रसिद्ध देखियतहे जो केसोहू वैरी होय केसोहू काम विगाडे परंतु आयकें शरण पडे जो में तो तुम्हारोहों अब चाहोसो करो तब उहपर कृपाहीं करे मायों न जाय तेसैं अनेकजन्मतें जीव भूल्यो हे सो श्रीआचार्यजीद्वारा प्रभुको सर्व समर्पणकरिकें दीन होय रहे जो में श्रीकृष्णको दासहूं तब प्रभु प्रसन्न होय कृपाहीं करे तातें दीन होय एक श्रीकृष्णकीही शरणभावना राखे सो श्रीभागवतएकादशस्कंधमें पिंगलाको वाक्यहे “ संसारकूपे पतितं विषयैर्मुपितेक्षणम् । अस्तं कालाहिनात्मानं कोऽन्य-स्मात्तुमधीश्वरः ” (संसाररूप कूपमें गियों ओर विषयकरिकें मूढ़ गयेहे नेत्र जिनके ऐसे ओर कालरूप सर्पने निगल्ये ऐसे आत्माको ओर

१ प्रजवासिनके लिये पुस्तकमें आवरणको अर्थ नाही लिख्योहे वण (घाघणादिक) लिखेहे सो अर्थ मूलसों विरह्ये.

श्रीआचार्यजीके दृढ आश्रयवारेनके दोष तो अग्निस्वरूपसों (श्रीआचार्यजी अग्निस्वरूपहे तासों) संबंधमात्रतें क्षणमात्रमें भस्म होयजात हे ॥ ६ ॥ टीका—दृढ आश्रय राखनो अन्याश्रयतें फलको नाश होय सो दामोदरदास संभरवारेकी वार्तामें प्रसिद्धहे जो बाकी स्त्रीने रंचकहू अन्याश्रय कियो तातें पुत्र म्लेच्छ भयो एसो बाधकहे सो श्रीगुसांइजी कहेहें “अहं कुरंगीदग्भंगिसंगिनांगीकृतोऽस्मि यत्। अन्यसंबंधगंधोऽपि कंधराभेव वाधते” अन्यसंबंधको गंधहू होयतो गरो कटे प्रभुसों अन्याश्रय सह्यो न जाय श्रीनंदरायजी अंविकापूजनकों गये तहां सुदर्शनसर्प नंदरायजीकों निगल गयो फिर प्रभुकी शरणजाय प्रार्थना करी तब छूटे तातें अन्याश्रय महाबाधकहे तातें श्रीआचार्यजीके आश्रितनकुं अग्निके संबंधतें काष्ठकीनाई अग्निरूप श्रीआचार्यजीके संबंधतें सगरे दोष एकक्षणमें भस्म होयजाय ॥ ६ ॥

मूलं—अतःस्वाचार्यमात्रैकशरणैस्तत्पराश्रितैः ॥ ७ ॥

तद्ग्रन्थार्थावबोधार्थाविहितातिप्रयत्नकैः ।

दुःसंगवर्जितैः संगसंप्राप्त्याशायुतैरपि ॥ ८ ॥

स्थेयं सेवापरैरन्याश्रयत्यागाविचक्षणैः ।

कामलोभादिदोषैकपरित्यागेच्छुभि सदा ॥ ९ ॥

शब्दार्थः—तासों अपने श्रीआचार्यजीकेही आश्रयवारे, इनके परायण भगवदीयके आश्रित ॥ ७ ॥ इनके ग्रंथ श्रीसुबोधिनीजी, निबंध आदि) के अर्थ जानिवेके लिये प्रयत्न करिवेवारे, दुःसंगतें रहित, सत्संगकी प्राप्तिकी आशायुक्त ॥ ८ ॥ सेवामें चतुर, अन्याश्रयके त्यागमें चतुर, कामलोभादि मुख्यदोषके त्यागकी इच्छावारे, ऐसे होय सदा रहेनो ॥ ९ ॥ टीका—श्रीआचार्यजीके चरणकमलको दृढ आश्रय करे श्रीआचार्यजीके चरणकमलके आश्रित भगवदीयहोय तिनको आश्रय

श्रीआचार्यजीमहाप्रभु कहेहैं “दैन्यं त्वत्तोपसाधनम्” याभांति दैन्य सर्वोपरि साधनहैं अभिमान ओर मद यह दोउ पुष्टिमार्गके फलमें विरोधीहे ताहीतें श्रीआचार्यजीमहाप्रभु विवेकधैर्याश्रयमें कहेहैं “अभिमानश्च संत्याज्यः स्वाम्यधीनत्वभावनात् ।” स्वामीके आधीनहूं एसी भावनातें अभिमान सगरो छोडनो) जो स्वतंत्र होय सोई अभिमान करे दासकों नांही कर्तव्यहे स्वामीकी आज्ञा मांगि सगरो कार्य कर्तव्य हे सो अभिमानतें दासपनो जातरहे तातें अभिमान बडो बाधकहे तेसेही मदहू बाधकहे पुष्टिमार्गके फलमें विरोधीहे ॥ ४ ॥ लौकिक सुखतें सगरे अलौकिक साधनको नाश होतहे तासों इंद्रिय दुष्ट होतहे तिनकों अलौकिकमें लगावे तब दुष्टता मिटे सो निरोधलक्षणमें श्रीआचार्यजीमहाप्रभुजी कहेहैं “संसारावेशदुष्टानामिन्द्रियाणां हिताय वै । कृष्णस्य सर्ववस्तूनि भूम्न ईशस्य योजयेत्” (संसारके आवेशकरि दुष्ट सब इंद्रियनके हितके लिये अपने स्वामी श्रीकृष्णकी सर्ववस्तुहे सो उनमें लगावे) तासों इंद्रियनकी दुष्टता निवृत्त होय सगरी इंद्रियनकी आसक्ति लौकिकमें होय सो दुष्टता जानियें प्रभुमें आसक्तिसे वह दुष्टता मिटे ॥ ५ ॥

मूलं—अथवाश्रयमात्रेण नाशयिष्यति मत्प्रभु ।

निजाचार्याश्रितानां तु दोषा वन्हिस्वरूपतः ॥६॥

संबंधमात्रतो भस्मीभवन्ति क्षणमात्रतः ।

शब्दार्थः—उपर कहे जो इंद्रियनकी दुष्टता साधनकरि निवृत्त करे परंतु तेसे न होयसके तो अपने स्वामीको आश्रय दृढ करनो ता आश्रयमात्रतें अपने स्वामी सर्वदोषकों नाश करेंगे काहेतें जो अपने

१ इंद्रियनकी धर्महे गो दुष्टागो न छुटे तासों सर्व इंद्रियनकी लौकिकमें आसक्ति ।
 २ स्वामी भगवानमें आसक्ति करावनी.

रहिवेतें श्रीठाकुरजीको आवेश हृदयमें न होय हृदयमेंते पधारे ओर लोभकरि संसारासक्ति होय पापपुण्यको विचार न रहे केवल अपने स्वार्थकेही वश्य होय ऐसे लोभी तथा कामीके हृदयमें प्रभु न आवे तांतें काम तथा लोभको सदा त्याग करे तब फलरूप दैन्य सिद्ध होय ॥ ९ ॥

इति श्रीहरिरायजीकृतं त्रयस्त्रिंशत्तमं शिक्षापत्रं श्री-
गोपेश्वरजीकृतव्रजभाषाटीकासमेतं समाप्तम् ॥३३॥

शिक्षापत्र ३४.

अब चतुस्त्रिंश शिक्षापत्रमें श्रीकृष्ण सदा सेव्यहैं येही फलहे तामें मुखारविंदकी भक्तिमें प्रभु आपतेंही प्राप्त होय ओर चरणारविंदकी भक्तिमें धर्मद्वारा धर्मविशिष्टप्रभु प्राप्त होय चरणात्मकभक्तिमें सायु-
ज्यफल होय ओर मुखारविंदकी भक्तिमें श्रीभगवानके अधरासृत सेवनरूप फल होय याभांति पुष्टिभक्तिकी अवस्था ओर साधनको निरूपण तथा सर्वात्मभावको निरूपणहे जेसैं मंत्रशास्त्रमें मंत्रके बीज बिना कलु कार्य सिद्ध न होय तेसैं यह पुष्टिमार्गमें दैन्य बिना कलु सिद्ध न होय पुष्टिमार्गकी प्राप्ति तो श्रीमदाचार्यजीके चरणार-
विंदकी कृपातें होय तासों इनकोही आश्रय करनो यह निरूपणहे ।
उपर ग्रंथके बोधतें, सत्संगतें ओर सेवातें दैन्य सिद्ध होय एसो निरूपण कियो सो सेवाके दोय प्रकारहे एक मुखारविंदकी भक्ति सो

१. चरणारविंदकी भक्ति करनी सो दासको धर्महे तासों यह धर्मरूपभक्ति हे.

करे ॥७॥ पुष्टिमार्गीय ग्रंथ श्रीआचार्यजीमहाप्रभुजी, श्रीगुसाईंजी आदिके श्रीसुबोधिनीजी, निबंध, विद्वन्मंडन, टिप्पणीजी श्रीसर्वोत्तमजी आदि ग्रंथहे इनके भावको बोधभयेतें आश्रय सिद्ध होय सो सर्वोत्तमस्तोत्रमें श्रीगुसाईंजी कहेहे 'कृष्णाधरामृतास्वादसिद्धिरत्र न संशयः श्रीकृष्णके अधरामृतको पान निश्चय करतहैं यामें संशय नाहीं तातें सर्वोत्तमआदि सगरे ग्रंथको पाठ अवश्य कर्त्तव्य है ताकरि सर्व सुबोध होय दैन्य होय ओर आश्रय सिद्ध होय, अब दुःसंगको त्याग करनो सत्संगकी प्राप्तिको यत्न करनो तातें श्रीभागवतप्रथमस्कंधमें शौनक कहेहैं "तुल्याम लवेनापि न स्वर्गं नापुनर्भवम् । भगवत्संगिसंगस्य मर्त्यानां किमुताशिषः" (भगवानके संगि भक्तनके लवमात्रके संग-तुल्य न स्वर्गकों के न मोक्षकों हम तुलना करेहैं तो मनुष्यनको सुख तो कहा) याभांति सत्संगतुल्य ओर सुख नाहींहे तातें सत्संग करे तो सर्व सिद्ध होय ॥ ८ ॥ श्रीकृष्णकी सेवामें स्थित रहे क्यों जो यह पुष्टिमार्गमें परमफलरूप भगवत्सेवाही है सेवासमान ओर कुछ नाहीं है सो श्रीभागवतनवमस्कंधमें श्रीभगवान् दुर्वासाप्रति कहेहैं "मत्सेवया प्रतीतं च सालोक्यादिचतुष्टयम् । नेच्छन्ति सेवया पूर्णाः कुतोऽन्यत्काल-विप्लुतम्" [मेरी सेवातें साक्षात्कार भये ऐसे सालोक्यादि चतुर्विध मोक्षकोंहू मेरे भक्त नाहीं इच्छत हैं काहेतें जो सेवाकरि पूर्ण है तो कालकरि जिनको नाशहोय ताकी इच्छा नाहीं राखे वामें कहा केहेनो] ऐसे भगवदीय सेवामें पूर्ण है जो चतुर्विध मुक्तिपर्यंत नाहीं चाहतहैं याभांति श्रीकृष्णकी सेवामें स्थित होय, ओर अन्याश्रय न करे देवताआदिको (द्रव्यादिकके लिये) रंचकहू आश्रय होय तो फलको नाश होय तातें अन्याश्रय छोडिवेमें विचक्षण रहेनो ओर कामादि विषयको तथा लोभको त्याग करे काहेतें जो कामादिविषयमें तत्पर

प्राप्तिहे यामें संशय नांहीं तहां कोई संदेह करे जो उपर मुखारविंदकी भक्ति कही फिर धर्मसेवात्मक चरणारविंदकी भक्ति कही दोऊतें प्रभुकी प्राप्ति बताये तव दोऊ एकहीं भई तव श्रीआचार्यजीमहाप्रभुजी प्रगट होय मुखारविंदकी भक्तिमें अधिकता कहा बताये ? याप्रकार कोई संदेह करे तहां आगे कहतहें ॥ २ ॥

मूलं—तत्र सायुज्यसंबंधो न लोभामृतसेवनम् ।

मुखारविंदभक्तौ तु साक्षात् तत्सेवनं मतम् ॥३॥

शब्दार्थः—चरणारविंदकी भक्तिमें सायुज्य संबंधहे लोभात्मक अधरामृत (भगवत्प्रसाद)को सेवन नांहीं ओर मुखारविंदकी भक्तिमेंतो साक्षात् इनको सेवनहे ॥३॥ टीका—मुखारविंदकी भक्ति (पुष्टि-भक्ति) में ओर चरणारविंदकी भक्ति (मर्यादाभक्ति) में फलमें बहुत भेदहे सो कहतहें चरणात्मक मर्यादाभक्तिकरिकें सायुज्यमुक्तिकी प्राप्तिहे तामें लोभामृतको सेवन नांहींहे ओर मुखारविंदकी भक्तिहे सो तो प्रभुकी साक्षात्सेवारूपहे तहां साक्षात् प्रभुके स्वरूपानंदको अनुभवहे तातें मुखारविंदरूप पुष्टिभक्ति सर्वोपरिहे ओर धर्मरूप चरणात्मक मर्यादाभक्तिहे एसे दोऊमें बडो तारतम्यहे तातें न्यारी न्यारी कहीहे ॥३॥

मूलं—एतादृक्फलिका भक्तिर्भवेत्केवलपुष्टितः ।

तत्रापि मुखरूपास्मदाचार्यानुग्रहात् पुनः ॥४॥

शब्दार्थः—लोभात्मक अधरामृतके सेवनरूप फल सिद्ध करिवेवारी भक्ति, केवल पुष्टितें होय तामेंहू फिर [श्रीकृष्णके] मुखारविंदरूप अपने श्रीआचार्यजीमहाप्रभुजीके अनुग्रहतें होय ॥ ४ ॥ टीका—जामें अधरामृतकी प्राप्तिहे एसी भक्तितो मुखारविंदरूप पुष्टिभक्तिहे सो मुखारविंदरूप श्रीआचार्यजीमहाप्रभुजीहे तातें मुखारविंदकी भक्ति हमारे श्रीआचार्यजीमहाप्रभुजीके अनुग्रहतें सिद्धहोय काहेतें जो मुखारविंदकी

सर्वोपरिहे ओर एक चरणकमलकी भक्तिहे सो दोउ भक्तिको प्रकार कहतहें:-

**मूलं-श्रीकृष्णः सर्वदा सेव्यः फलं प्राप्यं स्वतस्तु सः।
मुखारविंदभक्त्यैव साक्षात्सेवैकरूपया ॥ १ ॥**

शब्दार्थ:-साक्षात् सेवारूप मुखारविंदकी भक्तिहे तातेंही स्वतः (आपतें) प्राप्यफल यह श्रीकृष्णहे सो सर्वदा सेव्यहे ॥१॥ टीका-अब श्रीहरिरायजी कहतहें जो यह पुष्टिमार्गमें तो सदा सर्वदा श्रीकृष्णही सेव्यहे सो श्रीआचार्यजी महाप्रभुजी चतुःश्लोकी ग्रंथमें कहेहें “ सर्वदा सर्वभावेन भजनीयो ब्रजाधिपः । स्वस्यायमेव धर्मोहि नान्यः कापि कदाचन ” (सर्वदा सर्वभावकरि ब्रजके अधिपति श्रीकृष्णहीकी सेवा कर्त्तव्यहे हमारो यह धर्महे ओर नांही) ओर हमारे पुष्टिमार्गमें जो कोई स्थितहे तिनकोहू येही धर्महे श्रीकृष्णकी सेवाही कर्त्तव्यहे ओर कोई कालमें दूसरो साधन नांही कर्त्तव्यहे ताहिकरिकें पुष्टिमार्गके फलकी प्राप्ति स्वतः [आपुहीतें] सिद्ध होय काहेतें जो मुखारविंदकी भक्तिहे सो साक्षात् स्वरूपसेवातें सिद्धहोतहे जामें दर्शन, स्पर्श, सर्वांगसुखको अनुभवहे तातें स्वरूपसेवामें साक्षात्कारहे यह मुखारविंद-भक्ति कही सो सर्वोपरिहे ॥ १ ॥

मूलं-चरणात्मकभक्त्या तु धर्मसेवात्मरूपया ।

धर्मद्वारा तद्विशिष्टः प्रभुः प्राप्यो न संशयः ॥२॥

शब्दार्थ:-धर्मसेवास्वरूप चरणात्मकभक्तिकरि धर्मविशिष्ट प्रभु प्राप्त होय यामें संशय नांही ॥ २ ॥ टीका-चरणात्मकभक्ति धर्मसेवारूपहे जेसैं आगें ब्रह्मा, शिव, नारद, सनकादिक, सब करिआयेहें ताहीभांति मर्यादासंयुक्त धर्मवत् करनी यह धर्मद्वारा भक्तिहे ताकरि प्रभुकी

मूलं—यथा मर्यादया भक्तौ ब्रह्मभावस्तु साधनम् ।

तथा सर्वात्मभावोऽत्र साधनत्वेन बुद्ध्यताम् ॥ ७ ॥

शब्दार्थः—जैसे मर्यादा भक्तिमें ब्रह्मभावहे सो साधनहे तेसे यह पुष्टिमार्गीय भक्तिमें सर्वात्मभावहे सो साधनपनेतें जाननों ॥ ७ ॥

टीका—जैसे मर्यादाभक्तिमें ब्रह्मभावहे सोहि साधनहे सगरो ब्रह्मांड ब्रह्ममयहे अपनकोहू ब्रह्म मानतहें यह ब्रह्म सबठोरहे याभांति ब्रह्मभाव (अक्षरब्रह्मको ज्ञान) मर्यादाभक्तिको साधनहे तेसेही यह पुष्टिमार्गमें सर्वात्मभावहे सोहि साधनहे जेसे ब्रजभक्तनको सर्वात्मभावहे तेसो सर्वात्मभाव इहां साधनहे यह बुद्धिमें निश्चय जाननों ॥ ७ ॥

मूलं—वस्तुतस्तु फलं चैव फलं स्यात्तत्प्रवेशतः ।

तत्स्वरूपं तु सर्वेषां देहांतःकरणात्मनाम् ॥ ८ ॥

येन भावेन भगवत्यात्मभावो हि जायते ।

यस्माद्भावात्स्वदेहादि सकलं स्यात्तदर्थकम् ॥ ९ ॥

शब्दार्थः—वस्तुतें तो यह सर्वात्मभाव फलरूपहीहे काहेतें जो सर्वात्मभावको भीतर प्रवेश होय तब फल सिद्ध होय ताको स्वरूप तो देह अंतःकरण, आत्मा, सर्वके जो भावकरि भगवानमें आत्मभाव निश्चय होय जाभावसों अपने देहादिक समग्र भगवदर्थ होय ॥ ८ ॥ ९ ॥ टीका—मर्यादामार्गमें जेसे वस्तुतासों अक्षरब्रह्मरूप फलहे जामें प्रवेश होय फिर मायाके गुणमें न आवे तेसे पुष्टिमार्गीयको प्रभुकी लीलारूप फलमें प्रवेशहे तहां स्वरूपात्मकरसको अनुभवहे नेत्रतें दर्शन, अंतःकरणसों प्रभुकी लीलाको अनुभव, सर्व इंद्रिय मन प्राण सर्वकी प्रभुमें तत्परता, जेसे ब्रह्मसंबंधके गद्यार्थमें कहेहें याप्रकार मुख्यफलको

१ फलस्यान्त प्रवेशतः एमो पाठ काह पुस्तकमें हे ताकेअनुसार अर्थ—फलके अंतः—प्रवेशतें वस्तुतासों सर्वात्मभावहि फलरूप होय.

भक्ति श्रीस्वामिनीजीकीहे सो श्रीस्वामिनीजीके विप्रयोगभावात्मक पुष्टिभक्ति श्रीवलभाचार्यजीनेही प्रकट करीहे तातें श्रीआचार्यजी जब अनुग्रह करि यह मुखारविंदकी भक्तिको दान करे तब सिद्ध होय ॥४॥

मूलं—अत एतद्भक्तिमद्भिः श्रीमदाचार्यसंश्रयः।

प्रथमं सर्वथा कार्यस्ततएवाखिलं भवेत् ॥ ५ ॥

शब्दार्थः—तासों यह (मुखारविंदकी) भक्तिवारेनको प्रथम श्रीमदाचार्यजीको आश्रय सर्वथा कर्त्तव्यहे ताकरिकेही समग्र सिद्धहोय ॥ ५ ॥ टीका—एसी यह मुखारविंदकी भक्तिको साधन एक श्रीआचार्यजीको आश्रयहीहे तातें प्रथम सर्वथा येही कार्य कर्त्तव्यहे जो श्रीआचार्यजीके शरण आय नामनिवेदनकरि पाछें अपने मनमें दृढ श्रीआचार्यजीके चरणकमलको आश्रय करे ऐसे वैष्णवकों अखिल कार्य सिद्धहोय यामें संशय नांही तातें मुखारविंदकी भक्तिमें एक श्रीआचार्यजीको आश्रयही साधनहे ओर कोई नांही ॥ ५ ॥

मूलं—अतः परं तु तद्भक्तेरवस्थासाधनादिकम्।

निरूप्यते स्वतोषाय तत्कृपातो हृदि स्थितम्॥६॥

शब्दार्थः—उपर जो दोयभक्तिको निरूपण कियो तापाछें यह भक्तिकी अवस्था ओर साधनादिक इनकी कृपातें हृदयमें स्थितहे सो अपने तथा अपने भगवदीयनके संतोषकेलिये निरूपण करतहों॥६॥ टीका—उपर चरणात्मकभक्ति तथा मुखारविंदरूपभक्तिको निरूपण कियो तामें पुष्टिभक्तिमें केवल श्रीआचार्यजीको आश्रय बतायो तापाछें इनके साधनादिक कर्त्तव्यहे सो अपने मनमें संतोषार्थ तथा अपने तदीय (पुष्टिमार्गीय) के संतोषार्थ जो हमकों श्रीआचार्यजी महाप्रभुजी दान दियेहें ओर इनकी कृपातें जो हृदयमें स्थिर रह्योहे सो निरूपण करतहों ॥ ६ ॥

आछो नांही प्रभु हमकों देखि सुख पावे तो आछो तासों आछीभांति रहेनों याही भावतें ब्रजभक्तननेहू अपने देहकी रक्षाकरीहे तामें अपनो सुख नांही विचारयोहे या भांति देहादिककी रक्षा प्रभुसेवार्थ विचारिकें करे ॥ १० ॥ कछु लौकिकवैदिक फल सिद्ध होयगो तथा प्रभुकी सेवातें कृतार्थ होउँगो यह स्वार्थबुद्धितें भगवत्सेवा न करे काहेतें जो भगवान् बिनाविचारेही निजेच्छातें सर्वकार्य सिद्ध करेंगे सो श्री-आचार्यजीमहाप्रभुजी नवरत्नग्रंथमें कहेहैं “ सर्वेश्वरश्च सर्वात्मा निजे-च्छातः करिष्यति ” [प्रभु सर्वके ईश्वरहैं सर्वके आत्माहैं [तासों सर्वजानतहैं सो] अपनी इच्छाहीतें दासके सकलमनोरथ सिद्ध करेंगे] तातें प्रभुकी सेवामें अपनी स्वार्थबुद्धि न करे ओर गौणभावतें क्रिया-वत्तहू न करे भावसंयुक्त प्रीतिसों करे काहेतें जो भगवानकों एकप्रीति-हीतें धरे सो प्रिय लागतहैं जेसैं पद्मनाभदासजीके छोला प्रीतिहीतें अरोगे तातें सेवा प्रीतिसों करे ॥ ११ ॥

मूलं—न फलकांक्षणं यत्र लौकिकानां यथा धने ।

तदभावे यथा लोका दुःखेनासंस्त्यजन्ति हि ॥१२॥

शब्दार्थः—जहां फलकी इच्छा नांहीहे जेसैं लौकिकनकों धनमें प्रीतिहे सो धनको नाश होय तो जेसैं दुःखकरिकें प्राणकों छोडतहैं तेसैं प्रभुकी सेवामें प्रीति राखे ओर सेवाके अभावमें प्राणत्यागसमान दुःख होय ॥ १२ ॥ टीका—प्रभुकी सेवाकरि कछुहू फलकी आकांक्षा न करे काहेतें जो फलकी कामना राखे तो पुष्टिमार्गीय मुख्यफलको नाश होय तासों कामना भावमें बाधकहे यह जानि फलकांक्षा न करे लौकिकमें धन मुख्यहे धनके लिये सुखदुःख सहतहे प्राणत्याग करतहे एसी धनमें प्रीतिहे तेसी ही सेवामें राखे ॥ १२ ॥

अनुभव पुष्टिमार्गीय भक्तनको होय याप्रकार मर्यादा ओर पुष्टिके न्यारे न्यारे फल कहे तामें पुष्टिभक्ति सर्वोपरिहे ॥८॥ उपरकहे तामांति भाव जो भगवानमें बड़े सो उपाय करते रहेनो सो प्रभुमें भाव भयो कव जानियें ? जव देहादि, इंद्रिय, मन, सब प्रभुके अर्थ लगे, तन, मन, धन तीन्यो प्रभुमें लगे तव देहादिक सबनकी क्रिया भगवदर्थ होय सो तनुजा वित्तजा दोउ प्रकारकी सेवातें सिद्ध होय ॥ ९ ॥

मूलं—न देहाद्यर्थसिद्धयर्थं भगवानप्यपेक्षते ।

यतो देहादिरक्षापि प्रभुलीलौपयोगतः ॥ १० ॥

न स्वार्थबुद्ध्या स्वार्थोऽपि भगवानेव यत्र हि ।

येन भावेनानिमित्ता प्रीतिर्भवति वै हरौ ॥ ११ ॥

शब्दार्थः—देहादिक अर्थकी सिद्धिके लिये भगवानकी अपेक्षा नांही राखेहें जासों देहादिककी रक्षाहू प्रभुकी लीलामें उपयुक्त होयवेकू हे स्वार्थबुद्धितें नांहीहें जहां स्वार्थहू भगवानहीहें जाभावकरिके निश्चय निष्कारण प्रीति होयहें ॥ १० ॥ ११ ॥ टीका—यह भगवत्संवाहू देहादिककी सिद्धिके अर्थ तथा देहसंबंधि कुटुंब, द्रव्यादिककी कामनाके अर्थ न करे अपनो भोगसुख कछूहू न विचारे केवल भगवानकीही अपेक्षा राखे जो प्रभु कोनप्रकार सुख पावेंगे ? मतिकछु अपराधतें प्रभुको दुःख होय, याभांति प्रभुको सुख विचारे तथा भगवानके दर्शनकी, स्वरूपानंदके अनुभवकी अपेक्षा राखे, देहादिकको भोगसुख न विचारे महाप्रसादले तामेंहू यह भाव राखे जो प्रभुकी सेवामें सामर्थ्य होय इंद्रियादिक शिथिल न होयजाय जेसैं श्रीगुसांईजी परदेश पधारते तव विप्रयोगकरि कृश होते ओर तव परदेशतें श्रीजीद्वार पधारते तव बहुत प्रीतिसहित सुंदर महाप्रसाद लेते सो यहभावतें जो श्री-गोवर्द्धननायजी हमको कृश देखेंगे तो उनके मनमें दुःख होयगो सो

मूलं—तदेवात्र हि संसेव्यं येन दैन्यं प्रसिद्ध्यति ।

यदैन्यनाशकं तद्धि विरोधि सकलं मतम् ॥१५॥

शब्दार्थः—जाते दैन्य सिद्धि होय हे तासों यह मार्ग आछीरीतिसोंही ग्रहण करिवेंयोग्य हे ओर जो दैन्यको नाश करिवेवारोहे सो सब विरोधी जाननों ॥ १५ ॥ टीका—दैन्यविना फल सिद्धि न होय जासाधनतें दैन्य होय सोहि करे दैन्यको नाश करे सो सर्व पुष्टिमार्गमें विरोधी जाननो केसोहू साधन होय परंतु दैन्यको नाश करे एसो होय सो सर्वथा नांही करनो यह कहिकें यह जताये जो पुष्टिमार्गविना अन्यमार्गकी जितनी क्रिया साधनहे सो जब पुष्टिमार्गके फलतें विरोधीहे यह निश्चय मनमें जानि अन्यमार्गकी क्रिया नांही कर्त्तव्यहे ॥ १५ ॥

मूलं—एतन्मार्गांगीकृतौ हि हरिर्दैन्यं विवर्द्धयेत् ।

मदादिजनकं दुष्टं नाशयत्यपि (नाशयित्वापि) लौकिकम्

शब्दार्थः—यह मार्गमें अंगीकार होय तो हरि निश्चय दैन्यवृद्धि करेहें मदादिककी उत्पत्ति करिवेवारो दुष्ट जो लौकिकहे तिनकोहू नाश करतहे अथवा मदादिकको उत्पन्न करनहार जो दुष्ट लौकिक तिनकों नाशकरिकेंहू यह मार्गको अंगीकार होय तो हरि निश्चय दैन्यवृद्धि करतहे ॥ १६ ॥ टीका—एतन्मार्गीय जो भक्त यहपुष्टिमार्गमें श्रीआचार्यजी द्वारा शरण आयेहें तिनभक्तनों दैन्य बढावत हैं ओर मद [अभिमान] अपने मनसों होय सो दुष्ट लौकिक बढायवेवारोहें फलमें प्रतिबंधकहे ताको नाशही करतहे सो रासपंचाध्यायीमें प्रसिद्धहे जो भगवान् वेषुनाद करि ब्रजभक्तनों बुलाय रास किये तत्र ब्रजभक्तनोंको मद भयो तत्र भगवान् अंतर्धान भये पाछें जब अत्यंत दैन्य भयो तब प्रकटे तेसोंही यह पुष्टिमार्गमें भगवान् दैन्य सिद्ध करतहें मदको नाश करतहें अपने जनकों दैन्य बढावतहे मदको हरि करतहें

मूलं—सर्वत्यागस्तु सहजो यत्र लौकिकवेदयोः ।

नैरपेक्ष्यं स भावस्तु सर्वभावो निगद्यते ॥ १३ ॥

शब्दार्थः—जामें लौकिकवैदिकको सर्वत्याग सहज होय ओर निरपेक्षता होय सो भाव तो सर्वभाव कह्यो जाय ॥ १३ ॥ टीका—श्रीभगवानमें सहज प्रीति करि सर्वत्याग सहजहीमें करि लौकिकवैदिक कछु न चाहे सो श्रीआचार्यजीमहाप्रभुजी चतुःश्लोकीमें कहेहैं “यदि श्रीगोकुलाधीशो धृतः सर्वात्मना हृदि । ततः किमपरं ब्रूहि लौकिकैर्वैदिकैरपि” (जो सर्वात्मभावतें श्रीगोकुलाधीश हृदयमें धारण किये तातें [अधिक] दूसरो लौकिक तथा वैदिक करिकेहू कहाहे सो कहो) याभांति सर्वके आत्मा श्रीकृष्णहे तिनहीकों हृदयमें धारण करे सेवा करे ओर लौकिक वैदिक कछु न चाहे निरपेक्ष होय रहे सर्वात्मभाव करि एक प्रभुहीमें मन राखें ॥ १३ ॥

मूलं—तथात्र दैन्यमेवेकं मार्गं न श्रवणादिकम् ।

दैन्येनैव च संतुष्टः प्रादुर्भूतः फलं ददौ ॥ १४ ॥

शब्दार्थः—[जेसैं सर्वात्मभाव राखनो] तेसैं यह मार्गमें दैन्यही एक [मुख्य] हे श्रवणादिक (साधनबल) मुख्य नांहीहे दैन्यकरिकेही [ब्रजभक्तनकों] प्रसन्न भये प्रभु प्रकट होय फलदिये ॥ १४ ॥ टीका—यह पुष्टिमार्गमें एक दैन्यही साधन हे तासों अभिमान मिटे तब दोष निवृत्त होय जहां दैन्य सिद्ध भयो तहां श्रीठाकुरजी प्रकट होय दर्शन देय जेसैं रासपंचाध्यायीमें ब्रजभक्तन गुणगान करि निःसाधन भये दीन होय रुदन किये तब प्रभु तत्काल पधारे तातें जहांताँई श्रवणादिक साधनको बल मनमें होय तहांताँई दैन्य न आवे जब साधनको बल मिटे तब दैन्य आवे तब प्रभु संतुष्ट होय प्रकट होय स्वरूपा-नंदको अनुभव करावे ॥ १४ ॥

मत्वा यत्र कुत्र यदा कदा ” (आप अपने मानिके दंडदेय ऐसे होय तो हमको प्रियहीहे कहेंते जो जहांतहां जबतब आप हमको अपने मानिके दंड देयंगे) श्रीगुसाईजी कहतहैं जो हमको अपने जानि दंडदे तामें हमसुखीहैं जहांतहां जब चूक परे सुखेन दंड देय इत्यादिक वचनतें प्रभु पिताकीनाई अपने जनको दंड देय तब दुःख होय ताकूं अनुग्रह जानि श्रीमहाप्रभुजीको आश्रय न छोडे ॥ १८ ॥

मूलं—दंडदानं स्वकीयेषु परकीयेषुपेक्षणम् ।

आर्त्तिरेवात्र सततं भाव्या कृष्णपरोक्षतः ॥१९॥

शब्दार्थः—प्रभु अपने जनकूं दंड देतहैं ओर परकीय (ओरनके आश्रित) जीव होय तापें उपेक्षा करतहैं (जेसैं लौकिकमेंहू अपनो होय ताकी रक्षा करतहैं ओर परायो होय ताकी उपेक्षा करतहैं) तातें इहां श्रीकृष्ण परोक्षहैं तासों निरंतर आर्त्तिही कर्त्तव्यहे ॥ १९ ॥ टीका—जाको प्रभु अपनो करतहे तिनकोही दंड देतहे ओर जो संसारासक्त प्रवाही सृष्टिहे तिनकी उपेक्षा करतहैं दंड नांही देतहैं लौकिक देयकें लौकिकमेंही आसक्ति करावतहे रासपंचाध्यायीमें आर्त्तिके लिये प्रभु अंतर्धान भये तेसैं इहां पुष्टिमार्गमें ढेरा प्रभुमें आर्त्ति बढ़ायवेके अर्थहे तहां स्वरूपानंदको अनुभव नांही करावतहैं आर्त्ति देखे तो करावें तातें पुष्टिमार्गीय वैष्णवनको आर्त्ति अवश्य करनी ॥ १९ ॥

मूलं—अत्र भक्तार्त्तिदृष्टयैव मुदितो हि हरिर्भवेत् ।

संगो भाववतामेव भाववृद्धिर्यतो भवेत् ॥२०॥

१ जहांतांइ साधुभाव न होय तहांतांइ परोक्षही जाननैं तथा अनोसरमेंहू परोक्ष जाननैं.

जहांजहां लौकिकमें आसक्ति हे सो सवठोरतें छुडाय दैन्य सिद्ध करत हे पाछें कृपा करतहें ॥ १६ ॥

मूलं-स्वांगीकृतेहि निर्वाहः प्रभुणैव विधीयते ।

जीवाःस्वभावदुष्टा हि प्रचलेयुः कथं तथा ॥ १७ ॥

अतो दंडप्रदानेन पितेवाचरति प्रभुः ।

दंडोऽप्यनुग्रहत्वेन मंतव्यस्तु तदाश्रितैः ॥ १८ ॥

शब्दार्थः—जिनको प्रभुने अंगीकार कियो हे तिनको निर्वाह प्रभु हीतें होतहे जीव स्वभावतें दुष्टहें सो तेसैं केसैं चले ॥ १७ ॥ तासों पिताकी नाई दंडप्रदान करिके प्रभु हित करेहे तातें इनके आश्रयवारेनकों दंडहोय तोहू अनुग्रहरूप माननों ॥ १८ ॥ अपने अंगीकृत जीवनको निर्वाह प्रभु आपुहीं करेहें परंतु जीव यह नांही जानतहें काहेतें जो स्वभावकरि दुष्टहें सो श्रीआचार्यजीमहाप्रभुजी बालबोधमें लिखेहें “जीवाः स्वभावतो दुष्टाः” [जीव स्वभावतें दुष्टहें] श्रीठाकुरजी अपने अंगीकृत जीवनकों निर्वाह आगेतें करत आयेहें, करतहें ओर करेंगे जीवकों तो एक क्षणमें दुसंग लगे तो नाश करिदेई मन एक क्षणमें ओरको ओर होयजाय सो प्रभुनिर्वाह करे तब होय ॥ १७ ॥ जेसैं अज्ञानी बालककी रक्षा मातापिता करतहें अभिजलादिकतें बचावतहें तेसैं अंगीकृत भक्तनतें भूलपरे तो (जामें अपनो अनिष्ट होय सो जीव नांही जानत परंतु प्रभु दंड देतहे जो फिर वह काम न करे जेसैं श्रीनंदरायजी अंबिकापूजनकों गये तेसैंही जीवस्वभावतें कछू अपराध वने तो) प्रभु दंडदेतहें तासों दुःखमें भगवंदीय अपने मनमें अनुग्रह माने प्रभुको आश्रय न छोडे सो श्रीगुसांईजी विज्ञप्तिमें कहेहें “दंडःस्वकीयतां मत्वेत्येवं चोदिष्टमेव नः । अस्मासु स्वीयतां

मूलं—लौकिकाभिनिवेशात्तु मनोनिष्कासनं सदा ।

अलौकिकस्तु तद्भावस्तेनापि च विनश्यति ॥२३॥

शब्दार्थः—लौकिक आवेशसों तो सदा मनकूं निकासनों अलौकिक भाव तो लौकिकावेशतेंहूँ मिटिजात हे ॥ २३ ॥ टीका—जहां जहां लौकिकमें मन लागि रह्योहे सो सगरो दुःसंग जाननों तातें लौकिकाभिनिवेश जहां जहां होय ओर जाके संगतें होय सो सर्व त्याग करनों जहां जावस्तुमें लौकिकाभिनिवेश होय तहां भगवद्भाव जात रहे तातें सब लौकिकतें भगवद्भावकी रक्षा क्षणक्षणमें कियो करे तव भाव रहे ॥ २३ ॥

मूलं—वैराग्यपरितोषौ च हृदि भाव्यौ निरंतरम् ।

तदभ्यासात्तु मनसः कदाचिन्निर्गतस्ततः ॥२४॥

शब्दार्थः—वैराग्य ओर संतोष निरंतर हृदयमें राखे इनके अभ्यासतें तो लौकिकाभिनिवेशतें कोयदिन मन निकसेगो ॥२४॥ टीका—दुःसंगदोषके नाशके अर्थ वैराग्य ओर संतोष यह दोय निरंतर हृदयमें धारण करने सर्व लौकिक विषय देहसंवंधिपदार्थमें वैराग्य राखे ओर सहजमें जो आय प्राप्त होय ताहीमें मनको संतोष करिरहे यह अभ्यास जब राखे तव दुःसंगतें वचे ॥ २४ ॥

मूलं—कामाभावाय वैराग्यं चित्त्यं चेतसि सर्वथा ।

परितोषस्त्वलोभाय भक्तौ तावेव बाधकौ ॥२५॥

शब्दार्थः—कामके अभावके अर्थ चित्तमें निश्चय वैराग्यको चित्तन करनों ओर संतोषतो लोभके अभावके अर्थ राखनो काहेतें जो भक्तिमें यह दोयही बाधकहे ॥ २५ ॥ टीका—मनमें दृढ वैराग्य होय तो ताकरिकें कामादिकविषयको अभाव (नाश) होतहे ओर संतोषतें लोभको

शब्दार्थः—यहं पुष्टिमार्गमें प्रभु भक्तनकी आर्त्तियुक्त दृष्टिकरि-
केंही प्रसन्न होय हैं तासों भाववारे भगवदीयनकोही संग करनो
जासों भावकी वृद्धि होय ॥ २० ॥ टीका—ज्योंज्यों भक्त आर्त्तिकेश
करतहे त्योंत्यों भगवान् उहभक्तकों देखिकें प्रसन्न होतहैं तातें सत्संग
भगवदीयको होय तो वेगिही भावकी वृद्धि होय तातें सत्संगको यत्न
करनों ॥ २० ॥

मूलं—व्याघ्रस्याग्रे यथा देही तथा दुःसंगतो विभेत् ।

दुःसंग एव भावस्य नाशकः सर्वथा मतः ॥ २१ ॥

शब्दार्थः—जेसैं वाघकी पास देही भय पावतहे तेसैं दुःसंगते भय
पावे काहेतैं जो दुःसंगही सर्वथा भावको नाश करिवेवारो मान्योहे
॥ २१ ॥ टीका—जेसैं वाघके आगें शरीरको नाशही होय तेसैंही
दुःसंग भगवद्भावको नाशक हे तातें जेसैं वाघसों डरपिकें चले तेसैं
अपने भगवद्भावहूकी रक्षा करे तब भाव रहे ॥ २१ ॥

मूलं—दुःसंगतश्च्युताः सर्वे श्रुता हि भरतादयः ।

दुःसंगान्नजदोषाभ्यामभूद्भीष्मो वहिर्मुखः ॥ २२ ॥

शब्दार्थः—दुःसंगतेंही भरतादिक गिरेहैं सो अपन सुनेहैं दुःसंग
ओर अन्नदोषतें भीष्म वहिर्मुख भये (अर्थात् श्रीठाकुरजीके संग
लडिवेकों तत्पर भये) ॥ २२ ॥ टीका—अनेक जीव दुःसंगकरिके भग-
वद्धर्मतें गिरेहैं सो श्रीभागवतमें वर्णनहे जो भरतकों मृगके दुःसंगतें
तीन जन्मको अंतराय भयो ओर भीष्मपितामह बड़े भगवदीय हते
सो दुयोंधन दुष्टको अन्न खायो तादोषतें श्रीभगवानके संग लडिवेकूं
ठाडे भये तातें यह दुःसंगदोषतें जीव निश्चय श्रीभगवानतें वहिर्मुख
होयजाय तातें ऐसे भगवदीय गिरेहैं तो आधुनिक जीवनकी कित-
नीक बातहे ॥ २२ ॥

सेवा ओर कथादिक सर्वकार्यमें दैन्य वीजहे जेसे मंत्रशास्त्रमें वीजयुक्त मंत्र फल देयवेवारो होयहे तेसे यह पुष्टिमार्गमें सेवादिक सब दैन्ययुक्त होयतो फल देयवेवारे होयहे दैन्यको अभाव होय तो सेवा-दिक सब पुष्टि (भगवदनुग्रह) को सिद्ध करिवेवारे होय नहीं॥२७॥
॥ २८ ॥ टीका—यहपुष्टिमार्गको सर्वस्व दैन्यभावहे ताको नाशक क्रोधहे ताते वाको त्याग निश्चय करनो ओर सर्वकार्यविषे दैन्य राखनो सो दैन्यको उपाय कहतहे श्रीकृष्णकी तनुजा वित्तजासेवा प्रीतिकरिकें करनी ओर श्रीकृष्णकी कथा (श्रीसुबोधिनीजी आदिग्रंथ) सुन्योकरे यह सेवाकथाको नियम नित्यप्रति राखे तो हृदयमें दैन्य रहे ॥ २७ ॥ जेसे मंत्रको मूल वीजहे मंत्रशास्त्रमें कहेहे जो वीजसहित मंत्रते अखिलसिद्धि होय तेसेहि सेवामें दैन्यभावहे सो पुष्टिमार्गको साधनहे दैन्यभावसहित सेवा करे तो पुष्टिमार्गको अखिल फल सिद्ध होय ॥ २८ ॥

मूलं-तस्माद्रक्षेत्प्रयत्नेन दैन्यं भक्तियुतो नरः ।
दैन्येन गोपिकाः सिद्धाः कौण्डिन्योऽपि परोक्षतः ॥२९॥

शब्दार्थः—तासों भक्तियुक्त नर (जीव), प्रयत्नकरिकें दैन्यको राखे काहेते जो गोपीजनहु दैन्यकरिकें सिद्ध भयेहे ओर कौण्डिन्यऋषिहु परोक्षसों सिद्ध भयेहे ॥२९॥ टीका—वैष्णव यत्नकरिकें अपने दैन्यकी रक्षा करे यह पुष्टिमार्गीय भगवदीयको उचितहे तहां दृष्टांत कहतहे जो दैन्यकरि गोपीजनको सिद्धि भई प्रभु मिले ओर दैन्यकरि कौण्डिन्य ब्राह्मण अनंत ! अनंत ! रटत रहे तासों इनको सिद्धि भई तासों श्रीआचार्यजीमहाप्रभुजी . संन्यासनिर्णयग्रंथमें कहेहे “ कौण्डिन्यो

१ श्रीभगवद्गीताजीमें, काम, क्रोध, ओर लोभ यह तीन नरकके द्वार गिनेहे तामें क्रोध बीचमें गिन्योहे.

नाश होतहे यह दोष दोष भक्तिमार्गमें भगवद्धावके बाधकहे तातें काम ओर लोभके त्यागार्थ वैराग्य ओर संतोष राखनो ॥ २५ ॥

मूल—कामेनैन्द्रियवैमुख्य लोभे पाखंडसंभवः ॥

क्रोधस्तु मध्यपातित्वान्महाबाधक ईष्यते ॥ २६ ॥

शब्दार्थः—कामकरिकें इंद्रियनकी विमुखता होय लोभमें पाखंडको संभव होय [अर्थात् जाकूं लोभ होय सो द्रव्यादिकके लिये अनेक पाखंड करे] ओर क्रोध तो (काम, क्रोध, लोभ, यह तीन) बीच रहिवेवारोहे तासों महा बाधकहें ॥ २६ ॥ टीका—काम प्रकट भयेतें विषयादिक कियेतें सगरी इंद्रिय श्रीभगवानतें तथा भगवद्धर्मतें वहिमुख होयजाय इंद्रियनको विषयावेश होतहे ओर लोभ हृदयमें होय तो ता करि पाखंड प्रकट होतहे सो संन्यासनिर्णयमें श्रीआचार्यजीमहाप्रभुजी कहेहें “स्वयं च विषयाक्रांतः पापण्डी स्यात्तु कालतः ” (आप विषयाक्रांत ओर पाखंडी, कालतें होय) इत्यादि वचनतें काम ओर लोभ बाधक हे तामें मध्यपाती क्रोध हे कामादिक न मिले तब क्रोध होय तेसेही लोभको अर्थ सिद्ध न होय तब क्रोध उपजे तातें क्रोध प्रकट होयवेको कारण काम ओर लोभहे क्रोधकरि पीछें मोहहोय इत्यादिक दोष प्रकट होय तब अष्टप्रहर लौकिकावेश, लौकिकको ध्यान, हृदयमें रहे तातें दैन्यको नाश होय ॥ २६ ॥

मूल—यतो मार्गीयसर्वस्वदैन्यभावविनाशकः ।

दैन्यं सर्वेषु कार्येषु कृष्णसेवाकथादिषु ॥ २७ ॥

वीजं यथा मंत्रशास्त्रे तद्युक्तमखिलं भवेत् ।

तदभावे न सेवादि सकलं पुष्टिसाधकम् ॥ २८ ॥

शब्दार्थः—जासों [क्रोध] पुष्टिमार्गिके सर्वस्वरूप दैन्यको नाश करिवेवारोहे (तासों महाबाधकहे एसे पूर्वश्लोकमें संबंधहे) श्रीकृष्णकी

लीलाके भावमें मग्न होय सो सबठोर साक्षात् लीलासहित स्वरूपको निरंतर दर्शन होतेहे संयोगतें अधिक विप्रयोगमें सुखहे तातें युगपत् जो एक कालमें सर्व लीलाको अनुभव करे मनहीकरि ब्रजभक्तनको भाव.विचारे प्रभु गोचारनको पधारते तब ब्रजभक्त विप्रयोगकी भावना करते सो विचारे ओर पाछें संध्यासमय प्रभु वनतें पधारते तब ब्रजभक्त जो भाव करते सो भाव विचारे याभांति विप्रयोगमें दोउ लीलाके भावको अनुभव होयहे ॥ ३१ ॥

मूलं—एवं विज्ञाय मनसा पुष्टिमार्गं विभावयेत् ।

प्राप्तिः श्रीवल्लभाचार्यचरणाब्जप्रसादतः ॥ ३२ ॥

अतः स एव सततं सर्वभावेन सर्वथा ।

सुधिभिः कृष्णरसिकैः शरणीक्रियतां सदा ॥ ३३ ॥

शब्दार्थः—एसे जानिकें मनतें पुष्टिमार्गकी भावना करे तो श्रीवल्लभाचार्यजीके चरणारविंदके प्रसादतें (फलकी) प्राप्ति होय (“प्राप्तं” एसो पाठ होय तो एसे मनतें, जानिकें श्रीवल्लभाचार्यजीके चरणारविंदके प्रसादतें प्राप्त भयो जो पुष्टिमार्ग ताकी भावना करे) ॥ ३२ ॥ टीका—तासों निरंतर सर्वभावकरिकें निश्चय श्रीकृष्णके रसकूं जानिवे-वारे अथवा श्रीकृष्णही जो रस तामें मग्न जो बुद्धिमानहे तिनकों सदा श्रीवल्लभाचार्यजीही शरण (आश्रयस्थान) हे ॥ ३३ ॥ टीका—उपर विप्रयोगआर्तिको प्रकार कह्यो ताको अनुभव जा भांति होय सो कहतहें जो पुष्टिमार्गीय वैष्णव अपने मनमें भावना करे काहूसों कहे नांही याभांति भावना करतकरत श्रीवल्लभाचार्यजीके चरण-कमलके प्रसादतें पुष्टिमार्गके फलकी प्राप्ति निश्चय होय सो सर्वोत्तममें नाम श्रीगुसांइजी कहेहें “अशेषभक्तसंप्रार्थ्यचरणाब्जरजो-धनः” (समग्र भक्तनकों आछीभांतिसों मेविवेयोग्यहे चरणारविंदके

गोपिकाः प्रोक्ता गुरवः साधनं च तत् । भावो भावनया सिद्धः साधनं नान्यदिष्यते ” [कौण्डिन्यऋषि और गोपीजन भक्तिमार्गके गुरुहैं और साधन विननें कियो सोहीहे भावनातें भाव सिद्ध होयहैं और साधन नाहीहे) तातें पुष्टिमार्गके गुरु गोपीजन और मर्यादामार्गके गुरु कौण्डिन्य ब्राह्मणहैं इनके प्रकारसों भावविचारि दैन्यही भक्तिके भावमें कारणहे एसें जानौं ॥ २९ ॥

मूलं—फलमत्र हरेर्भावो विरहात्मा सदा मतः ।

रसात्मकत्वात्तद्रूपे सर्वलीलासमन्वितः ॥ ३० ॥

स्वरूपे तस्य सततं साक्षात्कारो विशेषतः ।

युगपत् सर्वलीलानामनुभूतिः प्रजायते ॥ ३१ ॥

शब्दार्थः—विरहात्मकरूपमें रसात्मकपनोहैं तासों सर्वलीलासहित जो प्रभुको सदा विरहात्मकभाव सो इहां फलरूप मान्योहे ॥ ३० ॥ यह (विरहात्मक) भावके स्वरूपमें निरंतर विशेष साक्षात्कार होयहे काहेतें जो एककालावच्छिन्न सर्वलीलाको अनुभव होयहे “साक्षात्कारे” एसो पाठ होय तो यह (विरहात्मक) भावके साक्षात्कार स्वरूपमें निरंतर विशेषसों एककालावच्छिन्न सर्वलीलाको अनुभव होय हे ॥ ३१ ॥ टीका—यहपुष्टिमार्गमें हरिमें भाव रहे सोहि फलरूपहे तातें विरहात्मक मन होय आवे काहेतें जो संयोगके अनुभवमें अंतःकरणगामी प्रभु नाहीहे बाहिरकी सब इंद्रियसों देहको विनियोगहे और विप्रयोगमें अंतःकरणमें सब सिद्ध होतहे तातें विप्रयोग भाव हृदयमें राखे यह पुष्टिमार्गमें येही सिद्धिहे काहेतें जो संयोगमें तो जहांलों दर्शन होय तहांलोंहि सुखहे और विप्रयोगमें रसात्मक पुरुषोत्तमको सर्वलीला संयुक्त अनुभव सर्वठोर होतहे तातें विप्रयोग भाव सर्वोपरिहे जामें सबठोर प्रभुको साक्षात्कारहे सो आगे कहतहैं ॥ ३० ॥ विप्रयोगमें

अनधिकारीहे सो आछी क्रिया ओर वचनकरि साध्यहे ज्ञानशून्य (अज्ञानी) तथा विपरीतज्ञानवानहे सो आध्यात्मिक अनधिकारीहे सोहू यथार्थ तत्वबोधतें शुद्ध होतहे ओर प्रीति रहित जो महादुष्टहे सो कोउ उपायसों साध्य न होय जेसैं जन्मतें नपुंसक होय सो कहू औषधनसों पुरुष न होय तेसैं जामें प्रीति नाहीहे सो आसुरी जाननो वाके संगतें आसुरावेश होय तातें भक्तिमार्गमें रहिवेवारो उनको त्याग करे यह निरूपणहे । उपर विप्रयोगभाव सर्वोपरि कहे ताको साधनहू कृपाहे परंतु दुःसंगादि अनेक प्रतिबंध हे तिनतें वचे तव सिद्ध होय तासों जो दोष पुष्टिमार्गमें बाधकहे सो कहतहैं.

मूलं-तदीयानां महद्दुःखं विजातीयेन संगमः ।

संभाषणं सजातीयैरसंगो भाषणं च न ।

तदेतदुभयं जातं ममैवाद्य स्वभाग्यतः ॥ १ ॥

शब्दार्थः—बहिर्मुखसों संग तथा भाषण ओर भगवदीयको संग नाही तथा भाषणहू नाही यह भगवदीयनकूं बडो दुःखहे सो दोउ अपने भाग्यतें मोकूं अव प्राप्त भयेहे ॥ १ ॥ टीका—अव श्रीहरिरायजी कहतहैं जो यहपुष्टिमार्गीयवैष्णवकों एक यह बडो दुःखहे जो विजातीय (अन्यमार्गीय) को संग होय सो ओरकी में कहा कहों मोकों विजातीयको संग भयोहे तातें मेरे मनमें महादुःखहे जेसैं ब्रजभक्तनकों श्रीकृष्णकी कथावार्त्तामें प्रतिबंध करिवेवारे संग दुःखदायीहे सगरे भक्त मिले तव सुखतें मिलिकें लीलावार्त्ता करि परमआनंद पावे तहां कोउ लौकिकजन आवे तव यहवार्त्ता रहिजाय ओर दुःख होय. तेसेही पुष्टिमार्गीय वैष्णव परस्पर भगवद्वार्त्ता करत होय तहां एकहू अन्यमार्गीय तथा बहिर्मुख आवे ताकरि दुःख होय सो मोकोंतो दशोदिशातें

रजरूप धन जिनके] याभांति पुष्टिमार्गीयं भगवद्भक्त श्रीआचार्यजी महाप्रभुजीके चरणकमलकी रजकों अपनो [सर्वस्व] धन जानेहैं तिनकों श्रीकृष्णाधरामृतफलकी सिद्धि होतहे तातें श्रीआचार्यजीके चरणकमलके प्रसादतें पुष्टिमार्गीय भगवदीयकों फल होय ॥ ३२ ॥
 उपर कहे ताप्रकार निरंतर सर्वभावकरि सर्वथा श्रीआचार्यजीके चरणकमलको आश्रय राखे ओर विप्रयोगकी भावना निरंतर सर्व भावकरि सर्वथा कर्त्तव्यहै अपने मनसों कपट छलको त्याग करि हृदयमें श्रीकृष्णचंद्रके शरण होय तथा शुद्ध भगवदीय श्रीकृष्णरसमें रसिक होय तथा श्रीआचार्यजीमहाप्रभुजीके चरणकमलके शरण होय दैन्यभावकरि निःसाधन होय रहे तिनकों पुष्टिमार्गीय फलकी प्राप्ति निश्चय होय ॥ ३३ ॥

इति श्रीहरिरायजीकृतं चतुस्त्रिंशत्तमं शिक्षा-
 पत्रं श्रीगोपेश्वरजीकृतव्रजभाषाटीका-
 समेतं समाप्तम् ॥ ३४ ॥



शिक्षापत्र ३५.



अब पंचत्रिंशत् शिक्षापत्रमें भगवदीयनों विजातियनको संग ओर सजातियनको असंग होय सो महादुःखदायकहे सो दोउ मोहूं प्राप्तहे जो श्रीभगवानको द्वेष करिवेवारोहे सो तक्षकतुल्यहै जेसैं ब्राह्मणके पुत्रने भेज्यो एसो तक्षकनाग महाभगवदीय परीक्षितकूं डस्यो तेसैं भगवद्द्वेषी दुष्टकर्मकरिवेवारो दुर्वचनतें भगवदीयनकूं दुःख देतहे तामें भगवद्द्वेषी जो दुष्टकर्मकरिवेवारोहे सो आधिभौतिक

बड़ी पीडा होत है एसो दुःसंग मोकों मिल्यो है जो रंचक मेरे मनमें धीरज नांही होतहे तातें आपतें धीरज नांही रहतहे ॥ ३ ॥

मूल—इदानीं तु जनाः प्रायो दुःसंगपदवीं गताः ।

शुद्ध मनः कलुषितुं क्षणेनाविविचक्षणाः ॥ ४ ॥

शब्दार्थः—बोहोतकरिकें अव तो मनुष्य दुःसंगकी पदवीको प्राप्त भयेहे सो शुद्ध मनको एकक्षण [संग] तें मलीन करिवेमें अतिविचक्षण [चतुर] है ॥४॥ टीका—अपनो हित नांही दीसतहे हिततो भगवदीयके संगतें होय ओर अष्टप्रहर दुःसंगतें अहित होय सो मोकों अष्ट-प्रहर दुःसंगहे तातें मोकों अपनो हित नांही दीसतहे सो श्रीभागवतमें कह्योहे ओर श्रीआचार्यजी महाप्रभुजी तथा श्रीगुसाईजी कहेहें जो दुःसंगतें वैष्णवजन निश्चय दुःख पावे सो दुःसंग मोकों आयमिल्योहे तासों दुःख पावतहो तहां कोई कहे जो तुम दुःख क्यों पावतहो ? अज्ञानी होय सो दुःसंगतें दुःख पावे तुम तो अनेक शास्त्र जानतहो तातें दुःसंग तुहारो कहा करे ! यामांति कोई कहे तहां कहतहें जो शुद्ध मन सुंदर बुद्धि होय ताहूको चित्त दुष्टपापीके संगतें एकक्षणमें भ्रष्ट होयजाय एसो दुःसंग बाधकहे सो श्रीगुसाईजी विज्ञप्तिमें कहेहें " अहं कुरंगीदृग्भंगिसंगिनांगीकृतोऽस्मि यत् । अन्यसंबंधगंधोऽपि कंधरामेवबाधते (जासों में ब्रजभक्तनके संगि जो श्रीकृष्ण तिनको अंगीकृतहों तासों अन्याश्रयको गंधहे सोहू ग्रीवाकों बाध करतहे) यामांति रंचकहू अन्यसंबंध होय तो गरो कटे सो चोराशी वैष्णवकी वार्तामें प्रसिद्धहे जो संभरवारे दामोदरदासकी स्त्रीने रंचक अन्याश्रय कियो तो पुत्र म्लेच्छ भयो तातें दुष्टके संगतें बुद्धि भ्रष्ट होतहे सो दुःसंग मोकों मिल्योहे तासों में दुःख पावतहों तहां कोई कहे जो एसे दुःसंगको वेगिही त्याग करिदेउ तब सुंदर बुद्धि रहेगी यामांति.

विजातीयको संग भयो हे ताकरि में बहुत दुःखीहों संभाषण तो सजा-
तीय वैष्णवसों चाहिये सोतो प्राप्त नांहीहे अन्यमार्गीयके संग अष्टप्रहर
संभाषण करनोपरतहे यह मोकों परमदुःखहे सो दुःख दूरि नांही करि-
सकतहों यहदोय मेरे भाग्यमें आय प्राप्तभयेहे एकतो भगवदीयको संग
चहियें सो तो मिलत नांही ओर दूसरे अन्यमार्गीय (विजातीय)
को संग न चहियें सो अष्टप्रहर रहतहे यह दोय मोकों प्राप्तहे सो
पुष्टिमार्गमें विरोधीहे सो दोय मेरे भाग्यतें आय प्राप्त भयेहें ॥ १ ॥

मूलं—दुःखांतरं तु ज्ञानेन भक्त्या वापि निवर्त्तते ।

लौकिकं विषयप्राप्त्या न हि दुःसंगजं क्वचित् ॥२॥

शब्दार्थः—दूसरो दुःख होय सो तो ज्ञानकरिकें अथवा भक्तिकरिकें
निवृत्त होतहे लौकिक (शब्दादिक विषय नांही मिलवेतें भयो एसो)
दुःख विषयकी प्राप्ति होय तातें निवृत्त होतहे परंतु दुःसंगतें उत्पन्न
भयो दुःख कोउ बखत निवृत्त नांही होतहे ॥ २ ॥ टीका—दूसरो दुःखतो
ज्ञान अथवा भक्तितें निवृत्त होतहे लौकिक विषयादिककी प्राप्तिको
दुःख होय सो विषय मिलेतें निवृत्त होतहे परंतु ताही दुःखतें दुःसंग,
दुःखहे सो बडोहे जो काहूतें निवृत्त नांही होतहे सो श्रीभागवतमें कह्यो
जो विषयतें विषयिको संगहे सो महाबाधकहे काहेतें जो उनके संगतें
अष्टप्रहर विषयमें ध्यान रहे विषयावेश होय तासों एसे विषयके संगी
बहिर्मुखको संग मोकों भयोहे ताकरि महादुःखहे ॥ २ ॥

मूलं—दुष्टानां दुर्वचोवाणौर्भिन्नं मर्मणि महपुः ।

न कापि लभते स्वास्थ्यं समाहितमपि स्वतः ॥३॥

शब्दार्थः—दुष्टजनके दुर्वचनरूप वाणकरिकें मर्ममें भिद्यो एसो मेरो श-
रीर आपतें समाहित भयोहे तोहू कहुं स्वस्थताकों नांही प्राप्त होतहे ॥ ३ ॥
टीका—दुष्टके दुर्वचनरूपी वाण मेरे शरीरके मर्मकों वेधतहें ताकरिकें

मूलं-भगवद्द्वेषितां यातः स तु तक्षक एव हि ।

यथा विप्रार्भकवचःप्रेरितः क्रोधमूर्च्छितः ॥ ६ ॥

अदशत्स समागत्य महाभक्तं परीक्षितम् ।

तथा दुर्जनवाक्यैकप्रेरितो ह्यतितामसः ॥ ७ ॥

अवज्ञया दुर्वचनैरधिक्षेपेण मामयम् ।

दुष्कर्मा भौतिको दुष्टः स साध्यः सत्क्रियोक्तिभिः ॥ ८ ॥

शब्दार्थः—श्रीभगवानके द्वेषिपनेकों प्राप्तभयो सो तो तक्षकहीहे जेसे ब्राह्मणके बालक (शृंगीकृष्णि) ने भेज्यो ओर क्रोधकरिकें मूर्च्छित (ज्ञानरहित) भयो एसो तक्षक आयके महाभक्त परीक्षित राजाकों डस्यो तेसे दुर्जनके वचनतेही भेज्यो एसो अति तमोगुणी यह दुष्टकर्म करिवेवारो निंदा, दुर्वचन, ओर तिरस्कार करिकें मोकुं डसतहे सो दुष्ट जाननों वह आछी क्रिया ओर वचन करिकें साध्यहे ॥ ६ ॥ ७ ॥ ८ ॥

टीका—उपर व्यावृत्तिमें दुःसंगदोष होय सो कहे अव कालदोष कहतहें भगवद्द्वेषी जो हे ताते धर्मकी रक्षा करे यह काल भगवद्धर्ममें महाबाधकहे जेसे ब्राह्मणके बालकने क्रोधकरिकें परीक्षित राजाकों शाप दियो यहकार्य कालदोषते भयो ॥ ६ ॥ राजा परीक्षित सद्भक्त भगवद्धर्ममें चतुर जिनकी रक्षा श्रीभगवानने गर्भमें कीनीहे तिनकों कलिकालके दोषते दुर्बुद्धि उत्पन्न भई सो “ब्राह्मणं प्रत्यभूद्रहन् ! मत्सरो मन्युरेवच” हे शौनक ! (शमीकृष्णिने आदरसन्मानन किये ते) यह ब्राह्मणप्रति मत्सर (इनकी ऐसी बड़ाई कहा ? जो में राजा आयोहुं ताको कञ्छु सन्मानन कियो ऐसी दोषबुद्धि) तथा क्रोध भयो) तत्र दुर्बुद्धि भई ताते मृतसर्प लेयके शमीकृष्णिके कंठमें डारिदियो यह बात इनके पुत्र शृंगीकृष्णिने सुनी तत्र क्रोधकरिकें

कहे तहां कहतहैं ॥ ४ ॥

मूलं-गृहस्थितस्य व्यावृत्तियुतस्य न हि तादृशाम् ।

संगो वारयितुं शक्यो व्यावृत्तेर्विनिरोधतः ।

अव्यावृत्तौ न विश्वासदार्यं येन तथा कृतिः ॥५॥

शब्दार्थः-गृहस्थाश्रममें रह्यो ऐसे पुरुषकों जो व्यावृत्तियुक्त [लौकिकजन] को संग व्यावृत्ति मिटिजाय तासों नांही मिटिसक-
तहे ओर अव्यावृत्तिमें विश्वासकी दृढता नांहीहे जासूं एसी कृति होत
हे ॥५॥ टीका-गृहस्थके व्यावृत्तिविना कैसें चले परदेशमें संग मनुष्य
चहियें इनको त्याग करों तो पाछें मनुष्यविना तो न चले जो राखियें
सो इनहूतें अधिक बहिर्मुख आवे तातें गृहस्थहैं सो व्यावृत्तिके लिये
राख्यो चाहियें जब अव्यावृत्ति होय तब दुःसंग छूटे तहां कोई कहे
जो तुम बड़े हो सर्वसामर्थ्ययुक्तहो व्यावृत्ति छोडि देउ तब दुःसंग
छूटिजायगो याभांति कहे तहां कहतहैं जो खोटे मनुष्यको त्याग
करि अपने घरमें बैठे रहे तो कहां दुःसंग आवे परंतु व्यावृत्ति चाहियें
तासों दुःसंग न छूटे तब मनुष्य चहियें जहां परदेशमें जईयें तहां
नित्य नूतन मनुष्यको मिलाप होय तिनको समाधान कियो चाहियें
तब दुःसंग कैसें छुटें ? तातें दुःसंग छोडिवेमें व्यावृत्ति विरोधीहे
व्यावृत्ति न करनी अव्यावृत्त रहेनों सो तो सर्वोपरि उत्तमहे सो श्री-
आचार्यजी महाप्रभुजी भक्तिवर्द्धिनीमें कहेहैं "अव्यावृत्तौ भजेत्कृष्णं
पूजया श्रवणादिभिः" (अव्यावृत्त होयकें पूजाकरिकें श्रवणादिकतें
श्रीकृष्णकों भजे) याभांति अव्यावृत्त होय तब दृढ विश्वास [धीरज]
चहियें सो धीरज छूटिजातहे जो व्यावृत्ति विना गृहस्थाश्रमको कैसें
निर्वाह होय ? यह दृढविश्वास विना अव्यावृत्त न भयोजाय तातें
कहां करियें ॥ ५ ॥

शुद्ध होतहे ॥ ९ ॥ टीका-अध्यात्मिक दुष्ट ज्ञानकरिके शून्य होय संगरो कार्य अज्ञानतें करे वाको जव कोई ज्ञानवान् वडो भगवदीय मिले वोहोत दिनलों सत्संग होय, वोहोत कष्टकरि सत्प्राणी भगवदीय अनेक भांति समुद्रायके बोध करे, तव अध्यात्मिक दुष्ट बहुतदिनमें शुद्ध होय ॥ ९ ॥

मूलं-प्रीतिशून्यो महादुष्टः स न साध्यः कथंचन ।

यथा नपुंसको नैव ह्यौषधैः पुरुषो भवेत् ॥ १० ॥

यथा त्रिदोषग्रस्तो न कथंचिदपि जीवति ।

प्रीतिशून्यो नीरसश्च न तथा श्रवणादिभिः ॥ ११ ॥

शब्दार्थः-प्रीतिकरि शून्यहे सो महादुष्ट कोई उपायसों साध्य नांही जेसें नपुंसक होय सो औषधनतें पुरुष नांही होय जेसें त्रिदोषग्रस्त होय सो कोई रीतिसूं जीवे नांही तेसें प्रीति शून्य नीरस श्रवणादिकते सिद्ध नांही होय ॥ १० ॥ ११ ॥ टीका-प्रीतिकरिके शून्यहे सो महादुष्ट आधिदैविक दुष्ट असाध्य जाननो कोटिकल्पलों सत्संग होय परंतु केसेहू ज्ञान वाके हृदयमें नलगे केवल प्रवाही आसुरीको मन श्रीभगवानमें ओर भगवद्धर्ममें कवहू न लगे ताको लौकिक दृष्टांत कहतहे जेसें नपुंसक होय वाको कोटि औषध देई परंतु कोईप्रकार वह पुरुष न होय वामें पुरुषार्थ न होय तेसेंही आधिदैविक महादुष्टको भगवत्संवांधि ज्ञान न लगे ॥ १० ॥ जेसें त्रि(कफ, वात, पित्त)दोषग्रस्यो रोगी न जीवे ताको कछुहू औषध न लगे तेसें प्रीतिशून्य नीरस (भक्ति-रस रहित) महादुष्टहे सो कितनीहू भगवत्कथाको श्रवण करे परंतु रंचक हृदयमें भगवानमें मन न होय सो प्रवाही आसुरी जीवकी नांई जाननो सो पुष्पिप्रवाहमर्यादाग्रंथमें श्रीआचार्यजीमहाप्रभुजी कहेहें “ चर्षणी शब्दवाच्यास्ते ते सर्वे सर्ववर्त्मसु । क्षणात्सर्वत्वमायांति

“(तक्षक सर्प सातवे दिन खायगो एसो) शाप दियो यह सर्वकार्य कालदोषतें भयो नांहीतो महाभक्त परीक्षितकों एसी दुर्बुद्धि क्यों आई ? ओर बालकनें एसो शाप क्यों दियो ? परंतु सब कालदोषतें भयो तेसेहि दुर्जनके वचन सर्परूपहीहे सो तामसके आवेशमें अन्यथा बोले सो कालदोष जाननों ॥७॥ अब श्रीहरिरायजी कहतहें जो यह कलिकालमें जीव दुष्टभयेहें तामें तीन प्रकारके दुष्टहें आधिभौतिक १ आध्यात्मिक २ ओर आधिदैविक ३ तामें आधिभौतिक ओर आध्यात्मिक तो काहू समय भगवद्धर्ममें आवे परंतु आधिदैविक दुष्टतो कबहू भगवद्धर्ममें न आवे ऐसे आधिदैविक दुष्टको कबहू संग न करियें सो तीन्यो दुष्ट कैसें जाने जाय ताके लिये तीन्योंके न्यारे न्यारे लक्षण कहतहें अनेक दुर्वचन कहे, अज्ञान करि अवज्ञा करे, दुर्वचनसों अपने मनको विक्षेप करे, ओरके मनको विक्षेप करे ओर शरीरतें दुष्ट कर्म करे, पापाचरण करे, सो भौतिक दुष्ट जाननो ऐसे दुष्टकों आछे भगवदीयको जब संग होय तब भगवत्सेवादिक सब करे, कठिन बोलिवोहू छुटिजाय, मनको विक्षेपहू छुटिजाय, भगवदीयके संगतें भौतिक दुष्टकों भक्ति बेगि होय ॥ ८ ॥

मूलं—आध्यात्मिको ज्ञानशून्यो ह्यन्यथाज्ञानवानपि ।

कष्टसाध्यः कदाचित्स तत्त्वबोधेन शुद्ध्यति ॥ ९ ॥

शब्दार्थः—ज्ञानशून्य ओर अन्यथा [विपरीत] ज्ञानयुक्त आध्यात्मिक दुष्ट जाननों सोहू कष्टसाध्यहे सो कोउदिन तत्त्वबोधकरिकें

१ गर्भमें परीक्षित राजाकी प्रभुनें रक्षा कीनी ओर अब क्यों नांही कीनी ? एसी शंका होय ताको समाधान यहहे जो परीक्षितद्वारा कितनोक कार्य करावनी हतो सो करायो फिर श्रीभागवतप्रवृत्ति लोकमें कगवनी हती तामूं शापके निमित्ततें श्रीगंगाजीके तट्ये घेठायो तब शुक्रदेवजी आय श्रीभागवतकी कथा कही ओर ग्रन्थास्य शांत कीयो हतो ताको सत्यताहू ग्राम्णद्वारा शाप दियाय राखी.

दक्षिणा, व्रत, यज्ञ, छंद तीर्थ, नियम, यम, कोउ वश नांही करत हे जेसो सर्वसंगकों मिटायवेवारो सत्संग मोकों वश करत हे तेसो कोउ वश नांहीकरतहे सत्संगतें यातुधान, दैत्य, सृग, मृग, गंधर्व, अप्सरा, नाग, सिद्ध, चारण, गुह्यक, वृत्रासुर प्रह्लादादिक वोहोत मेरे चरणार-विंदकों प्राप्त भये हैं) इत्यादिक वचनतें सत्संग सवतें बडो हे तातें तादृशीयके संगविना नित्य दुःसंगतें आसुरभाव होतहे ॥ १२ ॥

मूलं—दुष्कर्मा कर्मदुष्टः स्यात् ज्ञानदुष्टोऽन्यथादृशिः ।

प्रीतिशून्यो भक्तिदुष्टस्तत्तन्मार्गगतस्त्यजेत् ॥ १३ ॥

शब्दार्थः—दुष्टकर्मचारो कर्मदुष्ट होय, विपरीत दृष्टिवारो ज्ञानदुष्ट होय, ओर प्रीतिशून्य भक्तिदुष्ट होय, तासों भक्तिमार्गमें रहिवेवारो इनकों तजे. अथवा जो जो मार्गमें ऐसे तीन दुष्ट होय सो सो मार्गमें रहिवेवारो इनकों तजे ॥ १३ ॥ टीका—अब श्रीहरिरायजी कहतहैं दुष्कर्मा होय सो कर्मदुष्ट भौतिकदुष्ट जाननो ओर अन्यथा (विपरीत) ज्ञान-वान् ज्ञानदुष्ट आध्यात्मिकदुष्ट जाननों सो सत्संग भयेतें भगवद्धर्ममें आवे ओर जो प्रीतिशून्य आधिदैविक दुष्टहे सो आसुरी जाननो ऐसे-को तो यह भक्तिमार्गीय सर्वथा त्याग करे तब भगवद्धर्म रहे यह निश्चय हे ऐसे आसुरके रंचकहू संवंधतें बुद्धिको नाश होय जाय अन्याश्रय होय सो पुष्टिमार्गमें महाबाधकहे ॥ १३ ॥

इति श्रीहरिरायजीकृतं पंचत्रिंशत्तमं

शिक्षापत्रं श्रीगोपेश्वरजीकृतव्रजभाषा-

टीकासमेतं समाप्तम् ॥ ३५ ॥

रुचिस्तेषां न कुत्रचित्” [चर्षणी जीव सर्वमार्गमें क्षणमें आवे परंतु इनके कटूहू रुचि न लगे] ऐसे प्रवाही आसुरीजीवकीनाई जन्मजन्ममें संसारासक्तिमें पयों रहे याकों भगवत्प्राप्ति न होय सो कृष्णदासजी गायेहैं “गुणप्रताप देखियत अपने चख अश्मसार ज्यों भेदे न तोय” जेसैं अश्मसार (काले पत्थर)कों लेकैं हजार वर्षलों जलमें डारिराखे परंतु जल उहपत्थरकों न भेदे जब निकारे तब सुकिजाय तेसैं प्रीतिशून्य आधिदैविक महादुष्ट यहपुष्टिमार्गको प्रताप देखिके गुणहू सुने परंतु कबहू भगवद्धर्मको हृदयमें रंचकहू लेश न आवे ऐसे प्रीतिशून्य नीरस (भक्तिरसकरि रहित) बहिर्मुखहे ॥ ११ ॥

मूलं-प्रायः स आसुरो जीवो यस्मिन् प्रीतेरसंभवः ।

तादृशैर्नित्यसंगेन भवेदासुरभाववान् ॥ १२ ॥

शब्दार्थः—जामें प्रीतिको असंभव होय सो बोहोतकरिकें आसुर जीव जाननो ऐसे आसुर जीवनके साथ नित्य संगतें आसुर भाव-वारे होय ॥ १२ ॥ टीका—उपर कहे ऐसे प्रीतिशून्य महा दुष्ट होय ताकों आसुर जीव जाननों उह जीवमें प्रीतिकी संभावनाहू नाहींहे तातें एसेको संग छोडनो भगवदीयके संग विना नित्य आसुरभाव होतहे जब नित्य तादृशीयको संग होय तब यह आसुरभाव निवृत्त होय सो श्रीभागवतएकादशस्कंधमें श्रीकृष्ण उद्धवप्रति कहेहैं “ न रोधयति मां योगो न सांख्यं धर्म उद्धव । न स्वाध्यायस्तपस्त्यागो नेष्टापूर्तं न दक्षिणा ॥ १ ॥ व्रतानि यज्ञाश्छंदांसि तीर्थानि नियमा यमाः ॥ यथावरुंधे मत्संगः सर्वसंगापहोहिमाम् ॥ २ ॥ सत्संगेन हि दैतेया यातुधानाः खंगा मृगाः । गंधर्वाप्सरसा नागाः सिद्धाश्चारणगुह्यकाः ॥ बहवो मत्पदं प्राप्तास्त्वाष्टकायाधवादयः” [मोक्ष, योग वश नाहीं करतहे, सांख्य वश नाहीं करतहे, हे उद्धव, धर्म

तामें स्वस्थ होयकें रहे नहीतो सर्वथा पाछो फिरे तेसें चिंतातुर चित्तमें सकलगुण करिकें पूर्ण प्रभु केसें प्रवेश करे ? ॥१॥ २ ॥ टीका—अब श्रीहरिरायजी सगरे पुष्टिमार्गीयकों शिक्षा करतहें जो हे सगरे पुष्टिमार्गीय वैष्णव ! तुमको लौकिक चिंता नांही कर्त्तव्य हे काहेतें जो जाको चित्त चिंताकरिकें व्याकुल होय ताके हृदयमें सकल गुणयुक्त प्रभु केसें आय बसें ? चिंता सकल दोषनकीमाता हे जहां चिंता आई तहां सकल दोष आये अब हृदयमें दोष आये तब सकलगुणयुक्तप्रभु कोन प्रकार आवे ! ताहीतें श्रीआचार्यजीमहाप्रभु नवरत्नग्रंथमें कहेहें “चिंता कापि न कार्या निवेदितात्मभिः कदापि” (निवेदितात्म जीवनकों कोईसमयहू कछु चिंता नांही कर्त्तव्यहे) अपनों सगरो पदार्थ भगवानकों निवेदन कियो पाछें चिंता क्यों करतहे ? सर्वथा चिंता न करे सर्वकरणसमर्थ भगवान् धनी माथेपेहें तातें लौकिक चिंता कछुहू नांही कर्त्तव्यहे ॥१॥ अब लौकिक दृष्टांत कहतहें जेसें लौकिकमें गृहको धनी गृहकों शुद्ध करि संमार्जन करि सगरो कूडा बाहिर निकारि आछो शुद्ध गृह करि तामें रहतहे तेसें श्रीकृष्ण जा वैष्णवको हृदयरूप घर शुद्ध देखतहें चिंताको दोष जाके हृदयमें नांहीहे उहवैष्णवके हृदयमें प्रभु पधारेहें काहेतें जो चिंता लौकिकहे सो श्रीकृष्णके चरणकी विस्मारकहे चिंता भई तब लौकिकावेश हृदयमें भरयो रहे तब हृदयमें प्रभु केसें पधारे ! तातें श्रीआचार्यजीद्वारा निवेदन किये पाछें सगरी चिंता, काम, क्रोध, मद, मत्सर, यह हृदयमें कूडा (मेल) हे तिनकों निकासिकें अपनो हृदय शुद्ध करि शांत चित्त करि एक श्रीकृष्णहीको आश्रय करि रहे तब प्रभु वह वैष्णवको हृदय शुद्ध देखिकें प्रसन्न होय वामें पधारे कृपा करिकें अपने स्वरूपानंदको अनुभव करावे ॥ २ ॥

शिक्षापत्र ३६.

अब पद्मत्रिंश शिक्षापत्रमें भक्तिमार्गीय वैष्णवनकों चिंता नांही कर्त्तव्यहे जेसैं बुहारी काढिकें शुद्ध घर कियो होय तामें गृहपति रहे तेसैंही चिंतादिक करिकें रहित चित्तमें प्रभु पधारे जो चित्तमें चिंतादिक होय तो प्रभुको आवेश न होय तासों नवरत्नग्रंथमेंहू श्रीआचार्यजी-महाप्रभुजी चिंता नांहीकरनी एसे निरूपणकियेहैं धर्ममार्गके विचारमेंहू कलियुगमें कर्त्ता लिप्त होतहे संसर्गको इतनो बाध नांही हे यद्यपि अवैष्णवनके संग नांही रहनो एसैं श्रीआचार्यजीकी आज्ञा हे तोहू लोकको संकोच राखनो ओर इनकी निवृत्तिमें यत्न राखनो अपने मनको मोह करे एसी चिंता नांही करनी वह चिंतातैं आयुष्य व्यर्थ जातरहे भगवच्चरणारविंदमें चित्त स्थापन करनो यह शरीर संबंधीकी अहंताममता छोडनी प्रतिबंधकी निवृत्तिके अर्थ हरिकी शरणभावना राखनी हरिही सर्वसिद्ध करेंगे अपनकों तो श्रीआचार्यजीकी आज्ञा प्रमाण निवेदनको अनुसंधान मात्र करनो यह निरूपणहे उपर कहे जो एसे दुःसंगको छोडे तब भगवद्धर्मरहे तेसैंही लौकिक चिंताहू छोडे तब प्रभु हृदयमें पधारे सो चिंता निवृत्तिको प्रकार अब कहतहे—

मूलं—नैव चिंता प्रकर्त्तव्या लौकिकी भक्तिमार्गैः ।

चित्ते चिंतातुरे कृष्णः कथमाविशते गुणैः ॥१॥

यथा गृहे गृहपतिः शुद्धे संमार्जनादिभिः ।

स्वस्थस्तिष्ठत्यन्यथा तु परावर्त्तेत सर्वथा ॥२॥

शब्दार्थः—भक्तिमार्गीय वैष्णवनकों लौकिकी चिंता नांही कर्त्तव्यहे काहेतैं जेसैं गृहको मालिक गृह लिपिके झाडिकें शुद्ध राख्यो होय

तथापि लोकसंकोचः कर्तव्यस्त्वग्रदर्शनैः ।

मनः स्थाप्यं तन्निवृत्तौ समये तन्निवर्तनम् ॥६॥

शब्दार्थः—तेसेही दूसरे युगमें यह (कलियुग) पंचमपनेतें गिन्यो जातहे यद्यपि अपने श्रीआचार्यजीने कह्यो हे जो अवैष्णवनेके संग नांही रहनो ॥५॥ टीका—तोहू आगे केसे करिवैमें आछो होय एसो विचार करिवेवारेनको लोकसंकोच करनो ओर इनकी निवृत्तिमें मन स्थापन करनो सो समय आवे जब निवृत्त करनो ॥६॥ टीका—युगांतर जो सत्ययुग, त्रेतायुग, द्वापरयुग, कलियुग, यह चारो युग आवतहें तामें अब यह वर्तमान कलियुगहे सो पंचम हे उत्तमतें उत्तम हे यह चारोयुगमें नांहीहे काहेतें जो यायुगमें श्रीवल्लभाचार्यजी पूर्णपुरुषोत्तमको प्राकट्यहे सो श्रीगुसाँइजी सप्तश्लोकीमें कहेहें “मायावादकर्षद्रुद्धिदलनेनास्येदुराजोद्भूत श्रीमद्भागवताख्यदुर्लभसुधावपेण वेदोक्तिभिः । राधावल्लभसेवया तदुचितप्रेम्णोपदेशैरपि श्रीमद्वल्लभनामधेयसदृशो भावीनभूतोऽस्त्यपि” (मायावादरूप मदोन्मत्तहस्तीके गर्वको तोडिवेतें श्रीठाकुरजीके मुखचंद्रराजतें प्रकट भयो एसो जो श्रीमद्भागवतनामको दुर्लभसुधा [अमृत]को वर्ष [वृष्टि] ताकरिकें, वेदके वचनतें श्रीराधावल्लभ [श्रीकृष्ण]की सेवाकरिकें, ओर वह सेवामें योग्य एसे प्रेमसहित उपदेशनतेंहू श्रीवल्लभाचार्यजी बराबर [कोउ] नांही होयगो, नांही

१ चंद्र तो एकहे ताको राजा केसे संभवे ! एसी शंका होय ताको समाधान यह हैं जो श्रीठाकुरजीकी वाणीरूप श्रुतिरूपा भक्त अनेकहें सो चंद्ररूपहें तिनके (मायात्मक) आपहें तासों चंद्रराज कहेहें. २ युगलगीतमें इंद्र, शिव ओर ब्रह्मा, इनकोहू यह रसको तत्वज्ञान नांहीहे एसे निरूपणहे तहां दुर्लभताको स्पष्ट वर्णनहे. ३ वृष्टितें जेसे बीज उत्पन्न होयहे तेमेंही यह सुधाकी वृष्टि कर्णद्वारा हृदयमें प्रवेशकरे तब मावरूप अंकुर उत्पन्न होय. ४ वेद (श्रुति) श्रुतिपादन करतहे मो “ असंश्रुता फलमिदं न परं विदामः ” यह श्लोकमें प्रजमत्तननै निरूपण कियो हे यह वचनके अनुसार प्रभुकी सेवा प्रगट करीहे.

मूलं—उक्तं च प्रभुभिस्तस्मान्नवरत्ने कृपालुभिः ।
अतोऽन्यविनियोगेऽपि चिंता का स्वस्थ सोऽपि चेत् ॥ ३ ॥

शब्दार्थः—तासों कृपालु श्रीमहाप्रभुजीनें नवरत्नग्रंथमें कह्योहे जो (पुत्र स्त्री आदिके लिये द्रव्यादिकको विनियोग होय तब) यह हू अपनो हे तो अन्यविनियोग निमित्तहू चिंता कहाहे ? ॥ ३ ॥ टीका—तहां कोई कहे जो अन्यविनियोग होतहे यह प्रभुकी सेवा टहल न बने तबतो चिंता करनी तहां श्रीहरिरायजी कहतहैं जो हमारे श्रीवल्लभाचार्यजी परमकृपालु हैं सो नवरत्नग्रंथमें निरूपण कियेहैं जो अपनतें अन्यविनियोग होय तबहू कछु चिंता न करनी काहेतें जो येहू अपनोहे तातें चिंता छोडि एक प्रभुको दृढ आश्रय हृदयमें राखनो ३
मूलं—धर्ममार्गविचारेऽपि कलौ कर्तैव लिप्यते ।

न संसर्गकृतो दोषस्तथा कलियुगे भवेत् ॥ ४ ॥

शब्दार्थः—धर्ममार्गके विचारमेंहू कलियुगमें कर्ताही लिप्त होयहे (ओरयुगमें जेसो संसर्गको दोषहे तेसो) कलियुगमें संसर्गको दोष नहीं हे ॥ ४ ॥ टीका—धर्ममार्गकी रीति विचारे तो धर्मशास्त्रमें येही सबठोर कहेहैं जो कलियुगमें दोष करे सोही लिप्त होय संसर्गको दोष कलियुगमें सर्वथा न लगे तातें संवंधीको दोष अपनकों न लगे एसी मर्यादाहे तासों संवंधी भक्तिकी रीति छोडि अन्याश्रय करे तोहू वाको समजायके अन्याश्रय छुडावे, अपन चिंता न करे वेन माने तो असें जानें जो इननें कियोहे सो येही भुक्तेंगे मोकों कहा बाधकहे ? ऐसे विचारि आपु अपने धर्ममें सावधान रहे ॥ ४ ॥

मूलं—युगांतरे तथैवायं पंचमत्वेन गण्यते ।

यद्यप्युक्तं निजाचार्यैः स्थेयं नावैष्णवैः सह ॥ ५ ॥

१ अपने श्रीआचार्यजीद्वारा निवेदन कियोहे तब पुत्र स्त्री गृह आदि सबको निवेदन भयोहे तातें येहू प्रभुके भयेहे तासों इनके लिये विनियोग होय तामें चिंता कहा ?

मूलं-वृथा चिंता न कर्तव्या स्वमनोमोहकारणम् ।
 यथा सच्छिद्रकलशाजलं स्रवति सर्वशः ॥ ८ ॥
 तथायुः सततं याति ज्ञायते न गृहस्थितैः ।
 एवं हि गच्छत्यायुष्ये क्षणं नैव विलम्बयेत् ॥ ९ ॥
 भगवच्चरणे चेतः स्थापनेऽतिविचक्षणः ।

शब्दार्थः—अपने मनके मोहके कारणरूप वृथा चिंता न करनी काहेतें जो जेसैं छिद्रयुक्त कलशसों चारों ओरतें जल स्रवतहे तेसैं आयुष्य चलयो जातहे सो गृहस्थाश्रमीकों जानिवमें नांही आवतहे एसैं आयुष्य चलयो जातहे तामें श्रीभगवानके चरणारविंदमें चित्त स्थापन करिवेमें अतिचतुर एसो वैष्णव क्षणमात्र विलंब नांही करे। ८। टीका—वृथा चिंता सर्वथाही नांही कर्तव्यहे काहेतें मनको मोह होय मोहको कारण एक वृथा चिंताहीहे यह निश्चयही जाननो ताको दृष्टांत कहतहें जेसैं कलशके पेंदेमें छिद्रभयेतें सगरो जल कलशतें बाहिर बहिजातहें तेसैंहि वृथा चितामें मनको मोह उपजतहे भगवद्धर्म नांही वनिआवत आपु परम उत्तम यह मनुष्य देहहे ताको सगरो आयुष्य वीतिजातहे सो एकादशस्कंधमें राजा जनकनैं कह्योहे “दुर्लभो मानुषो देहो देहिनां क्षणभंगुरः । तत्रापि दुर्लभं मन्ये वैकुण्ठप्रियदर्शनम्” (या वचनसों यह मनुष्यदेहहे सो महादुर्लभहे ओर क्षणमें भंग होय एसो हे तामेंहू वैकुण्ठ (श्रीभगवान्) के प्रिय भक्तको दर्शन दुर्लभहे एसैं में मानतहों) सो यह देह पायकें प्रभुको आश्रय करे तो उनकों फल सिद्ध होय परंतु जीव वृथा चिंता करिकें मोह करिकें संसारमें जातहे॥ ८॥ उपर कहे ताभांति यह मनुष्यदेहको आयुष्य क्षणक्षणमें छीजतहे यह विचार निरंतर करि जाने जो यह गृहस्थाश्रममें मोकों तो सगरे बहिर्मुख दुःसंगी मिलेहें यह भगवद्धर्ममें सदा बाधही करेंगे याभांति

भयोहे, ओरहेहूँ नाहीं) ओर वधार्हमें कहेहैं “ एसी भई न ह्वेहे कवहूँ जेसी अव निधि आई ” याभावतें एसो मनमें जाननो जो एसो कलियुग कवहूँ नाहीं भयो ओर न आगें होयगो तातें अव दैवी-सृष्टिके जीवके उद्धारार्थ श्रीआचार्यजीमहाप्रभु पधारिकें पुष्टिमार्ग प्रकट कियोहे तातें यह युग ओर युगतें न्यारोहीहे एसें जाननो ओर अपने श्रीआचार्यजी कहेहैं जो अवैष्णवनके संग न रहेनो॥५॥ तोहूँ अवतांइ लोकसंवंधि संकोच आयपडे वोहोत दुःख होतजाने तवतांइ उनहीमें स्थित होय इनके दोष अर्थ वोहोत क्लेश न करे परंतु अपने मनको स्वाधीन राखे समय आवे तव उनको छोडि देई अपने पुष्टिमार्गकी रीतिसों सेवास्मरणमें मनको लगावे ॥ ६ ॥

मूलं—तत्कालं तत्प्रयत्ने तु रोगस्यैवोद्भवो भवेत् ।

अतः कार्यं शनैरेव प्रतिबंधनिवर्तनम् ॥ ७ ॥

शब्दार्थः—जेसें रोग उत्पन्न भयो तव (वाको शोधन करिकें मूलतें निकारिवेमें विलंब होय सो न करे ओर) तत्काल उनको दबायवेको प्रयत्न करे तो वा समय तो दब जाय परंतु फिर वह रोग उत्पन्न होय तेसें जो प्रतिबंध आवे ताको तत्काल निवृत्त करिवेको यत्न करे तो फिर वह प्रतिबंध आयनडे तासों धीरेधीरेही प्रतिबंधको निवर्तन करनो ॥७॥ टीका—कुटुंब लौकिकादिकको संकोच जेसो आयपडेतो वासमय उनहीमें मिलिकें रहे ओर इनके त्यागकी भावना राखे सो क्रमसों वाको छोडे काहेतें जो तत्काल छोडिवेमें रोगकीसीनाँइ फेर उत्पन्न होय तासों शनैः [धीरेतें] निवृत्त करनी या भांति वैष्णवको रहनो ॥७॥

१ नाहीं भयो एसे क्यों ? ब्रजभक्त तो सर्वोपरिहे एसी शंका होय ताको समाधान यहहे जो ब्रजभक्तनकोहूँ (गोवर्द्धनधारणलीलामें अपनी रक्षा करिवेकी प्रार्थना करि सो) लौकिकावेशतें प्रेममें न्यूनता भईहे नाहींतो वासमय प्रभुकी रक्षा करिवेको उपाय करते एमो प्रेमको स्वरूप आपने निरूपण कियोहे तासों नाहीं भयो एसें कछो ओर ब्रजभक्त गुरु कोटिमेंहूँ.

कियो एसो सर्व संबंधहू खोयो मान्योहे ॥ ११ ॥ तातें वा संबंधने
 कियो एसो दुःख उत्तम वैष्णवकों नांही माननो ओर प्रतिबंधकी
 निवृत्तिके लिये हरिकों शरण करे ॥ १२ ॥ टीका—हरिके चरणारविंदमें
 मन कब लगे ? जब अपने शरीरकों प्राकृत जानें यह देहके पोषणमें
 मन न होय तब तनुजा वित्तजा सेवा मन लगायके करे. तातें शरीर-
 को प्राकृत जाने ओर जीवकों सदा नित्य प्रभुको दास जाने या
 देहको एक दिन नाश होयगो एसें जानें ॥ १० ॥ जीव ओर देहको
 संबंध काहू कालमें नांहीहे जीव तो अनादिकालतें कोटान् कोटिवार
 चोराशीलक्षयोनि भुगत्योहे तहां काहू शरीरसों संबंध नांहीहे काहेतें
 जो यह देह प्राकृत पंचतत्वकरिकें बन्योहे ओर पंचतत्वहू प्राकृतहे तो
 कारण प्राकृत होय ताको कार्यहू प्राकृत होय ओर जीव सदा एकरस
 अखंडहे ताकों अग्नि न जरावें, शस्त्र न छेद करे, एसो नित्यहे परंतु
 अविद्या जो लगीहे ताकरिकें अपनो शरीर जानतहे सो जीवकों
 अहंता ममता लगीहे याभांति सगरो संसार अहंता ममताकरि बंध्योहे
 सो यह लौकिकसंबंध सगरो झूठोहे परंतु अज्ञानकरि अहंता ममतात्मक
 अविद्याके वश होय अपनों मान्योहे ॥ ११ ॥ तातें यह लौकिक
 संबंध मिथ्याहे इनमें मन न लगावे उत्तम भगवदीयहे सो यह लौकिक
 संबंधकों उत्तम नांही जानतहे अहंता ममतारूप प्रतिबंधकी निवृत्त्यर्थ
 हरिकी शरण जातहें जहां जहां अहंता ममताहे सो सब प्रभुकों
 समर्पण करि हरिकों शरण करिलेतहें तब यह प्रतिबंध दूर होतहें सो
 नवमस्कंधमें भगवान् दुर्वासाप्रति कहेहें “ये दारागारपुत्रास्तान् प्राणान्
 वित्तमिमं परम् । हित्वा मां शरणं याताः कथं तास्त्यक्तुमुत्सहे ”
 (जो भक्त, स्त्री, गृह, पुत्र, स्नेहीवर्ग, प्राण, द्रव्य, यह लोककों
 छोडिकें मोकों शरण आयैहें इनकों छोडिवेकों में कैसे उत्साह करूं)

१ सर्व भगवानको अपेण करे तब अपनी अहंता ममता छेदे जाय.

प्रतिबंध होय तो तिनको तत्काल त्याग करे एकक्षणहू विलंब न करे काहेतें जो देह छूटनको प्रमाण नांहीहे सो श्रीभागवतसप्तमस्कंधमें प्रह्लादजी, बालकसों कहेहैं “कौमारआचरेत् प्राज्ञो धर्मान् भागवतानिह। दुर्लभं मानुषं जन्म तदप्यध्रुवमर्थदम्” (यावचनसों प्रह्लादजी कहतहैं जो हे बालक ! यह भगवद्धर्मको कुमारअवस्थाहीतें आचरन कर्तव्यहे काहेतें जो मनुष्यदेह महादुर्लभहे ताको निश्चय नांहीहे जो कब नाश होयगो ! क्षणमें नाश होय जाय तासों कुमार अवस्थातें भगवद्धर्म कर्तव्यहे) यह विचारिकें प्रतिबंधरूप गृहकुटुंबको तत्कालही त्याग कर्तव्यहे एकक्षणहू विलंब न करे कहुं दुःसंगतें मन फिरजाय तो संसारासक्ति होयजाय तातें ताहीक्षण उनको शीघ्रही त्याग करे ॥९॥ उपर कहे ऐसे प्रतिबंधको छोडिकें श्रीभगवान् श्रीकृष्णके चरणारविंदमें अपने मनकों विचक्षण होयकें स्थापन करे श्रीभगवानके चरणारविंदकों स्मरण ज्ञानी तथा मर्यादामार्गीय भक्तहू करतहे तातें विचक्षण होयकें करे एसे कह्यो ताको अभिप्राय यहहे जो पुष्टिमार्गकी रीतिसों नित्य श्रीकृष्णकी सेवादिक करि सर्व इंद्रिय, देह, मन, सब श्रीभगवानके चरणारविंदमें लगावें ।

मूलं—शरीरं प्राकृतं तद्धि ह्यनित्यं सर्वथा मतम् ॥१०॥

तत्संबंधोऽप्यविद्यातस्ततोहंममतात्मकः ।

संसारस्तकृतः सर्वसंबंधोऽपि मृषा मतः ॥ ११ ॥

तत्संबंधकृतं दुःखं नहि मंतव्यमुत्तमैः ।

प्रतिबंधनिवृत्त्यर्थं हरिं शरणमाव्रजेत् ॥ १२ ॥

शब्दार्थः—शरीर प्राकृतहे सोहू सर्वथा अनित्य मान्योहे ॥१०॥ इनको संबंधहू अविद्यासोंहे तासों अहंताममतात्मक संसारहे तिनन

भक्तको दुःख नांही सहिसकतहैं तातें भक्तनकों दुःख पावत देखेंगे तब तत्कालही दुःख निवृत्त करेंगे सो विवेकधैर्याश्रयमें श्रीआचार्यजी-महाप्रभुजी कहेहैं “अशक्ये हरिरेवास्ति सर्वमाश्रयतो भवेत्” तथा “अशक्ये वा सुशक्ये वा सर्वथा शरणं हरिः” (अपनतें न होयसके तामें हरिही (रक्षक) हैं काहेतें जो आश्रयतें सर्व सिद्ध होय) तसैं (अशक्यमें तथा सुशक्यमें सर्वथा हरिशरणहैं) याभांति हरिकी शरणभावना दृढ राखे तो प्रभु सर्व ओरतें रक्षाही करे प्रह्लादजीनैं हरिकी शरण भावना राखी ओर दुःख सह्यो तो भगवान् प्रतिबंध दूर किये भक्तकी रक्षा करी तातें सर्व छोडिकें हरिशरणकी भावना दृढ राख सो गीताजीमें भगवान् अर्जुनप्रति कहेहैं “सर्वधर्मान् परित्यज्य मामेकं शरणं ब्रज । अहं त्वां सर्वपापेभ्यो मोक्षयिष्यामि मा शुचः” (सर्वधर्मकों छोडिकें एक मोकों शरण जा में तोऊं सर्वपापतें छोडाङ्गो शोक मति करे) याभांति भगवानके शरण जाय प्रभुको आश्रय करे ताकी प्रभु रक्षा करे ओर भक्तिवर्द्धिनीमें श्रीआचार्यजी महाप्रभुजी कहेहैं (“वाधसंभावनायां तु नैकांतं वास इष्यते । हरिस्तु सर्वतो रक्षां करिष्यति न संशयः”) वाधकी संभावना होय (जो एकांतमें रहिवेमें कछू वाधक आवे एसी शंका होय) तो एकांतमें वास नांही योग्यहे (गृहमें रहिवेमें वाधक आवेकी शंका होय तहां कहतहैं हरि सर्व ओरतें रक्षा करेंगे संशय नांही) तातें सर्व प्रकार हरिकोही आश्रय करे ॥ १३ ॥

मूलं—यावच्छक्ति प्रकर्तव्यो ह्युपायस्तन्निवर्तने ।

प्रतिकूले च तत्त्यागपर्यंतं विहितं पुनः ॥ १४ ॥

शब्दार्थः—प्रतिबंधकी निवृत्ति निमित्त अपनी शक्तिप्रमाण उपाय करनो ओर [स्त्री पुत्रादिक] प्रतिकूल होय तो इनको त्याग करना

और एकादशस्कंधमें कहेहैं “ कायेन वाचा मनसेन्द्रियैर्वा बुद्ध्यात्मना वानुसृतस्वभावात् । करोमि यद्यत्सकलं परस्मै नारायणायेति समर्पयेत्तत् ” [कायाते, वाणीते, मनते, इंद्रियनते, अथवा बुद्धिते, आत्माते अथवा इनकों लागिंरहो ऐसे स्वभावते जो जो में करतहों सो सर्व परऐसे नारायणके लिये(अर्थात् पूर्णपुरुषोत्तमके लिये करतहे)ऐसे प्रभुकों सर्व अर्पण करे फेरि एकादशस्कंधमें कह्योहे “ इष्टं दत्तं जपस्तप्तं व्रतं यच्चात्मनः प्रियम् । दारान् गृहान् सुतान् प्राणान् यत्परस्मै निवेदनम् ” [जो इष्ट कियो, दान दियो, जप कियो, तप कियो, व्रत कियो और अपनकों प्रिय हे, स्त्री, गृह, पुत्र, प्राण, जो हे सो पर [प्रभु] कों निवेदन करनों] इत्यादिक वचनके अनुसार पुष्टिमार्गमें श्रीआचार्यजी द्वारा प्रभुकों समर्पण करे एक प्रभुहीको आश्रय करे ॥ १२ ॥

मूलं—भक्तदुःखासहिष्णुस्तं तदैव हि निवर्त्तयेत् ।

अशक्ये हरिरेवास्तीत्येवमेव प्रभोर्वचः ॥ १३ ॥

शब्दार्थः—[जब प्रभुको आश्रय करे तब] भक्तके दुःखकों सहन नांही करिसके ऐसे प्रभु वाहीसमय वा प्रतिबंधकों निश्चय निवृत्त करे काहेतें जो अपनसों कछु न बने तहां हरिही रक्षकहे एसोही श्रीमहा-प्रभुजीको वचनमृतहे ॥ १३ ॥ टीका—उपर कहे जो प्रतिबंधकी निवृत्तिके अर्थ सर्व पदार्थ स्त्री पुत्रादिक प्रभुमें निवेदन करे हरिकेशरण जाय परंतु तामें सगरे कुटुंबी दुःख देय, ज्ञातिको दुःख होय, तथा अकेलो होय, रोगादि दुःख होय, द्रव्यादिककी हानि होय, नेत्रादिक अंगको भंग होय, तथा राजादि दंड देय, तथा खानपानादिकको संकोच होय, और अकेलो होय सो सहायता कोन करे ? याभांति संदेह होय तहां श्रीहरिरायजी कहतहें जो यह भगवद्भक्त सब छोटिकें हरिके शरण जाय तहां कोई दुःख आवे ताकों सहे तब श्रीठाकुरजी

मूलं—स्वयं किमर्थं कर्त्तव्या पितरीव शिरःस्थिते ।

न त्यक्ष्यति कृपापूर्णः सेवकं सर्वदा श्रितम् ॥ १६ ॥

शब्दार्थः—पिताकीनाई श्रीठाकुरजी अपनी उपर विराजेहें सो अपने क्यों चिंता करनी ? काहेतें जो कृपा करिकें पूर्ण ऐसे प्रभु आश्रितसेवकको नांही छोड़ेंगे ॥ १६ ॥ टीका—पुष्टिमार्गीय वैष्णवको चिंता क्यों करनी काहेतें जो श्रीआचार्यजी तथा श्रीकृष्ण धनी माथे-पर विराजेहें तिनको काहेकी चिंताहे जेसैं यालौकिकमें बालकके माथे पिता बैठयो होय वा बालकको कहा चिंता हे ? यह लौकिक हे ओर श्रीकृष्ण तो ईश्वरके ईश्वरहैं सर्वसामर्थ्ययुक्तहैं ऐसे प्रभु [पुष्टिमार्गमें] वैष्णवके माथे विराजतहैं जिनकी कृपादृष्टि सदा एकरस भक्तन-परहे एसो वैष्णव कोई अर्थकी चिंता न करे एक प्रभुको ही दृढ आश्रय करे ॥ १६ ॥

मूलं—आचार्यशरणं तस्य चिंतालेशोऽपि नैव हि ।

तस्माच्छ्रीवल्लभाचार्यचरणाब्जद्वयाश्रितैः ॥ १७ ॥

न कापि चिंता कर्त्तव्या कृष्णसेवां विना पुनः ।

निवेदनानुसंधानचिंतामात्रं विधीयताम् ॥ १८ ॥

शब्दार्थः—जिनको दृढ श्रीआचार्यजीको शरण सिद्ध भयो हे तिनको चिंताको लेशहू नांहीहे तासों श्रीआचार्यजीके दोयचरणार-विंदको जो आश्रितहैं ॥ १७ ॥ तिनको श्रीकृष्णकी सेवाविना काहू चिंता न करनी केवल निवेदनके अनुसंधानकी मात्र चिंता करनी ॥ १८ ॥ टीका—जो श्रीआचार्यजीमहाप्रभुजीके शरणहे नाममंत्र (अष्टाक्षर महामंत्र) पायोहे तिनको चिंताको लेशहू नांही कर्त्तव्यहे सो श्रीगुसाईजी विज्ञप्तिमें कहेहैं “यदुक्तं तातचरणैः ‘श्रीकृष्णः शरणं मम’

ऐसे श्रीआचार्यजी निबंधमें कहेहैं “उदासीने स्वयं कुर्यात्प्रतिकूलं गृहं त्यजेत्” [स्त्रीपुत्रादिक उदासीन रहेते होय तो आपु सेवादिक सब करे ओर प्रतिकूल होय [अर्थात् सेवामें विरुद्ध पडे तो गृहको छोडे] ॥ १४ ॥ टीका—याभांति वैष्णव प्रतिबंधकी निवृत्तिपूर्वक हरिशरणके उपायमें रहें प्रतिबंधके त्यागमें मन राखे जो कोई कुटुंबी, स्त्री, पुत्र, माता, पितादि, प्रतिकूल होय तो तिनको त्याग करे जो अनुकूल न होय तो अकेलो सेवा करे पाछें उनको महाप्रसाद ओर प्रसादिवस्त्र दे पोषण करे जो केवल प्रतिबंधरूप होय भगवद्धर्ममें द्वेष राखे तो उनको त्याग करे काहेतें जो भगवान् आत्मसंबंधी जन्मजन्मके प्रभुहैं ओर यहदेहसंबंधी स्त्री पुत्रादिकहे उनको जहांलों देहहे तहांलों संबंधहैं देहको मरण भयो तब स्त्रीपुत्रादिकको संबंध निवृत्त भयो ताहीतें देहसंबंधीके लिये आत्मसंबंध न छोडनो ॥ १४ ॥

मूलं—सर्वथा स्वस्य चाशक्तौ हरिरेव हि रक्षकः ।

स्वकीयचिंतां कुरुतं कर्त्ता स च करिष्यति ॥१५॥

शब्दार्थः—अपनी सर्वथा अशक्तिमें हरिही रक्षकहैं सो अपने भक्तनकी चिंता करतहैं सो करेंगे ॥ १५ ॥ टीका—जो सर्वथा जीव अशक्त होय तो ताके रक्षक हरि [सर्वदुःख हर्त्ता] हीहैं सो अपने निजभक्तनकी चिंता आगेतें करत आयेहैं अब करतहैं ओर आगे करेंगे तीन्यो कालमें कबहू भक्तनको नांही भूलतहैं सो संन्यासनिर्णयमें श्रीआचार्यजीमहाप्रभुजी कहेहैं “अन्यथा मातरो बालान्न स्तन्यैः पुपुषुः क्वचित्” माता अपने बालक पुत्रको स्तन अतिप्रीतिसों न प्यावे एसो माता कबहू न करे क्षणक्षणमें बालककी रक्षाही करतहैं तेसैंही भगवान् भक्तनकी चिंता कबहू न करे ऐसैं न होय जाभांति भक्तनको हित होय सोहि सर्व करतहैं यह निश्चय जाननों ॥ १५ ॥

न करिष्यति ” [श्रीकृष्ण अपने जनकों लौकिकवैदिकमें स्थित न करे जो अज्ञानकरि कोई लौकिक वैदिकमें स्थित होय तो प्रभु वह कार्य सिद्ध न करे तब वैष्णव तत्काल याविषय चिंता छोड़िकें प्रभुको गुण माने जो यामें कछु मेरो अनिष्ट होयगो तासों प्रभु सिद्ध नाहीं किये परंतु मनमें चिंता न करे यह मेरो विगयों अव में कहा करूं एसें चिंता न करे जो प्रभुको गुणही माने शीघ्रही प्रभुको चिंतन करे जो मेरे उपर प्रभु प्रसन्नहीहे जैसे संतदासजी श्रीआचार्यजीके सेवक हते सो प्रथम बहुत संपन्न हते सो सब द्रव्य गयो फिर २० टकाकी पुंजीतें अढाई पईसामें निर्वाह करि प्रसन्न रहेते पाछें नारायण-दासने १०० मोहोर पठाई सो न राखि प्रभुकी इच्छाके अनुसार चले याभांति वैष्णव प्रभुको गुणही माने ॥ १९ ॥

इति श्रीहरिरायजीकृतं षट्त्रिंशत्तमं शिक्षापत्रं श्री-
गोपेश्वरजीकृतव्रजभाषाटीकासमेतं समाप्तम् ॥ ३६ ॥



शिक्षापत्र ३७.



अब सप्तत्रिंशत् शिक्षापत्रमें अहर्निश अपनी निःसाधनताकी भावना करनी यह निरूपणहे । उपर कहे ताप्रमाण चिंता न करनी ओर जब निःसाधन होय तब फलप्राप्ति होय सो निःसाधनताकी भावनाको प्रकार निरूपण करतहैं—

मूलं—न शुद्धभावो नैवास्ति सर्वभावो न दीनता ।

नाज्ञापरत्वं विश्वासो न चास्ति परमादरः ॥ १ ॥

तत एवास्ति नैश्चित्यमैहिके पारलौकिके” जो तातचरण (श्रीआचार्य-जीमहाप्रभुजीने) “श्रीकृष्णःशरणं मम” कह्योहे तासोंही यहलोकके तथा परलोकके फलादिकमें निश्चितताहे) इत्यादि वचनकरि पुष्टिमा-गीय वैष्णवनकों चिंता नांही कर्त्तव्यहे ॥ १७ ॥ उपर कहे जो चिंता कोई प्रकारकी नांही कर्त्तव्यहे तहां कोई कहे जो चिंता कछू नांही करनी ऐसे कह्यो तब जीव भगवद्धर्मकी चिंताहू न करेंगो ओर भगवद्धर्महू न करेंगो क्यों जो प्रथम जीवनकों भगवद्धर्ममें मनहू नांहीहे ओर तुम चिंताहू नांहीकरन कहे तासों भगवद्धर्म नांहीकरे उनकी कहागति ? याभांति संदेह होय तहां कहत हे जो श्रीकृष्णकी सेवाकी चिंता तो अवश्य कर्त्तव्यहे ओर लौकिक वैदिक फलकी तथा अपने उद्धारकी चिंता नांही कर्त्तव्यहे श्रीकृष्णकी सेवाविना तो यहपुष्टिमार्ग सर्वोपरिहे ताके फलकी प्राप्ति न होय तासों यहचिंता अवश्य कर्त्तव्यहे तातें श्रीकृष्णकी सेवा करे निवेदनको अनुसंधान अहर्निश राखे जो में कितने कालसों प्रभुको भूल्यो हतो, अब श्रीआचार्यजीमहाप्रभुजीकी कृपातें संबंध भयोहे, में दासहों, मोकों अब कहा कर्त्तव्यहे. में सर्व समर्पन कियेहे, यामें अपनी सत्ता सर्वथा नांही हे सर्व प्रभुको हे, या भांति निवेदनको अनुसंधान राखे ॥ १८ ॥

मूलं—लोके स्वास्थ्यं तथा वेदइति श्रीमत्प्रभोर्वचः ।

स्मृत्वा शीघ्रं हृदिस्था सा निवर्त्या सेवनार्थिभिः ॥१९

शब्दार्थः—श्रीआचार्यजीमहाप्रभुजी नवरत्नमें कहेहैं जो “हरि लोकमें तथा वेदमें स्वस्थता न करेंगे” यहवाक्यको स्मरणकरिकें, प्रभुकीसेवाके अर्थवारे वैष्णवनकों हृदयमें रही एसी जो चिंता सो शीघ्र निवृत्त-करनी ॥ १९ ॥ टीका—अब श्रीहरिरायजी कहतहैं जो हमारे प्रभु श्रीवल्लभाचार्यजी नवरत्नग्रंथमें कहेहैं “लोके स्वास्थ्यं तथा वेदे हरिस्तु

मूलं-न सत्संगो नैव सेवा न निवेदनं संस्मृतिः ।

नाश्रयो न विवेको हि धैर्यं न शरणस्थितिः ॥२॥

शब्दार्थः-सत्संग नांहीहे, सेवा नांहीहे, निवेदनकी सुंदर स्मृति नांहीहे, आश्रय नांहीहे, विवेक नांहीहे, धैर्य तथा शरणमें स्थिति (दृढ आश्रय) नांहीहे ॥ २ ॥ टीका-ओर साधन न होय परंतु सत्संग होय तो ताकरि पुष्टिमार्गके फलको अनुभव होय सो मोकों पुष्टिमार्गको सत्संगहू नांहीहे ७ सत्संगतें अष्टप्रहर भगवत्सेवामें मन लागे तो फल-रूप मानसी सेवा सिद्ध होय सो मेरेमें तो तनुजा वित्तजाहू नांही वनतहे तहां मानसी तो परम दुर्लभहे. यह मार्गमें तो सेवाही मुख्यहे जेसे ब्राह्मण गायत्री न पढे तो ब्रह्मत्व जाय तेमेंही वैष्णव सेवा न करे तो वैष्णवता जाय सो मेरेमें सेवाहू नांहीहे ८ ओर निवेदनको अनु-संधान यह पुष्टिमार्गमें सर्वथा चाहिये सो नवरत्नमें श्रीआचार्यजीमहा-प्रभुजी कहेहे “निवेदनं तु स्मर्त्तव्यं सर्वथा तादृशैर्जनैः” (निवेदन तो तादृशीय भगवदीयजनके संग निश्चय स्मरणकरिवेयोग्यहे) सो मोकों न तादृशीयको संगहे ओर न निवेदनकी स्मृतिहे ९ एक प्रभुको आश्रय मनमें राखे यह परम साधनहे सो श्रीआचार्यजीमहाप्रभुजी विवेकधैर्याश्रयमें कहेहें “अशक्ये हरिरेवास्ति सर्वमाश्रयतो भवेत्” (अशक्यमें हरिहि सर्वहे तासों सर्व आश्रयतें सिद्ध होय) याभांति एक श्रीकृष्णहूको आश्रय नांहीहे १० विवेक चाहिये सो श्रीआचार्यजीमहा-प्रभुजी विवेकधैर्याश्रयग्रंथमें कहेहें “विवेकस्तु हरिः सर्वनिजेच्छातः करिष्यति” [हरि (भगवान्) अपनी तथा अपने भक्तनकी इच्छासुं

१ महाभारतमें कहोहे “हराम्यघं हि स्मर्त्तृणां (हरामि दुःखं स्मर्त्तृणां) हवि-र्भोगान् क्रतुष्वहम् । वर्णोऽपि मे हरिर्बेष्टस्तस्माद्हरिहं स्मृतं” (स्मरणकरिवेचारेको पाप ओर दुःख में हर्छुं यज्ञनमें हविष्यके भाग लेउंहुं ओर रंगहू हरयो मोकों ग्रिय हे तासों में हरि कहाउंहुं तासों हरिनामकोही यह माहात्म्यहे जो भक्तनके दुःख निवृत्त करेंगे यह समझनों सो विवेकको मूलहे.

शब्दार्थः—शुद्ध भाव नांहीहे, सर्वात्मभाव नांहीहे, दीनता नांहीहे, श्रीआचार्यजीमें तत्परता नांहीहे, यह पुष्टिमार्गमें विश्वास नांहीहे, ओर प्रभुमें आदर नांहीहे, (ऐसे साधनरहितमेंहू सो प्रभु कहा करेंगे एसी भावना करे) ॥१॥ टीका—अब श्रीहरिरायजी कहतहें याभांति निःसाधन जीव होय तो प्रभु निश्चय फलदान करे सो मेरेमें निःसाधनता नांहीहे प्रथमतो शुद्ध भाव होय तब प्रभु कृपा करे सो शुद्ध भाव नांहीहे मनमें कपट, छल, ईर्ष्या, इत्यादिक भरिरह्योहे तातें श्रीकृष्णमें शुद्ध भाव नांहीहे, ओर सर्वभावहू प्रभुमें नांहीहे जो महाप्रभुजी चतुःश्लोकीमें कहेहें “सर्वदा सर्वभावेन भजनीयो ब्रजाधिपः ” (सर्वदा सर्वभाव करि ब्रजके अधिप [श्रीकृष्ण] भजन करिवेयोग्यहे ऐसे ब्रजके अधिपति [श्रीकृष्ण] हे तिनको भजन [सेवा] सदाहि सर्वभावकरिकें कर्त्तव्यहे सो मोसों नांही वनत. देहसों करतहों तो इंद्रिय मन, नांही लगत. मनमें विचार होतहे परंतु देहतें नांही वनतहे, मन, वचन, कर्म, सर्वभावसूं नांही होतहे. भलो ओर कछू न बने तो दीनता करे तातें प्रभु प्रसन्न होय सो श्रीगुसाईजी विज्ञप्तिमें कहेहें “आचार्यचरणैरुक्तं दैन्यं त्वत्तोपसाधनम्” (हमारे आचार्यजीमहाप्रभुजी श्रीसुवोधिनीजी आदिमें कहेहें जो प्रभु प्रसन्न करिवेको साधन एक दैन्यहीहे] सो दैन्य मेरेमें नांहीहे, ओर जाप्रकार श्रीआचार्यजीमहाप्रभुजीकी आज्ञा शास्त्रमें हे सो बने तोहू प्रभु प्रसन्न होय सो पुष्टिमार्गकी रीतिहे ता अनुसार आज्ञा पालनहू मोमें नांहीहे, ओर या पुष्टिमार्गमें चातकपक्षिकीनाई विश्वास राखे सो सर्वोपरहे विश्वास विना कछू सिद्धि नांहीहे सो मोमें विश्वासहू नांहीहे ओर प्रभुमें आदर नांहीहे आदर (परमप्रीति) होय तो प्रभु बिना ओरठोर मन न लो सो प्रभुमें आदरहू नांहीहे ॥ १ ॥

दुःखहानौ तथा पापे भये कामाद्यपूरणे ॥ भक्तद्रोहे भक्त्यभावे
भक्तश्चातिक्रमे कृते । अशक्ये वा सुशक्ये वा सर्वार्थे शरणं हरिः । ”
[यहलोकमें, परलोकमें, सर्वथा हरि शरणहैं. दुःखकी हानिमें तथा
पापमें, भयमें, कामादिक पूर्ण न होय तामें, भक्त द्रोह करे अथवा
भक्तको द्रोह होयजाय तामें, भक्तिके अभावमें, भक्त अतिक्रम करे
अथवा भक्तनको अतिक्रम होयजाय तामें, अशक्यमें तथा सुशक्यमें,
सर्वार्थमें हरि शरणहैं) याभांति शरणभावना राखेतो श्रीकृष्णाश्रयमें
कहेहैं “ शरणस्थसमुद्धारं कृष्णं विज्ञापयाम्यहम् ” (शरणमें रहिवेवारे
जीवनके उद्धारनिमित्त अथवा उद्धार करिवेवारे श्रीकृष्णकों में विज्ञप्ति
करूंहूँ) तातें श्रीकृष्णके शरण जाय रहे तो प्रभु उद्धार करे सो
श्रीगीताजीमें भगवान् अर्जुनप्रति कहेहैं “ सर्वधर्मान् परित्यज्य मामेकं
शरणं ब्रज । अहं त्वां सर्वपापेभ्यो मोक्षयिष्यामि मा शुचः ” [सर्व-
धर्मको छोड़िकें मोको मुख्य जानि शरणहो में तोकों सर्वपापनतें
छुडाऊँगो शोक मति करे] याभांति प्रभुके शरण होय तो प्रभु कृपा
करे सो में शरणमेंहू स्थित नांहीहों १३ ॥ २ ॥

मूलं-न माहात्म्यपरिस्फूर्तिः स्नेहस्तु न हि कुत्रचित् ।

आसक्तिव्यसनादीना कथाऽपि खलु दुर्लभा ॥३॥

शब्दार्थः-माहात्म्यकी चायोंओरतें स्फूर्ति नांहीहे, काहूस्थलमें
स्नेह नांहीहे, आसक्ति ओर.व्यसनादिककी तो कथाहू निश्चय दुर्लभहे
॥३॥ टीका-श्रीकृष्णके माहात्म्यकी स्फूर्ति हृदयमें होय तोहू प्रीति
होय जो प्रभुके प्रमेय बलतें गाय, गोपी, ऐसे निःसाधनको फलसिद्धि
भईहे. अजामिलकों पुत्रभावके नामतें तायोंहे. अविद्यारूप पूतनाकों
एकक्षणमें मारि भक्तनकी अविद्या दूरिकीनीहे. या पुष्टिमार्गमें स्त्री-
शूद्रादिकनको उद्धार श्रीमहाप्रभुजी कियेहे, रंचक कृपादृष्टितें भक्तन-

सर्व करेंगे यह समझनो सो विवेक] मनमें विचार होय जो प्रभुही सर्व करतहैं जीवको कियो कछु नांही होत हे यह विवेक वैष्णवको चाहियें सो नांही हे ११ वैष्णवको दुःखसुखमें धैर्य चाहियें सो श्रीआचार्यजीमहाप्रभुजी विवेकधैर्याश्रयमें कहेहे “ त्रिदुःखसहनं धैर्यमामृतैः सर्वतः सदा । तत्त्वदेहवद्भावं जडवद्गोपभार्यवत् ” (मृत्युसमान संकट आयजाय अथवा मृत्यु होयजाय तहांतांई सर्वओरतें सदा आध्यात्मिकादिक त्रिविध (तीन प्रकारके) दुःखको सहनकरनो सो धैर्य. तत् (छाछ) कीनांई, जडभरंतकीनांई, ओर ब्रजभक्तनकीनांई, अथवा गोपकी स्त्रीकी वार्त्ता श्रीगोकुलोत्सवजीकृत टीकामें हे वा गोपस्त्रीकीनांई देह-वारेको भावना कर्त्तव्यहे अथवा देहकीनांई भावना कर्त्तव्यहे] याभांति आध्यात्मिकादि तीनोप्रकारके दुःखको वैष्णव सहनकरे तब धैर्य देखि प्रभु प्रसन्न होय, प्रह्लादजीकीनांई टेक चाहियें सो मेरेमें धैर्यहू नांही हे १२ ओर हरिके शरणमें स्थिति होय सो श्रीआचार्यजीमहाप्रभुजी विवेकधैर्याश्रयमें कहेहें “ एहिके पारलोके च सर्वथा शरणं हरिः ।

१ छाछ मथनको सहन करतहे तब मक्खन [साररूप] निकसतहे फेर छाछमें ममत्व नांही रहतहे तेसें देह विद्यमान होय तबतांई कार्य करिलेनो ओर देह तथा देहसंबंधीमें ममत्व नांही राखनो. २ जडभरतको भद्रकालीकी पास मारिवेको लगेये तोहू सहे तब इनके तेजसों भद्रकालीकी मूर्ति भिन्नहोयके भीतरसों देवी निकसी सो जडभरतको मारिवेवारेनको मारडारे. ३ ब्रजभक्तन लौकिक वैदिक तजे तामें दुःख आये सो सहे. ४ “ हत्वा नृपं पतिमवेक्ष्य भुजंगदंष्ट्रं देशांतरे विधिवशाद्गणिकासि जाता । पुत्रं पतिं समाधिगम्य चित्तं प्रविष्टा शोचामि गोपगृहिणी कथमद्य तत्कम् ” (राजाको मारिकें पतिपास गई तहां पतिकों सपे डस्यो देखिकें देशांतरमें गई तहां प्रारब्धयोगमूं वेश्या भई तहां पुत्रके संग पतिकीनांई समागम भयो तासों चित्तमें गिरी तहांतें इहां अब गोपकी स्त्री भई सो छाछको शोक कहा करूं, ५ देहमें अहंता ममतासों बंधनहोतहे ओर जब यह छुटे ओर इनसंबंधी दुःख सहे तब उत्तम फलमिले.

भवरनो ज्यां नहि प्रवेश विधि हरनो ” एसो शुद्धमार्ग तामें प्रवेश होय एसो एकहू साधन मोमें नांहीहे तातें यह अपने मनमें जानतहों जो यह सर्वोपरि भक्तिमार्गमें दोषरूपको प्रवेश नांहीहे १८ ओर लोकधर्ममेंहू स्थिति नांही हे तातें यह अपने मनमें जानतहों जो यह अलौकिक भक्तिमार्गहे तामें स्थिति न भई तो लौकिकमें तो स्थिति होय सो में लौकिक गृहादिकमेंहू स्थित नांहीहों १९ देशादि शुद्धताको आश्रय नांही कितनेक जीव शुद्धदेश [तीर्थ] को सेवन करतहें, काशी, प्रयाग, व्रजदेशको आश्रय करत हैं सो ऐसे देशको आश्रय नांहीहे २० वैदिक धर्म कालदोषतें सिद्ध नांहीहे, कर्म-मार्गतेंहू स्वर्गादिकफल शास्त्रमें कहेहें सो कालदोषतें वैदिकधर्म सिद्ध नांहीहे सो संन्यासनिर्णयमें श्रीआचार्यजीमहाप्रभुजी कहेहें “ सुतरां कलिदोषाणां प्रचलत्वात् ” (अव कलिदोषकी प्रचलतासों एसे स्थितिहे) ओर श्रीकृष्णाश्रयमें कहेहें “ नानावादविनष्टेषु सर्वकर्म-व्रतादिषु । पापंडैकप्रयत्नेषु कृष्ण एव गतिर्मम ” (सर्वकर्म ओर व्रतादिक नानाप्रकारके वादकरिकें नष्ट भये ओर पापंडकोही मुख्य प्रयत्न जामेंहे तामें श्रीकृष्णही मेरी गतिहें) याभांति कलिकाल पापकें मर्यादामार्गके साधन सब नष्ट भये तासों में वैदिककार्यमेंहू नांहीहों ॥ ४ ॥

मूलं-न च व्यावृत्तिराहित्यं व्यावृत्तौ न हरौ मनः ।

न त्यागश्चापि सेवार्थं स्वतंत्रस्य तु का कथा ॥५॥

शब्दार्थः—व्यावृत्तिरहितपनो नांहीहे, व्यावृत्तिमेंहू हरिमें मन नांहीहे, ओर सेवाके लिये त्यागहू नांहीहे, तो मनको अपने वश करिकें स्वतंत्र होयवेकी तो वार्त्ता कहा ? ॥५॥ टीका—में अव्यावृत्तहू नांहीहों सो श्रीआचार्यजीमहाप्रभुजी भक्तिवर्दिनीमें कहेहें “ अव्या-

को सर्वकार्य सिद्ध होतहे सो मोकों कहा डरहे? या भांति माहात्म्यकीहू स्फूर्ति नांहीहे ॥१४॥ चित्तमें स्नेह होय यह प्रभु प्रसन्न करिवेको बड़ो साधनहे काहेते जो प्रथम प्रभुमें स्नेह होय पाछें आसक्ति होय, व्यसन होय तब अनुभव होय सो श्रीकृष्णके चरणकमलमें प्रेमहू नांहीहे तो आसक्ति व्यसनादिककी तो कथा कहनकों दुर्लभ हे सो प्रेम, आसक्ति, व्यसन, कब होय सो त्रिविधनामावलीमें कहेहैं “बाललीलानामपाठात् श्रीकृष्णे प्रेम जायते। आसक्तिः प्रौढलीलाया नामपाठाद्भवति ॥ व्यसनं कृष्णचरणे राजलीलाभिधानतः। तस्मान्नामत्रयं जाप्यं भक्तिप्राप्तीच्छुभिः सदा ” [बाललीलाके नामके पाठतें श्रीकृष्णमें प्रेम होयहे, प्रौढलीलाके नामके पाठतें आसक्ति होयगी, राजलीलाके नामसों श्रीकृष्णके चरणारविंदमें व्यसन होय तासों भक्तिकी प्राप्तिकी इच्छा-वारेनकों सदा तीन्यो नाम जपकरिवेयोग्यहैं,] तासों तीन्यो नामके पाठ मन लगायकें करे तब निश्चय पुष्टिभक्ति सिद्ध होय, ओर भक्तिवर्द्धिनीमें कहेहैं “ ततः प्रेम तथासक्तिर्व्यसनं च यदा भवेत् ” (तासों प्रेम, तथा आसक्ति, ओर व्यसन जब होय सो शास्त्रमें बीज कह्योहे) सो मोमें स्नेहहू नांहीहे १५ ताकरिकें श्रीकृष्णके चरणमें आसक्ति नांहीहे १६ ओर व्यसनादिककी कथाहू दुर्लभहे १७ ॥ ३ ॥

मूलं—भक्तिमार्गप्रवेशो न धर्ममार्गे न च स्थितिः।

देशादिशुद्धभावो न कालदोषान्न वैदिकम् ॥४॥

शब्दार्थः—भक्तिमार्गमें प्रवेश नांहीहे, ओर धर्ममार्गमें स्थिति नांही, देशादि शुद्धभाव नांही, कालदोषते वैदिक नांही, ॥ ४ ॥ टीका—यह पुष्टिमार्ग सर्वोपरहे तामें मेरो प्रवेशहू नांहीहे काहेतें जो श्रीवल्लभाचार्यजीके भक्तिमार्गमें ब्रह्मादिक शिवादिकको प्रवेश नांहीहे सो गोपालदास बल्लभाख्यानमें गायेहैं “ एवो मार्ग श्रीवल्ल-

संयम [निरोध] नांही अभक्तनमें उदासीनता नांही, गृहादिकनमें अनासक्ति नांही॥५॥ टीका—श्रीकृष्णके विरहकी स्फूर्तिहू नांहीहे काहेतें जो श्रीकृष्णके विरहकी स्फूर्ति सर्व वैदिक लौकिक कार्यकी विस्मारकहे सो काहेतें विरहते दैन्य होय जेसें रासपंचाध्यायीमें प्रभु अंतर्धान भये तब मुख्यभक्तको विरह भयो तब दैन्यतें कह्यो “ हा नाथ ! रमण ! प्रेष्ट ! कासि कासि महाभुज ! दास्यास्ते कृपणायामे सखे दर्शय सन्निधिम् ” [हा नाथ ! रमण ! प्रिय ! कहांहो ? कहांहो ? हे बड़े भुजावारे ! हे सखे ! आपकी दासी में हों तिनकों सन्निधि बताओ अर्थात् दर्शन देओ] तथा सब ब्रजभक्त रुदन करन लागे एसो दैन्य भयो तब प्रभु प्रकटे तातें यह पुष्टिमार्गमें केवल विप्रयोगही फलरूपहे ऐसे फलरूप विप्रयोगकी स्फूर्तिहू नांहीहे २६ ओर वाणीको तथा नेत्रनको संयमहू नांहीहे सो श्रीभागवतमें कहेहें “ वर्हायिते ते नयने नराणां लिंगानि विष्णोर्न निरीक्षतो ये । जिह्वासती दार्दुरिकेव सूत ! न चोपगायत्युरुगायगाथाः ” [जो नेत्र भगवानके चिह्नकों नांही दर्शन करतहे सो नेत्र मोरकी चंद्रिकावत् (अर्थात् कुछ आपको उपयोगके नांही) ओर जो जिह्वा उरुगाय (बोहोतने गाये ऐसे भगवान्) की कथाको गान नांही करतहे सो जिह्वा दुष्ट दादुरकी नॉई (व्यर्थ) रटिवेवारीहे] यह दोय महा बाधकहे काहेतें जो वाणीको निरोध न होय तो मुखरता दोष होय ओर नेत्रनसों दोष देखनों यामें हृदय दोषरूप होतहे तातें वाणी ओर नेत्रको अवश्य निग्रह चाहियें सो नांहीहे २७ ओर भगवानके जो भक्त नांही तिनमें उदासीनता चाहियें तथा भगवदीयमें स्नेह चाहियें काहेतें जो इनके संगतें यह पुष्टिमार्गको फल सिद्ध होतहे यह निश्चय सिद्धांतहे सो भगवदीयसों स्नेह नांही ओर अभक्तमें उदासीनता नांहीहे तासों यह मार्गमें आवेश केमे होयगो?

वृत्तो भजेतकृष्णं पूजा श्रवणादिभिः ” (अव्यावृत्त होयकें पूजा (सेवा) ओर श्रवणादिक करिकें श्रीकृष्णको भजे] याभांति अव्यावृत्त होय भगवद्धर्म [सेवा] करे कथा सुने सो अव्यावृत्तहू नांही २२ व्यावृत्ति करतमेंहू हरिमैं चित्त चाहियें सोहू श्रीआचार्यजीमहाप्रभुजी भक्तिवर्द्धिनीमें कहेहैं ” व्यावृत्तोऽपि हरौ चित्तं श्रवणादौ यतेत् सदा” [व्यावृत्तियुक्तहू स्थापे ओर सदा हरिमैं चित्तको श्रवणादिकमें यत्न करो] याप्रकार व्यावृत्ति करतमेंहू भगवानमें मन नांहीहे जेसैं संतदासजी कोडी बेचतें काहूतें बोलतें नांही, २३ ओर भगवत्सेवार्थ देह, इंद्रिय, मनतें लौकिक वैदिकको त्याग नांहीहे जो त्याग न होय तो सेवा न बने सो श्रीआचार्यजीमहाप्रभुजी सेवाफलमें कहेहैं “उद्वेगः प्रतिबंधो वा भोगो वा स्यात्तु बाधकः ” [उद्वेग प्रतिबंध ओर भोग यह बाध-कहे] जो बाधकहे ताको त्याग करनो सोहू सेवाफलमें कहेहैं “बाध-कानां परित्यागो भोगेऽप्येकं तथा परम् ” [बाधकनको परित्याग करनो भोगमेंहू लौकिकको त्याग करनो] उद्वेग प्रतिबंध, भोग, [विषयार्थ आछो खानपान] ताको त्यागहू सेवार्थ नांहीहे २४ स्वतंत्र नांहीहो देह इंद्रियनके वश्यहो काहेतें जो विषयादिक भोगको त्याग नांहीहे ताको स्वतंत्रकी कथा कहा ? या भांति मन सबठोरतें (लौकिक वैदिकतें) स्वतंत्र होय के प्रभु शरण नांहीहे ॥२५॥५॥

मूलं—न कृष्णविरहस्फूर्तिः संयमो न च वाग्दृशोः ।

नौदासीन्यमभक्तेषु नानासक्तिर्गृहादिषु ॥ ६ ॥

शब्दार्थः—श्रीकृष्णके विरहकी स्फूर्ति नांही, वाणी ओर मनको

१ प्रतिबंध दोयप्रकारकोहे साधारण ओर भगवत्कृत तामें साधारण प्रतिबंधको त्याग अपनतें होयसके सो करनो.

२ भोग दोयप्रकारको हे लौकिक और अलौकिक तामें लौकिकभोगको त्याग करनो और अलौकिकता मुख्यफलरूपहे.

जवाब देहोगे इतना सुनतही छीतस्वामी कहे जो मेरे भाये तो तुमही म्लेच्छहो जा आजुपाछें तेरो मुख न देखूंगो ऐसैं कहिकें वरसोंदीहू छोडि चले आये, याभांति अपने-स्वधर्मकी रक्षा करे, काम, क्रोध, मद, मत्सर तासों रक्षा करे सो में तो कोई प्रकार स्वधर्मको परिग्रह नांही करतहों ३१ ओर यह पुष्टिमार्गतें अन्य धर्म जितनेहें सो सगरे पुष्टि-मार्गीय वैष्णवको बाधकहे सो में अन्य धर्मतें निवृत्त नांहीहों ३२ ऐसैं वत्तीस दोष संयुक्त में हों सो हे मेरे स्वामी श्रीकृष्ण ! तुम मेरे स्वामी हो सो कहा करोगे ? त्याग करोगे के अंगीकार करोगे ? सो मोकों नांही जानि परतहें ॥७॥ अब श्रीहरिरायजी कहतहें जो उपर दोष कहे सो वत्तीसहीहे ऐसैं मति जानियो में दोषको निधानहों अपार दोषहे गिनत गिनत जिनको पार न होय इतने दोषहें ओर सुंदर गुणकरि रहितहों एकहू गुण मोमें नांहीहे सो प्रभु कहा करेंगे ? या-भांति निःसाधनताकी भावना नित्यही कर्त्तव्यहे काहेतें जो निःसाधन होय तापर दया करी तिनके हृदयमें प्रभु पधारि अनुभव करावें ॥८॥

इति श्रीहरिरायजीकृतं सप्तत्रिंशत्तमं शिक्षा-
पत्रं श्रीगोपेश्वरजीकृतव्रजभाषा-
टीकासमेतं समाप्तम् ॥ ३७ ॥

शिक्षापत्र ३८.

अष्टत्रिंशत् शिक्षापत्रमें व्यापिवैकुण्ठमें भगवान् पूर्णानंदहें ओर रमावैकुण्ठमें विभूतिरूपहे, जेसैं व्यूहरचनामें स्थित पुरुष कोइको प्राप्त नांही होयहें तेसैं व्यूहमध्यमें स्थित पुरुषोत्तम अभक्तनको गम्य नांहीहें,

२८ ओर गृहादिक कार्यमें मनकरि आसक्त होय यह महा बाधकहे सो श्रीआचार्यजीमहाप्रभुजी ठोरठोर दूषण कहेहें ओर श्रीभागवतमेंहूँ सबठोर प्रसिद्धेहो जो गृहादिक लौकिक कार्यमें आसक्तहे तिनकों भगवानके धर्म दुर्लभहे तासों गृहादिकनमें अनासक्ति चाहियें (अर्थात् आसक्ति न चाहियें) सो नांहीहे में गृहादिकनमें आसक्तहों २९ ॥६॥

मूलं—नाहंकारादिराहित्यं न स्वधर्मपरिग्रहः ।

नान्यधर्मनिवृत्तिश्च किं करिष्यति मत्प्रभुः ॥ ७ ॥

मयि दोषनिधाने तु सर्वसद्गुणवर्जिते ।

निःसाधनत्वमेवं हि स्वस्य नित्यं विभावयेत्॥८॥

शब्दार्थः—अहंकारादिकनसों रहितणनों नांही, अपने धर्म जो भक्तिमार्ग ताको सबओरतें ग्रहण नांही ओर अन्यधर्मकी निवृत्ति नांही उपर कहे सगरे दोषको निधान (भंडार)रूप ओर सर्व सद्गुणकरि वर्जित मेंहों तापें मेरे प्रभु (स्वामी श्रीकृष्ण) कहा करेंगे ऐसे नित्य अपनी निःसाधनताकी भावना करनी ॥ ७ ॥ ८ ॥ टीका—अहंकार भक्ति-मार्गमें बाधकहे सो विवेकधैर्याश्रयमें श्रीआचार्यजीमहाप्रभुजी कहेहें “अभिमानश्चसंत्याज्यः स्वाम्यधीनत्वभावनात्” [स्वामीके आधीनताकी भावनासों अहंकार आछीरीतसों छोडनो] स्वतंत्र होय सो अहंकार करे दासको धर्म नांही तासों दास होयके अहंकार करे तो दास-धर्म जात रहे तातें दासकों तो अपने स्वामी श्रीकृष्णके अधीनत्वकी भावना कर्तव्यहे सो में अहंकारकरि रहित नांही हों ३० ओर पुष्टिमार्गीय वैष्णवकों अपने धर्मको परिग्रह चाहियें दृढता चाहिये जेसैं छीतस्वामीसों वीरचलने कहिजे तुम पदमें श्रीगुसाँईजीकों श्रीठाकुरजीको रूपकरिके गावतहो सो देशाधिपति पूछेगो तो कहा

जवाब देहोगे इतनी सुनतही छीतस्वामी कहे जो मेरे भाये तो तुमही म्लेच्छहो जा आजुपाछें तेरो मुख न देखूंगो ऐसैं कहिकें बरसोंदीहू छोडि चले आये, याभांति अपने-स्वधर्मकी रक्षा करे, काम, क्रोध, मद, मत्सर तासों रक्षा करे सो में तो कोई प्रकार स्वधर्मको परिग्रह नांहीं करतहों ३१ ओर यह पुष्टिमार्गतें अन्य धर्म जितनेहें सो सगरे पुष्टि-मार्गीय वैष्णवको बाधकहे सो में अन्य धर्मतें निवृत्त नांहींहों ३२ ऐसैं बत्तीस दोष संयुक्त में हों सो हे मेरे स्वामी श्रीकृष्ण ! तुम मेरे स्वामी हो सो कहा करोगे ? त्याग करोगे के अंगीकार करोगे ? सो मोकों नांहीं जानि परतहें ॥७॥ अब श्रीहरिरायजी कहतहें जो उपर दोष कहे सो बत्तीसहीहे ऐसैं मति जानियो में दोषको निधानहों अपार दोषहे गिनत गिनत जिनको पार न होय इतने दोषहें ओर सुंदर गुणकरि रहितहों एकहू गुण मोमें नांहींहे सो प्रभु कहा करेंगे ? या-भांति निःसाधनताकी भावना नित्यही कर्त्तव्यहे काहेतें जो निःसाधन होय तापर दया करी तिनके हृदयमें प्रभु पधारि अनुभव करावें ॥८॥

इति श्रीहरिरायजीकृतं सप्तत्रिंशत्तमं शिक्षा-
पत्रं श्रीगोपेश्वरजीकृतव्रजभाषा-
टीकासमेतं समाप्तम् ॥ ३७ ॥

शिक्षापत्र ३८.

अष्टत्रिंशत् शिक्षापत्रमें व्यापिवेकुंठमें भगवान् पूर्णानंदहें ओर रमावेकुंठमें विभूतिरूपहे, जेसैं व्यूहरचनामें स्थित पुरुष कोइको प्राप्त नांहीं होयहें तेसैं व्यूहमध्यमें स्थित पुरुषोत्तम अभक्तनको गम्य नांहींहें,

भावात्मक प्रभुतो सदाही रसात्मक लीला करेहें अन्यकार्य नाहींकरेहें, ओर भूभारहरणादिक तो अंशको कार्यहे. धर्मिमात्र अपनी मर्यादा^१ रहित ब्रजमेंहे ओर सर्वधर्मविशिष्ट मर्यादासहित मथुराजीमेंहे, परमानंदरूप बाललीलादिभेदसों उच्छ्रंखललीला ब्रजमें करी सो सर्वलीलामें रसरूपपनों गूढभावसों वर्णितहें ऐसें मूललीलायुक्त मूलरूप श्रीकृष्णमें निरंतर चित्त स्थापन करनों सोहि अपने मार्गकी सेवाहे इनकी सिद्धिके लिये तनुजा, वित्तजा, सेवा करनी, ओर तादृशीयभक्तनके संग निवेदनको अनुसंधान करनों, यह पुष्टिमार्गप्रवर्तक श्रीआचार्यजीमें सुदृढ स्नेह राखनों, ओर इनके मार्गमें दृढ विश्वास राखनों तासों सर्व सिद्ध होयगो. उपर कहे जो अपने दोषकी भावना करिं निःसाधन होयरहे दैन्य करे तो आगे उह वैष्णवकों कहा कर्त्तव्यहे ? सो वर्णनहे तामें यह ब्रजमें भावात्मक रसात्मक पूर्णपुरुषोत्तम श्रीकृष्ण सदा भक्तनके संग लीला करतहे ऐसें श्रीकृष्ण सर्वोपरिहे तिनको अनुभव होय तब सर्व फल सिद्ध भयो यह निरूपणहे.

मूलं—कृष्णे रसात्मके नित्यं गोपिकामंडलस्थिते ।

यमुनापुलिनांतस्थवृंदावनविराजिते ॥ १ ॥

नित्यगानरसाविष्टे विशिष्टेऽक्षरतः क्षरात् ।

भावैकगम्ये सर्वत्र प्रसिद्धे पुरुषोत्तमे ॥ २ ॥

यस्यावतारः पुरुषः आद्यो ब्रह्मांडविग्रहः ।

तस्यांशा एव ये भूमौ मत्स्याद्या इति बुध्यताम् ॥ ३ ॥

शब्दार्थः—श्रीकृष्ण कैसेहे रसात्मक, नित्य गोपिकानके मंडलमें विराजित, श्रीयमुनाजीके पुलिनके समीपमें श्रीवृंदावनमें विराजित

१ ब्रजमें बाललीलामें सब भक्तनको कसो करतहें तहां आप पूर्णपुरुषोत्तमहे मर्यादा नाहीं राखीहें सो आगे निरूपणहे.

॥ १ ॥ नित्यं गानरसमें आविष्ट, क्षर ओर अक्षरतें श्रेष्ठ, (भक्तनको) भावगम्य, सर्वत्र प्रसिद्ध, पुरुषोत्तम स्वरूपहैं ॥ २ ॥ जिनको आद्य अवतार ब्रह्मांडस्वरूप पुरुषहे (जिनको विराट्पुरुष कहतहैं) भूमिपें मत्स्यादिक अवतारहैं सो उहपुरुषकेही अंशहैं ऐसैं “उपर दोयश्लोकसों निरूपण किये ऐसैं” श्रीकृष्णमें बुद्धि राखनी ॥ ३ ॥ टीका—यह श्रीवल्लभा-चार्यजीके पुष्टिमार्गमें रसात्मक श्रीकृष्ण सेव्यहैं सो कोनप्रकार ब्रजमें विराजतहैं सो कहतहैं जो गोपीजन (ब्रजभक्त) के मंडलमें स्थितहैं श्रीकृष्ण रसात्मकहैं सो याभांति नित्य श्रीस्वामिनीजीके संग रासादिलीला करतहैं सो लीला कोनसी ठोर करतहैं सो कहतहैं श्रीयमुनाजीके पुलिनके मध्य श्रीवृंदावनमें विराजतहैं. “कृष्णो रसात्मको नित्यं गोपिकामंडले स्थितः । यमुनापुलिनांतस्थ-वृंदावनविराजितः ॥ १ ॥ नित्यगानरसाविष्टो विशिष्टोऽक्षरतःक्षरात् । भावैकगम्यैः सर्वत्र प्रसिद्धः पुरुषोत्तमः ॥ २ ॥ ” ऐसैं दोयश्लोकमें पाठभेदहे ताके अनुसार अर्थः—श्रीकृष्ण रसात्मकहैं, नित्य गोपिकानके मंडलमें विराजितहैं, श्रीयमुनाजीके पुलिन (तट) के समीप श्रीवृंदावनमें शोभितहैं ॥ १ ॥ नित्यगानरसकरि आविष्टहैं, क्षर तथा अक्षरतें श्रेष्ठहैं (भक्तनके) भावकरिकेही गम्यहैं ओर सर्वत्र प्रसिद्ध श्रीपुरुषोत्तमहैं जेसैं श्रीकृष्ण रसात्मकहैं तेसैं श्रीयमुनाजी रसात्मकहैं तेसैंहि श्रीयमुनाजीके पुलिन रसात्मकहैं पुलिनके मध्य श्रीवृंदावनहू रसात्मकहैं तहां भक्तनसहित श्रीकृष्ण विराजेहैं सो श्रीआचार्यजी-महाप्रभुजी श्रीयमुनाष्टकमें कहतहैं “तटस्थनवकाननप्रकटमोदपुष्पांबुना सुरासुरसुपूजितस्मरपितुः श्रियं विभ्रतीम् ” [तटमें रहे ऐसे नवीन वनके प्रकट सुगंधयुक्त पुष्पके मकरंदसूं सुरां ओर असुरनैं पूजित ऐसैं

वैकुण्ठवासी विष्णुहे सो (पूर्णानंद हरिकी) विभूतिहे जिनकी वैष्णवी रमा[लक्ष्मी] शक्तिहे सो वैकुण्ठमें पालन करिवेवारी हे एसें जाननों ॥५॥ टीका-अक्षरधामहे सो व्यापिवैकुण्ठहे भीतर प्रभु विराजतहें सो लोक-लोकपर्वततें परे जहां अर्जुनकों लेजाय दर्शन कराये सो सबनको मूलहे इनकी व्यापिवैकुण्ठ संज्ञा (नाम) हे सो व्यापिवैकुण्ठ सबमें व्यापकहे ताकी भीतर प्रभु विराजतहे जेसें भूमिपर पुष्टिमार्गकी रीतिसों प्रभु विराजें लीलाको अनुभव होय सो व्यापिवैकुण्ठ सबमेंहे तोहू न्यारो अनुभव होतहे तामें प्रभुके दर्शन [भीतर] होतहे तेसेंई अक्षर सबमें व्यापकहे ओर सबतें न्यारोहे ताकी भीतर (भक्तनकों) प्रभुको अनुभव होतहे. जेसें अँकार सबतें न्यारोहे ओर सब वेदको मूलहे तथा सबमें रह्योहे तेसें व्यापिवैकुण्ठहे. ताहीतें ज्ञानीकी दृष्टि व्यापि वैकुण्ठताँई पोहोंचतहे सो सबठोर व्यापक मानतहें तातें इनकों दासभाव छुटिजातहे ओर भक्तनकूं सबठोर व्यापकहे तिनको तथा न्यारोहें तिनकोहू अनुभवहे तासूं व्यापककों जानिकें न्यारो अनुभव होय तहां मानतहे अपनकों दास जानतहें. एसें अक्षरधाम वैकुण्ठमें ब्रह्मानंदरूप लक्ष्मीहे तातें अक्षरब्रह्मके उपासनावारे ब्रह्मानंदरूपलक्ष्मी-जीमें सुक्त होतहें इनकों पूर्णानंद हरिको पृथक् अनुभव नांही होतहे इनकों ब्रह्मानंदही मोक्षहे ॥४॥ ओर एक रमावैकुण्ठहे जहां सनका-दिकनें जयविजयकों शाप दियो यह वैकुण्ठ अक्षरधामकी विभूतिहे तहांके वासी विष्णु हे सो पूर्णानंदहरिकी विभूतिहे तहांकी लक्ष्मी पालिका शक्तिहे पुरुषोत्तमकी द्वादश शक्ति हे तामें यह पालिका शक्तिहे याप्रकार जहां जेसें प्रभु विराजतहें तहां तेसेंही लक्ष्मी विराजतहें श्रीकृष्णावतार सबको मूलभूतहे सो प्रकार आगे कहतहें ॥५॥

१ श्री, पुष्टि, गिरु, कांति, तुष्टि, कीर्ति, इला, ऊज्जो, विद्या, अविद्या, शक्ति, माया यह द्वादशशक्ति जाननी.

मूलं-मूलभूतस्यावतारे मूर्तिव्यूहोभिधीयते ।

प्रद्युम्नो वासुदेवश्चानिरुद्धोऽनंत एव च ॥ ६ ॥

व्यूहं विरच्य यस्तत्र स्थाप्यते प्राप्यते न सः ।

तथैतैरावृतःकृष्णो नावतारेऽवगम्यते ॥ ७ ॥

शब्दार्थः-मूलभूत (श्रीकृष्ण) के अवतारमें अथवा अवताररूप मूर्तिव्यूह कहियतहे प्रद्युम्न, वासुदेव, अनिरुद्ध, ओर संकर्षण ॥६॥ यह व्यूहकों रचिकें जो इनमें स्थापन क्यों जातहे सो नाहीं प्राप्तहोयहें तेसैं यह व्यूह करिकें आवृत्त श्रीकृष्ण अवतारमें नाहीं गम्य होतहें ॥७॥ टीका-अब वासुदेवदेवकीजीके इहां प्रकटहें सो कहतहें सर्व अवतारनको मूलभूत यहहे सो मूर्ति तो एकहे ओर चतुर्व्यूह प्रकट भयेहें तासों चतुर्भुज प्रकटहें सो व्यूहके नाम कहतहें. प्रद्युम्न, वासुदेव, अनिरुद्ध, ओर संकर्षण, तामें श्लोकमें चकारहे तासों यह जाननों जो श्वेतकेश ओर श्यामकेश इनही सहित पटप्रकारको स्वरूप प्रकट भये सो दुष्टनके नाशकरणार्थ मोक्षदानार्थ 'वंशवृद्धयर्थ, ओर भक्तनकी 'रक्षाकरणार्थ. इत्यादिक अनेक कारणहे इन चारों व्यूहनके भीतर पुरुषोत्तमहें तिनको जन्म (अवतार) नाहीं सो श्रीभागवतमें कहेहें " जयति जननिवासो देवकीजन्मवादो यदुधरपरिपत्स्वदोभिरस्यन्नधर्मम् । स्थिरचरवृजिनन्नः सस्मितश्रीमुखेन ब्रजपुरवनितानां चर्द्धयन् कामदेवम् " [जिनके निवासरूप तथा जनहे निवासको स्थानक जिनको; देवकीजीके इहांहे जन्मको वाद (नाम कथन) मात्र, जिनको; यदुक्कुलके सब बड़े यादव हैं सभा जिनकी अपने श्रीहस्तन-

१ व्यूहके भीतर आप विराजतहें. २ संकर्षणरूप. ३ वासुदेवरूप. ४ प्रद्युम्नरूप. ५ अनिरुद्धरूप. यह चारों व्यूहके चार कार्य मुख्य ओर अनेकहें.

सों अधर्मको नाश करिवेवारे, स्थावर जंगमके दुःखको मिटायवेवारे
 ब्रज तथा पुरंकी स्त्रीयनकों हास्ययुक्त मुखारविंदतें कामदेवकों बढाय-
 वेवारे श्रीकृष्ण सबतें अधिक विराजेहें] इत्यादिक वचनसों देवकी-
 जीके उदरतें जन्म कथनमात्रहे जेसैं पूर्वदिशातें चंद्र सूर्य प्रकटे या
 प्रकार जाननों ॥ ६ ॥ या प्रकार चतुर्व्यूहकों रचिकें आपु श्रीकृष्ण भीतर
 स्थापित विराजतहैं. तहां कोई कहे जो एसैं श्रीकृष्णसहित चतुर्व्यूहहैं
 तब चतुर्व्यूहको पूजन करियें इतनें श्रीकृष्णको भयो याप्रकार कोई
 संदेह करें तहां कहतहैं जो यद्यपि व्यूह करिकें आवृत श्रीकृष्णहैं
 तोहू इन चायों व्यूहअवतारनकी उपासना पूजनतें श्रीकृष्ण अवगाहे
 न जाय काहेतें जो पूर्णपुरुषोत्तम श्रीकृष्ण सर्वमेंहें ओर सबतें न्यारेहैं
 तातें व्यूहहे सो पुरुषोत्तमके आज्ञाकारीहैं जितनी प्रभुकी आज्ञाहे
 तितनों कार्य करिकें फेरि अपने धाममें पधारेंगे ओर श्रीकृष्णतो
 नित्य लीलाविनोद करतहैं तातें व्यूहकी उपासनाकरि स्वर्गलोक तथा
 सारूप्य, सामीप्य, सायुज्य, सालोक्य यह चार प्रकारकी मुक्ति मिले
 मुख्यफल भक्तिरसकी प्राप्ति नांही. तातें सवोंपरि श्रीकृष्णहीहे तिन-
 हीकी न्यारी भक्ति करे मिलिभक्तिमें फलकों न्यूनता प्राप्त होतहे या
 प्रकार जीव सत्संग विना श्रीकृष्णके माहात्म्यकों जानत नांही
 सो कहतहे ॥ ७ ॥

मूलं—अत एव जना भ्राताः प्राकृतं तं वदन्ति हि ।

अंशकार्यं मूलरूपे कल्पयन्त्यज्ञतां गताः ॥ ८ ॥

१ श्रीवृंदावनकेवृक्ष जो स्थावर हते तिनकोहू वेषुद्वारा मुधासंबंध भयो तब जडत्वको
 दुःख मिथ्यो. २ ग्राम्य ओर नगरकी स्त्रीको समान अनुभव न होय परंतु इहां तो
 ग्राम्यको विशेष अनुभव भयां. ३ पूर्वदिशाते चंद्र तथा सूर्य प्रकटतहैं तामें दिशाको
 कटु संबंध नांही, मार्गहे तेमेहि श्रीदेवकीजीते प्रभुको प्राकट्यहे.

शब्दार्थ:-तासोंही मनुष्य भ्रांत होयगयेहैं सो श्रीकृष्णकों प्राकृत कहतहैं अज्ञताकों प्राप्तभये ऐसे जीव अंशको कार्य फलरूपमें कल्पतहैं ॥ ८ ॥ टीका-अंश जो चतुर्व्यूहहे सो अनेक लीला जगतमें करतहैं मथुरातें भाजिकें फेरि कहुं सोच करतहैं काहूकी टहल करतहैं मिलिकें अनेक प्रकारके विचार करतहैं यह लीला देखिकें कितनेक जीव जो अज्ञानी हे सो मूढ मोहके बसतें प्राकृतकीनाई श्रीकृष्णकों जानत हे अवतारदशामें कोईएक भगवदीय प्रभुकों जानत हते ओर कोई न जानतो सो अब कलिके जीवकी कहाहैं ? काहेतें जो अंशावतारके लीलाको कार्य देखी सबकोई यह कहतो जो श्रीकृष्णने यह कार्य कियो ऐसे अज्ञानसों मिथ्या कल्पना करि मूलरूप श्रीकृष्णको नाम कहतहैं ताहीतें सवनको नाश भयो एक उद्धवजी भक्त हते सो शापतें छुटे तातें श्रीकृष्णकी भक्ति होनी अति दुर्लभहे श्रीकृष्णकों केवल आनंदमय रसात्मकलीलाकर्त्ता जाने ओरठोर जेसो कार्य तेसी व्यूहकी लीला जाने यह भाव दृढ रहे तब श्रीकृष्णमें भाव उपजे सो श्रीकृष्ण केसे हैं सो आगे वर्णन करतहैं ॥ ८ ॥

मूल-कृष्णस्तु केवलं लीलां करोति रसरूपिणीम् ।

भूभारहरणं चक्रे कलाभ्यामेव सर्वथा ॥ ९ ॥

शब्दार्थ:-श्रीकृष्ण तो केवल रसरूप लीला ही करतहैं ओर भूभारहरण सर्वथा कलाकरिकेंही कियोहे ॥ ९ ॥ टीका-श्रीकृष्ण तो सदा सर्वदा ब्रजभक्तनके संग रसरूप लीला करतहैं सो कहिवेमें नांही आवतहे जो निजजन श्रीआचार्यजीमहाप्रभुजीके अंतरंग भक्तहैं तिनकों मनमें अनुभव करिवेयोग्यहैं तातें (मानादि विहारादि)

१ ' कलाभ्यां ' यह द्विवचनतें श्रीवसुदेवजीके यहां रामकृष्ण शंभु केशव स्वरूप प्रकट भयेहैं सो जानने.

रसरूप लीला कहें याभांति श्रीकृष्ण तो सदा सर्वदा श्रीवृंदावनमें विराजतहैं ओर पृथ्वीपर दैत्य, राक्षसके पाप होतहैं सो भूभारहरणार्थ श्रीकृष्ण कलावतार धरिकें दुष्टनकों मारि देवतानकी रक्षा करतहैं याभांति ब्रजमें नित्य एकरस लीलाहे कला करि सृष्टिहूको कार्य करतहैं ॥९॥

मूलं-परमानंददानं तु स्वरूपेणेति निश्चयः ।

ब्रजस्थ एव सततं पुरस्थो वा कृपापरः ॥ १० ॥

तत्रापि रूपभेदेन क्रीडति स्म तथा रसः ।

धर्मिमात्रं स्वमर्यादारहितं केवलं ब्रजे ॥ ११ ॥

शब्दार्थः—ब्रजमें विराजतहे सो निरंतर परमानंदको दान करतहे ओर मथुराजीमें विराजतहैं सो कृपायुक्त होय तब फलस्वरूप करिकें परमानंदको दान करतहैं यह निश्चयहे ॥ १० ॥ तामेंहू रसरूप प्रभु रूपभेदकरिकें क्रीडा करतहैं अपनी मर्यादारहित केवल धर्मिमात्र रूप ब्रजमेंहे ॥ ११ ॥ टीका—परमानंदको दान तो सदा ब्रजमें लीलाकर्ता श्रीकृष्णहीतें होय ओर मधुपुरी तथा द्वारिकामें स्थित स्वरूपनकी कृपा बहोत होय तब कहूं परमानंदको दान होय, नांही तो उन स्वरूपतें मोक्षको फल होय काहेतें जो ब्रजमें स्थित हैं सो निरंतर आनंदरूप लीला करतहैं ओर पुरीमें स्थितहैं सो व्यूहसहित हैं तातें जो जीव मथुरास्थ श्रीकृष्णको आश्रय करतहैं तिनकों सदा आनंद नांहीहे उन पुरीके स्वरूपद्वारा तेसो फलहे यहस्वरूप मर्यादासहितहे तासों मर्यादामार्गीय रसदान करतहैं सो श्रीभगवान् गीताजीमें अर्जुन-प्रति कहेहैं “ ये यथा मां प्रपद्यंते तांस्तथैव भजाम्यहम् ” (जीव जाभावसों जास्वरूपको आश्रय करे तिनकों तेसो फल सिद्ध होय प्रभुहू ताही भावसों ताजीवको भजतहैं) तेसोही फल प्राप्त होतहैं ॥ १० ॥ याभांति श्रीकृष्ण अनेक स्वरूप धरि जगतमें ठोरठोर क्रीडा करतहैं जहां जेसो

स्थलहे तहां तेसोही स्वरूप हे तहां तेसोही रसहे ब्रजमें केवल मर्यादा-
रहित धर्मिरूप लोकवेदातीत रसात्मक स्वरूप सदा विहार कर-
तहें ॥ ११ ॥

मूलं-सर्वधर्मविशिष्टं तु समर्यादं पुरे मतम् ।

उच्छ्रंखला तु या लीला केवलेन ब्रजे कृता ॥ १२ ॥

परमानंदरूपा सा वाललीलादिभेदतः ।

सर्वत्र रसलीलात्वं गूढभावेन वर्णितम् ॥ १३ ॥

शब्दार्थः—सर्वधर्मयुक्त मर्यादासहित स्वरूप तो मधुपुरी तथा श्री-
द्वारकामें मान्योहे ओर जो उच्छ्रंखल (मर्यादारहित) लीलाहे सो
केवल (रसात्मक) स्वरूप करिकें ब्रजमें करीहे ॥ १२ ॥ सो वाललीला-
दिकके भेदसों परम आनंदरूपहे सर्वत्र गूढभाव करिकें रसलीलापनों
वर्णन कियोहे ॥ १३ ॥ टीका—सर्वधर्मसहित मर्यादायुक्त स्वरूप श्री-
मथुराजी तथा द्वारिकामें विराजतहें ओर उच्छ्रितरसरूप पुष्टिपुरुषो-
त्तम ब्रजमें [उच्छ्रंखल लीलायुक्त] हैं तातें मधुपुरी द्वारकाके स्वरूपमें
तथा ब्रजके स्वरूपमें भेदहे तेसो फलमेंहू भेदहे तासों ब्रजस्थस्वरूपकी
भावना कर्तव्यहे ॥ १२ ॥ ब्रजमें श्रीयशोदोत्संगलालित श्रीकृष्ण परमा-
नंदरूपहे, वाललीला, पौगंडलीला, किशोरलीला, यह सगरीलीला
सबठोर रसरूपहीहे सो श्रीगुसाँईजी गूढभावसों ग्रंथमें वर्णन कियेहें
ताभावसों सगरी लीला जाननी. सो यह गूढभाव वर्णनमें न आवे
अंतरंग भक्तनकी मनमें अनुभव करिवेयोग्यहें एसो रसात्मक स्वरूप
ब्रजमें विराजतहें ॥ १३ ॥

मूलं-कामरूपतया कृष्णे वयो न हि नियामकं ।

एतादृशे मूलरूपे मूललीलासमन्विते ॥ १४ ॥

चित्तं निरंतरं स्थाप्यं सैव सेवा स्वमार्गगा ।

तत्सिद्ध्यर्थं शरीरेण वित्तेनापि विधीयताम् ॥१५॥

शब्दार्थः—श्रीकृष्णमें कामरूपपनेतें अवस्था नियामक नांहीहे. ऐसे मूललीलायुक्त मूलरूपमें चित्त निरंतर स्थापन करनो सोही अपने मार्गकी सेवाहे ताकी सिद्धिके अर्थ शरीरतें ओर धनतेंहू (सेवा) करनी ॥१४॥१५॥ टीका—ब्रजमें श्रीकृष्ण कोटिकामरूप ब्रजभक्तनको सुखदानार्थ प्रकटेहें तासों “ साक्षान्मन्मथमन्मथः ” एसें रास-पंचाध्यायीमें कामदेवके कामदेव कहेहें तहां अवस्थाको नियमनांहीहे जन्मतेंही आनंद रसदान कियेसो श्रीभागवतमें कहेहें “ जयति जन-निवासो देवकीजन्मवादो यदुवरपरिपत्स्वैर्दोर्भिरस्यन्नधर्मम् । स्थिरचर-वृजिनघ्नः सुस्मितश्रीमुखेन ब्रजपुरवनितानां वर्द्धयन् कामदेवम् ” (मनुष्यनके निवासरूप, श्रीदेवकीजीतें जन्मको हे वादमात्र जिनको, (अर्थात् श्रीदेवकीजीतें जन्म लियोहे यह कथनमात्रहे) उत्तम यादव जिनके सभारूपहे, अपने हस्तनसों अधर्मको मिटायवेवारे स्थावर जंगमके दुःखको निवृत्त करिवेवारे, हास्ययुक्तमुखारविंदसो ब्रजके तथा मधुपुरी द्वारिकाके स्त्रीयनको कामदेवकी वृद्धि करिवेवारे प्रभु सर्वतें अधिकतासों विराजतहें) याभांति ब्रजकी वनिताको कामकी वृद्धि करतहें ओर श्रीगुसाईजी पलनामें कहेहें “ मानिनीमानहरणं ” श्रीयशो-दाजीके आगे पलनामें झुलतहें ओर श्रीस्वामिनीको मानहू मनावतहें [मानहरतहें] याभांति वाललीलाहीमें एककालावच्छिन्न समस्तलीला करतहें यह विरुद्धधर्माश्रय स्वरूप ब्रजमेंहे एसें मूलरूप श्रीकृष्ण मूललीला सहित ब्रजमेंहे जेसें मूलरूप श्रीकृष्ण सदा एकरस ब्रजमें लीला करतहें तेसेंही मूलरूप लीलाहू सदा एकरसहे यह कहिकें यह जताये जो जेसें श्रीकृष्ण नित्यहें तेसे श्रीकृष्णकी लीलाह.

नित्यहे ॥ १४ ॥ उपर कहे ऐसे श्रीकृष्ण सर्वके मूलरूप रसात्मकहैं इनकों निरंतर अपने चित्तमें स्थापन करनें सोहिं रसात्मक सेवा अपने मार्गमेंहे तातें चित्तमें निरंतर एसो प्रभुको लीलासहित अनुभव करे सो मानसी सेवा जाननी. ताकी सिद्धिके अर्थ शरीरसों तथा वित्तसों सेवा नित्य नियमपूर्वक कर्तव्यहे सो श्रीआचार्यजीमहाप्रभुजी सिद्धांत-मुक्तावलिमें कहेहैं “ कृष्णसेवा सदा कार्या मानसी सा परा मता । चेतस्तत्प्रवणं सेवा तत्सिद्धयै तनुवित्तजा ” (श्रीकृष्णकी सेवा सदा करनी सो मानसी उत्तम मानी हे चित्त प्रभुमें लीन करना सो सेवा जाननी ताकी सिद्धिके अर्थ तनुजा वित्तजा करनी) यह वचनसों श्रीकृष्णकी तनुजा वित्तजा सेवा नित्य नियमपूर्वक करे तब मानसी सिद्ध दोग यह पुष्टिमार्गकी रीतिहैं ॥ १५ ॥

मूलं—निवेदनानुसंधानं विधेयं तादृशैः सह ।

सत्संग एव कर्तव्यो विश्वासः स्थाप्यतां दृढः ॥१६॥

शब्दार्थः—निवेदनको अनुसंधान तादृशीय भगवदीयनके संग करनो, सत्संगही करनो, दृढ विश्वास स्थापन करनो ॥१६॥ टीका—एसें श्रीकृष्णमें भाव प्रकट होय ताके अर्थ पुष्टिमार्गीय तादृशीय वैष्णवसों मिलिके निवेदनको अनुसंधान करे तातें सत्संगहू नित्य-नियमसों करे ओर भगवदीयनके वचनको अपने मनमें चातकपक्षिवत् दृढ विश्वास राखे तब ऐसे(श्रीकृष्णके स्वरूपानंदको)अनुभव होय॥१६॥

मूलं—कृष्णः कृपापराधीनो दीनानामनुपेक्षकः ।

स्वकीयानामन्यभावात्करिष्यत्यवनं स्वतः ॥१७॥

शब्दार्थः—श्रीकृष्ण कृपातें पराधीनहैं सो दीनजनकी उपेक्षा नांही करतहैं सो अपने जननके अनन्यभावेतें स्वतः (आपुतेंही) रक्षा करेंगे ॥१७॥ टीका—श्रीकृष्ण केसेहैं जो कृपा करिकें अपने दासके आधी-

नहें सो भगवदीय गायेहें “ भक्तविरहकातर करुणामय डोलत पाछें लागे ” ऐसे श्रीकृष्ण प्रसिद्धहैं, अर्जुनको रथ हांक्यो, पांडवनके आज्ञाकारी भये, ओर ब्रजभक्तनसों तो एकक्षणहू जूदे नांही रहत हैं. याभांति श्रीकृष्ण कृपा करिकें अपने भक्तनके आधीन हैं, तातें यह पुष्टिमार्गमें श्रीआचार्यजीद्वारा शरण होय निःसाधन होय दैन्यकरि रहे ऐसे भक्तनकी उपेक्षा कवहू श्रीकृष्ण नांही करत हैं. ओर जेसैं संसारासक्त जीव लौकिक वैदिकमें महादुःख पावतहैं तिनकी उपेक्षा प्रभु कियेहैं (काहेतें जो संसारमें सुख ओर दुःख दोय फलहे सो पुण्यको फल सुख ओर पापको फल दुःखहे सो लोकमें तिनहीकी अपेक्षा राखतहैं तातें इनकों लौकिक फल देतहैं) तेसैं अपने स्वकीय (निजभक्तन) को अन्यथाभाव कोई कालमें कवहू श्रीकृष्ण नांही करतहैं सदा भावकी रक्षाही करत आये हैं, रक्षा करतहैं ओर रक्षा करेंगे. ओरद्वारा कवहू रक्षा न करावेंगे स्वतः (आपु) भक्तनकी रक्षा करतहैं ऐसे कृपालु श्रीकृष्णहैं ॥ १७ ॥

मूलं—धर्ममार्गप्रवृत्तिस्तु चित्तशुद्धया यथा हरौ ।

मतिः स्यान्नैव पाषंडे तदर्थं सर्वथेष्ट्यते ॥ १८ ॥

शब्दार्थः—धर्ममार्गकी प्रवृत्ति तो चित्तशुद्धितें जेसैं हरिमें मति होय पाखंडमें (मति) नांही होय ताके अर्थ सर्वथाहे ॥ १८ ॥ टीका—धर्ममार्गमें प्रवृत्त भयेतें चित्तशुद्धि होतहे तातें हरिमें शुद्ध मति [भाव] होतहे पाखंडमें मति न होय ताके अर्थ सर्वथा धर्ममार्गमें प्रवृत्तिहे ॥ १८ ॥

मूलं—मार्गप्रवर्तकाचार्यचरणेषु निरंतरम् ।

विश्वासः मुदृढः कार्यस्ततः सर्वं फलिष्यति ॥ १९ ॥

विशेषो गोवर्द्धनदासपत्राज्ज्ञेयः किमधिकम् ।

शब्दार्थः—यह पुष्टिमार्गके प्रवर्तक श्रीआचार्यजीके चरणकमलमें अतिदृढ विश्वास करनो ताते सब फलरूप होयंगे विशेष गोवर्द्धन-दासके पत्रते जानियो बढती कहा लिखे ॥१९॥ टीका—पुष्टिमार्गके प्रवर्तक श्रीवल्लभाचार्यजीहें तिनके दोयचरणकमलको दृढ आश्रय करनो जावैष्णवकों मनमें दृढ आश्रय होयगो तिनको सगरो फल निश्चय सिद्ध होयगो यामें संदेह नाहीहे ताते सर्वोपरि सिद्धांत यहहे जो श्रीआचार्यजीके चरणकमलको दृढ विश्वास करनो. विशेष समा-चार गोवर्द्धनदासके पत्रते जानियो ॥ १९ ॥

इति श्रीहरिरायजीकृतमष्टत्रिंशत्तमं शिक्षापत्रं श्री-
गोपेश्वरजीकृतव्रजभाषाटीकासमेतं समाप्तम् ॥३८॥

शिक्षापत्र ३९.



एकोनचत्वारिंशत् शिक्षापत्रमें, सत्संग करि निरंतर प्रभुमें चित्त स्थापन करनो, प्रथम जो नाम निवेदनके मंत्र सुनेहें तिनके अर्थको अनुसंधान करनो बुद्धि निश्चल करिकें भगवत्सेवा करनी, वैष्णवनको समाधान हे सोही भगवत्सेवाहे प्रभुमें प्रपत्ति बढे सोही करनो, प्रभु दुराराध्यहें सो सेवातेही वश्य होयहें तासो भगवत्सेवा करिवेवारे जन भाग्यवानहें यह निरूपणहें । ऊपर पुष्टिमार्गमें सेव्य श्रीकृष्ण रसात्मक स्वरूपको वर्णन कियो तिनकी सेवा करनी, भगवदीयको संग करनो, सो प्रकार आगे कहतहें—

मूलं—सत्संगेन प्रभौ चित्तं स्थापनीयं निरंतरम् ।

पूर्वं श्रुतानामर्थानामनुसंधानमादरात् ॥ १ ॥

शब्दार्थः—सत्संग करिकें निरंतर प्रभुमें चित्त स्थापन करनेों ओर पहिलें सुन जो नाम निवेदनमंत्र तिनके अर्थको अनुसंधान आदरसों करनेों ॥ १ ॥ टीका—अब श्रीहरिरायजी कहतहें जो सत्संगकरि प्रभु जो श्रीकृष्ण तिनमें चित्त निरंतर स्थापन करें. सो नवरत्न ग्रंथमें श्रीआचार्यजीमहाप्रभुजी कहेहें “निवेदनं तु स्मर्त्तव्यं सर्वथा तादृशैर्जनैः” याभांति निवेदनको स्मरण तादृशीय भगवदीयके संग मिलिकें करे तब चित्तमें भगवान् निरंतर निश्चय स्थित होय सो एकादशस्कंधमें श्रीकृष्ण आप श्रीमुखसों उद्धवजीकों कहेहें “न रोधयति मां योगो न सांख्यं धर्म उद्धव ! । न स्वाध्यायस्तपस्त्यागो नेष्टापूर्त्त न दक्षिणा ॥ व्रतानि यज्ञश्छंदांसि तीर्थानि नियमा यमाः । यथावरुंधे सत्संगः सर्वसंगापहो हि माम्” यह वचनसों भगवान् कहतहें जो मैं इतने साधनतें नांही बस होतहों योग, तथा सांख्य न धर्म, न स्वाध्याय, तप त्याग, न इष्टापूर्त्त, न दक्षिणा, व्रत, यज्ञ, छंद, तीर्थ, नियम, यम, इत्यादि अनेक साधन मोकों निरोध नांही करतहें जेसैं सत्संग मोकों निरोध करतहे तातें सत्संग बडो पदार्थहे तासों पुष्टिमार्गीय वैष्णवकों सत्संग निरंतर कर्त्तव्यहे. ओर पूर्व जो श्रीवल्लभकुलद्वारा अष्टाक्षर नाममंत्र सुन्योहें ताकों अर्थसहित अनुसंधान आदरपूर्वक करे जो श्रीकृष्णको नामहे सो सगरे वेदशास्त्रको सार परम रसात्मकहे एसे श्रीकृष्णके में शरणहों यह नाम श्रीआचार्यजीद्वारा प्राप्त भयोहे. याभांति भावना करि नाममें परम आदर राखे अष्टप्रहर लियो करे ॥ १ ॥

मूलं—भगवत्सेवनं सम्यग्विधेयमिति निश्चयः ।

वैष्णवादिसमाधानं कृष्णसेवैव सर्वथा ॥ २ ॥

१ जो याके पेहेलें शिक्षापत्र पठायेहें इनके अर्थको अनुसंधान एसोह अर्थ होयहें.

यतः प्रभोः प्रपत्तिर्हि वर्द्धते कार्यकारणात् ।

सेवयैव हि संतुष्टः सुखसेव्यः प्रभुर्भवेत् ॥ ३ ॥

शब्दार्थः—भगवानकी सेवा आछीभांतिसों करनी यह निश्चय राखनों वैष्णवादिकनको समाधानहे सो सर्वथा श्रीकृष्णकी सेवाहीहे ॥२॥ जासों (एसे श्रीकृष्णकी सेवाहे सो कारणहें ओर प्रपत्तिकी वृद्धि हे सो कार्यहे याभांति) कार्य कारणभावसों निश्चय प्रभुमें प्रपत्ति बढेहे तासों सेवासंतुष्ट प्रभु सुखसेव्य होय ॥ ३ ॥ टीका—सम्यक् प्रकार अत्यंत प्रीतिपूर्वक तथा जाप्रकार पुष्टिमार्गकी रीतिहे ताप्रकार भगवत्सेवा करे यह पुष्टिमार्गीय वैष्णवनको निश्चय सेवाही स्वधर्महे सो नवमस्कंधमें भगवान् कहेहें “भत्सेवया प्रतीतं च सालोक्यादिचतुष्टयम् । नेच्छन्ति सेवया पूर्णाः कुतोऽन्यत्कालविप्लुतम्” मेरी सेवातें साक्षात्कार भयो एसो भक्त सालोक्यादिक चारप्रकारकी मुक्तिकों नाहीं इच्छतहें काहेतें जो सेवातें पूर्णहे सो कालमें डूबे एसे स्वर्गादिकके राज्यादिककी इच्छा कैसें करे ?) ओर तृतीयस्कंधमें कहेहें “अहो वकीयं स्तनकालकूटं जिघांसयापाययदप्यसाध्वी । लभे गतिं धान्युचितां ततोऽन्य कं वा दयालु शरणं ब्रजेम” (दुष्ट पूतनानें जिनकों मारिवेके लिये कालकूट [स्तनमें] प्यायो सोहू धात्रीकी योग्य गतिकों प्राप्त भई इन प्रभुसों अन्य एसो कौन दयालुहे जिनके शरण जईयें) ओर अष्टमस्कंधमें ब्रह्माजी कहतहें “यथा हि स्कंधशास्त्रानां तरोर्मूलावसेचनम् । एवमाराधनं विष्णोः सर्वेषामात्मनश्च हि” [जैसें

१ ब्रजभक्तनकीनाई शरणागति बढे सो प्रपत्ति बढी जाननी. २ प्रभुकी सेवा ओर वैष्णवनके समाधानतें शरणागतिकी वृद्धि होय तासों कार्यकारणभाव लिख्योहे. ३ जो स्तनपान करावबेवारी होय ताको धात्री कहेहे. ४ अपनेकों दुःखदेयवेक् आवे ताकें सुखदे एसो कौन दयालुहे “अर्थात् प्रभु एसे दयालुहें ओर कोव नाहीं.”

वृक्षके मूलमें जलको सेचनहे सो छोटिवडी सब डारनकों तृप्तिकारकहे
 तेसैं विष्णुकों आराधनहे सो सब देवनकों तथा आत्माकोहू संतोषका-
 रकहे] इत्यादि वचनको भाव विचारि भगवत्सेवा सर्वोपरि मुख्यधर्म
 जानि प्रीतिपूर्वक नित्य नियमसों करे ओर महाप्रसाद तथा प्रसादी
 वस्त्रसों बने तितनो वैष्णवको समाधान करे जेसैं प्रीतिपूर्वक भगव-
 त्सेवा करे तेमेंही प्रीतिपूर्वक महाप्रमादीवस्तुनसों तादृशीय वैष्णवनको
 समाधान करे याप्रकार पुष्टिमार्गमें वैष्णव रहे तो प्रभु कृपा करे ॥२॥
 प्रभुकी प्राप्तिके अर्थ दीनतासों प्रार्थना करे तो प्रभुकों दया आवे
 तब कृपा करे, भक्तिकी वृद्धि होय, सो श्रीगुसाँईजी विज्ञप्तिमें कहेहैं
 “यदैन्यं त्वत्कृपाहेतुर्न तदस्ति ममाण्वपि । तां कृपां कुरु राधेश !
 यया तदैन्यमाप्नुयाम् ॥ प्रियसंगमराहित्याद्व्यर्थः सर्वे मनोरथाः ।
 निरपत्रपतासिद्धयै जीवामि सखि सांप्रतम् ॥ चित्तेन दुष्टो वचसापि दुष्टः
 कायेन दुष्टः क्रियया च दुष्टः । ज्ञानेन दुष्टो भजनेन दुष्टो ममापराधः
 कतिधा विचार्यः ॥ विज्ञप्तौ वापराधे वा पापंडे वा मदुक्तयः । पर्यव-
 स्यन्ति कुत्रेति न जानेऽहं विमूढधीः ॥ बलिष्ठा अपि महोपास्त्वत्कृपा-
 ग्रेतिदुर्वलाः । तस्या ईश्वरधर्मत्वात् दोषाणां जीवधर्मतः ॥ त्वद्दर्शन-
 विहीनस्य त्वदीयस्य तु जीवितम् । व्यर्थमेव यथा नाथ ! दुर्भगाया नवं
 वयः” [जादैन्यतें आपकी कृपा होय सो दैन्य मोकों अणुमात्रहू
 नाहीहे तासों हे श्रीराधेश ! एसी कृपा करो जा कृपाकरि एसो
 दैन्य प्राप्त होय ॥ पतिके संगम विना सर्व मनोरथ व्यर्थहे तासों
 हे सखि ! निर्लज्जपनेकी सिद्धिके अर्थ अव में जीवतहों ॥
 में चित्तमें दुष्टहों, वचनतेंहू दुष्टहों, शरीरतें दुष्टहों, क्रियातें दुष्टहों,
 ज्ञानतें दुष्टहों, भजनतें दुष्टहों. (एमें सर्व प्रकारसों दुष्टहों तासों)

१ जा दैन्यमों आपकी कृपा होतहे एमो दैन्य प्राप्त होय एसी कृपा करो.

मेरी अपराध केलेप्रकारको विचारनों ॥ में जो विज्ञप्तिमें कहत हों सो मेरी उक्ति, विज्ञप्तिमें के अपराधमें के पाखंडमें कायमें पर्यवसान होयँगी सो मेरी बुद्धि मूढ होयगईहे तासों में नाहींजानतहों ॥ ४ ॥ मेरे दोष वोहोत बलवानहे तोहू आपकी कृपाके आगे अति दुर्वलहें काहेतें जो कृपाहे सो आप ईश्वरहें इनको धर्महे ओर दोषहे सो हम जीवहें ताको धर्महे सो ईश्वरधर्मके आगे जीवधर्म अतिदुर्वलहे ॥ आपके दर्शनरहित जो आपको जीवहे ताको जीवित हीनभाग्यवारी (विधवा) के नवीन अवस्थाकीनाई हेनाथ ! व्यर्थहीहे] याभांति अनेकभावसों प्रासिके लिये दीनतासों प्रार्थना करे जो में महादुष्टहों, आप मेरे प्रभुहो, श्री आचार्यजीद्वारा संबंध भयोहे सो मोपर कृपा करो याभांति दैन्यतें प्रभुकों दया आवे भावकी वृद्धि होय काहेतें जो भावकी वृद्धिको कारण एक दैन्यहीहे तासों याभांति दीन होय श्रीकृष्णकी सेवा करे तब श्रीकृष्ण संतुष्ट होयजाय ता वैष्णवकों प्रभु सुखसेव्यहे कवहू सेवामें प्रतिबंध न करे कवहू रोगादिक बाधा न करे जन्मभरि प्रभुकी सेवा निर्विघ्नतासों होय सो श्रीगुसाईजी कहेहें “सुखसेव्यो” ऐसे वैष्णवकों सुखसेव्यहीहें ॥ ३ ॥

मूलं—दुराराध्यस्य सेवैव वशीकरणसाधनम् ।

कृष्णसेवां प्रकुर्वतो भाग्यवंतो जना मताः ॥४॥

शब्दार्थः—दुराराध्य प्रभुहें इनकों वश करिवेको साधन सेवाहीहे तासों श्रीकृष्णकी जो सेवा करतहें सो जन भाग्यवानहें ॥४॥ टीका—श्रीकृष्ण अत्यंत दुराराध्यहें ब्रह्मादिक शिवादिक कोटानकोटि वर्षतोंई अनेक साधन करतहें तब समाधिमें कवहू आंखि होतहे ओर जीवतो अनेक दोषकरि भयोंहे तासों दुष्ट होयरहोहे तिनकों तो दुराराध्यहीहें वडेवडे योगी अपने हृदयमें कल्पना करतहें मुनिजन जन्मजन्ममें यत्न

करतहैं तिनकों प्रभु दुराराध्यहैं तो जीवकी कहा बातहैं ? तो हू जो दैवी जीव श्रीआचार्यजीद्वारा शरण आयेहैं ओर पुष्टिमार्गकी रीति अनुसार भगवत्सेवा करत हैं दीन होय येही साधन करतहैं उह भक्त-नके बस होतहे तासों जो वैष्णव यह पुष्टिमार्गमें श्रीआचार्यजीद्वारा शरण आय मार्गकी रीति अनुसार सेवा करतहैं सो परमभाग्यवंतहैं (वडभागीहैं) उनहीको जन्म सफलहे सो सप्तमस्कंधमें प्रह्लादजी कहेहैं “ देवोऽसुरो मनुष्यो वा यक्षो गंधर्व एव वा । भजन्मुकुन्दचरणं स्वस्ति-मान्स्याद्यथा वयम् [प्रह्लादजी असुरनके बालकनकों कहतहैं जो देव, असुर वा मनुष्य, यक्ष अथवा गंधर्व जो मोक्षदेवेवारे भगवानके चरणारविंदकों भंजतहे सो जेसे अपने असुरहे तेसे होय तोहू कल्याणयुक्त होयहे] ओर पष्ठस्कंधमें पार्वतीको महादेवजी कहेहैं “ नारायणपराः सर्वे न कुतश्चन विभ्यति । स्वर्गापवर्गनरकेष्वपितुल्यार्थदर्शिनः ” ॥ (नारायण-परायण सर्वकाहुसो नांही डरपतहे स्वर्ग, मोक्ष ओर नरकमें हू तुल्य अर्थ देखिवेवारेहे] ऐसे अनन्य भगवद्भक्तसमान ओर कोई नांहीहे ॥ ४ ॥

मूलं—तस्माद्दृढं मनः कृत्वा कृष्णएव हि सेव्यताम् ।

अत्रत्यं वृत्तमखिलं वदिष्यति विशेषतः ।

श्रीविठ्ठलप्रभोर्दासः श्यामदाससहास्थितः ॥ ५ ॥

तत्रत्य वृत्तांतोऽखिलो विविच्य लेख्यः किमाधिकम् ॥

शब्दार्थः—तासों मन दृढ कहिके श्रीकृष्णही सेवने इहांको सब वृत्तांत श्यामदासके संग रह्यो एसो, श्रीविठ्ठलरायजीको दास विशेष-सो कहेगो ॥ ५ ॥ उहांको सब वृत्तांत विस्तार करिके लिखनों विशेष कहा लिखे ॥ टीका—सर्वोपर श्रीकृष्णकी सेवा दृढ मन करिके प्रीतिपूर्वक कर्त्तव्यहे सो श्रीभागवतसप्तमस्कंधमें प्रह्लादजी कहेहैं

“ न दानं न तपो नेज्या न शौचं न व्रतानि च । प्रीयतेऽमलया भक्त्या हरिरन्यद्विडंबनम् ” (न दान, न तप, न यज्ञ, न पवित्रता, न व्रत, प्रभुकों प्रसन्न करेहें शुद्ध भक्तिकरि हरि प्रसन्न होयहें दूसरो तो सब विडंबनहे) ओर दशमस्कंधमें उद्धवजी कहेहें ॥ श्लोक ॥ “ दान-व्रततपोहोमजपस्वाध्यायसंयमैः ॥ श्रेयोभिर्विविधैश्चान्यैः कृष्णे भक्तिर्हि साध्यते (दान, व्रत, तप, होम, जप, स्वाध्याय, नियम, ओर दूसरे जुदेजुदे प्रकारके कल्याणमार्गनतें श्रीकृष्णमें भक्ति सिद्ध होतहे) एकादशस्कंधमें श्रीकृष्ण कहेहें ॥ श्लोक ॥ तत्सर्वं भक्तियोगेन मद्भक्तो लभतेजसा ॥ स्वर्गोपवर्गं मद्भाम कथंचिद्यदि वाञ्छति ॥ [जो योगादिक साधनतें प्राप्त होयहें सो सर्व मेरो भक्त स्वर्ग ओर मोक्षरूप मेरो धाम (व्यापि वैकुण्ठ) हे तिनकों जो कोयरीतसुं चाहे- सो विनाहीश्रम मेरे भक्तियोगतें पावतहे] याभांति श्रीकृष्णहीकी भक्ति सर्वोपरहे तातें निष्काम होय श्रीकृष्णकी सेवा मन लगायकें कर्त्तव्य ओर इहांके सब वृत्तांत विशेषकरि श्रीगोकुलनाथजीके पुत्र श्रीविठ्ठलरायजीको दास तथा श्यामदास कहेगो सो जानिकें उहांके जो समाचार होय सो अखिल विस्तारपूर्वक प्रतिउत्तर लिखोगे किमधिकम् ॥ ५ ॥

इति श्रीहरिरायजीकृतमेकोनचत्वारिंशत्तमं
शिक्षापत्रं श्रीगोपेश्वरजीकृतव्रजभाषा-
टीकासमेतं समाप्तम् ॥ ३९ ॥

१ भगवद्भक्त मोक्षादिककीहू इच्छा न राखे परंतु कदाचित् इनकी इच्छा होय तो विनाहीश्रम भगवद्भक्तिते मिले.

शिक्षापत्र ४०.

अब चत्वारिंशत्तमशिक्षापत्रमें सर्वसाधनरहित में भयोहों ऐसे जतायवेकेलिये वोहोत दीनताके वाक्यमें ओर हमारे अधिकारीनें निंदित एक कार्य कियो तातें मनमें वोहोत खेद भयो परंतु फिर शांति भईहे (यह वृत्तांत, संग करनो सो विचारिकें करनो यह जतायेवेके लिये लिख्यो हे) अब इनकी उपर मेरी कृपाहू पूर्ववत् हे तातें प्रेमजी उदास भयो हे सो तुम्हारे हू उहांसों इनकी उपर प्रशंसाके जुदेजुदे पत्र लिखने यह निरूपणहे । उपर कहे जो यह पुष्टिमार्गमें श्रीकृष्णकी सेवा सर्वोपरहे साधन फल येही कर्तव्यहे सो मोसों कच्छू हू नांही बनसकेहें यह निरूपणहे

मूलं—पत्रद्वारा प्रकरवै स्वदुःखविनिवेदनम् ।

महत्तराख्ये चलिते दूरगेषु भवत्सु च ॥ १ ॥

जानामि निजमार्गस्य धर्मं किंचित्कृपाबलात् ।

तदसिद्धिजहत्क्लेशं को मे दूरी करिष्यति ॥ २ ॥

शब्दार्थः—महत्तरनामको भगवदीय चलो ओर तुम दूर रहे तासों [जो मोकों दुःख भयोहे सो] अपने दुःखकों विशेष बतायवो पत्रद्वारा करतहों ॥ १ ॥ कलुक (वडेनकी) कृपाके बलसों अपने मार्गके धर्मकों जानतहों सो मोकों यह धर्मकी असिद्धितें भयो जो हृदयको क्लेश ताकों कोन दूरिकरेंगो ॥ २ ॥ टीका—अब श्रीहरिरायजी कहतहें जो मैं अपनों दुःख तुमकों पत्रद्वारा निवेदन करतहों काहेतें जो तुम सर्वलायकहो मेरे प्रियभ्राताहो तातें दुःखसुख तुम विना ओर दूसरे कोनसों कहों ? ओर तुम दूरहो जो पास हते तो

दुःखमें सहायही करते तेसैं मोकों तुमारे संगतैं दुःखही न होतो तातैं यह पत्रद्वारा मेरो दुःख जानोगे, महत्तरहे आख्या [नाम] जिनको ऐसे भगवदीय मेरे पासतैं अपने कार्यार्थ चले सोहू मोकों छोड़िके दूरिगये ओर तुमहू इहांतैं दूरिहो अब मिलनकी आशा मोकों नांहीहे तातैं पत्रद्वारा अपनो दुःख लिखतहों सो वांचिके समाचार जानोगे ॥ १ ॥ श्रीआचार्यजी तथा श्रीगुसाँईजीकी कृपाके चलतैं निजमार्ग [यह पुष्टिमार्ग] को धर्म कच्छू जानतहों सो [भगवदीय दूरि गये ओर दुःसंग बोहोतहे तासों] सिद्ध न भयो ताकरिके मेरे हृदयमें अत्यंत दुःख [क्लेश] भयोहे सो कोन दूरि करेंगे सो मोकों जानि नांही परतहे काहेतैं जो मैं सकलसाधनकरिके रहितहों ओर अनेकं दोषतैं भयोंहों तातैं एसो मेरो दुःख कोन दूरि करेंगे ॥ २ ॥

मूलं-प्रायः पापंडिमुख्योऽहं हरिणा हृदि चिंतितः ।

कृपालुरप्युपेक्षां मे कुरुते दीनवत्सलः ॥ ३ ॥

शब्दार्थः-बोहोत करिके मैं पापंडिनमें मुख्यहों एसैं हरिनैं हृदयमें विचार्योंहों काहेतैं जो (हरि) कृपालु ओर दीनवत्सलहे तोहू मेरी उपेक्षा करतहैं ॥ ३ ॥ टीका-अब श्रीहरिरायजी दीनता होयवेके लक्षण अपने सेवक (पुष्टिमार्गीय वैष्णव)-कों जतायवेके लिये आप निःसाधनपनो कहतहैं जो मैं सगरे पापंडीमें मुख्यहों सो अपने मुखसों मैं कहा कहो ? हरिहू मोकों पापंडी जानतहे काहेतैं जो हरितो सर्वदुःख-हर्ता परम दयाल दीनवत्सलहे तोहू मेरी उपेक्षा कीनीहे तातैं मैं जानतहो जो मोको महापापंडी जानिके मेरी उपेक्षा कीनीहे सो अब मैं कहा करूं ? याभांति दैन्य कर्त्तव्यहे सो विज्ञप्तिमें कहतहे “ चित्तेन दुष्टो वचसापि दुष्टः कायेन दुष्टः क्रियया च दुष्टः । ज्ञानेन दुष्टो भजनेन दुष्टो ममापराधः कतिधा विचार्यः ॥ १ ॥ जानामि मंदभाग्योऽहं यदयं

गोकुलेश्वरः। भक्तक्लेशसहिष्णुत्वस्वभावं कुरुतेऽन्यथा॥२॥ श्रीगुसांईजी गोवर्धननाथजीसों कहतहें जो मैं चित्त करिकें दुष्टहों, वानी करिकें दुष्टहों, काया करिकें दुष्टहों, क्रिया करिकें दुष्टहों, ज्ञान करिकें दुष्टहों, भजन करिकें दुष्टहों, ऐसे मेरो अपराध कहाँताँई विचारोगे ॥ १ ॥ मैं जानतहों, जो मंदभाग्यवारोहों काहेतें जो गोकुलेश्वर तुझारे नामहे सो आगें गाय, गोप, गोपी, सगरे ब्रजकी तुमनें रक्षाकरीहे भक्तको क्लेश होय सो आप नांही सहीसको एसो परम दयाल तुझारो स्वभावहे सो अव अन्यथा कियो (कठोर भये भक्तको क्लेशहोय सो अव सहन लागे) सो तुम ईश्वरहो कर्तुं, अकर्तुं, अन्यथाकर्तुं, सर्व सामर्थ्ययुक्तहो तासों चाहो सो करो तुमकों कहा कहियें ? मैं ही मंदभाग्यवारोहों जो मेरे लिये आपको यह अपनो दयालस्वभाव फेरी कठोर होनो पर्यो इतनो धर्म भयो अव भक्तनके क्लेश सहनलागे याभांति दैन्य ही पुष्टिमार्गमें साधन हे सो भगवदीय दैन्य करि गाये हे हों पतितनको राजा, हों पतितनको ईश, हों पतितनको टीको, हों पतितनको नायक, इत्यादिक दैन्यके वचनतें जीवकों स्वरूप प्रकट किये सो जीव भगवानते न्यारे पडे तब दुष्ट भये ताहीते श्रीआचार्यजीमहाप्रभुजी वालबोधमें कहेहें “जीवाः स्वभावतो दुष्टाः” याभांति श्रीहरिरायजी श्रीगुसांईजीके भाव अनुसार कहतहे जो मैं पापंडीमें मुख्यहो ऐसे मोको प्रभु अपने चित्तमें चिंतन करिके (यद्यपि श्रीकृष्ण दयालहे दीनवत्सलहे तोहू) मेरी उपेक्षा कीयेहे तहां कोई कहे जो प्रभु (श्रीकृष्ण) भक्तकी उपेक्षा नांही करतहे यह शास्त्र, पुराण, श्रीभागवत, गीता, इत्यादिकमें प्रसिद्धहे तासों तुमने कैसे जानि जो मेरी उपेक्षा कियेहे ? याभांति कोई कहे तहा कहतहे ॥ ३ ॥

मूलं—उपेक्षितश्चेद्धरिणा स्वजनैरप्युपेक्ष्यते ।

अतः क यामि शरणं वनस्य इव विस्मृतः ॥४॥

शब्दार्थ:-हरिनें उपेक्षा किये तब स्वजन (वैष्णव) नेहू उपेक्षा किये तासों वनमें [ओर अपने जननें] विस्मृत कियो ओर आपु मार्गको भूलि गयो एसो कोनके शरण जाउं ॥ ४ ॥ टीका-श्रीकृष्ण उपेक्षा किये एसें में यातें जान्यो जो मोकों पुष्टिमार्गीय तदीयनें छोडि दियो सो मेनें आगे बढेनके श्रीमुखद्वारा शास्त्रवार्ता सुनी हे जो भगवान् प्रसन्न भये कब जानियें ? जब भगवदीयको मिलापहोय. ओर भगवान् उदासीन भये कब जानियें ? जब भगवदीय छोडिजाय. सो भगवदीय छोडिगये तातें में जानतहों जो मेरी भगवान् उपेक्षाकियेहें. अब में कहा करूं ? किनकी शरण जाउं ? यह मोकों हृदयमें बड़ी चिंता भईहे जो भगवान् ओर भगवदीय दोउ मेरी उपेक्षा कियेहें अब में किनकी शरण जाउं ? जेसें कोउ गंभीर वनमें भूले परे तब कितकी ओर जाय ? कहूं गेल सूझे नांही तब बड़ी चिंता होय तेसेंहि मोकों बहुत चिंता भई हे. तहां कोई कहे जो प्रभुने उपेक्षा करि छोडि गये तो यह दोष प्रभुहीको तुम जानतहों सो यह भक्तिमार्गकी रीति कहां हे ? प्रभु तो निर्दोषहें तुम प्रभुको दोष क्यों ठहराये ? या भांति कोई कहे तहां कहतहें ॥ ४ ॥

मूलं-प्रभोरपि न वै दोषो गुणलेशापि नो मयि ।

विस्मृत्य दोषनिचयं यं गृह्णीयाद्गुणग्रहः ॥ ५ ॥

शब्दार्थ:-निश्चय करिकें प्रभुकोहू दोष नांहीहे काहेतें जो (प्रभु ग्रहणकरे एसो) मेरेमें गुणको लेशहू नांहीहे परंतु प्रभु जिनको ग्रहण करेहें तिनके दोषके समूहको विसरिकें गुणकोही ग्रहण करेहें काहेतें जो आप गुणग्राही हे ॥ ५ ॥ टीका-अब श्रीहरिरायजी कहतहें जो

१ लौकिकमेंहू जो गुणग्राहीहें सो सामनेके दोषनको नांही देखतहें केवल गुण-कोही ग्रहणकरतहें ओर जो दोषमानहें सो अपने दोषको नांही जानतहें सामेवारेमेंही दोषारोपण करतहें.

प्रभुको दोष तो रंचकहू नांहीहे यह सगरोदोष मेरोहें जो मोमें गुणको लेशहू नांही हे ओर दोष नखतें शिखापर्यंत भरे हे सो अपने दोष में विसरिगयोहों तासों मोकों महागुणवंत जानतहों यह अज्ञानता मेरेमें-हीहे सो मेरोही दोषहे प्रभुतो सदा गुणसंयुक्तहें तासों दोषकों नांही देखतहें जिनको अंगीकार करतहें तिनको गुणही देखतहें मोकोंही अज्ञानकरि भ्रम होतहे ॥ ५ ॥

मूलं-यथा निःश्वासरहितं किं करोति सुभेषजम् ।

तथा विगतभावं मां कथासेवादिकं पुनः ॥ ६ ॥

शब्दार्थः-जैसें श्वासरहित मनुष्यकों सुंदर औषध कहा करतहे ? तेसें गयोहे भाव जिनकों ऐसें मोकों फिर कथासेवादिक कहा करे ॥ ६ ॥ टीका-जैसें सुंदर भेषज (ओखद) पुरुषकों देय ओर वा पुरुषके श्वास तो नांहीहे तब वो सुंदर भेषजहू वृथा हे कच्छु अपनो पराक्रम न करे तेसेंहि मेरेमें भावनांहीहे तासों मोकों सेवाकथादिक भगवद्धर्म कहा करे ? जैसें पुरुषको प्राण (श्वास) विना सुंदर भेषज (ओखद) वृथा हे तेसेंहि भाव विना सेवाकथादिक क्रियावत् हे तासों कहा फल सिद्धिहे कच्छुहू नांही तातें मोकों दुःखहे ॥ ६ ॥

मूलं-प्रायः कथैव नैषास्ति यतस्तिष्ठति नो हृदि ।

न वानुभावं कुरुते निजं त्यागाभिधं मयि ॥ ७ ॥

शब्दार्थः-वोहोत करिकें यह कथाहू नांहीहे जासों हृदयमें स्थित नांही रहत हे, ओर संन्यासनिर्णयमें (विरह करिकें) त्याग नामको जो अपनो अनुभव कह्यो हे सोहू नांही करतहे ॥ ७ ॥ टीका-

१ ब्रजवामिनके लिखे पुस्तकनमें भेषजको अर्थ वेप लिख्योहे सो मूलसां विरुद्धहे तामों इहां नांही लिख्योहे. २ भावविना सेवाफलग्रंथमें लिख्यो मुख्यफल न होय तामों कच्छुहू नांही लिख्योहे परंतु गौणफल तो होय.

श्रीकृष्णकी कथा सेवादिकमें यह जीव नांही स्थितहे तब भाव हृदयमें कहाँते स्थिर होय ? भगवदीयद्वारा श्रवण करे तब हृदयमें भावसिद्ध होय सो श्रीभागवतमें द्वितीयस्कंधमें कहेहैं “प्रविष्टः कर्णरंघ्रेण स्वानां भावसरोरुहम् । धुनोति शमलं कृष्णः सलिलस्य यथा शरत्” (अपने मत्तनके कर्णके छिद्रतें भावरूपकमलप्रति प्रविष्ट श्रीकृष्ण “शरद ऋतु जलको मल मिटावे तेसैं हृदयको मल मिटावदेतहैं) और शुक्रदेवजी कहेहैं “तस्माद्गोविंदमाहात्म्यमानंदरससुंदरम् । शृणुयात्कीर्तयेन्नित्यं स कृतार्थो न संशयः” (तासों आनंदरसकरि सुंदर श्रीगोविंदको माहात्म्यहे तिनकों जो नित्य श्रवण करे कीर्तन करे सो कृतार्थहे तामें संशय नांही) इत्यादिक वचनमें कथाकीर्तनादिकको माहात्म्य लिख्योहे एसी कथाके श्रवण बिना हृदयमें भाव कैसे स्थिर रहे ? और जहांताँई देहसंबंधी कार्यमेंतें मनको त्याग न होय तहांताँई श्रीकृष्णके स्वरूपको अनुभव कहाँते होय ? काहेतें जो मनकरिकें भाव सिद्ध होतहे सो मनतो लौकिक संसारादिकमें विषयमें आविष्ट भयो तब अनुभव कहाँते होय ? सो संन्यासनिर्णयमें श्रीआचार्यजीमहाप्रभुजी कहेहैं “विषयाक्रांतदेहानां नावेशः सर्वथा हरेः” जाको देह विषयादिककी कामना करि भयोहि ताके हृदयमें भगवदावेश सर्वथा न होय सो मेरे मनमें तो कबलु लौकिक वैदिकको त्याग नांहीहे ताकरि अनुभव नांही ॥ ७ ॥

मूलं—सेवा तु प्रतिबद्धा मे भोगोद्वेगादिबांधकैः ।

गेहवित्तादिकासक्त्या कथं सा मानसी भवेत् ॥८॥

शब्दार्थः—भोग और उद्वेगादिक प्रतिबंधकरिकें सेवा तो बंध होय गईहे तब गृहधनादिककी आसक्तिकरि मानसी सेवा कैसे सिद्ध होय ॥८॥ टीका—तनुजा वित्तजा भगवत्सेवामें अनेक प्रतिबंधहैं शरीर

इंद्रियनके विषयकी कामना उठे तब सेवा करतमें उद्वेग होय जो कब सेवा करिचूकों पीछें खानपान करूं याभांति प्रथम विषयादिकके भोगकी कामना होय तब मनमें उद्वेग होय सेवामें मन न लगे सो प्रभुकों वूरी लगे तब प्रतिबंध होय जामें सेवाही न वनिआवे तब गृहादिक कार्यवित्त (द्रव्यादिक) में आसक्त होय तब मानसी सेवा कहांते सिद्ध होयगी सो सेवाफलमें श्रीआचार्यजीमहाप्रभुजी कहेहैं “ उद्वेगः प्रतिबंधो वा भोगो वा स्यान्तु बाधकः । (उद्वेग, प्रतिबंध, अथवा भोग, बाधक होय) यह वचनतैं सेवामें उद्वेग तथा देहसंबंधी खानपान (विषय भोग संसारासक्ति) ओर प्रतिबंध यह सेवामें बाधकहे जब उद्वेग भयो तब तनुजा वित्तजा सेवा न भई ओर लौकिक संसारासक्ति भई तब मानसी सेवा वाकों कैसें सिद्ध होयगी ? तनुजा वित्तजा सेवाहू सिद्ध नांहीहे तो मानसी तो परम दुर्लभहे ॥ ८ ॥

मूलं—तातपादेषु यातेषु दुर्भगस्य परोक्षताम् ।

सत्सु सर्वेषु यातेषु दृशोर्दूरमहं स्थितः ॥ ९ ॥

शब्दार्थः—तातपाद (श्रीकल्याणरायजी) दुर्भाग्यवारेकों परोक्षताकों प्राप्त भये ओर सब सत् पुरुष दूरिगयो दृष्टिकों एसें में रह्योहों अथवा में दृष्टिकों दूरिरह्योहों ॥ ९ ॥ टीका—अब श्रीहरिरायजी कहतहैं जो मेरी यह अवस्थाहैं तातैं श्रीआचार्यजी, श्रीगुसांईजी, श्रीगोकुलनाथजी, तथा श्रीकल्याणरायजी ये हमारे पिताहि समानहे श्रीआचार्यजी मार्गप्रकटकर्त्ता हैं, श्रीगुसांईजी यहमार्गके प्रकाशकर्त्ता हैं, श्रीगोकुलनाथजीद्वारा नामनिवेदन भयोहे सो मेरे गुरुचरण पिताहीहैं ओर श्रीकल्याणरायजी हमारे तातचरण जगत्प्रसिद्धहैं, यह तातचरण मोकों परोक्षहैं में इतैं न्यारो पयोहों सो यासमयमें या दुःखमें मेरी कोन

सहाय करेगो ? तातें में दुर्भागीहों ओर सत्पुरुष जो सर्वगुणयुक्त पुष्टिमार्गीय वैष्णव तिनहूतें में दूरिपर्यो हों तातें यह जानतहों जो दुर्भागीहों या दुःखमें मेरेपास सत्पुरुष कोई नांहीहे जो मेरो रंचकहू समाधान करे तातें में कहा करूं, दुःख पावतहों ॥ ९ ॥

मूलं—श्रीभागवतचिंता तु न विना संगतेः सताम् ।

मनसोऽत्यंतविक्षेपान्न वा शरणभावनम् ॥ १० ॥

शब्दार्थः—सत्पुरुषकी संगति विना श्रीभागवतको विचार नांही होतहे मनके अत्यंत विक्षेपसों शरणकी भावना नांही होतहे ॥ १० ॥ टीका—कोई कहेजो तुम बड़े ज्ञानवानहो सो सत्संग नांहीहे तो कहा भयो श्रीभागवतको अवलोकन करो ताहि करिकें सकल चिंता छेश दूर होयगो याभांति कोई कहे तहां कहतहें जो एकाग्र चित्त होय सत्पुरुषनको संग होय, तब श्रीभागवतकी खबरि पडे सो सत्संग नांहीहे ओर चिंताकरि हृदय दुःखित होय रह्योहे तातें श्रीभागवतको भाव मोकों कहातें दीसेंगो ? काहेतें जो तादृशीय भगवदीय सत्पुरुष होय, वे श्रीभागवतको भाव कृपा करि कहे बतावे तब जान्योजाय ओर मेंतो अकेलो हों ऐसैं व्यग्रचित्तसो श्रीभागवततें कैसे संतोष होयगो ? तहां कोई कहे जो हरिके शरणकी भावना करो सो श्रीआचार्यजीमहाप्रभुजी विवेकधैर्याश्रयमें कहेहें “अशक्ये वा सुशक्ये वा सर्वथा शरणं हरिः” (अशक्यमें तथा सुशक्यमें सर्वथा हरि शरण-हे) तथा गीताजीमें भगवान् अर्जुनप्रति कहेहें “सर्वधर्मान्परित्यज्य मामेकं शरणं ब्रज । अहं त्वां सर्वपापेभ्यो मोक्षयिष्यामि मा शुचः” [सर्वधर्मकों छोड़िकें एक मोकों शरण हो में तोकों सर्वपापनतें छुडा-उंगो शोक मति करे] याभांति शरणकी भावनातें सगरो कार्य सिद्ध

होय याभांति कोई कहे तहां श्रीहरिरायजी कहतहें जो मेरे मनमें अत्यंत विक्षेप होय रह्योहे ताकरिकें शरणकी भावना कहांतें होय । १०।

मूलं-वार्त्तांतरकृतिप्रेम्णा नाष्टाक्षरमनोजपः ।

महत्त्वमत्या लोकानां प्रपत्त्या दैन्यनाशनम् ॥११॥

शब्दार्थः—(भगवद्वार्त्ता सिवाय) ओरवार्त्ता करिवेमें प्रेमहे ताकरि अष्टाक्षरमहामंत्रको मनकरि जपनांही होयहे ओर महत्त्वबुद्धिकरिकें लोकनकी प्रपत्तितें दैन्यको नाश होयहे ॥ ११ ॥ टीका—कोई कहे जो ओर न बने तो अष्टाक्षरमहामंत्रको जप करो ताहींतें सगरो कार्य सिद्ध होयगो सो श्रीआचार्यजीमहाप्रभुजी नवरत्नग्रंथमें कहेहें “ तस्मात् सर्वात्मना नित्यं श्रीकृष्णः शरणं मम । वदद्भिरेव सततं स्थेयमित्येव मे मतिः ” (तासों “ श्रीकृष्णः शरणं मम ” एसें निरंतर बोलतेही रहनों इतनीही मेरी मतिहे) तातें अष्टाक्षरको जपही करो याभांति कोई कहे तहां कहतहें जो लौकिकवार्त्तांतरमें जहांतहां प्रेम होतहें तातें अष्टाक्षर जप कहांतें होय ? सो मेरो तो लौकिकवार्त्तामें अत्यंत प्रेमहे ताकरि अष्टाक्षरजपहू नांही बनि आवतहे. तहां कोई कहे जो अष्टाक्षरको जप न बने तो प्रभुसों दैन्यभाव करो ताहिकरि प्रभु प्रसन्न होयंगे सो श्री-आचार्यजी कहेहें “ दैन्यं त्वत्तोपसाधनम् ” दैन्य होय तो भगवान् संतोष पावे याभांति कोई कहे तहां कहतहें जो लौकिकमें सब लोगनमें अपनी बडाईहे तामें यह अहंता ममताहूहे जो में बडोहों, बहुत समुन्नतहों, मेरेमें बहुत धर्महे जाकरि दैन्यको नाशहे काहेतें जो लोगनमें बडाईहे यह महत्तामें उन्मत्त फूल्यो फिरतहों ताकरि दैन्यको नाशहे तातें में कहा करूं ? ॥ ११ ॥

१ मय लोक बड़े जानिकें शरण आवतहें तातें अपने मनमेंहू बडाई आयजाय. जहां बडाई आई तहां दैन्यको नाश भयो या अभिप्रायसों एमें लिखेहे.

मूलं—निवेदनानुसंधानं सद्भित्यक्तस्य मे कथम् ? ।

केवलं शरणं सर्वत्यागाभावाच्च दुर्लभम् ॥१२॥

शब्दार्थः—सत्पुरुषनें जिनको त्याग कियो हे एसो जो में तिनको निवेदनको अनुसंधान कहाँते होय ? ओर सर्वत्याग नाहींहे तासों केवल शरणहू दुर्लभहे ॥ १२ ॥ टीका—कोई कहे जो निवेदनको अनुसंधान राखो ताहिकरि सर्व सिद्ध होगयो याभाति कोई कहे तहां श्रीहरिरायजी कहतहें जो सत्पुरुष जो पुष्टिमार्गीय भक्त भगवदीयहें तिननेंतो मोकों तजिदियोहे अब निवेदनको अनुसंधान कैसें करूं ? काहेतें जो निवेदनको अनुसंधान भगवदीयसों मिलिकें कर्त्तव्यहे सो श्रीआचार्यजीमहाप्रभुजी नवरत्नग्रंथमें कहेहें “ निवेदनं तु स्मर्त्तव्यं सर्वथा तादृशैर्जनैः ” (निवेदनको स्मरण सर्वथा तादृशीयजननसों मिलिकें करें) इत्यादि वचनकरि निवेदनको अनुसंधान भगवदीयविना अकेलें कैसें होय ? तहां कोई कहे जो केवल प्रभु शरण करो जो श्रीआचार्यजीमहाप्रभुजी श्रीकृष्णाश्रयमें शरणमार्ग प्रकट करि शरण सिद्ध कियेहें सोहि करो एसें कहे तहां कहतहें जो केवल शरण तो सब लौकिक वैदिकको मनमें त्याग होय तब सिद्ध होय सो मेरे मनमें तो लौकिक वैदिक कार्य लागि रह्योहे सर्व त्यागको अभावहे शरण कहाँते होय ? तातें में कहा करूं शरण परम दुर्लभहें ॥ १२ ॥

मूलं—चांचल्याच्चेतसः कुत्र दृढः कृष्णपदाश्रयः ।

विवेकधैर्यं तद्धेतू मूर्खाधीशस्य मे कथम् ॥१३॥

शब्दार्थः—चित्तकी चंचलतातें दृढ श्रीकृष्णके चरणारविंदको आश्रय कहाँ ? ओर आश्रयके कारणरूप विवेक तथा धैर्यहे सो मूर्खाधीश जो में हों तिनको कैसें होय ॥१३॥ टीका—अब श्रीहरिरायजी कहतहें जो मेरो चित्त लौकिक देहसंबंधी कार्यमें अतिचंचल

होय रह्योहे ताकरिकें श्रीकृष्णके पदकमलमें दृढ आश्रय नांहीहे आश्रयकी कहा कहां विवेक ओर धैर्य आश्रयके साधनहे सोहू में मूर्खनको राजाहूं तिनको कहांतें होय ? विवेक धैर्य ओर आश्रय तीन्यो चाहियें सो विवेकधैर्याश्रयग्रंथमें श्रीआचार्यजीमहाप्रभुजी कहेंहे “विवेकधैर्ये सततं रक्षणीये तथाश्रयः” (विवेक ओर धैर्य निरंतर राखनें तथा आश्रय राखनो) यह वचननसों विवेक धैर्यकी अष्टप्रहर रक्षाकरे तव श्रीकृष्णको दृढ आश्रय होय सो अज्ञानीकों विवेक धैर्य कहांतें सिद्ध होय ? ताकरिकें आश्रयहू नांहीहे ॥ १३ ॥

मूलं-भावो यदनुभावेन भवेन्निष्कासितस्ततः ।

क ता ब्रजभुवः कृष्णचरणांबुरुहांकिताः ॥१४॥

शब्दार्थः—जिनके अनुभावतें भाव होय ता (ब्रजदेश) तें में निकासित हों अब श्रीकृष्णके चरणारविंदके चिन्ह (ध्वज, वज्र, अंकुश, पद्म, इत्यादिक) युक्त वह ब्रजभूमि कहां ! ॥ १४ ॥ टीका—अब श्रीहरिरायजी कहतहैं जो कच्छू न बने तो ब्रजलीलाकी भावना करे ताकरि अनुभव होय सो भावको अनुभव तो ब्रजसंबंधीं लीलासामग्री देखेतें होय तहांतें तो में निकासितहों बाहिर परदेशमें स्थितहों इहां कहा देखिकें भाव उत्पन्न होय ! याभांति अपनमें निःसाधनकी भावना करत करत दैन्य भयो तादैन्यकरि तीव्र विरह [विप्रयोग] प्रकट भयो सो देहानुसंधान भूलिगये ब्रजकी लीला तन्मय होयकें कहतहैं जो वह ब्रजकी भूमि कहां हैं ! जहां श्रीकृष्ण सगरी लीला ब्रजभक्तनके संग करीहे एमी ब्रजभूमि कहांहे ! जहां ठोर ठोर श्रीकृष्णके चरणारविंदहे जामें ध्वज, वज्र, अंकुश, स्वस्तिक, पद्म, अष्टकोण, यव-ऊर्ध्वरेखा, कलश, यह नव चिन्ह दक्षिण चरणके तथा गोपद, जंबु, मत्स्य, धनुष, त्रिकोण, अर्धचंद्र, आकाश, यह सातो वामचरणके मिलिकें षोडश चिन्हहैं ऐसे चिन्हयुक्त ब्रजभूमि कहां हे ? ॥ १४ ॥

मूलं-क शैलः कृष्णदासारव्यः पुलिंदीभावपोपकः।

क ते श्रीयमुनादेशा लीलारसवितारकाः ॥१५॥

शब्दार्थः—पुलिंदीकों भावपोपक कृष्णदास (हरिदास) हे नाम जिनको एसो शैल [श्रीगिरिराज] कहाँ ? लीलारसकों विस्तारिवेवारे श्रीयमुनाजी करि उत्कृष्टभये ऐसे वह देश कहाँ ? ॥ १५ ॥ टीका—कृष्णदास इनको नामहे ऐसे शैल [श्रीगिरिराज] परम दयालु कहाँहे ? जानें पुलिंदीसारिखीकों भावको स्थापनकियो श्रीगिरिराजके संगतें पुलिंदीकों भाव उत्पन्न भयो ऐसे श्रीगिरिराजजी सर्वांगतें प्रभुकी सेवा करतहैं सर्व ऋतुमें प्रभुकों सुख देतहैं गाय सुख पावतहैं ऐसे भावके पोपक श्रीगिरिराजजी कहाँहैं ? ओर श्रीयमुनाजी कहाँहे ? कुमारिका नके मनोरथ पूर्णकर्ता श्रीयमुनाजी जहां विराजतहैं ऐसे देश कहाँहैं ? इनके आश्रयतें श्रीकृष्णकी लीलाको अनुभव होय सो कहाँ ? ॥ १५ ॥

मूलं-क्व ते वेणुरवा यैवां समाकृष्टा व्रजस्थिताः।

व्रजनाथकरांभोजप्रोच्छिताः क्व गवां गणाः ॥१६॥

शब्दार्थः—जिनने व्रजमें रहे ऐसे व्रजभक्तनको आकर्षण कियो वह वेणुरव कहाँ ? ओर श्रीकृष्णने हस्तकमलकरि पोंछे ऐसे गायनके समूह कहाँ ? ॥ १६ ॥ टीका—अब श्रीहरिरायजी कहतहैं जो श्रीकृष्णने वेणुनाद करि समस्त स्थावर जंगमकों सुधादान किये वह वेणुको रच कहाँ ? ओर व्रजके नाथ (श्रीकृष्ण) अपने करांजुजमों पोंछतहैं, सगरी गायनकों सुख दई पालन करतहैं एमी अनेक गायनके समूह कहाँ ? ॥ १६ ॥

१ कृजन, गीत, ओर रव, तीन प्रकारकी वेणुनादों से वेणुगीतमें शक्तिदेने नामें रवमों आकर्षण निरूपण कियोहे.

मूलं—अनंतलीलाधारास्ते द्रुमाः क्व विपिनस्थिताः ।

वेणुनादपरा वृक्षभुजारूढः क पक्षिणः ॥ १७ ॥

शब्दार्थः—अनंतलीलाके आधाररूप तथा अनंतलीलारूप मधु-
धाराको सवतहें ऐसे श्रीवृंदावनमें रह्ये वृक्ष कहां ? ओर यह वृक्षनकी
शाखायें वेठे वेणुनाद सुनिवेमें तत्पर (मुनिरूप) पक्षि कहां ॥१७॥
टीका—श्रीकृष्ण जहां भक्तनके संग अनंत लीला करतहें ऐसैं श्रीवृं-
दावनके सुंदर दुमहे जामेंतें वेणुनाद सुनि मधुकी धारा सवतहे ऐसे
वृक्ष कहांहे ? ओर वेणुनादके रसके पानकरणमें परायण पक्षि वृक्षादि-
ककी शाखा भुजारूपहे तापर आरूढ होय वेठेहे अपनो चंचल स्व-
भाव त्याग करि मुनिकीनाई वेठेहे सो वेणुगीतमें ब्रजभक्तन कहेहे
“प्रायो वतांव ! विहगा मुनयो वनेऽस्मिन् कृष्णेष्वक्षणास्तदुदितं कलवेणु-
गीतम् । आरुह्य ये द्रुमभुजान् रुचिरप्रवालान् शृण्वन्ति मीलितदृशौ
विगतान्यवाचः ” [श्रीयशोदाजीको ब्रजभक्त कहतहें जो हे अंव !
यह वृंदावनमें पक्षिहें सो बोहोतकरिकें मुनिहे जो पक्षि रुचिरहे प्रवाल
जिनके ऐसैं वृक्षकी भुजारूप शाखानके उपर वेठिकें श्रीकृष्णमें हे दृष्टि
जिनकी ओर इननें कैह्यो एसो अव्यक्त मधुर जो वेणुगीतहें ताको
नेत्रमृदि राखेहे ओर छोडि हे अन्यवार्त्ता जिननें ऐसैं होयके सुनेहें]
याभांति ब्रजभक्त गावतहें ताहिभावमें श्रीहरिरायजी मग्न होय भावना
करतहें ॥ १७ ॥

१ रुचिर प्रवालहें तिनको राखेकी इच्छा नांही होतहे ऐसे वेणुनादश्रवणमें
आमक्तहें. २ श्रीकृष्णने कब्यो एमो वेणुनादहे ओर वेदह प्रभुने कब्योहे तासो वेदतुल्य
वेणुनादको जानेहे कहेंते जो आपमुनिहे. ३ अन्यवार्त्ता छोडिहे ऐसे लिख्योहे तासो
वेणुनादको अनुकूलवार्त्ता करतहे ऐसैं जाननो.

मूल-ब्रजस्त्रीचरणांभोजरेणवः कं ब्रजस्थिताः ।

दधिनिर्मथनोन्नादाः कते श्रवणमंगलाः ॥ १८ ॥

शब्दार्थः-ब्रजमें रह्ये ऐसे ब्रजस्त्रीके चरणारविंदके रेणु कहां ? ओर श्रवणमें मंगलरूप ऐसे वह दधिमंथनके अधिक नाद कहां ? १८ ॥ दीका-अब श्रीहरिरायजी कहतहैं जो ब्रजस्त्रीके चरणांभोजकी रेणु ब्रजमें स्थितहै सो मोकों कहां ? जेसैं उद्धवजीनें भ्रमरगीतमें कह्योहै "आसामहो चरणरेणुजुपामहं स्यां वृंदावने किमपि गुल्मलतोपधीनाम् । या दुस्त्यजं स्वजनमार्यपथं च हित्वा भेजुर्मुकुंदपदवीं श्रुतिभिर्विभ्र-
ग्याम्" (ब्रजभक्तनकी चरणरजकूं सेविवेवारे वृंदावनमें जो गुल्म, लता, ओर औपधी तामें कछहू में होउ काहेतैं जो ब्रजभक्त दुस्त्यज ऐसे अपने संबंधिजन ओर वेदमार्गकों छोड़िकें 'श्रुतिनके ढूँढवेयोग्य जो मोक्षदाता प्रभुकी पदवी तिनको भजे) याभावमें मग होय श्रीहरि-
रायजी ब्रजभक्तनकी चरणरजकी विरहभावना करतहै ओर प्रातःकालमें दधिमंथनको शब्द सुनें सो परममंगलरूपहै सो दशमस्कंधमें कहेहैं " गोप्यः समुत्थाय निरूप्य दीपान् वास्तून्समम्यर्च्य दधीन्यमन्थयन् । प्रदीप्तदीपैर्मणिभिर्विरेजु रज्ज्विकर्पद्भुजकंकणस्रजः ॥ चलन्नितंघस्तन-
हारकुंडलत्विव्यत्कपोलारुणकुंकुमाननाः ॥ १ ॥ उद्गायतीनामरविंद-
लोचनं ब्रजांगनानां दिवमस्पृशच्चानिः ॥ दध्नश्च निर्मथनशब्दमिश्रितो
निरस्यते येन दिशाममंगलम् ॥ २ ॥ (गोपीजन (प्रातःकालमें)
जठिके, दीप करिकें, वास्तुको अर्चन करिकें. दधिमंथन करन लागे ओर रज्जु (नेत) सों सेंचातहैं भुजमें कंकणकी माला जिनकी, ओर चलायमान जो नितंघ स्तन, हार, तथा कुंडल

१ ब्रजभक्त श्रुतिरूपहै तातैं श्रुतिमें सब छोटिकें भगवानके श्रवण जाय यह अभिप्राय है ऐसे जाननो.

तिनकी कांतियुक्त कपोलमें अरुण कुंकुमयुक्तहे मुख जिनके ऐसे
 ब्रजभक्त अत्यंत प्रकाशमानहैं दीप जामें ऐसे मणिनतें वोहोत
 शोभायुक्त भये ॥ १ ॥ कमलनेत्र (श्रीकृष्ण) कों उच्चस्वरसों गातें
 ऐसे ब्रजांगनाको शब्द, दधिके निर्मथनके शब्दकरि मिश्रित [होयके]
 आकाशकों परसवेलग्यो जाकरि सवदिशाको अमंगल मिटिजातहे)
 याभावमें मग्न होय श्रीहरिरायजी दधिमंथनके शब्दकी विरहभावना
 करतहैं ॥ १८ ॥

मूल—यमुनावालुकादेहसंबंधः क्व जलस्पृशिः ।

वहिर्मुखत्वसातत्ये तदीयत्वं च मे कुतः ॥ १९ ॥

शब्दार्थः—श्रीयमुनाजीकी वालुकासों देहको संबंध कहां ?
 श्रीयमुनाजीके जलको स्पर्श कहां ? ओर मोकों वहिर्मुखताको
 निरंतर भावहे तब तदीयपनों कहांतें होय ? ॥ १९ ॥ टीका—अब
 श्रीहरिरायजी कहतहैं जो श्रीयमुनाजीकी वालुका कहांहे ? तथा
 श्रमजलके संबंधवारो परम लीलारस अमृतमय श्रीयमुनाजीको जल
 कहां ? वह जल ओर वालुकाके रंचक संबंधतें अलौकिक देह सिद्ध
 होय सो जल ओर वालुकाको संबंध कहां ? सो श्रीगुसाँईजी
 श्रीयमुनाष्टपदीमें कहेहैं “ तव तटगतवालुकाः कदाहं सकलनिजांग-
 गता मुदा करिष्ये ” (आपके तटमें गई एसी वालुका आनंदसों
 सर्व अपने अंगमें प्राप्त में कब करूंगो ?) यह श्लोकके अनुसार
 श्रीहरिरायजी भावाविष्ट भयेहैं याभांति विप्रयोग भावसों ब्रजकी
 लीलाको अनुभव करि फेरि दैन्य करतहैं जो में निरंतर वहिर्मुखही हों
 ताहींतें मोकों तदीयत्व कहां ? तदीयत्व होय तो तदीयको संग होय
 तब भावकी वृद्धि होय सो तदीयत्व नांहीहे ॥ १९ ॥

मूलं-परमानंददूरस्थे चित्रं किं दुःखसंततौ ।

पोषकाभावतो नैव दृढः स्वाचार्यसंश्रयः ॥२०॥

शब्दार्थः-परमानंद (श्रीठाकुरजी) सों दूर रहिवेवारेमें दुःखकी परंपरा चले तामें आश्रय कहा ? भावके पोषण करिवेवारेके अभावसों अपने श्रीआचार्यजीको यथार्थ आश्रय दृढ नाहीं हे ॥ २० ॥ टीका-परमानंद श्रीगोवर्द्धननाथजी, सातोस्वरूप, श्रीविष्णुनाथजी, ओर अपनेउपर विराजते होय सो स्वरूप यह पुष्टिमार्गमें परमानंदरूप रसात्मक श्रीकृष्ण सेव्यहैं एसें श्रीकृष्ण मोतें दूरिहैं ताकरिकें मेरे चित्तमें निरंतर दुःख रहत हे एक तो मोमें भाव नाहीं हे ओर दूसरो या भावको पोषणकर्ताहू कोउ नाहींहे ताहीतें श्रीवल्लभाचार्यजीके चरणकमलको दृढ आश्रय मोमें नाहीं हे ता करिकें मैं निरंतर दुःख पावतहों ॥ २० ॥

मूलं-विषयाभिनिवेशेन प्रेक्षा न विशति प्रभौ ।

जातोऽस्मि सांप्रतं सर्वसाधनाऽभाववाहनम् ॥२१॥

शब्दार्थः-विषयके अभिनिवेश करि ज्ञानदृष्टि प्रभुमें नाहीं प्रवेश करतहैं अव सर्वसाधनके अभाववारो में भयोहों ॥ २१ ॥ टीका-अव श्रीहरिरायजी कहतहैं जो मैं विषयावेशकरि भयाहूं तासों मेरे हृदयमें प्रभु वास नाहीं करतहैं सो श्रीआचार्यजीमहाप्रभुजी संन्यासनिर्णय-ग्रंथमें कहेहैं “ विषयाक्रांतदेहानां नावेशः सर्वथा हरेः ” (विषयकरि आक्रांत देहवारेनके हृदयमें सर्वथा हरिको आवेश न होय) या भांति विषयको आवेश देखिकें प्रभु हृदयमें नाहीं स्थित होतहैं ओर मोको विषयके आवेशतें हरिके दर्शनकी इच्छा नाहीं होतहे तो प्रभु हृदयमें कैसे आवेंगे ? या भांति सर्वसाधनके अभाववारोहूं तातें भाव कहातें सिद्ध होय ? ॥ २१ ॥

मूलं-निःसाधनत्वं भावे तु विद्यमाने प्रयोजकम् ।

तदभावे केवलं मेदोषायैव न चान्यथा ॥ २२ ॥

शब्दार्थः-भाव विद्यमान होय तब तो निःसाधनपनों प्रयोजकहे परंतु भावको अभाव होय तब केवल दोषके लियेही मेरो निःसाधनपनों हे अन्यथा नाहीं ॥ २२ ॥ टीका-अब श्रीहरिरायजी कहतहें जो में भावविना निःसाधन होय वेठ्योहूं सगरे सत्कार्य, भगवद्धर्महू छोड़ि-दियोहे सो निःसाधनपनों अप्रयोजकहे तातें कच्छू कार्य सिद्ध नाहीं होय सो जगतमें प्रसिद्धहीहे जो संसारी भगवद्धर्म नाहीं करतहे सो कहा निःसाधनहे ? तेसैंहि ओर संसारीकीनाई में लौकिकासक्तिनें जो जगतमें कोउ प्रभुकी सेवा स्मरण सत्कर्म नाहीं करतहे तातें कहा निःसाधनहें ? तासूं भगवानमें तद्रूप भाव भये विना सत्कार्य छोड़ि निःसाधन होय सो केवल दोषरूपहीहे अन्यथा नाहींहे ॥ २२ ॥

मूलं-शरीरेणाप्यशक्तस्य क्रिया का वात्र सेत्स्यति ।

यथांधो वधिरो मूको विहस्तः पंगुरुन्मनाः ॥ २३ ॥

शब्दार्थः-जेसैं अंध होय, वधिर होय, मूक (गूंगो) होय, हाथ-विनाको होय, पंगु होय, वावरो होय तेसैं शरीरकरिहू अशक्तहीतें इहां कोन क्रिया मिद्ध होयगी ॥ २३ ॥ टीका-शरीरमें सामर्थ्य न होयतो लौकिक अलौकिक कच्छू क्रिया न वने तेसैं भावविना सकल साधन जूठो हे ताको दृष्टांत कहत हे जेसैं अंध हे सो कोन प्रकार

१ हृदयमें भाव होय तो निःसाधनपनेतें दीनता होय जो में महा दुष्टहं मोमें कच्छू धर्म नाहीं मो मेरी कहा गति होयगी ? एमी दीनता होय एतें निःसाधनपनों प्रयोजकहे. २ भाव नाहीं अरु साधन सब छोड़िदिये तामें तो दोषही लगे यह अभिप्रायहै.

देखे, बेहरो कहा सुनें, गंगो कहा बोले, हस्तविना कहा किया करे,
पांवविना कैसे चले, ओर वावरो होय सो कहा कार्य करे, तेसैं जो
भावरहितहे, लौकिकमें आसक्तहे, सो कोनप्रकार अत्यंत दुर्लभ
भावकों पावे, ओर भावविना पुष्टिमार्गीय फल सिद्धि नांहीहे सो
भगवदीय गायेहें “ भज सखि भावभाविक देव, कोटि साधन करो
कोऊ तउ न माने सेव ॥ १ ॥ धूमकेतु कुमार मांग्यो कोन
मारग प्रीति । पुरुषतैं त्रियभाव उपज्यो सर्वें उलटी रीति ॥ २ ॥
वसन भूषण पलटि पहरे भावसों संजोय । उलटि मुद्रा दर्ई अंकन-
वरन सूधे होय ॥ ३ ॥ वेदविधिको नेम नांही प्रेमकी पहिचान ।
ब्रजवधू वश किये मोहन सूर चतुर सुजान ” याप्रकार भावहीतैं सब
सिद्धहे सो मोमें भावको लेशहू नांहीहे तातैं कच्छ सिद्ध नांही ॥२३॥

मूल-अकामः कामविक्षितो हरिणोपेक्षितोऽधुना ।

विमृशामि सदा स्वांते का गतिमें भविष्यति ॥२४॥

शब्दार्थः-भगवद्धर्मकी कामनाकरि रहितहों ओर लौकिककाम-
नाकरि विक्षितहों अब हरिनैं उपेक्षा कियोहूं सो सदा अपने मनमें
विचारूं जो मेरी कहा गति होयगी ॥२४॥ टीका-भगवत्कामना
जो नानाप्रकारके सेवासंवंधी मनोरथ ताकरि रहितहों मेरो मन प्रभुसे-
वामें एकक्षणहू नांही लागतहे ओर लौकिककामना विषयादिक तथा
देहके भरणपोषणसंवंधी कामनाकरि ग्रसितहों ताकरि हरि जो
श्रीकृष्ण सो मेरी उपेक्षा कियेहें मेरी सुध नांही लेतहें में महादोषको
समुद्रहों यातैं मेरो त्याग कियेहे “ और एक दोष मेरेमें सर्वोपरि

१ ईरपाभावको अभिप्राय मूलमें नांहीहे तोऊ बोहोन पुनरुक्तमें हे तामों किज्योहे
ओर जितनो मूलमें अधिक दीये हे तिनमें “ ” एमें निन्द कियेहें.

भारीहे तातें प्रभु मोकों छोड़े सो संतजन जो भगवदीयहें सो सदा ईर्ष्याभाव करिकें रहितहें जेसैं विभीषणकों रावणनें पदसों प्रहार कियो तौहू विभीषण विनती किये भली बात कही. ओर कृष्णदासनें श्रीगुसांईजीके दर्शन बंध किये परंतु श्रीगुसांईजी कृष्णदासको भलोहि किये यारीतिसों भगवदीय रहे तो प्रभु प्रसन्न होय. सो मैं भगवदीयकी ईर्ष्यामें अष्टप्रहर तत्परहों तातें मेरो त्याग प्रभु कियेहें ” सो अब मैं कहां जाऊँ ? ओर कहा करूं ? अब मेरी कोन गति होनहारहे यह बड़ो दुःख हे ॥ २४ ॥

मूलं—विरक्तवेषिणास्माकमधिकारकृता पुनः ।

कृतं युवतिवश्येन कार्यमेकमनीदृशम् ॥ २५ ॥

कस्याश्चित्सूरतिग्रामे विधवायाश्च संगमात् ।

दुष्टेन स्थापितो गर्भ पातितश्च तथौषधात् ॥ २६ ॥

शब्दार्थः—अपने अधिकारि विरक्तनें फिर स्त्रीके वश्य होयकें इनकों योग्य नहीं एसो एक कार्य कियो ॥ २५ ॥ सूरतगाममें कोउ विधवाके संगमतें दुष्टनें गर्भ स्थापन कियो सो तेसैं औषधतें गिरायो ॥ २६ ॥ टीका—भगवद्धर्मसंवंधी दुःख तो मेरे हृदयमें बोहोतहे ओर एक लौकिक दुःख आयके प्राप्त भयो हे सो कहतहों विरक्त

१ यह वृत्तांत लिखवेको कारण यह दीखेहे जो संग करने सो बोहोत विचारिके कर्णों उपरते धर्म देखिके विनाविचारे सहसा भीतरको संबंध नाहीं राखनों. २ विरक्त होयकें स्त्रीके वश्य भयो तामूं “ फिर ” एसें लिख्यो. ३ निरक्त होयकें फिर स्त्रीके वश्य होनो सो योग्य मांही. ४ कोउ दुष्टनें गर्भ स्थापन कियो ओर अधिकारिने तो औषधादिकी सहायता करिकें गिरायो एसेंह मूलश्लोकके अनुसार अर्थ होयहे ओर ब्रजनासिनके लिखे पुस्तकमें तो अधिकारिनेही गर्भ राख्यो एसें लिख्योहे तातें यह कार्य तथा गर्भपातको कार्य स्त्रीके वश्य होय कियो सो अयोग्य कियो एसे हूँ अभिप्राय दीखतहे.

वेणी हमारो अधिकारी जाकी जगतमें बहुत बड़ाईहे ओर में हू बाकों कृपापात्र जानिकें संग कियो अपनैं पास राख्यो. अधिकारी स्त्रीके वश्य भयो यह कलियुगमें स्त्री मोहिनीहे काहुको धीरज, ज्ञान, विवेक राखत नांही तातें युवतीवश अधिकारी होतभयो सो अयोग्य कार्य कियो अथवा विरक्त होयके अधिकार लियो सो अयोग्य कार्य कियो ताकरिकें युवतीके वश भयो हृदयमें काम बढत भयो ॥२५॥ याप्रकार युवतीके वश होय कोई कालमें समय पाय सूरतगाममें विधवाके संग संबंध करतभयो सो कोई या बातकों जानत नांही सो वहविधवास्त्रीकों गर्भ रहिगयो ताकरिकें बंहस्त्री ओर अधिकारी मनमें महादुःखी भये जो अब केसी होयगी पाछें दोउ मिलिकें अनेक ओपधि करिकें गर्भ गिरावतभये सो यह बात सब ठोर प्रसिद्ध सबके जानिवेमें आई ॥२६॥

मूलं—मरणं चोभयोर्मध्ये कस्यचित्स्यान्न संशयः ।

यत्नेन प्रेमजिन्नाम्ना मदापत्तिर्निवारिता ॥२७॥

शब्दार्थः—दोयके मध्यमेंतें एकको मरण होतो यामें संशय नांही, यत्न करिकें प्रेमजीनामके वैष्णवने मेरी आपत्ति निवृत्ति करी ॥२७॥ टीका—ओपध देकें गर्भ गिरायो सो मृतक होयके गियो ताकरिकें राज्यमें हाकिमकों खबरी भई सो मृत्युसमान दुःख होतभयो यामें संशय नांही ओर कहाँताई लिखो. सो प्रेमजी वैष्णव मेरे संग हतो कोहू अनेक यत्न करिकें आपत्ति (दुःख) निवृत्त किये राजद्वारवानें समाधान कियो सो जानेंगे ॥ २७ ॥

मूलं—विश्वासः कस्य कर्त्तव्य इति खिन्नं मनो मम ।

गृहकार्यं न चलति मनुष्याणामभावतः ॥२८॥

शब्दार्थ—विश्वास कोनको करनो एसें भरो चित्त खेदयुक्त होयहे ओर मनुष्यनके अभावसों गृहको कार्य न चले ॥ २८ ॥ टीका—एसी

वार्त्ता देखिके अव विश्वास कोनको करिये. लौकिक दुःखसंबंधके लिये गृहस्थको छोड़िके विरक्त प्रमाणिक वैष्णवकों संग लियो ताकी तो यह गति होतभई अव कोनकों अपने पास राखिये. कोनकों विश्वास करिये सो मनुष्य मिलत नांही यह बडोहि दुःखहे. परदेशमें जान्यों मनुष्य चाहिये सो मिले नांही ओर विश्वास काहूके उपर आवत नांही, विश्वास बिना सुख नांही होत हे ॥ २८ ॥

मूलं-अंतः स्निग्धोऽपि कार्ये तु महोषानुस्मृतेः सदा ।

प्रायशः प्रेमजिन्नामा वर्त्ततेऽसौ विरक्तवत् ॥२९॥

शब्दार्थः-भीतर स्नेहयुक्तहे तोउ कार्यमें तो मेरे दोषकी पीछें स्मृतिमें यह प्रेमजीनामको वैष्णवहे सो वोहोतकरिके विरक्तकीनाई रहतहे ॥२९॥ टीका-परमस्नेही मेरे एक इहां प्रेमजीहे जाको लौकिक कार्यमें अथवा अलौकिक कार्यमें कोईप्रकार इनके हमारी लौकिकवैदिक अनेक क्रिया देखिके मनमें हमारे दोषकी रंचकहू विस्मृति नांही होतहे. सर्वओरतें हमारेविपे दृढभाव राखतहे एसो भगवदीय मेरे संगमें एक प्रेमजीहीहे सां केवल विरक्तकी नाई रहतहे जितनी वनतहे तितनी हमारी टहल करि लौकिकतें न्यारो रहतहे. हे गृहस्थ परंतु शास्त्रमें जेसैं विरक्तके धर्म कहेहैं तद्वत विरक्त रहतहे इनके संगतें कछुक मन ठिकानेमें रहत हे ॥ २९ ॥

मूलं-चलितुं यतते तस्माल्लेख्या बहु समाहितिः ।

क्षांतोऽपराधः सर्वोऽपि मृषा क्रोधवशस्ततः ॥३०॥

शब्दार्थः-सर्व अपराध सहन कियो तासुं मिथ्या क्रोधके वश भयो एसो प्रेमजी चलिवेको यत्न करतहैं तातें वोहोत समाधान लिखनों

१ विरक्तको अपराध सहन कियो सो प्रेमजीके मनमें एसे आई जो एमो अपराध क्यों सहन कियो तातें मिथ्या क्रोधके वश भयोहे.

॥ ३० ॥ टीका—सो प्रेमजी' अब मेरे पासतें चलियेको विचार करतहे
अब में कोनप्रकार निर्वाह करूंगो तातें कच्छुक समाधान लिखोगे. में
अपनो दुःख तुमकूं लिखतहूं सो वोहोतकरिकें जानियो अपराध सह्यो
हे तातें मृषा क्रोधके वस भयोहे सो तादृशीयको एसो क्रोध नाही
चहियें काहेतें जो क्रोधहे सो भगवद्धर्ममें बडो वाधक हे, क्रोधतें भगव-
दावेश दूर होय जाते हे. ॥ ३० ॥

मूल—इदानीं तु कृपापूर्ववदस्तीति भयोद्भिज्ञतैः ।

भवद्भिः सर्वथा लेख्यं पत्रं सर्वै पृथक् पृथक् ॥

[इदानीं तु कृता (कृपा) पूर्वमनोवृत्तिस्तु सर्वथा ।

तस्माद्भयोद्भिज्ञतैः सर्वैः पत्रं लेख्यं पृथक् पृथक्] ॥ ३१

शब्दार्थः—अब तो पूर्वकीनाई कृपाहे तासों भयरहित (होयकें)
तुम्हारे सर्वने सर्वथा जुदेजुदे पत्र लिखने अथवा अबतो पूर्वकी मनो-
वृत्ति तथा कृपापूर्वक मनोवृत्ति सर्वथा कीनीहे तासों भयरहित सर्व
होयकें जुदेजुदे पत्र लिखने ॥ ३१ ॥ टीका—अब तो पूर्व जेसी कृपा

१ कोई एसे कहेहे जो प्रेमजी आपकी पास अधिकारी हतो बिननेही अयोग्य
काम कियो तासूं आपन कहु ठपका दियो ताते क्रोध करिकें वह चलियेको विचार
करनलाग्यो तब आपके मनमें खेद होयबेलाग्यो जो प्रेमजी अधिकार करतहे तकरिकें
हम निश्चित होय निरोधमें मग रहतहे लौकिक आपत्ति (दुःख) इनके चलनकरि
निवृत्त होतहे सो चल्थो जायगो तो में लौकिककार्यमें कोनप्रकार निर्वाह कदंगो
चाते कोउ समाधान लिखे ओर वह रहिजाय तो आछो तासों आप एसे लिखतहे,
परंतु यह अभिप्राय छोटे शिक्षापत्र तथा बड़े शिक्षापत्रमें जो ब्रजवासी लेखकन
लिख्योहे तामें नाही दीसतहे. २ ब्रजवासिनके लिखे पुस्तकमें मेरो अपराध समा-
करियो ओर तुम क्रोधनस प्रति होइयो एसे लिख्योहे सो मूलमें निरुद्ध हे तामों
इहां नाही लिख्योहे. ३ पूर्वकीनाई कृपाहे एसे लिख्योहे सो श्लोक ३० के दीपण
२ के अनुसार देखेहे एसे कोउ कहतहे. ४ मूरतकी इकीकत भंड ताकी पूर जेसी
वृत्ति हवी तेसी वृत्ति कीनीहे तासों पत्र आधिनेमा वृत्ति स्थिर होयजायगी. ५
तुम्हारे कृपा राखनी एसे ब्रजवासीके पुस्तकमें बिम्बागमें लिख्योहे मों मूलमें
विरुद्धहे तासों इहां नाही लिख्योहे.

राखतहते तेसीहे तासों हमारे उपर स्नेह राखि भय छोडिकें पत्र लिखने काहेतें जो हम परदेशमें हैं तातें मनुष्य पास चाहियें सो जान्यो मनुष्य चलयोजाय फिर दूसरो राखनो पडे तातें याके चित्तको समाधान होय ताहिभांति सब न्यारे न्यारे पत्र लिखियो, ॥ ३१ ॥

मूलं—अतिप्रशंसया चित्तं यथा तस्य स्थिरं भवेत् ।

मुखरोऽपि समीचीनो मुख्यदोषविवर्जितः ॥ ३२ ॥

शब्दार्थः—जेसें इनको चित्त स्थिर होय तेसें अति प्रशंसा करिकें पत्र लिखने काहेतें जो यह मुखर (बोहोत बोलिवेवारो) हे तोहू मुख्यदोष [अविश्वास तथा अन्याश्रय] तें 'विशेषकरिकें' वर्जितहे तासों आछोहे ॥ ३२ ॥ टीका—अति प्रशंसा करिकें इनको 'समाधान' होय तेसें पत्र लिखियो जेसें इनको चित्त स्थिर होय. यह मुखरता-दोषवारोहे तोहू मुख्यदोष वामें नांहीहे तासों आछो हे ॥ ३२ ॥

मूलं—वैद्यकेन गृहेऽस्माकं विशेषपरितोषणात् ।

भवत्संगात्कंदुकवत्पतितः पुनरुत्थितः ॥ ३३ ॥

विशेषः प्रेमजित्पत्राद्बोध्यः ॥

शब्दार्थः—तुम्हारे संगतें वैद्यक करिकें अपने घरमें विशेष संतोषहे तासों कंदुककीनाई [गेंदकीनाई] गिरयो फिर उठ्योहे ॥ ३३ ॥ विशेष प्रेमजीके पत्रतें जाननों ॥ ३३ ॥ टीका—यह अपने घरमें वैद्यहे सगरे रोगके औषध जानतहे तातें अपने घरके कामकोहे यह वैद्यने संतोष कियो केंदुक जेसें गिरतहे फिर उंचो जातहें तेसें यह

१ विशेष करिकें वर्जितको अभिप्राय यहहें जो अविश्वास तथा अन्याश्रयको अंगहू नांहीहे. २ ब्रजभासीनके लिखे पुस्तकमें विरक्त उहां आयोहे ताको समाधान कियो तुम इनको कदू कहेंगे तो तुमको मुखरता दोष होयगो एमें बोहोत लिख्योहे सो मूलमें विरद्धहे तामों उहां नांही लिख्योहे. ३ कलम २ प्रमाण लिखे पुस्तकमें याको दोष मनमें मति विचारियो याको संतोष कियो एमें बोहोत विस्तारसों लिख्योहे सो मूलमें विरद्धहे तामों उहां नांही लिख्योहे.

विरक्त गिरयों फिर बैद्यकरि उठ्यो सो तुम्हारे सत्संगको फलहे
विशेष समाचार प्रेमजीके पत्रतें जानिये ॥ ३३ ॥

इति श्रीहरिरायजीकृतं चत्वारिंशत्तमं
शिक्षापत्रं श्रीगोपेश्वरजीकृतव्रजभाषा-
टीकासमेतं समाप्तम् ॥ ४० ॥

शिक्षापत्र ४१.



अब एकचत्वारिंश शिक्षापत्रमें भगवदीयनकों प्रभुकी सेवामें
उपयोगिपनेतें लौकिक कार्य करनो, भगवानमें शुद्ध भाव स्थापन
करनो, लौकिकमें आवश्यक होय तितनोहि द्रव्यको विनियोग करनो,
यामार्गमें सेवाही साधनहे ओर सेवाही फलहे, याजन्ममें जो तनुजा
वित्तजा सेवाहे सो ऐहिक फलहे ओर अलौकिकदेहतें जो सेवादिक
करनों, सो पारलौकिक फलहे, ताके लिये सत्संग करनों, प्रभुके दर्श-
नादिकके विषे आर्ति राखनी, तदीयनकी चिंता हरिही करतहें तोहु
जो चिंता करे सो मूर्खहे, तासों श्रीआचार्यजीके दासनकों में जो
शिक्षा लिखिहे तापें रहिकें प्रभुकी सेवा करनी ताहिकरि निश्चय सर्व
सिद्ध होतहे यह निरूपणहे । यह पत्रमें श्रीहरिरायजी सगरो पुष्टि-
मार्गीय सिद्धांत वर्णन करतहें सो समस्त पुष्टिमार्गीय भगवदीयनकों
धारण करिवेयोग्यहे यह निरूपणहे ॥

मूलं—लौकिकं सकलं कार्यं प्रभुसेवोपयोजनात् ।

परं सर्वत्र पूर्वं हि प्रभुस्थित्यो न लौकिकम् ॥१॥

न रोचते हरेःस्वानां लौकिकासक्तियुद्भनः ।

तदोपेक्षावशात्तस्य न सिद्ध्यत्यपि लौकिकम् ॥२॥

शब्दार्थः—सब लौकिक प्रभुकी सेवामें उपयोगिसों करनो परंतु सब ठिकाने सब कार्यमें प्रथम प्रभुही चिंतन करिवेयोग्यहैं लौकिक चिंतन करिवेयोग्य नांही ॥१॥ काहेतें जो हरिकों अपने जननको लौकिक आसक्तियुक्त मन रुचत नांही तब इनकी उपेक्षाके वसतें लौकिकहू सिद्ध नांही होतहैं ॥२॥ टीका—अब श्रीहरिरायजी पुष्टिमार्गीय धर्म कहतहैं जो भगवदीयहैं सो जितनो लौकिक कार्यहे सो सब प्रभुकी सेवामें विनियोग करें यह सर्वोपरि मुख्य धर्महे. घरहू भगवत्सेवार्थ, देहसंबंधी कुटुंब, इंद्रिय, सबको व्योहार भगवत्सेवार्थ, काहूमें स्नेह सो केवल भगवत्सेवार्थ, याभांति सब भगवत्सेवाके उपयोगसों कार्य करे, स्त्रीसंगहू कृष्णभक्त पुत्र होय याभावसों करे जेसैं निरोधलक्षणमें श्रीआचार्यजी—महाप्रभुजी कहेहैं “ पुत्रे कृष्णप्रिये रतिः ” भगवद्भक्त पुत्रमें प्रीति राखे भगवद्धर्ममें प्रतिबंधक होय ताको त्याग करे, अनुकूल होय ताको संग्रह करे, जहां जहां मनकी वृत्ति दोरे, जो जो सुने, देखे, सो सब प्रभुकी लीलाहि जाने, क्रीडाभांड जाने, अपने प्रभुकोही चिंतन करे मनमें लौकिक न विचारे तब प्रभु प्रसन्न होय. तहां कोई संदेह करे जो लौकिकतो अत्यंत प्रबल ओर लौकिक कियेविना चलतहू नांहीहे तातें लौकिकसमय लौकिक करे ओर भगवत्सेवाके समय सेवा करे तो निर्वाह होय प्रभुतो कृपालुहैं सो थोडोसो बनेसो बहुत मानेंगे तातें सकल लौकिक छोडिवेको कहा प्रयोजनहे ? याप्रकार कोई संदेह करे तहां कहतहैं ॥१॥ अपने स्वकीय भक्तहैं सो लौकिक कार्य करे तो प्रभुकों न सुहाय तब प्रभु उपेक्षा करे उदासीन होयजाय, तब सेवामें मनको उद्देग होय, अनेक कार्यमें मन दोरे तब प्रभु प्रतिबंध करे सो सेवाफलमें श्रीआ-

१ सेवामें उद्देगादि प्रतिबंधकी बात मूलमें नांहीहे तोहू योहोंत पुस्तकमें हे तामो लिखिहे.

आचार्यजीमहाप्रभुजी कहेहैं “ उद्वेगः प्रतिबंधो वा भोगो वा स्यात्तु वाधकः । वाधकानां परित्यागो भोगेऽप्येकं तथाऽपरम् ” ॥ यह सब-नके मूल देहसंबंधी भोगहे, तातें खान, पान, विषय, इंद्रियनको सुख, न चाहे तबहि भगवत्सेवा मलीभांतिसो बने जो करे सो सेवार्थ करे भोगमें मन न राखे देहसंबंधी सुखदुःखमें मनको राखे तो सेवामें उद्वेग होय पाछें प्रभु अप्रसन्न होय प्रतिबंध करे सो सेवाहू न बने ओर प्रभुको छोड़िकें लौकिकमें आसक्त होय कार्य करे सोहू कार्य सिद्ध न होय नानाप्रकारके दुःखको पावे तातें मनको लौकिकासक्त सर्वथा न करे प्रभुकी सेवाहीमें निरंतर मन करे ॥ २ ॥

**मूलं—शुद्धभावःप्रभोस्थाप्यो न चातुर्यं प्रयोजकम् ।
अंतर्यामी समस्तानां भावं जानाति मानसम् ॥ ३ ॥**

शब्दार्थः—शुद्ध भाव प्रभुमें स्थापन करनो चाहियें चतुराई कारण-रूप नाहीं समस्तजीवनके अंतर्यामी (प्रभु) मनमें रह्ये ऐसे भावको जानतहे ॥ ३ ॥ टीका—प्रभुसंबंधी कार्यमें शुद्ध भावको स्थापन करे सदा एकरस प्रीतिपूर्वक करे काहूको दिखावेके लिये न करे जब कोई वैष्णव आवे तादिनां अनेक चतुराईसों सुंदर शृंगार करे, जप, पाठ आछीआछी वार्त्ता करे जादिन कोई न होय तादिन साधारण करे यह सब चतुराई जाननी, तेसैं न करे, जेसैं श्रीगुसाँईजी आगरे पधारे तब एक वैष्णव पढायो, अपनैं घर सेवा चतुराईसों करी तहां श्रीगुसाँईजी चित्रामनवत् कहे, तातें चतुराईहे सो सब अप्रयोजक [मिथ्या] हैं, तामें कछू फलसिद्धि नाहींहे केवल प्रतिष्ठा मात्रहे सो लोकप्रतिष्ठा भगवद्भावकी नाशक हे, प्रभु सर्वके हृदयकी जानतहें अंतर्यामी हे तहां मनको कपट कछू चलत नाहींहे सो विवेकैर्याध्रयमें श्रीआचार्यजीमहाप्रभुजी कहेहैं “ सर्वत्र तस्य सर्वं हि सर्वसामर्थ्यमेव

च " यह वचनते प्रभु सबठोर सर्वसामर्थ्ययुक्तहैं याभावसों जानिके करे तेसोही फल देय ताते लोभार्थ प्रतिष्ठार्थ कपटसंयुक्त कबहू न करे जितनी रीति बंधीहे तितनी पुष्टिमार्गकी मर्यादा रीतिसों करनी, लौकिक वैदिक कछू कामना मनमें न राखनी ॥ ३ ॥

मूल-शुद्धभावे तदीयं तु लौकिकं साधयेत्स्वयम् ।

तत्साधितमविघ्नेन सर्वं सिद्ध्यति नान्यथा ॥४॥

शब्दार्थ:-शुद्ध भाव होय तो ताको लौकिकतो आप (प्रभु) सिद्ध करतहैं. प्रभूने सिद्ध कियो सो विघ्नविना सर्व सिद्ध होतहे अन्यथा नाहीं होतहे ॥ ४ ॥ टीका-कोउ कहे शुद्धभाव प्रभुमें राखि सर्व प्रभुकों निवेदन करे पाछे लौकिकद्रव्यादिक विना सेवा कोनप्रकार करे ? यह संदेह होय तहां कहतहैं जो वैष्णव शुद्ध भावते प्रभुमें मन लगाय तत्पर होय ताको शुद्धभाव देखिके प्रभु लौकिक वैदिक सकल कार्य सिद्ध करतहे. सो संतदासकी वार्त्तामें प्रसिद्धहीहे जो बीश टकाकी पूंजीमें प्रभु सर्वकार्य सिद्ध करते, पद्मनाभदासके छोलामें सकल पदार्थ सिद्ध करते, ताते शुद्धभावसों करे. तहां कोई कहे जो लौकिकवैदिकवारे लोक विघ्न करे तहां कैसे करे ? एसो संदेह होय तहां कहतहैं जो प्रभु अविघ्नते सर्व सिद्धकरतहैं सो श्रीआचार्यजीमहाप्रभुजी भक्तिवर्द्धिनीमें कहेहैं " सेवायां वा कथायां वा यस्यासक्तिर्दृढा भवेत् । यावज्जीवं तस्य नाशो न कापीति मतिर्मम ॥ १ ॥ बाधसंभावनायां तु नैकांते चास ईष्यते । हरिस्तु सर्वतो रक्षां करिष्यति न संशयः " (सेवामें अथवा कथामें जाकों दृढ आसक्ति होय ताको यावज्जीवं (जीवे तहांलों) कहहूं नाश नाहीं एसी मेरी मति हे ॥ १ ॥ एकांतमें रहिवेमें बाध होयवेकी संभावना होय तो एकांतमें वाम नाहीं इच्छित होत हे. ओर घरमें रहिवेमें बाध आयवेकी शंका होय

तहां कहतहें जो हरि (भक्तनके दुःखकों हरिवेवारे) सर्वओरतें रक्षा करेंगे संगय नांही ॥२॥ प्रभुके कार्य सेवादियें दृढ भाव होय सघठोरतें अपनों मन खेंचि सेवामें अथवा कथामें लगावे ऐसे भक्तकी सर्वओरतें प्रभु निश्चय रक्षा करें जेसें अंवरीपकों दुर्वासाके शापतें रक्षाकिये, तातें प्रभुके धर्ममें मन लगाय तत्पर होय तो प्रभु निर्विघ्नतासों सर्व सिद्ध करें अन्यथा न करें. ओर अन्यथा निर्विघ्नतासों कार्य सिद्ध न होय तातें यह लोक तथा परलोकमें एक प्रभुही सार्थीहैं यह ज्ञान राखे ॥४॥

मूलं-आवश्यको हि कर्त्तव्यस्तदीयैर्लौकिकव्ययः ।

अनासक्तौ लौकिकं तु वर्द्धते न च बाधते ॥५॥

शब्दार्थः-तदीयनकों जितनों आवश्यक होय तितनोही लौकिकमें व्यय करनों आसक्ति न होय तो लौकिकतो बढतहे बाध नांही करतहे ॥५॥ टीका-अव श्रीहरिरायजी कहतहें जो मुख्य तो यहहीहे जो लौकिक न करे परंतु जो लौकिक न छूटे तो आवश्यक होय तितनोही लौकिक करे वामें आसक्त न होय. मनकी आसक्तिही बाधकहे, आसक्तिविना कितनोहू लौकिक बढे सो सर्वथा बाधक न होय सो श्रीआचार्यजीमहाप्रभुजी निबंधमें कहेहें “ गृहं सर्वात्मना त्याज्यं तत्रैत्यक्तुं न शक्यते । कृष्णार्थं तत्प्रयुंजीत कृष्णोऽनर्थस्य मोचकः ” (सर्वात्मकरि गृह छोडिवे योग्य हे सो छोडिवेको समर्थ न होय तो वह गृह श्रीकृष्णके अर्थ लगावे. काहेतें जो श्रीकृष्ण अनर्थतें छुडायवेवारेहे) ओर भक्तिवर्द्धिनीमें कहेहें “ अव्यावृत्तो भजेत्कृष्णं

१ देह, इंद्रिय, मन, सब गृहतें न्यारे होयजाय सो सर्वात्मकरि त्याग जाननो. जामें धर्ममें रंचकहे संबंध किंवा प्रीति न रहे.

२ जहां अहंता ममता लगे सो संसार जाननो. सो घर श्रीकृष्णकों निवेदन करे तब अपनी अहंता ममता छूटे सो संसार दृश्यो जाननो.

पूजया श्रवणादिभिः । व्यावृत्तोऽपि हरौ चित्तं श्रवणादौ यतेत्सदा ”
 ('अव्यावृत्त होयकें पूजाकरि श्रवणादिकनतें श्रीकृष्णकों भजे. ओर
 व्यावृत्तहू हरिमैं श्रवणादिकमें चित्तको सदा यत्न करे) यह वचनसों
 जो तीव्र वैराग्य होय तो सर्व त्यागपूर्वक प्रभुको भजन करे ओर
 त्याग होय न सके तो सगरो घर श्रीकृष्णकी सेवामें विनियोग
 करे. व्यावृत्ति रहित रहे सो तो उत्तम हे परंतु एसें न बने तो एसी
 व्यावृत्ति करे जामें निरंतर हरिमैं चित्त रहे. याप्रकार रहे तो बाधक
 न होय नही तो बाध करे ॥ ५ ॥

मूलं-अन्यथा बृद्धमप्येतद्वाधते तदुपेक्षया ।

कृष्णसेवैकविषये मुख्यं चेतो निधीयताम् ॥

अन्यत्तदुपयोगित्वात्क्रियतां न तु मुख्यतः ॥६॥

शब्दार्थः-उपर कह्यो तेसें न करे तो गयो एसो लौकिकहू
 प्रभुकी उपेक्षातें बाध करे तासों श्रीकृष्णकी सेवारूप मुख्य विषयमें
 चित्तकों स्थापन करनों. ओर दूसरो सेवाके उपयोगिपनेतें करनों मुख्य-
 तासों न करनों ॥ ६ ॥ टीका-लौकिक वैदिकमें चित्त बहुतही बड़े सो
 प्रभु तो अंतःकरणमें विराजतहैं सो जब लौकिकमें आसक्ति देखे तब
 उपेक्षा करि उदासीन होयजाय सो श्रीआचार्यजीमहाप्रभुजी संन्यास-
 निर्णयमें कहेहैं “ विषयाक्रान्तदेहानां नावेशः सर्वथा हरेः ” जब देहीको
 मन इंद्रियनको विषयमें आसक्त प्रभु देखे तब अपनों भगवद्भावरूप
 रसको आवेश वामेतें खेंचि लेय. ताकों केवल लौकिकासक्ति होय तब
 प्रभु उपेक्षा करि त्याग करिदेय तातें सर्वथा लौकिक विषयमें मन
 आसक्त न करे प्रभुकी सेवासंबंधी कार्य जानि प्रभुसंबंधी विषय धारण

१ लौकिक वैदिक छोडि श्रीकृष्णकों भजे गो अव्यावृत्त होयके भजन जाननों
 गो न बने तो निरंतर हरिमैं चित्त राखनों ताकरि हरि सखें दुःखहताहैं सो बाधक
 नाहीं होयवे दे यह जाननों.

करे जो फलाने उत्सवकों यह चाहियें ताअर्थ यत्न करे फलानी सामग्री प्रभु आरोगें तो आछो, फलानो वागो, वस्त्र, आभूषण प्रभुमें विनियोग होय तो भली, जा प्रकार हरिविषयक राग होय सोई वार्त्ता मनमें धरे. ओर 'कथाहू एसी सुनें जो जाके सुनेतें लौकिकमें वैराग्य दृढ होय और प्रभुके धर्ममें अनुराग दृढ होय. तानें कृष्णसेवार्थ चित्तमें विषयको आवेश होय येही सर्वोपरि मुख्य फलहे सकल पदार्थ प्रभुकोही जानें अपनी सत्ता कछू न जानें सेवार्थ प्रभुको प्रसादी दासधर्म जानि लेय अपने शरीरको भोग न जानें यह उत्तम भगवदीयके लक्षणहे ॥ ६ ॥

मूलं—सेवैव साधनं सेवा फलमैहिकमत्र सा ।

सैवालौकिकदेहेन संभवेत् पारलौकिकम् ॥ ७ ॥

शब्दार्थः—सेवाही साधनहे ओर इहां सेवा होय सो ऐहिक फलहे तथा येही अलौकिकदेहकरि होय सो पारलौकिक फलहे ॥ ७ ॥ टीका—प्रभुकी सेवाहि साधन ओर सेवाहि फलहे येही पुष्टिमार्गीयकों सर्वोपरि कर्त्तव्यहे. मर्यादामार्गमें साधन न्यारो तथा फल न्यारोहे ओर पुष्टिमार्गमें साधन तथा फल एकहीहे तातें श्रीहरिरायजी कहतहें जो प्रभुकी सेवा फलरूप सर्वोपरि जानिकें करे साधन न विचारे. काहेतें जो साधनरूप विचारे तो ज्ञानमार्गीय होयजाय. जेसैं श्रीकपिलदेवजी माताप्रति ज्ञानकी भावना करी, नख शिखतें प्रभुमें मन लगाय, पाछें मन निकारि निर्गुणकी भावना करें सो न्यून फलहे. तातें सेवा साधन-रूप जाने तो मोक्षफल होय तासों सदा फलरूप जानि सेवा करे सो सेवाफलकी भावना अहर्निश चित्तमें राखे येहीफल पुष्टिमार्गमें हे सो इहां लौकिकदेहतें सेवा होय सो ऐहिक फल जाननों ओर अलौकिक देहतें सेवा होय सो पारलौकिक फल जाननों ॥ ७ ॥

१ ब्रजवासीनके लिखे पुस्तकमें अन्यदेवके विनियोगकी तथा नृगराजाकी बात लिखिहें सो मूलसों विरुद्ध जानि इहां नाहीं लिखिहें.

मूलं-तदर्थमेव कर्त्तव्यः सत्संगो भाववर्द्धकः ।

अनिधनो वह्निरिव भावः शाम्येत्तु लौकिकात् ॥ ८ ॥

शब्दार्थः—ताकेलियेही भावकों बढायवेवारो सत्संग करना काहेतें जो इंधनविना अग्नि जेसे शांत होयजाय तेसे लौकिकते भाव शांत होय जाय ॥ ८ ॥ भगवदीयको सत्संग न भयो तब सेवाको भाव हृदयारूढ न होय तब सेवा क्रियावत् होयजाय तातें ब्रह्मसंबंध करि पुष्टिमार्गीय भगवदीय सेवामें तत्पर होय सत्संग करे. सो श्रीआचार्यजीमहाप्रभुजी नवरत्नग्रंथमें कहेहैं “ निवेदनं तु स्मर्त्तव्यं सर्वथा तादृशैर्जनैः ” याप्रकार ब्रह्मसंबंध करि पुष्टिमार्गीय भगवदीयके संग निवेदनको स्मरण करे. ओर अन्यमार्गीय आछो होय तोहू वाको संग न करे, उपर ३५ में शिक्षापत्रके प्रारंभमें कहेहैं “ तदीयानां महदुखं विजातीयेन संगमः । संभाषणं सजातीयैरसंगो भाषणं च न ” विजातीयनको संग तथा इनही साथ संभाषण ओर सजातीयनको संग तथा इनके साथ भाषणहू नही येही तदीयनकों बडो दुःखहे. दोऊ एक मिले तो रस उपजे सो निरोधलक्षणमें श्रीआचार्यजीमहाप्रभुजी कहेहैं “ महतां कृपया यद्वत्कीर्त्तनं सुखदं सदा । न तथा लौकिकानां तु स्निग्धभोजनरूक्षवत् ” (भगवदीयनके संग कीर्त्तनमें बडो सुख आवतहें जेसे घृतयुक्त भोजनके स्वाद जेसो स्वाद लगतहे और लौकिककी वार्त्तामें रूखे भोजनके स्वाद जेसो स्वाद लगतहे.) तदीयके सुखतें सुनें तो दिनदिन भावकी वृद्धि होय और लौकिकके सुखतें सुनें तो पेटतो भरे परंतु रूखो भोजन जेसो होय यह भाव विचारि, पुष्टिमार्गीय भगवदीयसों मिलिकें, सेवा स्मरण करे तो भावकी वृद्धि होय जेसे अग्निमें काष्ठादिक न लगावे तो अग्नि शीतल होयजाय तेसे भगवद्भाव अग्निरूपहे तामें सत्संगरूप इंधन न लगावे तो भावरूप अग्नि शांत होय जाय ओर जो

भगवदीयको संग होय तो सगरो भाव अग्निकीनाई वडे, ओर लौकिकको संग होय तो जल अग्निकीनाई भावको नाश करे तातें भगवदीयको संग कर्त्तव्यहे ॥ ८ ॥

मूल—आर्तिरेव सदा स्थाप्या हरिसंदर्शनादिषु ।

स्वास्थ्यं तु लौकिकेनैव ददाति करुणानिधिः॥ ९ ॥

शब्दार्थः—हरिके सुंदर दर्शनादिकमें आर्तिही सदा स्थापन करनी. करुणाके निधिरूप प्रभु लौकिकमें स्वस्थता नांही करेंगे ॥ ९ ॥ टीका—या पुष्टिमार्गमें आर्तिहे सोहि सर्वोपरि फलहे. तातें प्रभुके दर्शनकी आर्ति राखनी ताकरि प्रभु कृपाकरें सो निरोधलक्षणमें श्रीआचार्यजीमहाप्रभुजी कहेहैं “क्लिश्यमानान् जनान्दृष्ट्वा कृपायुक्तो यदा भवेत् । तदा सर्वं सदानंदं हृदिस्थं निर्गतं वहि ॥ सर्वानंदमयस्यापि कृपानंदः सुदुर्लभः” जेसैं काष्ठके भीतर अग्निहे सो मथनतें बाहिर निकसे तेसेही प्रभुके दर्शनार्थ क्लेश करे तो प्रभु बाहिर प्रकटें. सर्वके आनंददाता प्रभु सबठोरहे सो अपने जीवकी आर्ति देखि बाहिर प्रकट होय ओर सर्व आनंदमय प्रभुहैं तोहू कृपानंद परम दुर्लभहे भक्तनहीपर कृपा करतहैं तातें हरिदर्शनकी आर्ति हृदयमें स्थापन करनी. लौकिकमें आर्ति न राखे काहेतें जो प्रभु लौकिकमें स्वस्थता करें तो जीव वहि-मुख होय जाय तातें आप करुणानिधिहे सो लौकिकमें स्नेह छुडाय अपनेमें लगावतहैं. जब अपनेमें चित्त लग्यो देखें तब प्रभु स्वरूपानंदको अनुभव करावे तातें सर्व छोडिके एक प्रभुमेंही स्नेह जोडे सो श्रीभागवतएकादशस्कंधमें उद्धवजीप्रति श्रीभगवान् कहेहैं “त्वं तु सर्वं परित्यज्य स्नेहं स्वजनबंधुषु । मय्यावेश्य मनः सम्यक् समदृष्ट्वा चरस्व गाम्” (हे उद्धव! तू तो सर्व स्वजनबंधुमें स्नेहको त्यागकरिकें मोमें संपूर्ण रीतिसे मनकें आवेशयुक्त करके सबठोर समदृष्टि राखिकें भूमिमें विचरे तो तोकें कच्छ भय नांही ॥ ९ ॥

मूलं-तदीयानां स्वतश्चिंतां कुरुते पितृवद्भरिः ।

पुनश्चिंतां प्रकुर्वाणां मूर्खा एव न संशयः ॥ १० ॥

शब्दार्थः—हरि (सवनके दुःखहर्त्ता प्रभु) तदीयनकी चिंता पिताकीनाई आपतेंही करतहें फिर चिंता करिवेवारे मूर्खहीहैं संशय नांही ॥ १० ॥ टीका—तदीयनकों अपनी चिंता, तथा देहसंवंधी चिंता, यहलोक परलोकसंवंधी कछूहू चिंता नांही कर्त्तव्यहे. काहेतें जो जेसैं पिता पुत्रके पालनकी चिंता राखे तब पुत्रकों कछु भय नांही याप्रकार प्रभु अपने भक्तनकी चिंता करतहे. तोहू कोउ भक्त जो अज्ञानकरि चिंता करतहें सो सर्वथा मूर्खहे यामें संशय नांही ॥ १० ॥

मूलं-तस्मादाचार्यदासैस्तु मच्छिक्षा यां सदा स्थितैः ।

सेव्यः प्रभुस्ततो भद्रमखिलं भावि सर्वथा ॥ ११ ॥

शब्दार्थः—तासों श्रीआचार्यजीके शरण आय दास भये, ओर मेनें जो शिक्षा लिखिहे तामें सदा स्थितहे एसे वैष्णवनकों तो प्रभुही सेव्यहैं तातें समग्र सर्वथा सिद्ध होयंगे ॥ ११ ॥ टीका—श्रीआचार्यजी बलभाचार्यजीके जो दासहे सो निरंतर यह मेरी शिक्षा अपने हृदयमें धारण करे तिनहीके अर्थ इतनो यत्न कियो हे जो अनेक धर्म हे सो अधिकारि भेदकरि न्यारे न्यारे बताएहें ओर भक्तिमार्गमेंहू पाठ, गुण-गान, वार्त्ता, श्रवण, तिनसवनमें मुख्य प्रभूकी सेवा हे तामें प्रभूको सन्मुखत्व हे. सेवा विना मुख्य फलको अधिकार न होय, तातें यह मनमें जाननो जो कोई प्रभूकी सेवा करतहें, तिनके सकल कल्याण होय, कार्य तथा पुष्टिमार्गको फल होनहार हे तिनके लिये यह सर्वोपर निश्चय सिद्धांत भयो. (अब श्रीगोपेश्वरजी कहतहे जो) 'धन्य हरिजीवनदास ! तिहारे हृदयमें श्रीहरिरायजी आय मेरो दुःख

दूर कियो ओर यह शिक्षापत्रकी टीका मेरी कृति मति जानियो मेरे हृदयमें प्रविष्ट होय श्रीहरिरायजी कियेहे. ताते श्रीहरिरायजीके हृदयमें श्रीआचार्यजी तथा श्रीगुसाँईजी निरंतर विराजतहैं ताते यह भावप्रकट भयोहे सो तुम परम चतुरहो ताते यह रत्न अत्यंत गोप्य राखियो काहेतें जो जहां तहां दिखायवेयोग्य नांहीहे ॥ ११ ॥

इति श्रीहरिरायजीकृतमेकचत्वारिंशत्तमं शिक्षापत्रं
श्रीगोपेश्वरजीकृतव्रजभाषाटीकासमेतं समाप्तं ॥ ४१ ॥

भावस्वरूपनिरूपणम् ॥

अब मूलश्लोकके एक पुस्तकमें अडतीसमो शिक्षापत्र नवीनहीहे जो काहू पुस्तकमें नांही. तासों शिक्षापत्रके भीतरको नांहीहे तथापि श्रीहरिरायजीकृतहे ओर इनको अभिप्राय पुष्टिमार्गीय वैष्णवचनकों जानिवेयोग्य हे ताते वह मूलश्लोक तथा उनके अर्थ लिखतहैं.

मूलं—रसात्मकतया सिद्धः परमात्मा श्रुताविति ।

संयोगविप्रयोगाभ्यां शृंगारसरसो हरिः ॥ १ ॥

अर्थः—श्रुतिमें रसात्मकताकरि परमात्मा (श्रीकृष्ण) सिद्धहे तासो संयोग ओर विप्रयोग भेदतें शृंगार रसतें सरस हरिहे. काहेतें जो वेदमें कहेहैं जो आपसररूपहैं ओर ग्रहण करिकें आनंदयुक्त होयहैं ताते आप आनंदघनहे सवरसमें शृंगाररस मुख्यहे सो शृंगार संयोगविप्रयोगभेदसों दोयप्रकारको हे वह दोय प्रकारके शृंगार करि प्रभु सरसहैं ॥ १ ॥

मूलं-धर्मधर्मिविभेदेन तावपि द्विविधौ मतौ ।

धर्मरूपस्तु संयोगो बहिःप्राकट्यपालितः ॥

परोक्ष आंतरो यस्तु स धर्मित्वेन संमतः ॥ २ ॥

वियोगोऽपि तथा यस्तु प्रभुप्राकट्यसाधकः ।

स्वतंत्रफलरूपो यः स्वरूपावेशतो हरेः ।

धर्मिरूपः स विज्ञेयो नाविर्भावप्रयोजनम् ॥ ३ ॥

अर्थः-संयोग ओर विप्रयोगहू धर्म ओर धर्मी या भेदकर दोय प्रकारकेहें तामें बाहिर प्रभुके प्राकट्यतें सिद्ध जो संयोगहे सो धर्मरूपहे ओर परोक्षमें [हृदयकी भीतर प्रभु पधारे तव] भीतरको संयोगहे सो धर्मिपनेतें मान्योहे ॥ २ ॥ तेसैं विप्रयोगहू जो प्रभुके प्राकट्यको साधिवेवारो हे सो धर्मरूपहे [जेसैं रासपंचाध्यायीमें ब्रजभक्तनको विरह भयो तव प्रभु प्रकटे] ओर हृदयमें प्रभुको आवेश होयजाय तासों जो विप्रयोग स्वतंत्र फलरूपहे सो धर्मिरूप जाननों (जेसैं) ब्रजभक्तनको विरहदशामें हे सो श्रीभागवतएकादशस्कंधमें भगवान् उद्धवप्रति कहेहैं "ता नाविदन्मय्यनुपंगवद्धधियःस्वमात्मानमदस्तथेदम्। यथा समाधौ मुनयोऽब्धितोये नद्यः प्रविष्टा इव नामरूपे" [मेरेमें स्नेहकरि बांधिहे बुद्धि जिनने ऐसे गोपीजन, अपने देहकों, परलोककों, तथा यह जगतकों, नांही जानत हते. तहां दृष्टांत कहतहे जेसैं मुनि समाधिमें कछू ओर अपनो नामरूप नांही जानतहे ओर समुद्रके जलमें नदी मिल गई फिर वह अपनो (जुदो) नाम के रूप नांही जानतहे तेसैं गोपीजन ओर कछू नांही जानत हते] याप्रकार विप्रयोगमें भगवदावेश होयजाय सो विप्रयोग धर्मिरूपहे तामें आविर्भावको प्रयोजन नांही ॥ ३ ॥

मूलं-बहिःसंवेदनं वापि तदसंवेदनं तथा ।

तयोरवस्थाद्वितयं भावेनैव न चान्यथा ॥ ४ ॥

शब्दार्थः-अथवा जाविप्रयोगमें बाहिरको ज्ञान रहे (अर्थात् सर्व प्रपंचको ज्ञान रहे) सो धर्मरूप विप्रयोगहे, ओर जामें यह ज्ञान न रहे (अर्थात् भगवन्मय चित्त होयजाय ओर कछू जाने नहीं) सो धर्मिरूप विप्रयोगहे, यह दोयप्रकारके विप्रयोगकी दोय अवस्था भाव-करिकेही हे अन्यथा [भावविना] नाहींहे ॥ ४ ॥

मूलं-वियोगात्मस्वरूपेण संयोगाभाववद्द्वयम् ।

बहिःसंवेदनाभावे तत्र साक्षात्तथा क्रिया ॥ ५ ॥

तदा संवेदने विप्रयोगानुभव एव हि ।

एवं सततं द्वावेव स्वतंत्रा भक्तिरुच्यते ॥ ६ ॥

अर्थः-विप्रयोगात्मक स्वरूप करिके धर्म ओर धर्मिरूप दोय अवस्था-संयोगके अभाववारी हे वामें संयोग नाहीं हे (तामें) जो बाहिरके प्रपंचको ज्ञान न रहे एसो भगवदावेश होय जाय तो यह विप्रयोगा-त्मक स्वरूपमें साक्षात् तैसी क्रियाहे, संयोगमें जितनो आनंदहे तथा जैसी क्रियाहे ताप्रमाण यह विप्रयोगमें हे ॥ ५ ॥ विप्रयोग होय तब बाहिरके प्रपंचको ज्ञान रहे तो केवल विप्रयोगकोही अनुभव होय भगवदावेशको अनुभव न होय एसें निरंतर दोय प्रकारको विप्रयोगहे सोही स्वतंत्र भक्ति कहीहे ॥ ६ ॥

मूलं-भावरूपः स्वरूपात्मा निरुद्धः पूर्ण एव सः ।

धर्मरूपवियोगेऽपि प्रविशन्ति गुणा हरेः ॥ ७ ॥

धर्मिरूपे तत्र कृष्णः कोशवत्प्रविशेत्पुनः ।

यथा (भगवदाविष्टा मूर्तिः) भगवदावेशो
मूर्त्तिकोशे हरेस्तथा ॥ ८ ॥

अर्थः—विप्रयोगात्मक प्रभु भावरूपहे सो हृदयमें निरुद्ध भये सो पूर्णहीहे ओर धर्मरूप विप्रयोगमेंहू हरिके गुण वामें प्रवेश करतहें ॥ ७ ॥ ओर धर्मरूप वह विप्रयोगमें मूर्त्तिकीनाई श्रीकृष्ण प्रवेश करतहे जेसैं मूर्त्तिरूपमें भगवदावेश होत हे अथवा भगवदावेशवारी मूर्त्ति रूपमेंहे तेसैं वामें हरिको आवेश होतहें ॥ ८ ॥

मूलं—तेषु भावद्वयं सिद्धं स्त्रीभावः सहजः पुरा ।

आविष्टभगवद्भावः पश्चाज्जातो विशेषतः ॥ ९ ॥

तेषु धर्मा अपि तथा दृश्यन्ते द्विविधा अपि ।

एवमेवास्मदाचार्यस्वरूपमवबुद्ध्यताम् ॥ १० ॥

अर्थः—उपर धर्म धर्मिके भेद कहे ता भेदमें दोय भाव सिद्ध हे पहिलें तो सहज भयो एसो स्त्रीभावहे ओर पाछें आविष्ट भये ऐसे भगवानको भाव विशेषसों भयोहे ॥ ९ ॥ तामें ऐसे दोय प्रकारके धर्महू देखिवेमें आवतहें एसैही अपने श्रीआचार्यजीमहाप्रभुजीको स्वरूप जाननों ॥ १० ॥

मूलं—स्वामिनीभगवद्भावयुतं चापि विलक्षणम् ।

अत एवोभयं तत्तदग्रंथेषु विनिरूप्यते ।

प्रभुभिः स्वामिनीभावभगवद्भाववत्त्वतः ॥ ११ ॥

अर्थः—श्रीस्वामिनीभाव तथा भगवद्भाव उपर निरूपण किये हे ता भावयुक्त श्रीआचार्यजीमहाप्रभुजीको स्वरूपहे [अर्थात् धर्म ओर

१ धर्मरूप विप्रयोगमें हृदयमें प्रभुके गुणको आवेश होतहे ता गुणके अनुभवकरि विप्रयोगको अनुभव होतहे मूर्त्तिमें जेसैं प्रभुको आवेश होतहे तेसैं धर्मरूप विप्रयोगमें श्रीकृष्णको आवेश होतहे जेसैं प्रजमक्तनको विप्रयोगमें समोत्तमभाव सिद्ध भयो.

धर्मिरूप विप्रयोग भावयुक्तहे) तोहू विलक्षणहे, तासोंही ताताग्रंथमें श्रीगुसाईजीने श्रीस्वामिनीभाव तथा भगवद्भावयुक्तपनेतें दोयभावात्मक निरूपण कियेहें ॥ ११ ॥

मूल—‘सर्वलक्षणसंपन्न’ इति नाम विराजते ।

तथा तत्रैव ‘रासस्त्रीभावपूरितविग्रहः’ ॥ १२ ॥

वस्तुतः कृष्ण एवेति चोक्तं श्रीवल्लभाष्टके ।

एवं विदित्वा तद्रूपं कर्त्तव्यः सर्वदाश्रयः ॥ १३ ॥

अर्थ—सर्वोत्तमजीमें “सर्वलक्षणसंपन्नः” (सर्वलक्षणकरियुक्त) यह नाम विराजतहे तेसें उहांही “रासस्त्रीभावपूरितविग्रहः” [रासस्त्री जो ब्रजभक्त तिनके भावकरि पूरित श्रीअंगहे अर्थात् यह भावात्मकही आपको श्रीअंगहे) यह नाम विराजतहें ॥ १२ ॥ ओर श्रीवल्लभाष्टकमें कहेहें “ अज्ञानांधकारप्रशमनपटुताख्यापनाय त्रिलोक्याममित्वं वर्णितं ते कविभिरपि सदा वस्तुतः कृष्ण एव ” (त्रिलोकीमें अज्ञानादिक जो अंधकार ताकी शांतिमें चातुर्य प्रसिद्ध करिवेके अथ आपको अमित्व कविनें वर्णितहे परंतु सदा वस्तुतासों आप श्रीकृष्णहीहो) ऐसे श्रीआचार्यजीमहाप्रभुजीके स्वरूपकों जानिकें सर्वदा इनको आश्रय करनो ॥ १३ ॥

इति श्रीहरिरायजीविरचितं रसात्मक-

भावस्वरूपनिरूपणं समाप्तम् ।